

AD 15, 1J 565, « terrier de Montal »
Transcription intégrale par Monique de La Rocque en 2020

Quelque petites indications pour aider à la compréhension du texte :

- * « **ou** » et « **au** » sont absolument interchangeables, seuls ou en combinaison
- * « **pour** » et « **par** » se disent souvent l'un pour l'autre
- * « **ses** » et « **ces** » également
- * « **si** » est remplacé par « **se** », et « **ni** » est remplacé par « **ne** » et souvent « **qui** » par « **que** »
- * « **aucun** » n'a pas le sens actuel, mais celui de « quelque »
- * « **neantmoing** » n'a pas le sens de notre « néanmoins » actuel, mais celui de « au moins autant » ou « pas moins »
- * « **offecier** (officier) » a ici le sens ancien d' « homme chargé d'un office, serviteur domestique », alors que les officiers de justice (policiers) sont appelés « **sergents** »
- * « **excecuter un homme** » ne veut pas dire le tuer, mais le traîner en justice pour l'obliger à obéir
- * quelques mots figurent parfois sous leur forme latine : « **sunt** » pour « sont », ou partiellement : « **tennent** » pour « tiennent », « **virtu** » pour « vertu », « **posside** » pour « possède » ou « posséda ».
- * Pour le reste, se fier à la phonétique !
- * Les abréviations ont été déployées dans l'orthographe rencontrée dans le texte là où les mots n'étaient pas abrégés.

Cy s'ensuyent les productions dez lectres documens et instrumens et aussi l'effet et substance qu'elles contiennent produys par discret homme Vidal Audebal procureur de noble et puissant seigneur Amalry de Mont Ault seigneur et baron de La Roquebraou, de Poul, de Glénat, de Saint Victeur, de Mallemort et de la ville de Brive, devient moy Jehan de Pouzols licencié en loys, commissere par auctorité royalle à ce dépputé par lez lectres royaulx de ma commission, et de noble et sage home Mosseigneur le viguier de Figac, commissere principal à ce député par icelles lectres desquelles la teneur est cy dessoubz insérée, afin de prouver l'entention dudit de Mont Ault de et sur le contenu esdites lectres, et aussi devient discrettes personnes maistres Blayse de Melle et Anthoyne Blanchier clers et notayres royaulx, à l'encontre dez hommes et subgez¹ dudit de Montault apellans.

Et aussi amprès s'ensuyent lez depositions dez tesmoins par devient moy commissere et par le procureur à prouver l'intention que dessus, prouduyt lez jours que dessoubz, lesquels tesmoins ont juré sur saints evngilles Dieu dire et deppouser vérité de ce qu'ils sceront de ladicte intention et dont ilz seront interrogés ; et lesquels tesmoins aussi amprès leurdit serement ont esté interrougez et examinés par moy commissere dessusdit par vertu d'iceux seremens, et ont dit et depposé secretement singulièrement et particulièrement l'ung amprès l'autre devient moy et lez notayres dessusdiz sur ladicte intention plus à plain contenue ez fays et articles aussi de et sur le contenu esdites lectres desquelx la teneur aussi est cy dessoubz scripte comme en leur depositions se contient et les jours que dessoubz.

Cy s'ensuyt la teneur desdites lettres de commission

Charles par la grâce de Dieu Roy de France ; à noz Seneschal de Rouvergue bayli de Gevaldan et viguier de Figac ou a leurs lieutenant salut. L'umble suplication de notre bien amé Amalry de Mont Ault escuyer seinheur de La Roquebraou de Malemort et de Brive, et nostre bayli dez montainhes d'Auvergne avons receu contenant que à cause de sadicte seigneurie de La Roquebrau qui est belle, ancienne et notable baronie, et en laquelle ledit supliant a toute justice et juridiction haulte et moyenne et basse sur ses hommes et subgez et ce qui en dépent et peut

¹ sujets

deppendre, iceluy supliant a pluseurs hommes vassaulx tenens de luy noblement et autrement, les aucuns² desquels tiennent de luy à foy et houmaige et les autres qui sunt gens serfz et de service condition à cens, rentes et autres drois et devoirs de servitude ; sur lesquels hommes serfs ledit supliant a pluseurs beaux droys et devoirs³ de servitude, et envers les autres a droit et est en bonne possession et saysine icelluy supliant de mectre et asseoir et prendre et percevoir sur lesdis homes et subgez d'icelle baronie ou aucuns particuliers d'icelle unne taille une foyes en l'an à ses playsir et voulenté, et luy sunt tenuz iceux ses homes serfs fayre

Page 2 = folio 1 verso

et payer pluseurs courvées et manevres de corps et de beufx en certaynes saysons de l'an aussi à ses playsir et voulenté. Desquels drois et devoirs de servitude ledit suppliant a, sur sesdis hommes et subges, joÿ⁴ et usé playnement et paysiblement par dix, vint, trente, quarente, cinquante, sixante, cent, deux cens ans et plus, quoi que soit par tel et si lonc tamps qu'il n'est memoire du comancement ne du contrayre. Et jusques à plus n'a guères que sesdis hommes et subgiez serfz qui lui sont tenuz fere et payer lesdis drois de servitude ont cessé, contredit et reffusé, cessent, contredient et reffusent par chacung jour de fayre et payer audit supliant sesdictes taillez et courvées, manevres de corps et de beufz et autres drois de servitude, et qui plus est iceux hommes et subgiez, pour eux cuyder⁵ exempter desdis⁶ drois de servitude deus⁷ audit supliant, ont interjecté, ou lez aucuns d'eux, certaynes appellations dudit suppliant et de ses officiers⁸ et icelles tellement quellement relevées en nostre court de parlement, où elles pendent encore indésises. Et soubz umbre desdites appellations n'ont voulu ne veulent payer audit suppliant sesdis drois de servitude qui est l'unne partie dez revennuez dudit suppliant, et dont il doit soustenir son estat, et n'en amende plus aucunement, au trèsgrant grief, prejudice et dommaige dudit suppliant, et pourroit encores plus estre se par nous ne luy estoit sur ce pourveu de nostre grace et remède convenable, si comme il dit requerent humblement iceux ; pour quoy nous, ces chouses considérées, qui ne voulons ledit suppliant par le moyen de telles appellations frivoles interjectées par sesdis hommes et subgiez estre empesché en sesdis drois de servitude, mais d'iceulx le fere joÿr ainsi que raison est, vous mandons, et pour ce que vous estes nous plus prouchains juges des parties à qui ce pourra toucher par quoy plus tost et à moindres fraiz savoir la vérité de ceste matière commectons et à chacun de vous sur ce requis, que s'il vous appert desdis drois de servitude dudit suppliant et que icelluy suppliant et ses prédecesseurs en ayent d'ancienneté joÿ et usé, et que ledit suppliant en feust joÿssant au temps desdis proucès encoumancés, et desdites appellations interjectées, et par avant vous non obstant icelles appellations et les procez sur ce pendens en nostre court de Parlement ait sur ce autrement esté ordonné ledit suppliant joÿr et user de sesdis drois de servitude tout ainsi et par la fourme et manière qu'il en joÿssoit au temps desdites appellations interjectées et desdis procez encoumancés, en contraignant ou faysant contraindre ceux qui pour ce seront à contraindre par toutes voyez deues et raysonnables, car ainsi nous plaist-il estre fait, et audit

page 3 = folio 2 recto

suppliant l'avons octroyé et octroyons de grace spécial par ces présentes, non obstant quelxconques lectres subreptices impétrées ou à impétrer à ce contrayres, mandons et commandons à tous noz justiciers officiers et subgez que à vous et chacun de vous et à vous commis et députez en ce faissant obéissent et entendent diligemment. Donné à Chinon le pénultième jour de jullet l'an de grace mil quatre cens quarente et neuf, et de nostre règne le vint et septiesme, ainsi signées par le Roy, à la relation du conseil par Aude.

Collation a esté fecte avec l'oreginal desdites lectres

Signatures : Blasius de Melh

A. Blanchié

² « Aucun » a ici son sens originel qui est celui du mot latin « aliquis » = quelqu'un, quelque. D'ailleurs les gens de nos campgnes disent « pas aucun »

³ « Devoir » a ici le sens du mot de latin médiéval « deverium » = redevance

⁴ « joy », prononcer « jo-i » Pour « joui » c'est-à-dire « a eu la jouissance desdis drois »

⁵ « eux cuyder exempter » = se croire exempté, se considérer comme exempté, croire qu'il pouvaient s'exempter

⁶ Lorsque « lesdits », « desdits » et « sesdits » sont abrégés dans l'original, nous prenons le parti de les développer sans mettre le « t » devant le « s » final, comme le notaire l'a fait dans l'Item XXXIII

⁷ Deus = dus. Comme cela se pratiquait longtemps après encore, les terminaisons en « u » sont toutes en « eu » (Vu=veu, etc)

⁸ « officier » désignait au Moyen-âge une personne pourvue d'une charge, un serviteur domestique, un agent domanial (Dictionnaire Ethymologisue Robert)

Cy s'ensuyt la teneur desdites lettres de commission octroyée
par ledit Mosseigneur le viguier commissere principal comme
dit est par lesdictes lectres royaulx dessus insérées

Ludovicus d'Anjohani dominus de Tornemire scutifer scutiferie domini nostri francie Regis ejusque vicarius ville et vicarie Figeaci ac ressorti ejusdem, commissariusque in hac parte auctoritate regia specialiter deputatus honorabilibus viris dominis Johanni de Pozolibus licenciato in decretis

et Johanni La Broa ville Aureliaci salutem. Literas nostre commissionis regias in pargameno scriptas cera crocea impendentia sigillatas, datas apud Caynonem, die penultima mensis julii anno presenti, ut in meis legitur et aparam, pro parte nobilis et potenti viri Amalricy de Monte Alto domini de Rupebraoue de Malamorte et de Briva baylivique montanorum arvernien pro dicto domino nostro Rege ipsarum literarum regiarum impetrantis quibus hec nostre presentes sub sigillo regio ressorti dicte nostre vicarie alligantur nobis presentatas recepisse noveritis reverenter post

quarumquidem literarum presentationem et receptionem fuimus pro eadem parte dicti domini impetrantis instanter requisiti ut illas executioni demandare haberemus. Cumque pro nunc aliis arduis negotiis tam regiis quam nostris propriis occupati hoc facere nequeamus⁹ neque executioni

earumdem intendere. Igitur nolentes occupationem nostram dicto domino impetrante neque ejus jure fore prejudicabilem nec dampnosam confidentes ad plenum de vestris scientia industria et probitate vos et quemlibet vestrum insolidum ad dictas hujusmodi literas regias exequendas et executioni debite demandandas fecimus constituimus et ordinavimus facimusque constituimus

et ordinamus tenore presentium locumtenente nostro vobisque et cuilibet vestrum insolidum in hac parte commisimus acque commictimus omnino vices nostras. Datum Figiaci sub dicto sigillo regio ressorti dicte vicarie in absentia nostri proprii die septima mensis novembris anno domini millesimo quadringentesimo

Page 4 = folio 2v

quadragésimo nono sic signatum de subtus de mandato dicti domini vicarii lcumbas notarius regius. Collation a esté faite avec l'original de ladicte commission.

Signatures : Blasius de Melh

A.Blancherii

Cy s'ensuyt la teneur desdis articles baillez par ledit seigneur
de Mont Ault ou sondit procureur

Cy s'ensuyt ce que noble et puissant seigneur Amalry de Mont Ault seigneur et baron des baronies chastellenies et seigneuries de La Roquebraou de Malemort de Poul de Saint Victeur de Glénat et autres dit et propouse devant vous honorable et saige homme maistre Jehan de Pozols licencié en loys commissere en ceste partie expressément depputé pour le Roy nostre seigneur et par vertu dez lectres royales à l'encontre de Jehan de Besses, Géraud du Mas, Jehan Robbert, Thomas du Claux Magiran, Pierre de Ugoliis et Jehan de Ugols, et autres appelans et à ce adhérans à la noble court de parlement dudit seigneur et de ses officiers à cause dez taillez et autres servitutes esquelle lesdis appelans et adhérans sunt tenuz audit seigneur dont cy amprès sera plus expressément déclaré et affin que icellez lectres de vostre commission royales soyent par vous excecutes selon leur fourme et teneur contre lesdis appelans et adhérans et à toutes autres bonnes et deues fins audit seigneur approuffitables, protestant toutesfoys que ledit seigneur n'entend rien à dire que soit en son préjudice.

I Et premièrement est vray que audit seigneur entre autres terres et seigneuries appertienent les baronies de La Roquebraou, chastellenies places et seigneuries de Poul, de Saint Victeur et de Glénat au diocèse de Saint Flour.

II Item et que lesdictes terres et seigneuries chastellenies ont au temps jadis esté de la terre et hostel de Mont Ault et néantmoi[n]s plusieurs autre appertenoyent à ung seigneur c'est assavoir de Montalt.

III Item et que oudit lieu de La Roquebraou ledit seigneur a et luy appertient son chastel dudit lieu lequel est mout bel et fourte place dont, que Dieu ne veuille, s'il estoit prins par les enemis à grand payne le pourroit-on recouvrer¹⁰.

⁹ Nequeamus est la 1^{ère} personne pluriel subjonctif présent du verbe « nequeo,-is,-ivi,-itum,-ire »= ne pas pouvoir

¹⁰ Cette phrase est citée dans le DHSC avec la date de 1449 mais pas la source, qui est donc ici

IIII Item et que ledit lieu et chastel de La Roquebraou est mout ancienne baronie et chastellenie, et aussi lesdis lieux et places de Saint Victeur, de Glénat et de Poul sunt anciennes seigneuries et chastellenies qui ont acoustumé avoir de toute ancienneté c'est assavoir : ladicte seigneurie et chastel de La Roquebraou tous les drois et préheminences et préregatives de baronie et de chastellenie, et les autres terres seigneuries et lieux que dessus de chastellenie.

Page 5 = folio 3r

V Item et que ledit seigneur à cause desdictes baronie terres chastellenies et seigneuries a pluseurs hommes subgetz et vassaulx tenens et qui ont accoustumé à tenir de luy et de sesdictes seigneuries pluseurs vilaiges bourderies héritaiges affasions terres et possessions mouvans et tenens desdites baronie terres et seigneuries, sur lesquelz il a lez préheminences et prérogatives que dessus.

VI Item entre les autres drois préheminences et prérogatives audit seigneur appartenens en sesdis chasteux terres et seigneuries il a et ses prédécesseurs ont acoustumé avoir et tenir toute juridiction aulte basse et moyenne et mère et mist impere sur sesdis hommes et subgez et esdis vilaiges et autres terres et possessions que dessus mouvans et tenuz de luy et de cesdictes seigneuries.

VII Item et aussi luy sunt tenuz lesdis hommes et subgetz à cause desdis vilaiges affasions borderies héritaiges et autres possessions qu'ilz tiennent de luy en pluseurs cens rentes annuelles de blé, d'argent et de polailhez, de motons et charnalaiges et autres.

VIII Item et aussi lesdis hommes et leurs prédécesseurs ont acoustumé et sunt tenuz audit seigneur et à ses prédécesseurs à cause desdictes seigneuries et vilaiges leur fere et payer pluseurs services et servitus, lesquelles iceux hommes et leurs prédécesseurs ont acoustumé de toute ancienneté à cause de leursdits vilaiges et autres possessions que dessus fere et payer audit seigneur et à ses prédécesseurs à cause desdites seigneuries.

IX Item et entre les autres drois servitus et servaiges ez quelz lesdis apellans sunt tenus doyvent et ont acoustumé fere comme dit est le service servitut et servaige de guet de nuyt et de jour tant audit chastel de La Roquebraou que es autres lieux et places de ladicte baronie et dudit seigneur ou playsir et volenté d'icelluy seigneur et de ses capitaynes desdites places pour garde tencion et deffence d'icelles places et lieux et dudit seigneur.

X Item aussi plus entre les autres drois franchises et devoirs que ledit seigneur a sur sesdis hommes appellans et adhérans et autres desdites baronie et terres a droit et devoir de percevoir d'iceulx hommes les rentes, cens et revenus annuelz esquelz ilz luy sunt tenuz en monoye et deniers à la valeur de bonne et fourte monoye franc d'or de bon or et

Page 6 = folio 3v

du poys de trois deniers¹¹ d'or estant en la valeur de vint soulx tournoys de ladicte monoye et lez checuns vint soulx de ladicte rente et prins pour vint soulx tournoys de ladicte fourte monoye tant seulement et payés monoye en monnoye courant avaluée à ladicte fourte monoye¹².

XI Item est vray que lesdis hommes ou leurs prédécesseurs avoyent heus et investus lesdis vilaiges des seigneuries qui ont esté dessusdictes seigneuries et de Montal par avant que lesdis franc d'or eussent cours en cest royaume, par lequel temps courroit meilleur monnoye que desdis franc et à leur valeur et par nul changement de monnoye n'ont acru¹³ iceulx hommes ne amoindré¹⁴ eulx ne leurs prédécesseurs leursdites rentes de deniers en plus grande somme.

¹¹ Le denier n'est pas seulement une unité de monnaie, c'est aussi une unité de masse datant du XIIIème siècle, équivalent à 1,2748 g, 3 deniers font donc 3,8244 g.

¹² Le Franc d'or créé en 1360 pesait 3,88 g d'or à 24 carats (or pur) et valait une livre tournois donc 20 sous. Sous Charles VI (1380 à 1422) fut créé l'écu d'or à la couronne, qui contenait 3,95 g d'or et valait 22 sous tournois. L'écu d'or de Charles VII (1422 à 1461) ne pesait plus que 3,47 g.

¹³ accru

¹⁴ Ni amoindri

XII Item et mesmement ce que dit est a lieu pource que lesdictes terres et seigneuries et vilaiges sont assis en pays de droit script¹⁵.

XIII Item plus outre lesdis drois services servitus et devoirs a droit et devoir de fere porter et payer à sesdis hommes de sesdictes baronie terres et seigneuries cesdis cens rentes revenues tant de blé d'avoyne d'argent de gelines et autres audit seigneur ou son recevoir¹⁶ en sadicte place de La Roquebraou ou à sesdictes autres terres et places où il feroit sa demeure.

XIII Item et plus et outre lesdis drois et servitudes a ledit seigneur droit et devoir sur sesdis hommes qu'ilz luy sont tenuz en servitut et servaige et service de luy appourter ou fere appourter tout le boys qui luy est necessaire pour tout son chauffaige en sondit chastel de La Roquebraou ou en icelle de sesdictes autres places et seigneuries où il feroit sa demeure.

XVI Item et pareillement outre lesdis drois a ledit seigneur de Mont Ault droit et devoir à servitut servaige et service sur sesd hommes que iceux que iceux hommes luy doivent et sont tenuz fere manevres de leurs corps et de leurs beufs avec les charrois pour la reparation et ediffication de sesd places et autrement autres exploix à sa volenté pour son service toutes quantes foys bon ou expédient luy est.

XVII Item et semblablement outre lesdis drois et devoirs a plus ledit seigneur droit et devoir sur sesdis hommes c'est assavoir de servitut servaige et service que il peut et a accoustumé impouser et indire¹⁷ à tous cesdis hommes une taille et subside ung checun an de tiel somme que bon luy semble et icelle distribuer esgalée et divise la exiger lever et percevoir et à icelle payer contraindre et compeller par

Page 7 = folio 4r

toutes voyes et manières deues et raysonnables sesdis hommes par ses juges et autres officiers.

XVIII Item neantmois¹⁸ outre lesdis drois et devoirs a ledit seigneur droit et devoir sur sesdis hommes c'est assavoir que iceux ses hommes luy sont tenuz fere servitut service et servaige de foucher et semer et porter le foin de ses prés de sesdictes baronie et chastellenies et en lez granges ou en houstel dudit seigneur là où bon luy semble.

XIX Item et pour plus ample évidence desd drois et devoirs fait à présupposer et est vray que lesdis hommes ne sont tenuz audit seigneur que en bien peu de rentes et leurs vilaiges et affasions qu'ilz tiennent de luy ne sont guieres chargez de rentes et sont beaulx et grans vilaiges ayans plusieurs et amples possessions et dependences et par ainsi n'est il pas inconvenient s'ilz sont tenuz audit seigneur fere lez autres services servitus et charges que dessus.

XX Item et aussi fait-il à présupposer et est vray que tant audit pays dez montaignes d'Auvergne que Lymosin et Quercin circumvoysins sont plusieurs seigneurs ayant plusieurs et diverses autres leurs seigneuries et chastellenies voisines de ladicte baronie et dez autres places

dudit seigneur qui ont plusieurs hommes et subgez tenens desdictes seigneuries comme le viconte de Murat la viconté de Carlat la chastellenie de Vieulxchamps¹⁹ et baronnie de Carbonières et autres qui ont tiennent et parcoivent et ont acoustumé avoir lever et percevoir sur leursdits hommes et subgez tenens d'eux pareilx semblables drois comme ledit seigneur et comme dessus est dit.

XXI Item et plus outre tout ce que dit est fait à présupposer que led seigneur à cause desd baronnie et autres ses terres et seigneuries a plusieurs vassaulx gentilz hommes et autres tenens de luy en fiez noble plusieurs vilaigez en ladicte baronnie de La Roquebraou et autres sesdictes seigneuries et chastellenies, lesquelz vassaulx ont et parcoivent et ont acoustumé avoir et percevoir de leurs hommes paiges²⁰ et rousturiez tenens d'eux lesdis vilaiges

¹⁵ Droit écrit, par opposition au droit coutumier

¹⁶ receveur

¹⁷ Terme de droit féodal : indire= doubler certaines impositions féodales, dans certains cas déterminés (en général les « quatre cas » bien connus), mais dans ce texte il semble synonyme de « imposer »

¹⁸ Néanmoins a dans tout le texte le sens de « il n'en est pas moins vrai que », « tout autant »

¹⁹ Viescamps

²⁰ Paiges = pagès = emphytéotes ou paysans

qui en fieu²¹ sunt tenuz dudit seigneur pareilles et semblables drois et devoirs comme dessus est dit icelluy seigneur avoir sur sesdis hommes.

XXII Item et aussi les habitans dudit lieu de La Roquebraou qui est le leur chief principal de ladicte baronnie et dont lesdis habitans n'ont et ne avoyent si amplement dez terres pasturaulx prés et autres possessions à cause dudit lieu que ont lesdis autres ses hommes d'icelle baronie furent affranchis des prédecesseurs dudit seigneur de pareils et semblables services servitus et devoirs que dessus est dit.

Page 8 = folio 4v

XXIII Item or n'est-il pas vraysemblable que ledit seigneur ait moindres drois et devoirs sur sesdis hommes que les autres seinheurs ses voysins ont sur les leurs, ne aussi que sesdis vassaulx ont sur les leursdits hommes dont leurs vilaiges sont tenus en fieu noble dudit seigneur comme dit est ne aussi que souloit avoir anciennement sur lesdis habitans dudit lieu de La Roquebraou ; et n'ont iceulx hommes appelans adhérens et autres aucune rayson par laquelle ilz puyssent prétendre diversité de eulx aux autres hommes desdis vassaulx et autres voysins que dessus.

XXIII Item toutes quantes foyes le cas advient que aucun des paiges et rousturiers tenens desdis vassaulx les vilaiges sers de ladicte baronnie ou autres terres que dessus dudit seigneur affranchissent iceulx vilaiges desdis servitus servaiges et services desdis vassaulx fault il appres ledit achapt qu'ilz soyent investus dudit seigneur et louvés et ainsi l'ont ilz acoustumé à fere.

XXV Item et par ce que dit est appert évidemment que lesdis hommes appelans adhérens et autres subgiés et tenens dudit seinheur luy sont tenus fayre et payer et rendre lesdis servitus servaiges services et drois et devoirs à cause de leursdis vilaiges qu'ilz tiennent de luy esdites ses baronie chastellenies et seinheuries.

XXVI Item et outre ce que dit est appert appert plus évidemment iceux drois devoirs servitus services et servaiges estre deus par lesdis hommes à leurdit seigneur en ce c'est assavoir que lesdis hommes ont exprimé en leurs vestisons documens et lextres qu'ils ont de leursdits vilaiges qu'ilz sont tenus fayre payer et rendre audit seigneur et ses successeurs à cause desdis vilaiges icelles tailles servitus services servaiges drois et devoirs acoustumés.

XXVII Item aussi ledit seigneur tant par luy que par ses prédecesseurs a esté et est en bonne possession et saysine de sesdis drois et devoirs seigneuraulx à cause de sesdictes baronie chastellenies places et seigneuries de toute ancienneté c'est ascavoir de lever percevoir et exiger avoir et recouvrer de sesdis hommes et leurs prédecesseurs à cause de lesdis vilaiges et autres terres et possessions qu'ilz tiennent de luy lesdis servitus servaiges services drois et devoirs.

XXVIII Item et aussi plus ledit seigneur est et a esté en bonne possession et saysine tant par luy que par sesdis prédecesseurs dont il a cause et de toute ancienneté de contraindre et fere contraindre par ses juges et autre officiers et serviteurs et par toutes voyes et manières deues et raysonnables sesdis hommes appelans adhérens et autres et leurs prédecesseurs à luy payer

Page 9 = folio 5r

et fere rendre lesdis servitus servaiges services et autre drois et devoirs ainsi que dessus est plus amplement dit et déclaré.

XXIX Item et que ledit seigneur tant par luy que par ses prédecesseurs a joÿ et usé de sesdis drois et devoirs seigneuraulx et iceux percevoir franchement et libéramment aussi que dessus est dit et déclaré et de la possession et saysine d'iceux de toute ancienneté et par tiel et si lonc temps qu'il n'est memoire du contrayre ne du commencement pacifiquement et quiètement sans nul débat ne contrediction jusques au temps que lesdis hommes interjectèrent leur appellation dudit seigneur à cause d'iceux servitus servaiges services et autres drois et devoirs.

XXX Item non obstant tout ce que dit est estant ledit seigneur en sesdictes possession et saysine pacifique et quiète de lever exhiger prandre et percevoir lesdis servitus services servaiges et autres drois et devoirs que dessus de sesdis hommes et d'iceux joÿr et user comme dessus est dit lesdis Jehan de Bessa²², Géraud du Mas²³, Jehan de

²¹ Fieu = fief

²² Besse, paroisse d'Ytrac

²³ Le Mas, paroisse d'Espinadel (commune de Glénat)

Robbert²⁴, Thomas du Claux Magiran²⁵, Pierre, Pierre, et Jean de Utgols²⁶ appelèrent dudit seigneur et de ses officiers à cause desdis drois servitus servaiges services et autres devoirs et affin de empescher en iceux ledit seigneur et en ses possessions et saysine que dessus sans cause juste et raysonnable qu'ilz heussent de appeler et sens nul grief ne tort que en iceulx ledit seigneur ne ses officiers ne leur avoyent fayt.

XXXI Item et amprès ladicte appellation ainsi que dessus dit est interjectée sans grief ne tort et sens cause ne sen rayson mais malicieusement par les dessusdites appellations ainsi ensuyvent la malice d'iceulx appellans adherirent à icelle appellation Guillaume de Longuière²⁷, Jehan Serny, Pierre Chassaig, Jehan autrement Jehannot du Mas de Bourdes²⁸, Pierre de Sauvaignac²⁹, Pierre de Lachens³⁰, Géraud de Preignac³¹, Michel d'Escoubeyron³², Rigaud de Preignac, Jehan de Montcanin³³, Pierre Reygades³⁴, Jehan de Montcanin, Pierre du Mas, Jehan La Lemozenie³⁵, Pierre Roudier³⁶, Pierre La Broe³⁷, Hugon des Cazaulx³⁸, Géraud de Barascon³⁹, Bernard de Laybraydie⁴⁰, Durand de Palach⁴¹, Géraud d'Espinet⁴², Durand d'Espinet, Pierre d'Espinet, Pierre de Monmiala⁴³, Jehan de Palach, Jehan de Recoules⁴⁴, Marc de La Serra⁴⁵, Jehan de Braconnat⁴⁶, Jehan de Chaudes Maysons⁴⁷, Jehan d'Espinet, Jehan de Mourel⁴⁸, Olivon de Codex⁴⁹, Béguon du Mespoulier⁵⁰, Géraud de Mont Agut⁵¹, Jehan de Vieyre⁵², Durand de Lerm⁵³, Géraud d'Espinadelh⁵⁴, Pierre de Mourel et Jehan de Palach.

XXXII Item et que toux lesdis appellans et adhérens sunt hommes subgiez et tenens leurs vilaiges fasions héritaiges et possessions dudit seigneur en sadicte baronie chastellenie et seigneurie que dessus.

Page 10= folio 5v

XXXIII Item et que entre les aultres hommes et subgiez dudit seigneur lesdis appellans et adérans et leurs predecesseurs à cause desdis villaiges possessions et faysions qu'ilz tiennent de luy et ont tenu de leurs predecesseurs lesdis servitus servaiges services et aultres drois et devoirs que dessus ainssi que dessus est dit⁵⁵.

²⁴ Robert, paroisse de Chaussenac ?

²⁵ Clamagirand, paroisse d'Espinadel (commune de Glénat)

²⁶ Uzols, paroisse de Saint Santin Cantalès

²⁷ Longueyrès, paroisse de Nieudan

²⁸ Las Bordes, paroisse de Siran ?

²⁹ Salvanhac, paroisse de Siran

³⁰ Lachens, paroisse de Siran

³¹ Preignat, paroisse de Nieudan

³² Escoubeyroux, paroisse de Siran

³³ Montcani, paroisse de Siran (en latin Monte Canino)

³⁴ Reygade, paroisse de Siran

³⁵ Lasmoisines, paroisse de Siran

³⁶ Le Roudier, paroisse de Siran

³⁷ Labro, paroisse de Siran (ou celui de Glénat ?)

³⁸ Escazals, paroisse de Siran

³⁹ Le Brascou, paroisse de Siran

⁴⁰ Lasbrairies, paroisse de Siran

⁴¹ Palat, paroisse de Saint Gérons

⁴² Espinet, paroisse de Saint Gérons

⁴³ Monmiolle, paroisse de Saint Gérons

⁴⁴ Recoules, paroisse de Glénat

⁴⁵ La Serre, paroisse de Glénat

⁴⁶ Braconat, paroisse de Pers

⁴⁷ Caldemaïsons, paroisse de Siran

⁴⁸ Le Maurel, paroisse de Saint Gérons

⁴⁹ Couderc, paroisse de La Roquebraou

⁵⁰ Mespoulhes, paroisse de Bou, commune de La Roquebraou

⁵¹ Montagut, paroisse de Siran

⁵² Vieyre, paroisse de Comiac, Lot

⁵³ Lherm, paroisse de Lamativie, Lot

⁵⁴ Espinadel, ancienne paroisse, commune de Glénat

⁵⁵ Visiblement il manque quelque chose à cette phrase... telle qu'elle est le sens n'apparait pas

Par lesquelles couses conclud ledit seigneur contre lesdis appellans et adhérens et checun d'eux et les houeurs⁵⁶ et successeurs se aucun y en a et demende par Vous mondit seigneur Le Commissere ou de voustre mandement et par vertu de voustre dicte commission royalle lesdis appellans et adérans et checun d'eux et autres leurs houeurs et successeurs estre contraignis et par ordonnance payer fere et rendre oudit seigneur lesdis servitus servaiges et services aultres drois et devoirs que dessus ainsi que dessus est dit et déclaré sens préjudice desdites appellations et aultres fectes ou affaire. Et advenent iceulx appellans ou adérens ou aucun d'eux appeler de rechef et icellez non obstant par manière de provision et jusques à ce que par la court de parlement aultrement en soit ordonné ainsi que par lesdictes lectres royalles de commission est mandé et proutesté Toutesfoys ledit seigneur qu'il ne soit tenu à prouver superflument toutes lez chouses dessusdictes mais tant seulement ce que luy sera neccessaire à obtenir la conclusion exequution et intermation desdictes lectres. Et aultrement en tout requier et suplie par vous sur ce que dit est droit et justice luy estre administrée.

Collation a esté faicte avec l'original desdis articles

signatures des deux notaires

Page 11 = folio 6r

Item et amprès le troixiesme jour du moys de mars l'an de l'incarnation noustre seigneur mil quactre cens quarente neuf ledit Vidal proucurer dessusdit prouduysit par devient moy commissere que dessus et en la presence desdis notaires certaynes et pluseurs lectres et papiers estans dedens ung sac de toelle pour prouver l'intention de sondit maistre et le contenu esdictes

lectres de commission en tent c'est ascavoir que icelles lectres et papiers font et faysoient pour l'intention et proupos d'icelluy seigneur de Montault et en tent qu'il en pouvoit optenir et avoir lez fins et execcution d'icelles lectres de commission et en tent que en icelluy sac auroit aulcunnes lectres et instrumens qui ne feroient pas pour ladicte intention et proupos de sondit maistre ou feroient en aucune manière contre luy et actendu qu'il est homme lay⁵⁷ et que ledit seigneur de Montault son maistre n'estoit present au pays prouteste ledit procureur qu'il n'entendoyt prouduyre aucunes d'icellez lectres ne papiers ne aucun d'eux senon seulement et en tent qu'ilz feroient pour icelluy son maistre comme dessus est dit les avoit pour prouduytes et en tent que elles ne feroient pour luy ou par aventure en y auroit de telles qui feroient contre luy les eut et avoit selon qu'il prouteste pour non prouduytes desquelles lectres et papiers prouduys faisans audit proupos la substance ou effet s'ensuyt pour ce que sont icelles lectres papiers tiltres et documens obmis d'estre inserées ou present proucès c'est ascavoir leur toutelle teneur pour la grant confusion multitude et prolixité d'elles.

Et **premièrement** en icelluy sac entre les aultres lectres papiers et documens y avoit ung petit papier ancien en quactre script de lecture bien ancienne où est enregistré et scripture une taillée qui commance ainsi : « Anno domini millesimo ccc^{mo} vicesimo die martis ante festum Beati Stisti⁵⁸ sunt les taillades de B de Montal primo a Aletz⁵⁹ », à laquelle taillée

Page 12 = folio 6v

a de tailhe sur pluseurs hommes et vilaiges illec nompmés la somme de trente quactre livres selon qu'est script à la fin d'icelle taillée.

Item amprès en ung autre feuillet ensuyvent audit papier est contenue unne autre talhée qui encoumamce « a la terre de Glenat de taihada etc » et à la fin de ladicte taillée est script « somme XII livres ».

Item en icelluy mesme feuillet et en la seconde paige est scripture unautre taillée qui encoumamce « ela baylie del Quier⁶⁰ de tailhade a Teulet usque etc » et tient icelle taillée ladicte seconde paige dudit feuillet et tout ung autre feuillet ensuyvent et unne partie de la première paige d'u[n]g autre feuillet sur pluseurs vilaiges et hommes illec expressement nompmés et est script à la fin d'icelle taillée « soma six vins quinze livres et dix soulx ».

⁵⁶ Sans doute pour « hoirs » = héritiers ; on pourrait transcrire « honeurs », mais cela n'a aucun sens

⁵⁷ « lai », mot d'ancien français = laïc, homme peu instruit, ici sans doute par opposition à clerc

⁵⁸ Peut-être Saint Titien, évêque de Breschia, fêté le 3 mars

⁵⁹ Aleix, paroisse de Saint Victor

⁶⁰ Le Quier, commune de Teissière de Cornet

Item en la second paige d'icelluy feuillet est scripte unautre tailhée dez hommes et sommes et vilaiges illec expressément nompmés en commansent « La baylie de Poul etc » et est script en icelle tailhée « somme quinze livres ».

Item en ung autre fueillet ensuyvent est scripte unautre tailhée que tient tout ledit feuillet et la moytié de la première paige de l'autre emprès ansuyvent sur pluseurs hommes et vilaiges illec nommés et commanse icelle tailhée « la baylie de Carbonières » et est script à la fin de ladicte tailhée « somme quactre vins sept livres quactre soux ».

Item unne autre tailhée en ung autre fueillet ensuyvent que tient tout ledit fueillet et la moytié de la première paige de l'autre fueillet en suyvent sur les hommes et vilaiges illec expressément nommés qui encoumamse « La tailhade de La Roque » et est script à la fin de ladicte tailhée « somme quactre vins livres quinze soux ».

Item ung autre petit papier de lectre ancienne script en fourme de petit livre où estoit scripte unne tailhée sur pluseurs vilaiges illec nompmés encoumamsent « tallia Rupisbrou ».

Item aussi en icelluy mesme papier unautre tailhée sur certains vilaiges illec nommés encoumamsent « tallia baylivie del Quier ».

Item unautre papier de grant fourme couvert de peau rouge ung grand fuelh plié en quactre fueils de papier script de lectre ancienne où avoit pluseurs registres de taillez selon qu'il aparoit. Et premièrement ung registre commansent ainsi « sequitur census denariorum baillie

Page 13 = folio 7r

de Carboneriis prout levabantur anno domini millesimo trescentesimo tricesimo nono primo igitur de talliis delz porcz etc »

Item en icelluy mesme papier avoit unautre registre de taillez en ung autre fueillet encoumamsent « Talha baylivie del Quier porcus etc »

Item en icelluy papier avoit ung autre registre de taillez en ung autre fueil enconnansent « Incipit de redditus quas debet levare baiulus Sancti Santini tallia Rupisbrou porcus etc ».

Item en icelluy papier en la seconde paige de l'autre fueillet avoit ung autre registre de tailles encoumamsent « Talha baylivie del Quier porcus etc ».

Item et oultre en icelluy avoit unautre registre de taillez en la première paige d'un autre fueillet encoumamsent « talha baylivie de Pol porcus etc ».

Item un autre papier de fuels de papier en petite fourme pliés en quactre feuilles ou avoit douze feuilles cousus et à la première paige de duernire feuillet comansoit ainsi « So que you Gaspars ay mandat a pagar per mosseignour per la talhada que fu facha l'an mil quactre cens et quactre et premieyrament ay mandat a Anthony de Pouzols etc »

Item certaynes lectres et proucez fays et meuz selon que appert de prime face entre le prieur dez Chalmelhz⁶¹ de l'ordre de Saint Augustin demandeur et contre feu noble et puysent seigneur Messire Géraud de Mont Ault seigneur de La Roquebraou et de Carbonieres et autres deffandeurs

en matiere de prez, le quel papier est script en papier de lectre ancienne et feut meü environ l'an mil troys cens et quarente en la court de parlement auquel proucez furent baillez pardevent certains commisseres d'icelle cour par la partie dudit prieur demandeur certains repprouches contre les tesmoigs que ledit de Mont Ault deffandeur avoit prouduys en icelle cause et entre autres chouses repprouchoit icelluy prieur contre Bernard de Rays de Glenat et contre Bernard

de Glenat de La Roquebraou et contre Jean Grangiers de Glenat et contre Marc de Braconat de la Roquebraou, et contre Raymond des Effrus⁶² de Roumegos et contre Bernard Bonore de Glenat et contre Jehan du Serieys de Nioudon⁶³ et contre Bernard Bonnel de la paroisse de Saint Girons⁶⁴ et contre Pierre du Boschattel de ladicte paroisse de Saint Girons et contre Geraud Cregut de Carbonieres tesmoygs prouduys en ladicte cause pour ledit

⁶¹ Escalmels, commune de Saint Saury

⁶² Le Refrus de Roumegoux

⁶³ Le Sériès de Nieudan

⁶⁴ Saint Gérons

chivalier que iceux hommes dessus nommez estoient hommes levans et couchans taillables et exploictables à la voulenté dudit chivalier deffendeur lequel proucez et repprouchez n'estoyent point signés

Page 14 = folio 7v

Item unnes scriptures bailhées en ladicte cause dont dessus est fecte mencion en parchemin et aussi unnes autres en papier semblables scriptes bailhées par la partie dudit chivalier et autres deffendeurs contre ledit prieur demandeur et au sinquiesme et sixiesme articles de celles scriptures metoit en fet ledit chivalier deffendeur que lez habitans et mansionnaires du vilaige de Roudete dont aucuns dient qui est de la parroisse de Ciran⁶⁵ au dioucese de Saint Flour sont hommes qui devoient audit chivalier cens rentes et tailles à sa voulenté non mye signée

Item un roule de parchemin de unne pieça contenant unne tailhe du seigneur de Mont Ault sur aucuns hommes dez parroisses de Cirang de Saint Girons encoumamsent « Cirang set si la tailhada

de Mossenhor de Montal de l'an mial quactre cens et onze Cirang etc » et estoit script en la fin d'icelluy roule « somme LX lyvres XV sols »

Item unne lectre ancienne seellée de douze seaulx de date de l'an mil deux cens nonnente et sept et du dixhuytesme jour d'avril qui estoit le quatorsiesme de calandes de may contenant ung testament de feu Messire **Geraud de Mont Ault** chanoyne et sagrestain⁶⁶ de l'esglise de Mende confirmatoyre de ung autre testament premier dudit feu Messire Geraud de Mont Ault auquel testament icelluy testateur entre autres chouses a ordonné estre donnés pour son ayme trente sestiers de blé dont les aucuns sont assignés sur lez vilaiges de l'Esclause de la paroisse de Champs⁶⁷ et sur le vilaige du Cayre de la paroisse d'Aguoles⁶⁸ et sur le vilaige de La Combe et sur le vilaige de La Vaur et sur le vilaige de La Bastide de la paroisse de Agoules et sur le vilaige de Lescures et sur le vilaige de Mesergue et sur le vilaige de La Combe et sur le vilaige de Layrit de la paroisse de Roffiac⁶⁹ et estoit assignée aucune partie dudit blé sur lesdiz vilaiges à maysure tailhendiere.

Item plus estoit contenu audit testament que ledit testateur ordenoit que son heretier ne peust fere tailhes ou vilaige de Courtz oultre la somme de sixante soulx et ou vilaige de La Boygue oultre la somme de quarente soulx.

Item plus est contenu audit testament que ledit testateur ordenoyt que les cens et autres services acostumés d'aucuns vilaiges qui avoit layssés en son autre premier testament à certaynes viga-

Page 15 = folio 8r

-ries par luy ordonnés lesquelz cens et services ne seroyent leyssés expressement audiz viccaires lez layssoit à feu **Messire Durand** chavalier et **Astorc de Mont Ault**.

Item plus estoit actachée à icelluy testament unne autre petite cedulle en parchemin scellée du seel dudit feu messire **Géraud de Mont Ault** commamsent « Nos Geraldus de Monte Alto sacrista mimatensis etc » en laquelle cedulle est contenu que nonobstant qu'il aist ordonné en sondit testament que son heretier ne puisse fere tailles oultre lesdictes sommes esdits vilaiges de Cortz et de Boygue il veult en icelle cedulle que sondit heretier puyse fere et indire sur lesdis vilaiges oultre lesdictes sommes et estoit icelle cedulle de date ou quatorsiesme dez kalendes de may l'an mil deux cens nonnente sept⁷⁰.

Item unautre lectre de l'offcial⁷¹ de Clermont seellée du seel de la court dudit official contenant troys peaux de parchemin ensemble cousus l'une amprès l'autre contenant ung transcript ou vidimus de deux testemens dudit feu messire **Geraud de Mont Ault** et dudit autre testament dont dessus est fecte mencion et aussi contenant en la darniere peau lez deppousicions de certains tesmoigs faiste sur la averacion dez seaux desdis deux testemens lequel

⁶⁵ Roudettes, paroisse de Siran

⁶⁶ Le sacristain était alors un personnage imprtant dans une église, c'était un religieux chargé de la surveillance du trésor et des archives de l'église.

⁶⁷ Camps en Corrèze, le village de Lesclause n'existe plus

⁶⁸ Le Cayre paroisse de Goulles en Corrèze (Goulles se disait en latin « Agulis ») La Vaur et La Bastide ont disparu

⁶⁹ Rouffiac (seul Leyrits est encore identifiable sur la commune de Rouffiac, Mesergues est maintenant sur celle de Cros, il n'y a plus de village à La Combe)

⁷⁰ 18 avril 1297 en calendrier julien : les 14 jours sont comptés en remontant à partir des kalendes de mai, c'est-à-dire du premier mai (1/05-30/04-29/04-28/04-27/04-26/04-25/04-24/04-23/04-22/04-21/04-20/04-19/04-18/04)

⁷¹ Official= juge ecclésiastique désigné par l'évêque pour exercer en son nom la juridiction contentieuse

vidimus est de date du lundy amprès le quinsiesme jour de la nativité de Saint Jean Baptiste⁷² l'an mil deux cens neuvente sept et est signée par maistres **Pierre Duboys** aisi que **P. de Bosco** et **Pierre Bade** ainsi P. Bade.

Item une lectre de testament de feu messire **Durand de Mont Ault** chivalier en parchemin seellée de deux seaux de la date au moys d'aoust l'an mil deux cens nonnente sept le jour de la vespre de Saint Julien⁷³ au quel testament est inserré unne telle clouse c'est ascavoir que icelluy testateur laysoit à ses homez tailhandiers deux cens livres tournoys unne foys payées.

Item unautre lectre scripte en parchemin seellée du seel Royal aux contraux stabli ez montainhes d'Auvergne de date du mercredi amprès la feste de Pâques l'an mil deux cens nonnente sept contenenent que devant maistre Reymond Saven feu messire **Geraud de Mont Ault** sagrestain de Mende en presence de messire **Durand de Mont Ault** chivalier et de **Astorc d'Orlhac** escuyers ses neveux et de leur consentement feist division à ses deux neveux de certains biens à luy appartenens.

Item unautre lectre ancienne en parchemin scripte que d'autre foys selon qu'il apparoit avoit esté sellée de la date es nonnez du moys d'octobre l'an mil deux cens sixante six contenenent de feu messire **Pierre Gualsem**

Page 16 = folio 8v

vendit à feu messire **Durand de Montault** chivalier entre autres chouses le vilaige ou affar nommé la Pomardie avec toux ses droys et appartenences services usaiges serventaiges aubert⁷⁴ questes tailhes ou collectes et sevitutes.

Item une autre lectre ou instrument de la dite date du troysiesme jour de juing l'an mil troys cens sixante huyt receu par feu maistre **Bernard de Clau Magiram** notayre royal groussé⁷⁵ par maistre **Geraud de Salessa** notayre royal et par vertu de commission du Regent par le Roy le bayliage des montainhes d'Auvergne contenenent le testament de feu noble et puissant **Bertrand de Mont Ault** seigneur de La Roquebraou et de Carbonieres auquel est contenu entre autres chouses que ledit testateur en certain cas laysoit à feu noble et puissente **Guilharde de Seveyrac** sa fame son chastel et chastellenie de Carbonieres avec ses rentes cens tailhes exploys manevres services et servitus quelxconques.

Item unautre lectre ou instrument receu par maistre **Mathieu Dumas** notayre royal seellées du seel royal de la viguerie de Figiac contenenent que Gualhianne délayssée de **Rigaud de Merle** escuyer tutesse de Pierre et Dalphine leur enfens et **Guilbert Fonquaut** escuyer en presence de noble **Geraud de Mont Ault** seigneur de La Roquebraou et de Carbonieres et de discret homme Maistre **Guillaume de Messac** saige en Droit juge dudit seigneur vendirent pour payer les debtes desdis enfans c'est ascavoir lez vilaiges de Sinq Aubres et de Mas Soubre de la parroisse de **Roffiac**⁷⁶ à **Jehan Faure** de La Roquebraou avec leurs rentes cens juridictions devoirs partinences et justice aulte et basse et avec leurs tailhes manevres dons services et employx pour le pris de six cens et trente livres de bons petis tournoys noyers⁷⁷ laquelle vante à requeste desdis vandeur et achapteur ledit juge mis son decret et est de date du mardy au vespre de la feste Saint Mary l'an mil troys cens et vint huyt.

Item unnes lectres receues par maistre **Jehan de Brigie** soubz le seel de feu messire **Jehan de Mont Ault** seigneur de La Roquebraou et de Carbonieres seellées dudit seau et signées par ledit notayre encoumancens « Nos Johannes de Monte Alto etc » de date du vint et sinquiesme jour du moys de aoust⁷⁸ contenenens en effet que ledit seigneur reconnoisoit

Page 17 = folio 9 r

avoir eu de **Jaques de Courbiere** son bayle de sa baylie de **Saint Santin Cantalez** entre autres chouses et avoit payé audit seigneur ou de son mandement à certains autres toutes les sommes dez taillez par icelluy bayle au nom dudit seigneur levées dez hommes dudit seigneur et de ladicte baylie et par icelluy seigneur impouées à ses hommes en

⁷² La nativité de St Jean Baptiste est le 24 juin ; faut-il aussi partir en marche arrière comme pour les calendes, les ides et les nones ? si oui la date est le 10 juin 1297

⁷³ Sans doute Saint Julien de Brioude, dont la fête est le 28 août

⁷⁴ Sans doute référence au « fief de haubert » qui entraînait obligation de se mettre au service du seigneur avec un cheval.

⁷⁵ Grossoyé : une copie certifiée de l'acte a été donnée par Géraud de Salesses détenteur des minutes de Bernard de Clamagirand

⁷⁶ Rouffiac ; Cinqualbres, maintenant commune de Cros de Montvert, et Massoubro, village sans doute disparu

⁷⁷ Le « gros tournois », monnaie créée par Saint Louis en 1266, valait un sou. Mais les « petits tournois noyers » ?

⁷⁸ L'année n'est malheureusement pas mentionnée

ans et années mil quactre cens et sept et mil quactre cens et huyt, mil quactre cens et neuf, desquelles sommes icelluy seigneur quictoitoit ledit Corbières son bayle à touxjours.

Item unautre lectre en parchemin encoumamsent « Nos Johannes de Monte Alto etc » non signée ne scellée de date du quatorsiesme jour d'avril l'an mil quactre cens et quactre contenant que noble **Jehan de Mont Ault** seigneur de La Roquebraou et de Carbonières a baillié et investu à **Jehan La Coste** de la parroisse de Boysset ung ort nompmé de La Fon situé au mas de **Vernhols** et tout le affar nompmé de L'Eschaliere audit mas de Vernhols aux cens annueels exploix manevres taillez servitus acoustumés deus audit seigneur.

Item unautre lectre en parchemin receu et signé par maistre **Bec de Brigée** desoubz le seel aux contraux establi pour le Roy aux Montainhez d'Auvergne de date du sinquiesme jour du moys de may l'an mil quactre cens et deux contenant que **Jehan de Tremoilhes** du mas de Tremoilhez de la parroisse **Saint Santin Cantalèz**⁷⁹ reconnayt entre autres chouses tenir de feu noble **Jehan de Mont Ault** seigneur de La Roquebraou et de Carbonières ledit vilaige de Tremoilhes de toutes et singuliers autres tailhez collectes questes dons services trahutz manevrez biaux exploix sevitus et autres exeptions et conventions quelxconques.

Item unautre lectre ou instrument en parchemin de date du sixiesme jour de septembre l'an mil quactre cens trente troys receue et signée par maistre **Huc Jalet** notaire royal et impérial contenant une reconnoissance faicte par **Pierre de Malessier** et Jehan son filz du mas de La Casa en la paroisse de **Saint Julien de Pellerin** à feu noble **Jehan de Mont Ault** escuyer seigneur de Carbonières et de Vieux Champs c'est ascavoir qu'ilz ont recognu tenir dudit feu Jehan tout ledit vilaige de La Case avec ses devoirs rentes cens acoustumés et talhez manevres checun an à sa volenté et justice aulxte et basse.

Item unautre lectre en parchemin commansent ainsi « Nos Johannes de Monte Alto dominus castrorum Rupisbraou et de Carbonieriis etc » non seellée ne signée de date du trexiesme jour du moys d'avril l'an mil quactre cens et sexe contenant une vestition faicte par noble Jehan à **Gaspar La Thomarie**⁸⁰ du villaige de Carbonières assis en la paroisse de **Saint Santin** et

Page 18 = folio 9 v

aussi du vilaige de Lacole assis en ladicte parroisse à rente checun an acoustumée à lever exploix manevres tailhes servitus et autres drois acoustumés justice aulte basse et moyenne en la présence de **Olivon de Mont Ault Jaques de Carbieres**⁸¹ et de messire **Jehan de Tremolhyeyre**.

Item unautre lectre en parchemin non mye seellée ne signées selon que de prime face appert receu par maistre **Bec Brige** commansent « Nos Johannes de Monte Alto etc » de date du vint et sixiesme jour du moys de juing l'an mil quactre cens et sinq contenant une quictance et reconnoissance faicte pour ledit de Mont Ault à **Gaspar de Mont Agut** de la parroisse de Cirang son bayle de la baylie de **Glenat** dez rentes fruytz blés cens et de argent poys gellines poillaylhes et moctons eux⁸² et dez esmolumens du **molin de Palatz**.

Item unautre lectre en parchemin non mie signée ne seellée que commamse « Nos **Bertrandus de Monte Alto** etc » de date du joydi avant la feste de Saint Mathieu appostre l'an mil troys cens sixante neuf contenant une vestition faicte par icelluy feu Bertrand à Jehan de L'Epiolerie de la parroisse de Braou et à **Pierre du Mespplier** et Bonne sa fame c'est ascavoir audit Pierre et sa fame de la moytié du vilayge du Mespplier du vilaige de La Plaisse de ladicte parroisse de **Braou** ainsi que plus à plain dit estre contenu en unnes lectres receues sur ce par maistres **Bernard du Claux Magiran** et **Geraud du Mas** noteres royaulx excepté et retenu audit feu noble Bertrand sur iceux vilayges ses cens rentes annuels tailhes manevres exploix dons services et servitus acoustumés et justice et juridiction aulte basse et moyenne.

Item unautre lectre en parchemin non mye seellée ne signées commansent « Nos **Johannes de Monte Alto** miles etc » de date du darnier jour du moys de septembre l'an mil quactre cens et sinq contenant la vestition faicte par ledit chevalier à **Loys de Messac** d'ung **estanc nommé de Palpinson** ains que plus à plain dit estre contenu en unne lectre receue par maistre Geraud Salessa notere royal excepté par icelluy chivalier et retenu les cens annuels par

⁷⁹ Tremouilles, maintenant commune de Cros de Montvert

⁸⁰ Lathornarie ? (Latournerie)

⁸¹ Courbières cf p 17 en haut

⁸² Œufs ?

intier et sens nulle diminution juridiction alte basse et moyenne et toux autres droys et devoirs par luy et ses predecesseurs acoustumés à lever sur ledit estanc.

Page 19 = folio 10 r

Item unautre lectre en parchemin ainsi commansent « Nos **Johannes de Monte Alto** etc » de date du vint et noviesme jour du moys d'avril l'an mil quactre cens dix et neuf en la présense de **Pierre de Teulière**⁸³ escuyer et de maistre **Géraud de Phelip** noteyre et de **Pierre Ferrat** passées et scellées en cire rouge en pendant du seel dudit seigneur de Mont Ault contenens unne bailhée et vestition faicte par icelluy de Mont Ault à **Jehan Vidal, Bernard de Cavanet, Pierre de Ceyrols, Géraud Tourenne, Begon de Cavanet** du vilage ou affaire nommé de la Codieyre soubz les rentes sans annuelz acoustumés tailhes exploix manevres services servitutes et autres droys et devoirs deus et acoustumés, justice aulte basse et moyenne.

Item au lieu de La Roquebraou au diocèse de Saint Flor le vint et troysiesme jour du moys de mars l'an que dessus prouduist plus ledit Vidal prou-
-cureur que dessus pluseurs lectres papier et doctumens estans en ung sac de toelle dont cy des-
-soubz est premièrement faicte mention, c'est ascavoir :

Ung papier ou registre de court dez causes playdoies et demenées devient le juge de feu noble et puysent seigneur messire **Durand de Mont Ault chivalier** et devient maistre **Mathieu du Mas** graffier de ladicte court ouquel papier et registre est enregistré de la date du samedy amprès la feste de Saint Mathieu apostre de l'an mil troys cens et vint et sept que **Jehan de Pol** procureur dudit seigneur avoit fait fere inhibition et deffance de part icelluy seigneur à **Estienne Martin de Pruns** qu'il ne exploitast l'affar de Bordes du vilage de Pruns jusques à ce qu'il eust payé sa part et portion de la tailhe que ledit seigneur avoit impusé sur ledit affar.

Item plus est contenu oudit registre de ladicte date que aussi la main dudit seigneur fut apousée sur ledit affar dez Bordes tant qu'il touchoit **Bernard Daletz** et que ledit Bernard se soubmist à l'ordonnance dudit seigneur de ce que le procureur dudit seigneur demandoit oudit Bernard qu'il payoist la tailhe à luy appertenant pour ledit affar et que pour ce ledit Bernard donna et bailla pour fiance **Pierre de Aguierre** qui pour ce se obliga et ses biens.

Page 20 = folio 10 v

Item unne lectre scripte en parchemin qui avoit esté seellée de date du samedy amprès la feste des Saint Phelipe et Saint Jaques apostres⁸⁴ l'an mil troys cens sixante huyt contenant que noble et puysent seigneur **Bertrand de Mont Ault** seigneur de La Roquebraou et de Carbonières conserva à **Geraud du Claux Magiran** et à Guilhauma sa femme et à **Durand du Mas**, du Claux Magiran de la parroisse **d'Espinadel**, et aux heretiers de Hugues et **Estienne la Vayssa** de la parroisse de **Glenat** tenenciers du vilage de la Glede de ladicte parroisse de Espinadel l'affranchiment que **noble Geraud Aycard** escuyer de Glenat et Helis sa femme et Bertrand leur filz avoient fait ausdis tenenciers de toute tailhe don queste service manevre biau exploit subcide subvention bayliage serventaige jornaux exaction et autre servitus quelxconques, et aussi estoit contenu que ledit seigneur avoit en tenenciers le doit que luy appertenoit à cause dudit affranchiment et dudit droit les quitoit.

Item un papier de notes de contraulx receus par feu maistre **Geraud du Mas** notere auquel papier a pluseurs notes de divers contraulx receus par ledit notere entre pluseurs personnes et antre les autres contraulx unne note de date du douziesme jour de decembre l'an mil troys cens septente quactre contenant entre autres chouses que feus nobles et puysens **Bertand de Mont Ault** seigneur de La Roquebraou et de Carbonières et **Jehan son filz** vendirent à feu messire **Mathieu Bardet prestre** toutes les tailhes manevres questes biains sercices servitus et autres drois et devoirs qulxconques lesquelx les tenenciers du **mas de Bardet** avoyent acoustumés payer ausdis vendeurs.

Item estoit plus contenu oudit sac unne lectre scripte en parchemin encoumamcent « Noverint universi presentes literas inspecturi quod nos **Ben**⁸⁵ **de Durban miles** non dolo inductus etc » de date du Jeusdy vespre de la annunciation Nostre Dame l'an mil deux cens nevente neuf et apparoit que avoit esté seellée du seel dudit Durban,

⁸³ Peut-être Pierre de Sermur alias de Teulières

⁸⁴ La fête de Saint Philippe et Saint Jacques, instituée en 570, était jusqu'en 1955 le premier mai

⁸⁵ Bernard ?

contenant que icelluy de Durban vendit à feu noble et puyssent seigneur messire **Durand de Mont Ault chivalier** la moytié du vilage de l'Estival de la parroisse de **Romegos** qu'il avoit achaptée de **Ben La Broe** et de sa fame et que iceux de La Broe et sa femme parveoyent et avoyent acoustumé parveoir dedens ladicte parroisse de Romegos.

Page 21 = folio 11 r

Item et aussi unautre lectre scripture en parchemin receue et signée par feu maistre **Jehan Daguzo** juré du seel aux contraux establi pour le Roy ez montaignes d'Auvernes de date du digmenche amprès la feste Saint Nicolas d'yver⁸⁶ l'an mil trois cens cinquante ung contenant que **Bernard de Lalourie** de la parroisse de **Saint Julien Alboy** recognoyt tenir de feu **Bertrand de Mont Ault** seigneur de La Roquebraou et de Carbonières le vilage ou affar nommé de La Lourie⁸⁷ de ladicte parroisse à certains cens et rentes et à tailhe à volenté dudit de Mont Ault.

Item unautre lectre scripture en parchemin signée et receue par maistre **Jehan Daguzo** notere juré dudit seel aux contraux establi ez montaignes d'Auvergne de date du vendredy amprès la feste Saint Nicolas d'yver l'an mil trois cens cinquante ung contenant que **Geraud** et **Pierre de Longueyrou** de la parroisse de **Saint Christofle** recognurent tenir de noble et puyssent seigneur **Bertrand de Mont Ault** seigneur de La Roquebraou et de Carbonieres le villaige ou affar nommé de Longeyro à certains cens rentes et aux tailhes exploix et autres devoirs acoustumés comme les predecesseurs dudit de Mont Ault avoyent acoustumé.

Item unautre lectre scripture en parchemin signée et receue par maistre **Beg Brige** notere et juré dudit seel de la date du dix et neufviesme jour de juing l'an mil quactre cens et cinq contenant que feu noble et puyssent **Jehan de Mont Ault** seigneur de La Roquebraou et de Carbonieres a affranchi **Pierre La Borie** tenencier en sa partie du vilage de La Borie de la parroisse de **Saint Victeur** de toutes tailhes questes collectes dons services trahus manevres biamis exploix servitus et autres axactions et subventions quelxconques pour la somme de quinze livres tournoys retenu audit seigneur la taihe de quactre soulz et six deniers de tournoys en checun des quactre cas en icelle lectre déclarés.

Item unne autre lectre receue et signée par ledit maistre **Beg Brige** notere et juré dudit seel de la date du troisisme jour de juing l'an mil quactre cens et quactre contenant que ledit feu **Jehan de Mont Ault** seigneur de La Roquebraou et de Carbonieres a affranchy

Page 22 = folio 11 v

Jehan de La Fon du vilage de Chasiech de la parroisse de **Saint Victeur** tenencier en partie dudit vilage de Chasiech et aussi du vilage de La Borie de ladicte parroisse et de certaynes autres terres et possessions declarées en icelle lectre de toutes tailles collectes questes dons services trahus manevres exploix servitus et autres subventions quelxconques pour le pris de vingt et deux livres et deux soulz tournoys réservés audit seigneur certains cens et rentes et sept soulz et huit deniers et maille tournois de tailhe en checun de quactre cas en icelle lectre declarés.

Item ung livre de papier script de lectre ancienne peu long et consumi ou gasté environ de tous les fueils ou estoient contenus aucuns contes de aucuns receveurs des cens et rentes et de aucunes tailles et entre autres contes est contenu en icelluy livre et en ung feullet et en la premiere paige que **Jehan Salvaige** conta des rentes et des tailhes de l'an nostre seigneur mil trois cens et tente⁸⁸ huit le premier jour de caresme jusques audit jour ainsi que est script ou papier de la prinse qu'il eut deux cens six livres et quatorze soulz.

Item en icelluy mesme fueil dudit livre et en la seconde paige est script que furent rebatues à aucun d'une taille que fut fecte aucun en certaynes sommes illec ensuyvent scriptes.

Item et en l'autre fueil dudit livre amprès encontinent ensuyvent en la premiere paige est script que fut conté de la taille fecte icelluy an que ne fut fecte hors tan seulement la quarte partie de ce que avoit acoustumé fere.

Item en ung autre fueil dudit livre et en la seconde page au commencement d'icelle est script que fut fait compte ung jour de la taille que fut fecte l'an quarente selon que est script ou papier de la prinse.

Item amprès en icelle page s'ensuyt que furent quictés dix soulz de taille au clerc de **Sinc Abres**.

Item en ung autre fueil amprès et encontinent ensuyvent dudit livre en la premiere page et au commanement d'icelle est script que fut conté pour la somme de cent livres sept soulz et demy de la taille que fut fecte l'an

⁸⁶ « Fête de Saint Nicolas d'hiver », donc le 6 décembre ; il semblerait donc qu'il y ait eu une autre fête de Saint Nicolas dans une autre saison

⁸⁷ Lalaurie, village disparu (il y a un autre La Laurie à Bassignac le Bas, également en Corrèze

⁸⁸ Sic, pour trente

quarente que fut pour tout payée quactre vints et douze livres quinze soulx et six deniers et est illec script amprès que restarent huyt livres

Page 23 = folio 12 r

moins huyt soulx.

Item ung autre fueil dudit livre et en la seconde page et script que fut comté pour la somme de septente livres et dix soulx de tailhe mais icelluy an n'en fut fecte que la quarta partie que montoit dix et sept livres et dix et sept soulx et six deniers.

Item en la premiere page d'ung autre fueillet dudit livre amprès ensuyvent est contenu que l'an mil trois cens et quarente fut compté avec un nompmé **Phelipot** le lundi amprès caresme prenent et luy furent donnés trente deux soulx pour lever la tailhe de l'an trente neuf à luy ou à son vailet.

Item en la première page d'ung autre fueil dudit livre amprès ensuyvent est contenu que l'an mil troys cens quarente quactre fut conté avec ung nommé **Negrier** et payé de l'argent de la tailhe ainsi que est script en ung sien papier cinquante huyt livres et quinze soulx quactre deniers et aussi en autre article de ladicte page est contenu que fut donné troys soulx de la tailhe à l'homme de *Senenols*.

Item en la première page d'ung autre fueil dudit livre est script que ung nompmé **Negriers** ont payé le samedy avant la feste de Saint George l'an mil troys cens quarente sept la tailhe de l'an quarente-six jusques au digmenche de Reminiscere quactre vints et quinze livres.

Item en la seconde page d'ung autre fueil dudit livre est script que a esté donné de la tailhe et a esté prins en conte aucunes petites sommes illec amprès ensuyvens.

Item et aussi en la première page d'ung autre fueillet dudit livre sont scriptes aucunes sommes que ont esté rebatues de la tailhe et des cens.

Item en la seconde page d'ung autre fueil dudit livre est script et au commencement que ung nommé **Michel** compta le samedy amprès Saint Andrieu l'an quarente de la tailhe que avoit levée l'an quarente et eut tout payé hors quinze soulx avec trente soulx que luy furent donnés pour lever.

Item en la seconde page d'ung autre fueil dudit livre en commencent

Page 24 = folio 12 v

est script et contenu que fut conté pour la somme de la tailhe de deux cens livres quinze soulx et amprès illec s'ensuyt que fut fait à **Carbonieres** dégecté pour raison de la guerre sinquante soulx que prinst **Jehan Salvaige**.

Item en la première page d'ung autre fueil amprès ensuyvent est contenu que aucun disoyt qu'il avoit vingt et unne livres de prest en la tailhe.

Item et aussi ung autre petit livre de papier ancien script de lectre ancienne où estoyent escrips pluseurs comptes et receptes dez cens et dez tailhes ouquel papier estoit fecte mention en pluseurs lieux et parties d'aucunes tailhes que avoyent esté fectes aucunes années.

Et premièrement ou commencement de la première page d'ung fueillet dudit livre estoit escript contenant en effet que **Jehan Salvaig** avoit payé de la tailhe d'icelluy an que montoit deux cens livres ou environ huyt vints livres et le surplus fut rebatu en restes ou en ce que avoit esté donné aux gens.

Item en la première page d'ung autre fueillet dudit livre estoit script contenant en effet que ung nommé **Philipot** ou **Negriers** de la taille d'icelluy an que montoit septente livres ou plus que fut fecte à Panthecoste avoit payé environ soixante livres et le surplus fut conté en restes ou en ce que avoit esté donné aux hommes.

Item en la première page d'ung autre fueil dudit livre estoit escript en effet que **Géraud Aycartz** ou **Bosrevels** pour luy de la tailhe que fut fecte icelluy an que montoit environ six vints livres ou plus paya environ cent livres et le surplus fut conté en restes ou en rebatemens ou en ce que fut esté donné aux hommes.

Item et en icelle mesme page amprès est script en effet de la taille que

Page 25 = folio 13 r

fut fecte à **la Roche al Derremat** (Derreviat ? Derreinat ?)⁸⁹ dix livres.

⁸⁹ Peut-être La Roche d'Allassac, qui faisait au Moyen-Age partie du pays d'Yssandon cité ensuite, ou plutôt La Roche près de **Brenat à Saint Hilaire-Peyroux**, Corrèze

Item et plus en ladicte page mesmes est script en effet de la taille que fut fecte en **Yssandonnes**⁹⁰ sept livres.

Item en la fin de ladicte page aussi est escript en effet que la taille que fut fecte **en la terre Clersille** que montait environ quarente livres eut environ vint et cinq livres.

Item ou second item de la première page d'ung autre fueil dudit livre est escript en effet que les hommes de **La Roche au Derrainat**⁹¹ (ou Derramat ?) payarent sixante soulx le josdy amprès Saint Ylaire et firent compte de ce qu'ils devoient d'argent de ce jour de la rente ou des arreyraiges ou des tailles deppuys l'an quarente.

Item et en la fin de la première page d'ung autre fueil dudit livre estoit escript que ung nommé **Malros** paya le jour de Saint Nicholas six livres tournois pour la taille ou pour le blé que luy avoit esté vendu.

Item aussi ung papier de notes de pluseurs recognoissances fectes par pluseurs hommes dudit **Amalry** et de ses seigneuries à cause des vilaiges qu'ils tiennent dudit Amalry qui recognurent eulx devoir audit Amalry les cens rentes tailles et autres devoirs et drois ez quelx ils sont tenus audit Amalry à cause de leursdits vilaiges c'est ascavoir les aucunes par devient maistres Jehan de Phelipe et Jehan Brige noteres ensemble et les autres par devient ledit Phelipe tant seulement et les autres par devient ledit Brige tant seulement selon que ledit maistre Jehan de Phelipe a affermé par son serement qui a son office de notaire.

Et premièrement une note desdis deux notayres de date du quatorziesme jour de janvier l'an mil quactre cens quarente deux contenant que **Bartholemy La Cassaigne** du vilaige de La Cassaigne de la paroisse de **Saint Julien al Boy** ou dioucese de Tuelle recognuyt qu'il tenoit deux chassaulx dudit Amalry assis ez pertinences du chastel dal Boy illec confrontés à certains cens et rentes et aux taillez manevres et autres drois et devoirs acoustumés.

Page 26 = folio 13 v

Item une autre note desdis an et jour et desdis noteres contenant en effet que **Jehan de La Croix** de ladicte paroisse de **Saint Julien Alboy** recognuyt soy tenir dudit **Amalry** une borie nommée de Pon Merles assise en ladicte paroisse et en ladicte note confrontée à certains cens et rentes et taillez et manevres et autres drois et devoirs acoustumés.

Item une autre note desdis an et jour et desdis noteres contenant en effet que **Jehan de La Croix** de ladicte paroisse de **Saint Julien Alboy** recognut soy tenir dudit **Amalry** une borie nommée de **Pon Merles** assise en ladicte paroisse et en ladicte note confrontée à certains cens et rentes et taillez et manevres et autres drois et devoirs acoustumés.

Item une autre note desdis deux noteres et desdis an et jour contenant en effet que **Bernard, Pierre et Bartholemy de Rosiers** autrement **de la Sala** reconurent eux tenir dudit seigneur une borderie nommées de **Granaric** en ladicte note confrontée à certains cens et rentes et aux tailles manevres services et exploix acoustumés.

Item une autre note desdis noteres de date du dixiesme jour de septembre l'an mil quactre cens quarente quactre contenant que **Jehan de La Laurie** du vilaige de **La Laurie** recognut pour luy et pour Guillaume et Estienne de La Laurie ses freres tenir dudit seigneur ledit villaige et aussi ung pré et une terre aboutissans assis en ladicte paroisse et en ladicte note confrontés à certains cens et rentes et aux taillez et manevres et autres drois et devoirs acoustumés.

Item une autre note desdis noteres et desdis an et jour contenant en effet que **Anthoyne de La Molenayrie** pour soy et pour Pierre son frere recognut eulx tenir dudit seigneur le villaige du Telh de **Clemensac**⁹² assiz en ladicte paroisse de **Saint Julien Alboy** en ladicte note confronté à certains cens et rentes et aux tailles manevres et autres drois et devoirs acoustumés.

Item une note dudit maistre Jehan de Phelippe de date du vint et huytiesme jour de Janvier l'an mil quactre cens quarente deux contenant en effet que **Pierre d'Ujols alias La Barrieyre** de la paroisse de **Saint Santin de Cantalès** ou dioucese de Saint Flor recognut à tenir dudit seigneur le villaige **d'Ujols Soteyra** assis en ladicte paroisse confronté en ladicte note à certains cens et rentes et aux tailles manevres exploix et servitus et autres drois et devoirs acoustumés.

⁹⁰ Yssandon en Corrèze, près de Brive

⁹¹ Voir plus haut, orthographe différente « al Derremat »

⁹² Clamensac, commune de Saint Julien aux Bois

Item une autre note dudit de Phelippe desdis an et jour contenenent en effet que **Geraud La Besseyrete alias dels Pons** du villaige de **La Besseyrete** de ladicte parroisse de **Saint Santin** recognut soy tenir dudit seigneur ledit villaige de La Besseyrete assiz en ladicte parroisse et en icelle note confronté à certains cens et rentes et aux tailles manevres collectes servitus biains et autres drois et devoirs acoustumés.

Page 27 = folio 14 r

Item une autre note dudit de Phelippe de ladicte date contenenent en effet que **Jaques Robbert** du villaige de **Cabarnac** recognut soy tenir dudit seigneur une grange avec son curtil assise ou coderc dudit villaige en ladicte note confrontée à certains cens et rentes et aux tailles manevres exploix et services acoustumés.

Item une autre note dudit de Phelippe et de ladicte date contenenent en effet que **Geraud Geneste** recognut soy tenir dudit seigneur une borie sienne nommée de **Roque** assise oudit villaige de **Cabarnac** à certains cens et rentes et aux tailles collectes et bians acoustumés.

Item une autre note desdis deux noteres de date du quinsiesme jour de fevrier l'an mil quactre cens quarente deux contenenent en effet que **Jehan de Renac** autrement de Besse du villaige de Cabarnac de la parroisse de **Saint Santin de Cantales** pour luy et pour et au nom de Astrugue sa femme et de **Pierre de Besse** son nepveu recognut soy atenir dudit seigneur la moytié et l'autre moytié du villaige de **Cessede** assiz en ladicte parroisse et la borie de Roque autrement de **La Sigilade** assise oudit villaige de **Cabarnac** et confrontée en icelle note à certains cens et rentes et aux exploix tailles manevres et autres drois et devoirs acoustumés.

Item une autre note dudit de Phelippe desdis an et jour contenenent que **Jehan de Seroy** dudit villaige de **Cabarnac** pour soy et pour **Guillaume de Seroy** son nepveu recognut a tenir dudit seigneur l'autre moytié avec l'autre moytié dudit villaige de **Ceresede** à certains cens et rentes et

28/ exploix et taillez acoustumés.

Item et aussi une autre note contenenent que ledit **Jehan de Seroy** recognut soy tenir dudit seigneur deux prés assis en la **reviere d'Etze** confrontés en ladicte note à certains cens et rentes et aux tailles manevres et exploix acoustumés.

Page 28 = folio 14 v

Item une autre note dudit de Phelippe du premier jour d'avril l'an mil quactre cens quarente trois contenenent en effet que **Jehan d'Espaignac** pour la moytié et Anthoyne et **Jehan de Salvaignac** autrement de Monedieres pour l'autre moiitié du villaige de **Monedieres** assis en la parroisse de **Saint Santin de Cantales** recognurent eux tenir dudit seigneur tout le affar ou tenement nommé **Les Calms de Monedieres** confronté en ladicte note à certains cens et rentes et aux tailles manevres biains exploix services et autres drois et devoirs acoustumés.

Item une autre note dudit de Phelippe desdis an et jour contenenent en effet que **Jehan de Solve et Bertrand de Senrame** recognurent eux à tenir dudit seigneur la tiersa partie dez tenemens nommés **dez Gouteillez et de Cassagnos** confrontés en ladicte note à certains cens et rentes et aux tailles servitus biains manevres et autres drois et devoirs et services acoustumés.

Item une autre note dudit de Phelippe du quactriesme jour dudit avril l'an que dessus contenenent en effet que **Jehan de Caumon dit de Lerm** du villaige de **Caumon** de ladicte parroisse de **Saint Santin de Cantales** recognut soy tenir dudit seigneur tout ledit villaige de Caumon confronté en ladicte note à certains cens et rentes et aux tailles manevres collectes exploix biains et autres drois et devoirs et services acoustumés.

Item unautre note dudit de Brige du sinquiesme jour dudit avril l'an que dessus contenenent en effet que **Durand de Peyrissagol** du villaige de **Peyrissac** pour soy et pour Jehan son frere recognut eulx tenir dudit seigneur les bories ou affars de La Bodie du Prat du Teil de Larmandie et de La Causeme assises ou villaige de Peyrissac de la parroisse de **Noudan**⁹³ confrontées en ladicte note à certains cens et rentes et aux tailles manevres services servitus et exploix acoustumés.

⁹³ Nieudan

Item une autre note desdis deux noteres du sixiesme jour dudit avril l'an que dessus contennent en effet que **Jehan de Renac** du villaige de Renac **Pierre d'Aletz** du villaige d'Aletz⁹⁴ et sa fame recognurent eulx tenir dudit seigneur tout ledit

Page 29 = folio 15 r

villaige d'**Aletz** de la parroisse de **Saint Victour** exceptés aucunes terres et aussi aucunes autres possessions assises oudit villaige et aussi ledit Jehan de Renac ung autre pré confronté en ladicte note à certains cens et rentes et aux tailles manevres services sevitus et exploix deus anciens et acoustumés.

Item une autre note desdis deux noteres et desdis an et jour contennent que **Jehan de Renac** pour la tiersa partie et **Pierre dez Cumbes** pour les autres deux tierces parties du villaige de **Renac** recognurent eux tenir ledit villaige de Renac dudit seigneur assiz en ladicte parroisse d'**Aeren**⁹⁵ et confronté en ladicte note à certains cens et rentes et aux tailles manevres servitus et exploix acoustumés.

Item une autre note desdis deux noteres de date du vinpt et huystiesme jour de may contennent en effet que **Guillaume de Pari le Souverain**⁹⁶ pour soy et pour Hugues son frere et **Jehan et Hugues de Pari** freres filz de feu Pierre du villaige de **Pari le plus Bas ou inférieur**⁹⁷ de la parroisse de **Saint Alire**⁹⁸ et **Guillaume Borie** du villaige de **Polpedis** de la parroisse de **Saint Santin de Cantales** recognurent eux tenir la quatriesme partie de tout le affar de **La Bossonie** assiz en ladicte parroisse de Saint Santin à certains cens et rentes et aux tailles manevres exploix servitus services et autres drois et devoirs deus anciens et acoustumés.

Item une autre note dudit de Phelippe notere de date du noviesme jour de septembre l'an mil quactre cens quarente quactre contennent en effet que **Pierre d'Ensesa** dit de Lacumbe filz dudit Estienne tenencier en sa quarte partie dudit villaige d'**Ensesa**⁹⁹ de la parroisse de **Saint Julien Alboy** ou dioucese de Tuelle recognut soy tenir dudit seigneur le affar ou borderie de La Borderie du Prat Domierguier assiz ez pertinences dudit villaige d'**Ensesa** confronté en ladicte note à certains cens et rentes et aux tailles biains servitus et autres drois et devoirs acoustumés.

Item une autre note dudit de Phelippe de date du unziemesme jour de septembre l'an que dessus prochain contennent en effet que **Gérauld Dezpons** du villaige dez **Pons de Cantal** de la

Page 30 = folio 15 v

parroisse de **Saint Martin de Cantales** recognut soy tenir dudit seigneur la tiersa partie de La Borie affar ou villaige nommé du Croz et du Pont du Cantal assis en ladicte parroisse de **Saint Martin de Cantales** confronté en ladicte note à certains cens et rentes et aux autres drois et devoirs et tailles biains et manevres acoustumés.

Item une autre note dudit de Phelippe de la date du sixiesme jour d'octobre l'an mil quactre cens quarente quactre contennent en effet que **Guibert du Compte** du villaige de Lespinas de la parroisse de **Saint Santin de Cantales** recognut soy tenir dudit seigneur tout le villaige nommé de **Lespinatz** et le villaige ou tenement nommé de **las de las**¹⁰⁰ **Robbertenquas** et le villaige ou affar nommé de **Farnose** et ung pré nommé le pré de Menestral et aussi ung autre pré contennent environ ung jornal et demy de pré assis lesdis deux prés ez pertinences du villaige **dez Broes**¹⁰¹ et **de Cassagnos**¹⁰² assis en ladicte parroisse confrontés en ladicte note à certains cens et rentes et aux tailles manevres biains exploix et services et autres drois et devoirs acoustumés.

Item une autre note de date du dix et septiesme jour d'octobre l'an que dessus prouchain contennent que **Jehan de Revelhatz** du villaige de **La Lecole** de la parroisse de **Saint Santin de Cantales** la quactriesme partie dudit villaige de La Lecole¹⁰³ confronté en ladicte note à certains cens et rentes et aux tailles biains et autres drois et devoirs acoustumés.

⁹⁴ Aleix

⁹⁵ Ayrens

⁹⁶ « Pari le Souverain » = « Parieu Haut »

⁹⁷ Parieu Bas

⁹⁸ Saint Illide

⁹⁹ Ancèze, commune de Saint Julien Aux Bois

¹⁰⁰ Le bis est dans l'original

¹⁰¹ Leybros, commune de Saint Santin Cantales

¹⁰² Cassagnous, village disparu, mais le patronyme subsistait au XVIème siècle (minutes de Jean Fregeac, notaire)

¹⁰³ Le notaire ou le greffier a oublié la portion de phrase « recognut soy tenir dudit seigneur »

Item une autre note desdis deux noteres de date du darnier jour de may l'an mil quactre cens quarente trois contennent en effet que **Gerauld de La Martevia** filz de Pierre et Geraud de La Marthivia filz de Geraud du villaige de **La Marthivia**¹⁰⁴ de la parroisse de **Comiac** ou dioucese de Caors recognurent eux tenir dudit seigneur tout le affar ou borderie nommée de Couste Bonne assiz en ladicte parroisse et confronté en ladicte note à certains cens et rentes et aux tailles collectes subventions manevres biains et autres droix et devoirs et services acoustumés.

Page 31 = folio 16 r

Item une autre note desdis deux noteres et de la date que dessus contennent en effet que **Jehan et Pierre de Peyroles** freres du villaige de **Peyrolas**¹⁰⁵ de ladicte parroisse recognurent eux tenir dudit seigneur tout le villaige de Peyrolas et affar de Puech Long aboutissans ensemble assiz en ladicte parroisse confrontés en ladicte note à certains cens et rentes et aux exploix manevres tailles servitus et autres droix et devoirs deus anciens et acoustumés.

Item et aussi le vilage nommé de **La Clavelie** assiz en ladicte parroisse confronté en ladicte note à certains cens et rentes et aux tailles manevres exploix services et servitudes acoustumés.

Item une autre note dez noteres et an et jour que dessus contennent en effet que **Guillaume de Monmassos**¹⁰⁶ assiz en ladicte parroisse de **Comiac** et confronté en ladicte note à certains cens et rentes et aux tailles manevres services servitudes et exploix acoustumés.

Item une autre note d'iceulx noteres et date que dessus contennent en effet que **Bernard de Corcuech** dit de Vieyra **Pierre et Jehan de Vieyra** freres du villaige de **Vieyre**¹⁰⁷ de ladicte parroisse de **Comiac** recognurent eux tenir dudit seigneur tout ledit villaige de Vieyra le affar de Terre Roche assiz en ladicte parroisse confronté en ladicte note à certains cens et rentes et aux tailles manevres exploix services servitudes acoustumés.

Item une autre note dez noteres et an et jour que dessus contennent en effet que **Durand del Herm** dit du Perier de la parroisse de **Calviac** ou dioucese de Caours recognut soy tenir dudit seigneur le villaige nommé du Perier ou del Herm¹⁰⁸ assiz en ladicte parroisse confronté en ladicte note à certains cens et rentes et aux tailles manevres services servitudes et exploix acoustumés.

Item une autre note desdiz deux noteres de date du quinsiesme jour de juign l'an mil quatre cens quarente trois contennent en effet que **Michel d'Escobeyrou** recognurent soy tenir dudit seigneur le villaige d'**Escoubeyro**¹⁰⁹ assiz en ladicte parroisse de **Ciran** ou dioucese de Saint Flor à certains cens et rentes et à tailles et manevres.

Item une autre note dudit de Phelippe et de ladicte date contennent en effet que **Pierre du Mas** filz de feu Jehan dit Pauc et **Jehan du Mas** filz de feu Gerauld recognurent eux tenir dudit seigneur ung villaige ou borie dit du Mas assiz ou villaige **dez Bordes**¹¹⁰ en ladicte parroisse de **Ciran** confronté en ladicte note à certains cens et rentes et aussi les deux sinquiesmes parties dez fraux nommés de Cabanial dez Bordes confrontés en ladicte note à certains cens et rentes et à tailles exploix manevres et services.

Page 32 = folio 16v

Item une autre note dudit de Phelippe et de date que dessus contennent en effet que **Pierre de La Cabanie et Pierre de Reygade** dit de Palach recognurent eux tenir dudit seigneur le villaige ou borie nommée du Puech à Siran assise ou villaige du **Mas Alpuech**¹¹¹ à **Siran** de ladicte parroisse de **Ciran** à certains cens et rentes et à tailles et manevres. Et oultre en icelle mesmes note est contenu que ledit Pierre de La Cabanie recognut soy tenir dudit seigneur le affar ou borderie nommée **Elas Salas** assiz environ les pertinences dudit villaige à certains cens et rentes et à tailles 10/ et manevres.

¹⁰⁴ Lamativie ? (était autrefois de la paroisse de Comiac, avant de devenir une paroisse)

¹⁰⁵ Peyrolles, Lamativie, Lot

¹⁰⁶ Le Mamoussou, 46190 Lamativie

¹⁰⁷ Vieyres, Lamativie

¹⁰⁸ Lherm, Calviac, Lot

¹⁰⁹ Escoubeyroux, commune de Siran

¹¹⁰ Lasbordes, commune de Siran

¹¹¹ Le Puy de La Canet, près de Siran (à cause du Puech=Puy) ? ou le Mazet (proche de Reygade)?

Item une autre note dudit de Phelippe desdis an et jour contenenent en effet que **Bernard de La Hebreynie de Meseirac**¹¹² assis en ladicte parroisse confronté en icelle note à certians cens et rentes et aux tailles manevres et services acoustumés.

Item une autre note dudit de Phelippe et de ladicte date contenenent en effet que **Bernard du Ser** recognut soy tenir dudit seigneur le villaige du **Ser de Meseyrac**¹¹³ assis en ladicte parroisse de **Ciran** confronté en ladicte note à certains cens et rentes et aux tailles collectes manevres biains et autres services acoustumés.

Item une autre note dudit de Phelippe et de date du dix et septiesme jour de juign contenenent en effet que **Jehan Rodier** dit de La Lemozenia recognut soy tenir dudit seigneur tout le villaige ou borie de **La Lemozenie**¹¹⁴ assiz en ladicte parroisse de **Ciran** et confronté en ladicte note à certains cens et rentes et aux tailles manevres et autres drois et devoirs acoustumés.

Item une autre note dudit de Phelippe et de ladicte date contenenent en effet que **Hugues** filz de feu **Pierre de La Condamine** dit dez Casals et **Jehanne de Canet** délaissée¹¹⁵ de feu Pierre de La Condamine dit d'Ezcasals comme loyalle¹¹⁶ administrasse de Hugues son filz et dudit feu Pierre et aussi heretier universal d'icelluy feu Pierre recognurent eux tenir dudit seigneur le vilage de **La Condamine**¹¹⁷ ou dez Casals assis en ladicte parroisse de **Ciran** confronté en ladicte note à certains cens et rentes et aux manevres tailles biains et services acoustumés.

Item une autre note dudit de Phelippe et de date du dixiesme jour de juing l'an mil quactre cens quarente quactre contenenent en effet que **Pierre de Salvanhac** et Mathieu son nepveu recognurent eux tenir dudit seigneur leur mas ou borie de **Salvanhac**¹¹⁸ assis ou

Page 33 = folio 17 r

villaige de Salvagnac et ung affar nommé dez **Costes de l'Alguieyras** mouvant du villaige de l'Alguieyras à certains cens et rentes et aux tailles biains manevres exploix et autres drois sevoirs et services acoustumés.

Item une autre note dudit de Phelippe de date du vint et deuxiesme jour de juil l'an mil quactre cens quarente trois contenenent en effet que **Pierre du Barascon** filz de feu Guillaume et **Gerauld du Barascon** filz de feu Jehan recognurent eux tenir dudit seigneur checun jour la moytié tout le villaige du Barascon assiz en ladicte parroisse de Ciran. Et aussi ledit Gerauld une deveze ou terretoire nommé La Belle que deppant du villaige de Lachens confronté en ladicte note à certains cens et rentes et aux tailles exploix manevres biains exactions et autres drois devoirs et servitutes acoustumés.

Item une autre note dudit de Phelippe de date du dixiesme jour de juign l'an mil quactre cens quarente quactre contenenent en effet que **Pierre de La Broa** filz de feu Jehan recognut soy tenir dudit seigneur la moytié du vilage de **La Broa** de ladicte parroisse de **Ciran** confronté en ladicte note à certains cens et rentes et à tailles et manevres et aussi le affar de Combertes et plus aussi la moytié pour non devis¹¹⁹ d'ung pré assis ou Puech à Ciran confronté en ladicte note ausdis tailles et biains.

Item une autre note dudit de Phelippe desdis an et jour contenenent en effet que **Jehan du Cassaign** pour soy et comme tuteur et loyal administrateur de Jehan du Cassaig dit de Cels son nepveu recognut eux tenir dudit seigneur la moytié du vilage de La Broe et leur affar qu'ilz tiennent ou villaige de l'Alguieyre et aussi leur *autre* affar nommé de **La Pierre Brune** mouvent dudit vilage de **l'Alguieyre** et aussi tout le villaige nommé du **Cassaign** et outre ce la quactriesme partie dudit villaige de **Lachens** assiz en ladicte parroisse de **Ciran** et confronté en ladicte note à certains cens et rentes et aux tailles biains manevres servitutes et autres drois et devoirs acoustumés.

Item une autre note dudit de Phelippe de date du vint et deuxiesme jour de juil l'an mil quactre cens quarente trois contenenent en effet que **Pierre et Jehan de Lachens** freres recognurent eux tenir dudit seigneur les trois de quactre

¹¹² Lasbrairies de Siran

¹¹³ Le Sern, commune de Siran

¹¹⁴ Lasmoisines, commune de Siran

¹¹⁵ Traduction littérale du latin « relicta » = veuve

¹¹⁶ Loyalle = légale

¹¹⁷ Probablement plutôt La Condamine qu'Escazals, mais sans certitude, commune de Siran

¹¹⁸ Salvanhac, commune de Siran

¹¹⁹ Pour non devis = en indivis

parties du villaige de **Lachens** et leur fait¹²⁰ borie ou affar nommé de Jehan Reynal assis ou villaige de **Salvanhac** assis en ladicte parroisse de **Ciran** et confronté

Page 34 = folio 17 v

en ladicte note à certains cens et rentes et aux tailles biains et manevres servitutes et autres drois et devoirs et services acoustumés.

Item unne autre note dudit de Phelippe de ladicte date contenenent en effet que **Bonne de Olhac** délaissée de feu Guillaume de Olhac comme loyalle administratresse de Geraud son filz recognut tenir dudit seigneur le villaige ou borie dudit son filz nommée d'Olhac assise ou villaige d'**Olhac**¹²¹ confrontée en ladicte note à certains cens et rentes et aux exploix manevres tailles servitutes et biains.

Item unne autre note dudit de Phelippe de date du neufviesme jour de joun l'an mil quactre cens quarente quactre contenenent en effet que **Jehan de Guachanula** recognut soy tenir dudit seigneur tout le villaige ou borie nommée de Guachanula assiz ez pertinences du villaige de **Palach** et le **molin** nommé de Palach de Gachanula et la quactriesme partie des affaires nommés des Fraux de Las Cavals assiz ez pertinences dudit villaige de Palach en la parroisse de **Saint Girons** ou dioucese de Saint Flor confrontés en ladicte note à certains cens et rentes et aux tailles biains manevres servitutes et autres drois et devoirs et services acoustumés.

Item unne autre note dudit de Phelippe de la date que dessus contenenent en effet que **Yrlande de La Bernardie** ou del Bruch recognut soy tenir dudit seigneur toute la moytié par indivis du villaige ou borie de **La Bernardie** assiz oudit villaige de **Palach** et aussi la quactriesme partie et demye du affar nommé **Les Fraux de Las Cavals** assis oudit Palach et en ladicte parroisse de **Saint Girons** confronté en ladicte note à certains cens et rentes et à tailles manevres biains services desdites chouses.

Item unne autre note dudit de Phelippe desdis an et jour contenenent en effet que **Hugues et Durand de La Bernardie** freres recognurent eux tenir dudit seigneur la moytié par non devis de la borie de **La Bernardie** assise oudit villaige de **Palach** et la huytiesme partie par indivis dudit affar nommé les Fraus dez Cavals designés en ladicte note à certains cens et rentes et aux tailles et manevres comme dessus.

Item unne autre note dudit maistre Jehan de Brige de date du douziesme jour du moys de juign l'an mil quactre cens quarente quactre contenenent en effet que **Pierre de Rodier** recognut soy tenir dudit

Page 35 = folio 18 r

seigneur la moytié par indivis du villaige de **Borbolergues** assis en la parroisse de **Ciran** et aussi tout le affar nommé dez Guotels assis en ladicte parroisse de Ciran et aussi la quactriesme partie du affar nommé dez Cavals à certains cens et rentes et aux tailles manevres services servitutes et exploix acoustumés.

Item unne autre note dudit de Brige de ladicte date contenenent en effet que **Gerauld de La Broe** recognut soy tenir dudit seigneur le villaige ou borie d'**Olhac** et la moytié par indivis d'ungn pré deppendent dez pertinenses du villaige du Puech à **Ciran** confronté en ladicte note à certains cens et rentes et aux exploix manevres biains tailles servitutes et services acoustumés.

Item unne autre note dudit de Brige et desdis an et jour contenenent en effet entre autres chouses que **Pierre et Jehan de Maurelh** freres recognurent eux tenir dudit seigneur tout le villaige de **Mourelh**¹²² assiz en la parroisse de **Saint Girons** confronté en ladicte note et aux tailles manevres servitutes et exploix acoustumés.

Item unne autre note dudit de Philippe de date du quatorsiesme jour de juign l'an mil quactre cens quarente et quactre contenenent en effet que **Géraud du Mas** autrement¹²³ de Spinadelh recognut soy tenir dudit seigneur le affar ou borie sienne du **Mas d'Espinadelh** mouvent et deppendent du Mas d'Espinadelh assiz ou lieu ou parroisse d'**Espinadelh**¹²⁴ ou dioucese de Saint Flour confrontée en ladicte note à certains cens et rentes et aux tailles manevres servitutes et biains acoustumés.

¹²⁰ Fait (factum en latin) = petite possession

¹²¹ Aulhac de Siran

¹²² Le Maurel, commune de Saint Gérons

¹²³ Autrement = alias = aussi appelé

¹²⁴ Espinadel, autrefois paroisse, maintenant simple écart de la commune de Glénat

Item une autre note dudit de Philippe et desdis an et jour contennent que **Gerauld d'Espinadelh** autrement de Lerm recognut soy tenir dudit seigneur les deux sinquiesmes parties dudit vilage d'**Espinadelh** confronté en ladicte note à certains cens rentes et à tailles et biains.

Item une autre note desdis deux noteres desdis an et jour que dessus contennent en effet que **Bartholomé du Claus Magiran** recognut soy tenir dudit seigneurs a borie du Claus Magiran assise en ladicte paroisse d'**Espinadelh** confrontée en ladicte note à certains cens et rentes et aux tailles manevres servitutes et exploix acoustumés et aussi le affar sien de La Cleda assis en ladicte paroisse et confronté en ladicte note à certains cens et rentes et aux tailles manevres services servitutes et exploix deus anciens et acoustumés.

Item une autre note de date du dix et neufviesme jour de juign et de l'an que dessus contennent en effet que **Anthoyne du Forn** dit de Borbolergues assis en ladicte paroisse de Ciran confronté en ladicte note à certains cens et rentes et à tailles et Biains¹²⁵.

Page 36 = folio 18 v

Item une autre note dudit de Philippe de date du jour de Saint Michel l'an que dessus contennent que **Geraud dez Cases** habitant du lieu de **Glenat** oudit dioucese de Saint Flour recognut soy tenir dudit seigneur ung hostel et ung ort aboutissant ensemble lesquelx souloyent tenir feu Durand de Glenat et amprès feu Durand dez Costes assiz à Glenat et aussi ung hostel ou coutiz et ung ort aboutissant ensemble assiz oudit Glenat qua anciennement furent de feu Durand de Bratz confrontés en ladicte note à certains cens et rentes et aux tailles manevres collectes et services acoustumés à payer dedens les decz¹²⁶ et lim[i]tations dudit lieu de Glenat.

Item une autre note dudit de Philippe de ladicte date contennent en effet que Geraud le jeune dez Cases recognut soy tenir dudit seigneur certaynes possessions designées en ladicte note à certains cens et rentes. Mais plus est exposé en icelle note que lesdictes chouses sunt quictes et franchises de toute taille service manevres et exploit.

Item une autre note dudit de Philippe de date du darnier jour dudit septembre l'an que dessus contennent entre autres chouses que **Mathieu de La Serra** dit Roguier et **Pierre de La Serre** dit de **Pompidor** recognurent eux tenir dudit seigneur tout le villaige de **La Serra** assis en ladicte paroisse de **Glenat** confronté en ladicte note à certains cens et rentes et aux tailles manevres et collectes servitutes exploix et autres drois et devoirs acoustumés.

Item une autre note dudit de Philippe de la date que dessus contennent en effet que **Ramond de Cayrols** comme gouverneur de **Vidal de Ginestos** du **chastel de Glenat** reconut tenir dudit seigneur le affar de La Cazellie assis ez pertinenses dudit lieu de **Glenat** ouquel affar sont ung pré et ung cham aboutissans ensemble confrontés en ladicte note à certain cens et rentes et à tailles et manevres.

Item une autre note dudit de Philippe de date du premier jour

Page 37 = folio 19 r

d'octobre l'an que dessus contennent en effet que **Jehan de Recoles** reconut soy tenir dudit seigneur le villaige de **Recoles**¹²⁷ assis en ladicte paroisse de **Glenat** confronté en ladicte note à certains cens et rentes et aux tailles collectes manevres biains¹²⁸ et autres drois et devoirs et services acoustumés.

Item une autre note dudit de Philippe de date du second jour dudit octobre l'an que dessus contennent en effet que **Jehan du Lac** reconut soy tenir dudit seigneur le villaige du Lac confronté en ladicte note assis en ladicte paroisse de Saint Girons à certains cens et rentes et aux tailles manevres collectes biains servitutes exploix et autres drois et services acoustumés.

Item une autre note dudit de Philippe de date du second jour de janvier l'an mil quactre cens quarente deux contennent en effet que **Geraud de Moncanin** filz de feu Pierre et **Jehan de Moncanin** filz de feu Hugues reconurent eux tenir dudit seigneur toux deux ensemble tout le repayre ou fait nommé Le Repayre ou fait¹²⁹ de Mont Ault assiz

¹²⁵ Le notaire a sauté une partie du texte « recognut soy tenir etc. »

¹²⁶ « dec », mot occitan, « borne, limite » (Dictionnaire d'Occitan médiéval en ligne)

¹²⁷ Recoules, commune de Glenat

¹²⁸ « bian », mot occitan, « corvée » (Dictionnaire d'Occitan Médiéval (DOM en ligne)

¹²⁹ Du mot latin « factum », petite propriété rurale

ou villaige de Moncanin¹³⁰ en la parroisse de **Ciran** lequiel souloient tenir et en icelluy repayre habiter ou temps passé les anciens predecesseurs dudit seigneur exceptés le fraug¹³¹, serve et molin dudit seigneur avec certaines salvetés expresses en ladikte note et aussi checun desdis de Moncanin reconurent eux tenir la moytié checun dudit vilaige de Moncanin, et aussi ledit Jehan de Moncanin reconut soy tenir dudit seigneur certains pré bois terres et territoires nommés de **La Boyrie** aboutissans ensemble plus amplement designés et confrontés en ladikte note à certains cens et rentes et aux tailles subventions biains manevres exploix dons services trahus¹³² servitutes et autres drois et devoirs deus et acoustumés comme l'autre terre dudit seigneur. (02/01/1443)

Item unne autre note desdis deux noteres de date du vint et deuxiesme jour de janvier l'an mil quactre cens quarente deux contenant que **Guillaume de Longueyro** reconut soy tenir dudit seigneur tout le villaige de **Longueyron**¹³³ assiz en la parroisse de **Saint Christofle** ou diocese de Clermont confronté en ladikte note à certains cens et rentes et aux tailles exploix et autres drois et devoirs acoustumés. (22/01/1443)

Item unne autre note desdis deux noteres de la date que dessus contenant en effet que **Gerauld Geneste et Anthoyne Geneste** reconurent eux tenir dudit seigneur tout le vilaige de **Pomeyrol** assiz en la parroisse de **Arnac** confronté en ladikte note à certains cens et rentes et aux tailles et autres drois contenuz en les affranchimans.

Item unne autre note desdis deux noteres de date du vint et neufviesme jour dudit janvier l'an que dessus contenant en effet que **Bernard de la Baquerie**¹³⁴ reconut soy tenir dudit seigneur tout le vilaige de **La Robbaldie** assiz en ladikte parroisse de **Saint Christofle** à certains cens et rentes à tailles en quactre cas exprimés aussi en ladikte note.

Page 38 = folio 19 v

Item unne autre note dudit de Brige notere de date du trexiesme jour de juihl l'an mil quactre cens quarente troys contenant en effet que **Jehan de Vergnas** reconut soy tenir dudit seigneur sa partie et portion qu'il tient ou vilaige de **Vergnas**¹³⁵ et aussi ung ort nommé de Merle assiz oudit villaige de Vergnas et aussi ong autre ort nommé de La Geneste pareillement assiz oudit villaige confronté en ladikte note à certains cens et rentes et aux tailles manevres et autres drois et devoirs deus anciens et acoustumés.

Item unne autre note desdis deux noteres de date que dessus prouchain est dit contenant en effet que **Guillaume de Mamo** pour soy et pour **Pierre de Mamo** dez Bessieyres son frere tout le vilaige nommé **Le Puech al Mas** assiz en la parroisse de **Saint Santin** et ung affar dudit Guillaume nommé de **Betalhols** et aussi outre pour soy tout seul reconut soy tenir dudit seigneur ung autre vilaige nommé de **Boudigos** assiz en la parroisse de **Brou**¹³⁶ ou diocese de Saint Flour confrontés en ladikte note à certains cens et rentes et aux tailles et autres drois et devoirs acoustumés.

Item unne autre note desdis deux noteres de date que dessus prouchain contenant que Pierre de Faurgues dit de Mansergues et Pierre du Compte dit de Mansergues pour soy et pour les enfans de feu Jehan de Mansergues reconurent eux tenir dudit seigneur le vilaige de Mansergues assiz en la parroisse de Saint Santin et outre lesdit Perre du Compte pour soy et pour lesdis enfans le vilaige de La Pomeyrolie assiz en ladikte parroisse de Saint Santin et le vilaige de Feneyrols¹³⁷ assiz oussi en ladikte parroisse confrontés en ladikte note à certains cens et rentes et aux tailles manevres servitutes services et exploix acoustumés.

Item unne autre note dudit de Philippe de date du antepenultiesme jour de septembre l'an mil quactre cens quarente et quactre contenant en effet que Messire **Geraud Lez Combes** recteur de l'esglise parrochial de Romeguos oudit diocese de Saint Flour reconut soy tenir dudit seigneur toutes les maisons et chaminées pour ladikte esglise

¹³⁰ Montcany (commune de Siran) qui figure dans le DHSC sous le nom de « Montcaux », sans doute une coquille à la place de « Monteaux ». Calle, dans son ouvrage sur le Canton de La Roquebraou, place par erreur ce repaire à Montagut, village voisin.

¹³¹ « frau », mot occitan, « terre inculte » Dictionnaire d'Occitan Médiéval (DOM en ligne)

¹³² « trahut », mot occitan, « tribut » (Dictionnaire d'Occitan Médiéval, <http://www.dom-en-ligne.de/dom.php?lhid=2JwIBkD0yw1xcrWnRDPAjQ>)

¹³³ Longairoux, paroisse de Saint Christophe les Gorges

¹³⁴ De La Beccarie ?

¹³⁵ Vergne de Saint Santin Cantalès ? ou Lavergne de Saint Christophe les Gorges ?

¹³⁶ Paroisse de l'ancien village de Brou (Saint Martin), sans doute antérieur à La Roquebraou ; le village a disparu complètement.

¹³⁷ Fenairol, près de La Fourne

de **Romeguos**¹³⁸ assises oudit Romeguos confrontées en ladictte note à certains cens et rentes et aux autres drois et devoirs exploix tailles et excercices deuz et acoustumés

Page 39 = folio 20 r

Item et amprès oudit lieu de La Roquebraou le vint et septiesme jour dudit moys de mars l'an de l'incarnation nostre seigneur mil quactre cens cinquante produyst devent moy commissere dessusdit et par devent lesdis deux noteres Maistres Blayse de Cuelha et Anthoyne Blanchier unne lectre scripture en deux peaux de parchemin ensemble cousues signées dez seigns manuels de Maistres Philippe Jane Jean Dissartz et Guillaume Poignet noteres jurés du seel establi aux contraulx ou pays dez montaignes d'Auvergne et seellée dudit seel conteneant la coppie d'unnes lectres ou instrument receu par feu Maistre **Pierre Palach notere** et juré dudit seel esquelles est contenu ung acort ou transaction fait entre feuz Messire **Bernard de Vieux Champs** chivalier et Hugon son filz d'une part et **Astorg d'Orillac** escuyer d'autre de et sur aucuns debatz et questions meues entre lesdictes parties ou quel contrait antre autres chouses lesdis chivalier et Hugon son filz reconurent a tenir dudit Astorg aucuns vilaiges oudit contrait nommés assiz et toutes¹³⁹ les autres chouses que iceun pere et filz tenoyent ez parroisses de **La Chapelle de Vieux Champs**¹⁴⁰ de **Saint Poul dez Landes**¹⁴¹ de **Carlandela**¹⁴² de **Sansac** de **Ytract** de **Saint Estienne de Cantales** et de **Tiallac**¹⁴³ avec leurs cens rentes jurisdiction usaige seigneurie service alberc¹⁴⁴ queste taille et collecte lesquielx lesdis chivalier et sondit filz avoyent esdis vilaiges et checun d'eux lesquelles lectres ou leurs originalx estoient de date du marsdy amprès la feste de Saint Pierre ad vincula¹⁴⁵ **l'an mil et troys cens** fait ou monastere des nonains du Boys amprès Orhac¹⁴⁶ et est ladictte coppie de date du digmenche avant la feste de la Nativité de Saint Jehan Baptiste l'an mil troys cens cinquante sept.

Cy amprès s'ensuyvent les depositions desdis tesmoingns lesquielx ont juré sur sains evangilles dire et depposer verité par devent nous commissere et noteres que dessus de et sur le contenu esdis articles et lectres dessus inserées lesquielx ont dit et depposé amprès leursdis seremens checun d'eux particulièrement et secretement interrogé et examiné par moy commissere dessusdit comme s'ensuyt :

Et premièrement en la ville d'Orhac le quatriesme jour de mars l'an de l'incarnation de Nostre Seigneur mil quactre cens quarente neuf **Pierre de Corbieres** de la parroisse de **Saint Santin de Cantalès**

Page 40 = folio 20 v

ou diocese de Saint Flour et agé de cinquante ans ou environ et de memoire quarente ou environ tesmoign par la partie que dessus prouduyt examiné et interrogé par vertu de son serement dit et deppose si comme s'ensuyt :

Et premierement **sur** le premier article dit et deppose que ledit Amalry de Mont Ault est seigneur dez chasteaulx chastellenies et chouses contenues oudit article pour ce le set quar il a veu tenir oudit Amalry et à son pere au temps qu'il vivoit lesdictes seigneuries pour leurs et aussi du contenu oudit article est chouse publique ez pays d'Auvergne et de Lymosin.

Sur le second article dit et deppose le contenu en icelluy estre vray et pour se le set quar il a veu que feu Messire **Jehan de Mont Ault chivalier** pere de noble et puysent **Amalry de Mont Ault** dessusdit et de feu **Jehan de Mont Ault** lequel Jean estoit pere de noble **Guilhot de Mont Ault** tenoit et possidoit comme siens lez terres seigneuries de l'ostel de Mont Ault et estoit réputé seigneur de de Mont Ault. Dit que les baronies et chastellenies de La Roque

¹³⁸ Roumegoux

¹³⁹ Il semble que le notaire ait sauté quelques mots

¹⁴⁰ Lacapelle Viécamps

¹⁴¹ Saint Paul des Landes

¹⁴² Crandelles

¹⁴³ ?

¹⁴⁴ Droit d'auberge ou alberge

¹⁴⁵ Saint Pierre aux liens, fête le 01/08

¹⁴⁶ Monastère des religieuses du couvent du Buis près d'Aurillac

Braou et de Carbonieres qui sunt anciens et notables baronies et les chastellenies de Poul de Saint Victeur de Glenat de Vieux Champs et de Velsic et icelles seigneuries ledit feu Messire Jehan de Mont Ault tenoit et possidissoit comme siennes et les tenoit et possidissoit par son temps tant qu'il visquit et amprès luy succederent en icelles c'est ascavoir ledit Amalryc son filz esdictes terres et seigneuries de La Roquebraou de Poul de Glenat de Saint Victeur an leurs pertinences et deppendenses lesquelles il tient au jour d'uy et possede comme siennes à cause desquelles il a et luy appertienent plusieurs vassaulx nobles et autres ses homes et subgetz que y sunt tenuz en plusieurs et divers c'est ascavoir lesdis vassaulx homatges et autres drois de fieuf de seigneurie et les autres homes et subgetz en plusieurs cens rentes de blé d'argent et d'autres chouses services et autres drois et devoirs à cause des vilages tenenemens bourderies et autres terres et possessions qu'ilz tiennent de luy avec juridiction et justice. Dit oultre que oudit feu Jehan de Mont Ault filz dudit Messire Jehan et frere dudit Amalryc apertindrent et devindrent par la succession de sondit feu pere lez baronies et chastellenies dessusdictes de Carbonieres de Vieux Champs et de Velsic et leurs appertenances lesquelles il tint et posside comme siennes deppuis le trespas de sondit feu pere tant qu'il visquit et en icelles luy succede et icelles tient et possede comme siennes ledit noble Guilhot de Mont Ault son filz auquel appertienent au cause desdictes sez seigneuries plusieurs fieufz et drois de seigneurie et homaige esquelx luy sunt tenuz plusieurs vassaulx siens et aussi luy appertienent plusieurs cens rentes et autres drois et devoirs esquelx luy sunt tenuz

Page 41 = folio 21 r

plusieurs ses hommes et subgez à cause dez fieufs et seigneuries qu'ilz tiennent dudit noble Guilhot et aussi des vilages bourderies et autres possessions tenues de luy. Dit oultre que **ledit chastel et chastellenie de La Roque Braou est belle et fourte place** en laquelle ledit Amalryc a droit de baronie et de chastellenie et aussi esdictes autres ses places droit de chastellenies. Et neantmoins **ledit chastel de Carbonieres est belle et fourte place** en laquelle ledit noble Guilhaume a droit de baronie et de chastellenie et aussi esdictes chastellenies de Vieux Champs a droit de chastellenie. Et pour ce ledit qui parle dit lez chouses que dessus estre vrayes pour ce qu'il lez a ainsi veues et oyes¹⁴⁷ dire et ainsi ledit om¹⁴⁸ publiquement ez lieux circumvoysins.

Sur lez troysiesme quatriesme sinquiesme sixiesme septiesme et huytiesme articles se reppourte à ce que dessus a dit.

Sur le noviesme article dit et deppouse qu'il a veu deppuys quarente ans en ça et trente ans a ou environ que quant il aloyt et venoit par son chemin il trouvoit aucuns dez hommes de ladictte terre de Carbonieres qui aloyent fere le guayt audit chastel de Carbonieres selon qu'ilz disoyent. Dit oultre qu'il a ouy dire tousjours et se dit publiquement que lesdis homes dudit Guilhot de Mont Ault ont acoustumé et sunt tenuz fere le guayt oudit chastel de Carbonieres à la volenté de leurdit seigneur. Et neantmoins dit et deppouse qu'il a veu plusieurs foys deppuys cinquante ans et quarente ans a et oultre que lez hommes desdictes chastellenies de La Roquebraou c'est ascavoir dez terres et parroisses de La Roquebraou de Ciran et de la baylie de Saint Santin ont fait et acoustumé à fayre le guayt oudit chastel de La Roquebraou et lez autres hommes ressourtissans à ses autresdictes chastellenies lez funt et ont acoustumé à fere checun à sa dicte chastellenie bien est vray que quant lesdis homes ne funt le guet ausdictes chastellenies dont ilz sunt ressortissans

ilz ont acoustumé à payer et donner aucune chouse et esmolument pour ledit guayt oudit seigneur que est antreprins entre eux ou sondit cappitayne selon qu'ilz ont entrepris et acourdé entre eux et ainsi l'a veu luy qui parle par ledit tamps par plusieurs foys et de ce qu'il a deppousé est fame¹⁴⁹ publique esdictes chastellenies et baronies. A esté interrogé s'y l y a point aucuns homes habitans esdictes baronies et chastellenies exemps de fere ledit guayt comme dessus est dit, dit que non selon qu'il a ouy dire plusieurs foys. Mais a ouy dire que toux lesdis habitans sunt tenuz et ont acoustumé fere ledit guayt ou donner aucun esmolument pour icelluy comme dessus est dit. A esté interrogé comment scet il ce qu'il a deppousé, dit que pour ce qu'il qui parle est home de ladictte terre de Mont Ault et a servi ou tamps passé ledit Amalryc de Mont Ault et aussi le pere de luy qui parle a esté serviteur

¹⁴⁷ ouies

¹⁴⁸ Pour « le dit-on » !

¹⁴⁹ Transposition directe du latin « fama » = voix publique, opinion publique, réputation

desdis feu Messire Jehan et Amalry de Mont Ault au quel son pere luy qui parle a ouy dire aussi qu'il avoit veu et ouy observer et garder lez chouses dessusdictes ou fait dudit guayt

Page 42 = folio 21 v

ainsi que dessus est dit par le temps dudit feu Messire Jehan de Mont Ault. Dit oultre ledit tesmoig que aussi ainsi l'a ouy dire comme a deppousé aux hommes anciens de ladicte terre sans ce que jamays il y ait ouy dire ne veu le contrayre.

Sur les dixiesme unsiesme et douziesme articles dit et deppouse que par le tamps que le pere dudit tesmoign estoit bayle de la terre de Mont Ault en la baylié de Saint Santin de Cantales ressortissant à la baronie de La Roque Braou icelluy pere levoit lez rentes dudit seigneur et quarente ans a et oultre et deppuis aussi par le quel tamps ung escu d'or du pays de troys deniers valoit vinct deux soux et demy de fourte monoye, et de toux ceux qui devoient ung franc ou vinct soux en rente oudit seigneur il prenoit et levoit vinct soux de ladicte fourte monoye pour lez checuns vingt soux de rente, et à ladicte valeur de monoye il levoit et prenoit toux lez deniers d'icelle rente. Et deppuis ledit tamps luy qui parle a esté aussi bayle par pluseurs années de ladicte baylie de Saint Santin et a prins pareillement lesdictes rentes de deniers à ladicte valeur et a veu aussi que deppuis lez autres bayles ont prins lesdictes rentes de deniers à ladicte valeur. Dit oultre que lors estoit voix et fame publique par toute ladicte terre de Mont Ault par le temps qu'elle estoit toute à ung seigneur que les homes qui devoient lez rentes audit seigneur en deniers les payoent à ladicte valeur. Dit oultre que pluseurs hommes de ladicte terre de Mont Ault tant de Carbonieres que de La Roquebraou que aussi dez autres terres et seigneuries de Mont Ault avoient prins et vestus leurs vilaiges paravant que lez monoyes fussent apetissées de leur valeur.

Sur le quatorsiesme article dit et deppouse qu'il a veu deppuis cinquante ans et quarente ans a et outre tant pour le tamps dudit feu Messire Jehan de Mont Ault que deppuis continuellement jusques au tamps du present debat toutes quantes foys les bayles desdictes terres et seigneuries de Mont Ault commendoient aux hommes desdictes terres qu'ilz pourtassent le boys pour le chauffaige et service des hostels et seigneurs desdictes terres ilz le pourtoient san contrediction et ce a veu il qui parle par ledit tamps.

Sur le quinsiesme article dit et deppouse que par le tamps dudit feu Messire Jehan de Mont Ault et deppuis continuellement jusques au tamps du present debat ancommencé que toux les homes de ladicte terre de Mont Ault debat toutes quantes foys leur estoit commendé aller querir le vin pour la provision dez hostels et des seigneurs de ladicte terre ilz le aloyent querir avec leurs beufz et charois et venoyent querir iceux hommes à l'ostel dudit seigneur les pipes et cueves pour mectre ledit vin à l'ostel dudit seigneur et les

Page 43 = folio 22 r

offeciers dudit seigneur bailhoent ausdis hommes du pain et de la cher¹⁵⁰ pour fere leurs despens au chemin et d'ilec iceux homes lesdictes pipes et cueves vuydes pourtoient avec leursdis beufz et charrois au vinhoble où estoit achapté ledit vin et amprès lez en retournoient pleynes de vin ausdis hostelz et aucunes foys ailleurs là où il plassoit aux offeciers desdis seigneurs.

Sur le sexiesme article dit et deppouse qu'il a veu par sondit tamps de sa memoire jusques au tamps dudit debat encoumamsé que quant en l'hostel dudit seigneur de Mont Ault estoit quelque chouse à fere ou avoyent besoin de charroyes et beufs ou d'autres services les offeciers dudit seigneur aloyent querir les homes de ladicte terre pour fere les manevres aux quelles fere estoient mandés et quant estoit besoig à icelles manevres et negoces dudit houstel y avoir charrois aussi iceux homes lez amenoyent et venoient audit hostel pour fere les manevres et autres services par lesquelles fere estoient mandés et aucunes foys quant iceux homes ne venoyent fere lesdictes manevres et exploix avec leursdis charrois ou sens eux les offeciers dudit seigneur leur faysoient fere commendement par les sergens d'icelluy seigneur qu'ilz veinssent fere lesdictes manevres et exploix de charrois et par ainsi amprès lesdis commendemens lesdis homes venoyent comme commendé leur estoit san nulle contrediction et onques ledit tesmoign n'oy dire de contraire hors tan seulement au tamps du present debat encoumamsé.

¹⁵⁰ Cher = chair = viande

Sur le dix et septiesme article dit et deppouse que pour le tamps de sa memoire que ledit feu Messire Jehan de Mont Ault vivoit ledit feu Messire Jehan faysoit venir parler à son juge les bayles dez baylies de sa terre et ledit juge disoit à iceux bailes que ledit seigneur avoit mandé mectre taille sur ses hommes desdictes bailies et disoit lez sommes d'icelles tailles et iceux bailles en presence dudit juge esgaloient deppartoient et devisoient icelles sommes de taille checun baille sur les hommes de sa bailie et le dimanche amprès ladicte division iceux bailles disoient à checun dez homes de leursdictes baillies combien de taille ilz avoient et lesdis hommes aucunes foys payoent icelle taille sans eux rancurer ne plaindre aucunes fois aucuns se plainhoent et rancuroient qu'ilz estoient mal taillés et esgalés et lors selon qu'il sembloit ausdis bailles les repparoient ou quant lesdis bailles avoient reparé et lesdis homes ne vouloient tenir ladicte reparation aloient oudit seigneur

Page 44 = folio 22 v

et lors ledit seigneur selon que bon luy sembloit leur faisoyt grace et leur remetoit aucune somme de ladicte taille et l'autre somme ils payoent et aucunes foys ne leur fayçoit nulle grace mais leur faisoyt tout payer et ainsi checun an ledictes tailles l'en faisoyt et faysoit payer et quant iceux hommes ne payoient¹⁵¹ icelles tailles lesdis bayles les faisoyent excecuter par ung sergent dudit seigneur et les faisoyent ainsi payer. Dit oultre que ledit seigneur de Mont Ault par pluseurs foys et années a fait reppondre de l'argent de sedictes tailles par recevoir d'icelles aux merchens et autres desquelz il avoit prins merchandise et auxquelz il devoit. A esté interrogé il qui parle comment scet ce qu'il a dessus dit, dit que pour ce qu'il a veu par ledit tamps et a tousiours ouy dire aux homes anciens et autres de ladicte terre que ainsi avoit acoustumé estre fait checun an au tamps passé et de ce est et a esté voix et fame publique an toute ladicte terre de Mont Ault et onques il qui parle ne ouy dire le contraire. Dit oultre par la manière que dessus a dit il qui parle l'a veu et ouy observer et continuer en ladicte terre de Mont Ault amprès le decces dudit Messire Jehan par le tamps desdis Amalry et Jehan de Mont Ault sans nulle contrediction jusques au tamps du present debat.

Sur le dixhuytiesme article dit et deppouse que au temps dudit feu Messire Jehan de Mont Ault quarante ans sont passés et oultre et deppuis continuellement jusques au présent debat il qui parle a veu que toutes quantes foys l'en a mandé lez hommes de ladicte terre de Mont Ault pour foucher ou fener et pourter le foin dez prés dudit seigneur là où bon sembloit à ses officiers et deppuis aussi là où bon sembloit aux officiers de cesdis successeurs ilz le fouchoient fenoient et pourtoient comme mandé leur estoit sans nulle contrediction jusques au tamps du present debat encoumamcé et pour ce le scet quar ainsi l'a veu fere et observer par tout le tamps de sa memoire sans nulle contrediction et ainsi pareillement il a ouy dire aux autres homes anciens et autres desdictes terres sans ce que onques il ne ouyt dire le contraire jusques au tamps du present debat.

Sur le vint et deuxiesme article dit et deppouse qu'il a ouy dire le contenu oudit article.

Sur les trentiesme trenteungesme trente deuxiesme et trente troysiesme articles dit et deppouse que les holles nommés en iceux sont homes de ladicte terre de Mont Ault et dudit Amalry ressortissans tant à ladicte baronie de La Roquebraou que à sedictes autres terres et chastellenies à cause de leurs vilaiges et possessions. Dit oultre que lesdis homes nommés en iceux articles tant eux que aussi leurs predecesseurs ont acoustumé payer lesdictes teilles et fere les autres services manevres exploix et guayt par la forme et manière que dessus a dit et deppousé.

Page 45 = folio 23 r

Ledit jour en ladicte ville d'Orlhac **Jehan La Borie** du lieu de **Saint Victeur** ou dioucese de Saint Flour eagé de sixante ans et oultre et bonne memoire de cinquante tesmoign juré sur sains Dieu ewangiles par vertu de sondit serement a dit et deppousé de et sur lesdis articles comme dessus.

Premierement sur les premier second troysiesme quactriesme sinquiesme sixiesme septiesme et huytiesme articles dit et deppouse qu'il a veu par le tamps de feu Messire Jehan de Mont Ault chivalier seigneur de Mont Ault que les terres et seigneuries de Mont Ault appertenoyent toutes oudit feu Messire Jehan c'est assavoir lez baronies chasteaux et chastellenies de La Roquebraou de Carbonieres qui sont anciennes baronies et aussi lez chasteaux et

¹⁵¹ Dans tout le document, sans doute conformément à un usage de l'époque, le « i » des terminaisons en «-oient » est enlevé lorsque le « o » est précédé d'un « y » comme ici : « payoient » devient « payoent »

chastellenies de Glenat de Poul de Vieux Champs de Velsic et de Saint Victeur et leurs appartenances et en estoit seigneur seul et par le tout lesquelles seigneuries sunt et ont esté toutes de ladicte terre et seigneurie de Mont Ault à cause desquelles baronies et seigneuries oudit seigneur Messire Jehan de Mont Ault appartenoient et il avoit plusieurs vassaulx hommes et subgetz tenens de luy et de cesdictes baronies et seigneuries lesquelles c'est ascavoir lesdis vassaux sunt et estoient tenus et luy devoient fere homatges seremens et autres drois de fieufz à cause dez fieufz nobles et autres qu'ilz tenoient dudit seigneur et de sesdictes baronies chastellenies et seigneuries et lesdis autre ses homes et subgetz luy estoient tenus en plusieurs cens rentes de blé l'argent de gelines de moctons et autres drois et devoirs à cause dez vilaiges et bourderies qu'ilz tenoyent dudit seigneur de sesdictes seigneuries le quel seigneur par le tamps qu'il vivoit avoit et luy appartenoit toute justice et juridiction en sesdictes terres. Dit oultre que amprès le trespas dudit feu Messire Jehan luy succederent en sesdictes seigneuries c'est ascavoir Amalry de Mont Ault son filz ez baronie de La Roquebraou où il a bel et fort chastel et aussi ez chastellenies et chasteaux de Poul de Glenat et de Saint Victeur et leurs pertinences et dependences lesquelles baronie et chastellenie ledit Amalry tient et possede comme siennes et feu noble Jehan de Mont Ault filz de feu Messire Jehan succeda à sondit feu pere amprès son trespas ez baronie de Carbonieres et chastellenies de Vieux Champs de Velsic et leurs appartenances lesquelles par le tamps qu'il visquit amprès le trespas de sondit feu pere avec leurs appartenances et dependences il tint et posseda comme siennes ; au quel feu Jehan de Mont Ault a succédé apres son trespas noble Guillaume de Mont Ault son filz c'est ascavoir esdictes baronie de Carbonieres où il a beau chasteau et fourte place et en la chastellenie de Vieux Champs et leur appartenances, et en ladicte chastellenie de Velsic a succédé audit feu Jehan noble Amalrion de Mont Ault son filz et frere dudit Guillaume, lesquieulx nobles Guillaume et Amalrion freres tiennent et possèdent c'est ascavoir ledit Guillaume lesdictes baronie de Carbonieres et chastellenie de Vieux Champs et iceluy Amalry ladicte chastellenie de Velsic et par ainsi lesdis Amalry de

Page 46 = folio 23 v

Montault bailif dez montaignes d'Auverne et Guillaume et Amalrion de Mont Ault ses nepveux ont succédé oudit feu Messire Jehan de Mont Ault en sesdictes terres et seigneuries de Mont Ault ausquelx sunt deus et appartienent et lesquelx oussi tiennent et possident toux et checuns les drois et devoirs desdictes terres qui étoient deus oudit feu Messire Jehan seigneur de Mont Ault c'est ascavoir checung d'eux par telle portion qu'ilz luy succedent et ce a veu par le tamps de sadicte memoire luy qui parle tenir et observer et oussi l'a dit hom publiquement en toute ladicte terre de Mont Ault.

Sur lez noviesme dixiesme douxiesme quactorsiesme quinsiesme sexiesme dixeseptiesme et dixhuytiesme articles dit et deppouse par sondit serement qu'il est recors¹⁵² du tamps dudit feu Messire Jehan de Mont Ault par lequel tamps et dudit Amalry son filz du quel tamps et par sa memoire il qui parle a veu que lez hommes de la chastellenie de Saint Victeur, appartienent oudit Amalry, qui est ung des membres de ladicte terre de Mont Ault ont fait le guayt audit chastel de Saint Victeur toutes quantes foys le capitayne dudit chastel les en commendoit ou quant ilz ne fasoient ledit guayt donnoient aucun prouffit oudit capitayne pour ledit guayt. Neantmoins dit et deppouse que par ledit tamps il a veu que les hommes de ladicte chastellenie ont payé ou recevoir¹⁵³ dez rentes de ladicte chastellenie de Saint Victeur les cens et rentes de deniers qu'ils devoient oudit seigneur à la valeur de fourte monoye c'est ascavoir de vint deux soux et demy prins et comtés pour un escu d'or du poys de troys deniers, et vint soux de ladicte monoye pour ung franc d'or. Dit oultre luy qui parle que lesdis hommes de ladicte chastellenie de Saint Victeur pour ce qu'ilz estoient fourcés à ce fere à cause dez excecutions et gaigieres de leurs bien que les officiers desdis seigneurs leur prenoient et par ainsi leur estoit fourcé de payer lesdis cens et rentes à ladicte valeur. Dit oultre qu'il a veu par ledit tamps que lesdis habitans de ladicte chastellenie de Saint Victeur aloient fere les manevres charrois et exploix et autres services toutes quantes fois ilz estoient mandés à ce fere par les officiers desdis seigneurs comme à foucher fener et fere le foin d'icelluy seigneur an ses prés et le pourter là où bon sembloit à icelluy seigneur avec leurs charrois. Aussi dit et deppouse luy qui parle qu'il a veu par ledit tamps lesdis habitans de

¹⁵² « Recors », ailleurs « recours » = mémoratif, qui se souvient

¹⁵³ Probablement « payé au receveur »

ladicte chastellenie de Saint Victeur toutes quantes foys lesdis seigneurs leur ont fait indit et impousé tailles ont payé icelles c'est ascavoir checun par la part et portion

Page 47 = folio 24 r

que leur estoit impousée et divisé. Neantmois a dit et deppousé par sondit serement qu'il a veu lesdis habitans de ladicte chastellenie de Saint Victeur pourter et aler querir le vin au vinhoble pour icelluy seigneur toutes quantes foys luy ou ses officiers leur commendoit ce fere lesquelles chouses luy qui parle a veues observer et garder par ledit tamps en ladicte chastellenie de Saint Victeur sans contrediction nulle jusques au jour d'uy et encores au regart dez autres chastellenies de Mont Ault n'en scet rien n'en a rien ouy dire.

Le cinquiesme jour dudit moys **Jehan de Cas** de la parroisse de **Saint Santin de Cantales** ou dioucese de Saint Flour et agé de sixante cinq ans ou environ et memoire cinquante cinq et oultre, tesmoign par la partie que dessus produyt examiné et interrogé par vertu de son serement dit et deppouse si comme s'ensuyt :

Et premierement sur lez premier second troysiesme quactriesme cinquiesme sixiesme septiesme et huytiesme articles dit et deppouse qu'il a veu par le tamps de feu Messire Jehan de Mont Ault chivalier seigneur de Mont Ault que lez terres et seigneuries de Mont Ault appertenoient toutes oudit feu Messire Jehan c'est ascavoir les baronies chasteaux et chastellenies de La Roquebraou de Carbonieres qui sunt anciennes baronies et aussi les chasteaux et chastellenies de Glenat de Poul de Vieux Champs de Velsic et de Saint Victeur et leurs appertenances et en estoit seigneur seul et par le tout lesquelles seigneuries sunt et ont esté toutes de la terre et seigneurie de Mont Ault à cause desquelles baronies et seigneuries oudit seigneur messire Jehan de Mont Ault appertenoient et il avoit pluseurs vassaulx hommes et subgez tenens de luy et de sesdictes baronies et seigneuries lesquelles c'est ascavoir lesdis vassaux sunt et estoient tenuz et luy devoient fere homages seremens et autres drois de fieufz à cause dez fieufz nobles et autres qu'ilz tenoient dudit seigneur et de cesdictes baronies chastellenies et seigneuries et lesdis autres homes et subgez luy estoient tenuz en pluseurs cens rentes de blé d'argent de gelines de moctons et autres drois et devoirs à cause dez vilaiges et bourderies qu'iz tenoyent dudit seigneur de cesdictes seigneuries lequel seigneur par le tamps qu'il vivoit avoit et luy appertenoit toute justice et juridiction en cesdictes terres. Dit oultre que amprès le trespas dudit feu Messire Jehan luy succederent en cesdictes seigneuries c'est ascavoir Amalry de Mont Ault son filz ez baronie de La Roquebraou où il a beau et fort chasteau et aussi chastellenies et chasteaux de Poul de Glenat et de Saint

Page 48 = folio 24 v

Victeur et leurs pertinences et deppendances lesquelles baronie et chastellenie ledit Amalry tient et possede comme siennes, et feu noble Jehan de Mont Ault filz dudit Messire Jehan succeda à sondit feu pere amprès son trespas ez baronie de Carbonieres et chastellenies de Vieux Champs et de Velzic et leurs appertenances lesquelles par le tamps qu'il visquit amprès le trespas de sondit feu pere avec leurs appertenances et deppendances il tint posside comme siennes au quel feu Jehan de Mont Ault a succédé amprès son trespas noble Guillaume de Mont Ault son filz c'est ascavoir esdicte baronie de Carbonieres où il a beau chasteau et fourte place et en la chastellenie de Vieux Champs et leur appertenances, et en ladicte chastellenie de Velsic a succédé audit feu Jehan noble Amalrion de Mont Ault son filz frere dudit Guillaume, lesquieulx nobles Guillaume et Amalrion freres tiennent et possident c'est ascavoir ledit Guillaume lesdictes baronie de Carbonieres et chastellenie de Vieux Champs et icelluy Amalrion ladicte chastellenie de Velzic et par ainsi lesdis Amalry de Mont Ault baylif dez montaignes d'Auvergne et Guillaume et Amalrion de Mont Ault ses neveux ont succédé oudit feu Messire Jehan de Mont Ault en sesdictes terres et seigneuries et possident toux et checuns les drois et devoirs desdictes terres qui estoient deus oudit feu Messire Jehan seigneur de Mont Ault c'est ascavoir checun d'eux par telle porcion qu'ilz luy succedent et ce a veu par le tamps de sadicte memoire luy qui parle tenir et observer et aussi le dit om publiquement en toute ladicte terre de Mont Ault.

Sur le noviesme article dit et deppouse qu'il a veu pluseurs foys durant ledit tamps que les hommes habitans de ladicte chastellenie de La Roque Braou faisoient le guayt oudit chastel et ceux de la chastellenie de Saint Victeur aussi faysoient le guayt au chastel de Saint Victeur et ceux de la chastellenie de Poul le faysoient à Poul et ceux de

Glenat au chastel de Glenat et a ouy dire que les habitans de la chastellenie de Carbonieres le faysoient ou chasteau de Carbonieres avec ceux de Vieux Champs et de Velsic à la volenté et ordenance dez capitaynes desdis chasteaux excepté que d'aucunes foys lesdis habitans desdictes chastellenies donnoient et s'acourdoient avec lesdis capitaynes en certaine somme prouffit ou esmolument pour iceux guetz lesquelz ilz loyoent desdis capitaynes et moyennent ledit prouffit et esmolument ilz ne faisoyent mie ledit guayt et ce luy qui parle a veu observer et maintenir par ledit tamps sans nulle contrediction et ancorre se garde et observe.

Sur lez dixiesme et onsiemes articles dit et deppouse que aucuns dez hommes de la terre de Mont Ault avoient prins et investus leurs vilaiges ilz ou leurs predecesseurs ou tamps que la fourte monoye avoit cours c'est ascavoir que ung escu d'or du poys de trois deniers valoit vinpt deux soulx et demy de ladicte monoye et non plus.

Page 49 = folio 25 r

Sur le trexiesme article dit et deppouse qu'il a veu par le tamps de sa memoire tenir et observer en ladicte terre de Mont Ault que les bayles de ladicte terre aloient parmy les vilaiges de ladicte terre, et pourtoient et ont acoustumé à pourter lez meysure dez rentes de blé que les hommes tenenciers desdis vilaiges devoient à leur seigneur, et iceux bailes maysuroient icelluy blé esdis vilaiges desdis hommes, et puy iceux hommes pourtoient et ont pourté ladicte rente aux graniers desdis seigneurs sans nulle contrediction jusques au tamps du commencement du present debat.

Sur le quatorsiesme article dit et deppouse qu'il a veu tenir et observer par le tamps de sa memoire que les hommes de ladicte terre de Mont Ault tant de La Roquebraou et dez autresdictes baronnies et chastellenies ont acoustumé à pourter et ont pourté le boys avec leurs charrois et beufs necessere pour le chauffaige et service de l'ostel dudit seigneur là où icelluy seigneur fayçoit sa demurance et pour son service et de cesdis hostelz sans nulle contrediction ne debat jusques au tamps du present debat encoumamcé excepté toutesfoys que luy qui parle a veu plusieurs fois et ouy avant que le present debat fut encoumamcé que aucuns desdis hommes se rancuroient et plainhoent de ce qu'ilz disoient que l'on leur faisoit pourter trop souvent ledit boys.

Sur le quinziesme article dit et deppouse qu'il a veu par ledit tamps observer et garder que les hommes de ladicte terre de Mont Ault ont acoustumé fere et ont fait les chouses contenues oudit article sans nul debat ne contrediction jusques au tamps du present debat encoumamcé.

Sur le dixetseptiesme article dit et deppouse que pour le tamps de sa memoire que ledit feu Messire Jehan de Mont Ault vivoit ledit feu Messire Jehan faiçoit venir parler à son juge lez bayles dez baylies de sa terre et ledit juge disoit à iceux bayles que ledit seigneur avoit mandé mectre tailles sur ses hommes desdictes baylies et disoit lez sommes d'icelles tailles et iceux bailles en presence dudit juge esgualoyent deppartoient et divisoient icelles sommes de taille checun bayle sur les hommes de sa baylie et le dimenche amprès ladicte division iceux bailles disoient à checun dez homes de leursdictes baylies combien de taille ilz avoient et lesdis hommes aucunes fois payoient icelle taille sans eux rancurer ne plaindre aucunes fois aucuns se plainhoent et rancuroient qu'ilz estoient mal taillés et esgualés et lors selon qu'il sembloit ausdis bailes les repparoient ou quant lesdis bailles avoient repparé et lesdis hommes ne vouloient tenir ladicte repparation aloient audit seigneur eux plaindre et lors ledit seigneur selon que bon luy sembloit leur faiçoit grace et leur remectoit aucune somme de ladicte taille et l'autre somme ilz paioient et aucunes fois ne leur

Page 50 = folio 25 v

fayçoit nulle grace mais leur fayçoit tout payer et ainsi checun an lesdictes tailles l'on faiçoit et faiçoyt payer et quant iceux hommes ne payoient icelles tailles lesdis bailes lez faiçoient excecuter par ung sergent dudit seigneur et les fayçoient ainsi payer. Dit oultre que ledit seigneur de Mont Ault par plusieurs foys et années a fait respondre de l'argent desdictes tailles par les recevoirs d'icelles aux merchans et autres desquels il avoit prins merchandise et auxquels il devoit. A esté interrogé il qui parle comment scet ce qu'il a dessus dit, dit que pour ce qu'il a veu par ledit tamps et a tousjours ouy dire aux hommes anciens et autres de ladicte terre que ainsi avoit acoustumé estre fait checun an au tamps passé et de ce est et a esté voix et fame publique an toute la terre de Mont Ault, et onques il qui parle n'a ouy dire le contraire. Dit oultre par la maniere que dessus a dit il qui parle l'a veu et ouy observer et continuer en ladicte terre de Mont Ault amprès le decces dudit Messire Jehan par le tamps desdis Amalry et Jehan de Mont Ault sans nulle contrediction jusques au tamps du present debat.

Sur le dixhuytiesme article dit et deppouse que au tamps dudit feu Messire Jehan de Mont Ault quarente ans sunt passés et oultre et deppuis continuellement jusques au present debat il qui parle a veu que toutes quantes fois l'en a mandé les hommes de ladicte terre de Mont Ault pour foucher ou fener et pourter le foin dez prés dudit seigneur là où bon sembloit à ses officiers et deppuis aussi là où bon sembloit aux officiers de cesdis successeurs ilz le fouchoient fenoient et pourtoient comme mandé leur estoit sans nulle contrediction jusques au tamps du present debat encoumamcé et pour ce le scet quar ainsi l'a veu fere et observer par tout le tamps de sa memoire et sans nulle contrediction et aussi pareillement il a ouy dire aux autres hommes anciens et autres desdictes terres sans ce que onques il ne ouyt dire le contraire jusques au tamps du present debat. Item dit oultre et deppouse il qui parle qu'il a veu observer et garder les chouses dessusdictes ainssi qu'il les a deppousées par le tamps de sa memoire et san nul debat ne contrediction excepté comme dessus a depposé jusques ou commencement du present debat et jamais n'a ouy dire ne fere le contraire mais a ouy dire aux hommes anciens de ladicte terre de Mont Ault que ainsi avoit acoustumé estre fait et acoustumé de faire comme dessus a depposé.

Page 51 = folio 26 r

Sur lez trentiesme trenteungesme et trentedeuxiesme articles dit et deppouse qu'il croyt le contenu en iceux estre vray.

Ledit jour mesmes venerable et discrete personne Messire **Pierre de Pruns** prestre de la parroisse de Saint Santin de Cantales et agé de cinquante sinq ans et de memoire trente cinq ou environ, tesmoig par la partie que dessus prouduyt examiné et interrogé par vertu de son serement dit et deppouse comme s'ensuyt :

Et premierement sur lez premier second troxiesme quactriesme sinquiesme sixiesme septiesme et huytiesme articles deppouse qu'il a veu par le tamps de feu Messire Jehan de Mont Ault chivalier seigneur de Mont Ault que lez terres et seigneuries de Mont Ault appartenoient toutes oudit feu Messire Jehan de Mont Ault c'est ascavoir les baronies chasteaux et chastellenies de La Roquebraou de Carbonieres qui sunt anciennes baronies et aussi les chasteaux et chastellenies de Glenat de Poul de Vieux Champs de Velsic et de Saint Victeur et leurs appartences en estoit seigneur seul et par le tout lesquelles seigneuries sunt et ont esté toutes de la terre et seigneurie de Mont Ault à cause desquelles baronies et seigneuries oudit seigneur messire Jehan de Mont Ault appartenoient et il avoit plusieurs vassaulx hommes et subgez tenent de luy et de sesdictes baronies et seigneuries lesquelx c'est ascavoir lesdis vassaux sunt et estoient tenuz et luy devoient fere homaiges seremens et autres drois de fiefz et à cause dez fiefz nobles et autres qu'ilz tenoient dudit seigneur et de cesdictes baronies chastellenies et seigneuries et lesdis autres ses hommes et subgietz luy estoient tenus en plusieurs cens rentes de blé d'argent de gelines de moctons et autres drois et devoirs à cause dez vilaiges et bourderies qu'iz tenoyent dudit seigneur de cesdictes seigneuries lequel seigneur par le tamps qu'il vivoit avoit et luy appartenoit toute justice et juridiction en cesdictes terres. Dit oultre que amprès le trespas dudit feu Messire Jehan luy succederent en cesdictes seigneuries c'est ascavoir Amalry de Mont Ault son filz ez baronie de La Roquebraou où il a fort et beau chasteau et aussi ez chastellenies et chasteaux de Poul de Glenat et de Saint Victeur et leurs pertences et deppendences,

Page 52 = folio 26 v

et deppendences, lesquelles baronie et chastellenie ledit Amalry tient et posside comme siennes, et feu noble Jehan de Mont Ault filz dudit Messire Jehan succeda à sondit feu pere amprès son trespas ez baronie de Carbonieres et chastellenies de Vieux Champs et de Velzic et leurs appartences lesquelles par le tamps qu'il visquit amprès le trespas de sondit feu pere avec leur appartences et deppendences il tint et possida comme siennes, au quel feu Jehan de Mont Ault a succédé amprès son trespas noble Guillaume de Mont Ault son filz c'est ascavoir esdicte baronie de Carbonieres où il a beau chasteau et fourte place et en la chastellenie de Vieux Champs et leur appartences, et en ladicte chastellenie de Velsic a succédé oudit feu Jehan noble Amalrignon de Mont Ault son filz et frere dudit Guillaume, lesqueulx nobles Guillaume et Amalrignon freres tiennent et possident c'est ascavoir ledit Guillaume lesdictes baronie de Carbonieres et chastellenie de Vieux Champs et icelluy Amalrignon ladicte chastellenie de Velzic, et par ainsi lesdis Amalry de Mont Ault baylif dez montainhes d'Auvergne et Guillaume et Amalrignon de Mont Ault ses neveux ont succédé oudit feu Messire Jehan de Mont Ault en sesdictes terres et

seigneuries de Mont Ault ausquielx sunt deus et appertienent et lesquieux tiennent et possident toux et checuns les drois et devoirs desdictes terres qui estoient deus oudit feu Messire Jehan seigneur de Mont Ault c'est ascavoir à checun d'eux par telle porcion qu'ilz luy succedent, et ce a veu par le tamps de sa memoire luy qui parle tenir et observer et aussi l'a dit hom publiquement en toute ladicte terre de Mont Ault.

Sur le noviesme article dit et deppouse qu'il a veu par le tamps de sa memoire que les hommes de ladicte terre de Mont Ault checun a acoustumé à fere le guayt et l'ont fet ez chasteaux et chastellenies dont ilz ressortissent excepté que d'aucunes fois aucuns desdis hommes donnoient quelque prouffit ou esmolument au seigneur en lieu de fere ledit guayt et d'aucunes fois le faisoient fere par quelcun autre et luy qui parle l'a fet d'autre foys pour aucuns desdis hommes qui le loyoent ou tamps qu'il estoit clerc et luy donnoient prouffit.

Sur le onsiesme article dit et deppouse qu'il a ouy dire le contenu en icelluy.

Sur le douxiesme article dit et deppouse que le contenu en icelluy est vray.

Sur le trexiesme article dit et deppouse que les hommes de ladicte terre de Mont Ault c'est ascavoir ceux qui sunt lyges dudit seigneur ont acoustumé de pourter les rentes qu'ils doyvent oudit seigneur au granier d'icelluy et là out leur est mandé en ladicte terre de Mont Ault, et ce a veu il qui parle par le tamps de sadicte memoire sans nul debat ne contrediction jusques ou tamps du present debat, combien que iceux hommes par avant le present debat encoumamcé iceux hommes se rancuroient et se phainhoent.

Page 53 = folio 27 r

Sur le quatorsiesme article dit et deppouse qu'il a veu tenir et observer par le tamps de sa memoire que les hommes de ladicte terre de Mont Ault tant de La Roquebraou et dez autres baronies et chastellenies ont acoustumé à pourter et ont pourté le boys avec leurs charrois et beufz necessere pour le chauffage et service de l'oustel dudit seigneur là où icelluy seigneur faïçoit sa demeure et pour son service et de cesdis houstelz sans nulle contrediction ne debat jusques au tamps du present debat encoumamcé excepté toutesfoys que luy qui parle a veu plusurs fois et ouy avent que le present debat fut encoumamcé que aucuns desdis hommes se rancuroient et plainhoent de ce qu'ilz disoient que l'en leur faisoit pourter trop souvent ledit boys.

Sur le quinsiesme article dit et deppouse qu'il a veu par ledit tamps observer et garder que les hommes de ladicte terre de Mont Ault ont acoustumé fere et ont fait les chouses contenues oudit article sans nul debat ne contrediction jusques au tamps du present debat encoumamcé.

Sur le sexiesme article dit et deppouse qu'il a veu par ledit tamps que lesdis hommes de ladicte terre de Mont Ault faisoient et venoient fere et ont fet les manevres services exploix et charrois desquelz est fectz mention oudit article toutes quantes foys on les mandoit ou pour lever les rentes dudit seigneur.

Sur le dixetseptiesme article dit et deppouse qu'il a ouy dire par pluseurs foys vint ans a deppuis à aucuns dez hommes de ladicte terre et aux officiers d'icelluy seigneur que icelluy seigneur mandoit aucuns de ses hommes de sa terre c'est ascavoir ses bayles par lesquels il faisoit devire et esgualer sur ses hommes de sa terre aucunes sommes d'argent par maniere de taille de telles sommes que bon luy sembloit [*# renvoi dans la marge* : et icelles sommes ledit seigneur faysoit paier aux termes que bon luy sembloit] et faisoit contraindre iceulx hommes à paier lesdictes tailles par prises et executions de leurs biens et aucunes foys il leur faisoit reppondre sur icelles tailles aux merchans et autres ausquels il devoit argent.

Sur le dixhuytiesme article dit et deppouse qu'il a veu par le tamps de sa memoire que les hommes de ladicte terre de Mont Ault venoient foucher et fener le foin dez prés dudit seigneur quant om lez mandoit à ce fere ou tamps deu, autre chouse n'en scet.

Ledit jour Guibbent Conte de la parroisse de Saint Santin de

Page 54 = folio 27 v

Cantales ou dioucese de Saint Flour eagé de septante ans ou environ et de bonne memoire de sixante, tesmoig par la partie que dessus prouduyt examiné et interrogé par vertu de son sersment dit et deppouse comme s'ensuyt :

Et sur lez premier second troxiesme quactriesme sinquiesme sixiesme septiesme et huytiesme articles dit et deppouse qu'il a veu par le tamps de feu Messire Jehan de Mont Ault chivalier seigneur de Mont Ault que lez terres

et seigneuries de Mont Ault appartenens toutes oudit feu Messire Jehan c'est ascavoir les baronies chasteaulx et chastellenies de La Roquebraou de Carbonieres qui sunt anciennes baronies et aussi les chasteaux et chastellenies de Glenat de Poul de Vieux Champs de Velsic et de Saint Victeur et leurs appartenances et en estoit seigneur seul et par le tout lesquelles seigneuries sunt et ont esté toutes de la terre et seigneurie de Mont Ault à cause desquelles baronies et seigneuries oudit seigneur messire Jehan de Mont Ault appartenoyent et il avoit pluseurs vassaulx hommes et subgiez tenens de luy et de cesdictes baronies et seigneuries lesquelx c'est ascavoir lesdis vassaulx sunt et estoient tenuz et luy devoient fere homaiges seremens et autres drois de fiefz à cause dez fiefz nobles et autres qu'ilz tenoient dudit seigneur et de cesdictes baronies chastellenies et seigneuries et lesdis autres homes et subgietz luy estoient tenus en pluseurs cens rentes de blé d'argent de gelines de moctons et autres drois et devoirs à cause dez vilages et bourderies qu'ilz tenoient dudit seigneur de sesdictes seigneuries lequel seigneur par le tamps qu'il vivoit avoit et luy appartenoit toute justice et juridiction en cesdictes terres. Dit oultre que amprès le trespas dudit feu Messire Jehan luy succederent en cesdictes seigneuries c'est ascavoir Amalry de Mont Ault son filz ez baronie de La Roquebraou où il a fort et beau chateau et aussi ez chastellenies et chasteaux de Poul de Glenat et de Saint Victeur et leurs pertinences et deppendances lesquelles baronie et chastellenie ledit Amalry tient et posside comme siennes, et feu noble Jehan de Mont Ault filz dudit Messire Jehan succeda à sondit feu pere amprès son trespas ez baronie de Carbonieres et chastellenies de Vieux Champs et de Velzic et leurs appartenances lesquelles par le tamps qu'il visquit amprès le trespas de sondit feu pere avec leurs appartenances et deppendances il tint et possida comme siennes au quel feu Jehan de Mont Ault a succédé amprès son trespas

Page 55 = folio 28 r

noble Guillaume de Mont Ault son filz c'est ascavoir esdicte baronie de Carbonieres où il a beau chateau et fourte place et en la chastellenie de Vieux Champs et leur appartenances, et en ladicte chastellenie de Velsic a succédé oudit feu Jehan noble Amalrion de Mont Ault son filz et frere dudit Guillaume, lesquieux nobles Guillaume et Amalrion freres tiennent et possident c'est ascavoir ledit Guillaume lesdictes baronie de Carbonieres et chastellenie de Vieux Champs et icelluy Amalrion ladicte chastellenie de Velzic et par ainsi lesdis Amalry de Mont Ault baylif dez montainhes d'Auvergne et Guillaume et Amalrion de Mont Ault ses nepveux ont succédé oudit feu Messire Jehan de Mont Ault en sesdictes terres et seigneuries de Mont Ault ausquelx sunt deus et apertiennent et lesquieux aussi tiennent et possident toux et checuns les drois et devoirs desdictes terres qui estoient deus oudit feu Messire Jehan seigneur de Mont Ault c'est ascavoir checun d'eux par telle porcion qu'ilz luy succedent et ce a veu par le tamps de sadicte memoire luy qui parle tenir et observer et aussi l'a dit hom publiquement en toute ladicte terre de Mont Ault.

Sur le noviesme article dit et deppouse qu'il a veu par le tamps de sa memoire que les hommes habitans de ladicte terre de Mont Ault checun a acoustumé à fere le guayt et l'ont fet ez chasteaux des chastellenies dont ilz ressortissent excepté que d'aucunes fois aucuns desdis hommes donnoient quelque prouffit ou esmolument au seigneur en lieu de fere ledit guayt et d'aucunes fois le faysoient fere par quelcun autre et luy qui parle l'a fet d'autres fois pour aucuns desdis hommes qui le loyoent et luy donnoient prouffit.

Sur les dixiesme onziesme et douziesme articles dit et deppouse qu'il a veu et est recors du tamps que la fourte monoye courroit c'est ascavoir vingt deux soulx et demy pour ung escu d'or du poys de trois deniers et en icelluy tamps lez hommes de ladicte terre ont payé les rentes deues en argent à la valeur de ladicte monoye et deppuis icelluy tamps lez seigneurs de la terre de Mont Ault et leurs officiers ont fet payer les rentes deues en deniers à la valeur d'icelle fourte monoye san nul debat ne contrediction jusques au present debat encomamcé combien que par avant icelluy debat aucuns dez hommes de ladicte terre se plainhoent et rencuroient entre eux de ce que dit est mes toutes fois non obstant lesdictes plaintes ilz payoent comme dessus.

Page 56 = folio 28 v

Sur le quatorsiesme article dit et deppouse qu'il a veu par le tamps de sa memoire que les hommes de ladicte terre de Mont Ault et ont pourté et acoustumé porter oudit seigneur et à son hostel le boys qui luy estoit necessere pour son chauffaige et pour le service de son hostel sans nul debat ne contrediction jusques au tamps du present debat toutes quantes foys l'on leur commendoit ce fere.

Sur le quinsiesme article dit et deppouse qu'il a veu par ledit tamps observer et garder que les hommes de ladictte terre de Mont Ault ont acoustumé fere et ont fait lez chouses contenez oudit article san nul debat ne contrediction jusques au tamps du present debat encoumamcé.

Sur le sexiesme article dit et deppouse qu'il a veu par ledit tamps que lesdis hommes de ladictte terre de Mont Ault faysoient et venoient fere et ont fet les manevres services exploix et charroix desquels est fecte mention oudit article toutes quantes foys on lez mandoit ou pour lever les rentes dudit seigneur. Dit oultre que les hommes de ladictte terre n'ousoient contredire de fere ce que dit est jusques oudit debat encoumamcé.

Sur le dixeseptiesme article dit et deppouse que pour le tamps de sa memoire que ledit Messire Jehan vivoit il faïçoit venir parler à son juge sez baylez et ledit juge leur disoit que ledit seigneur avoit mandé mectre tailles sur sez hommes et disoit lez sommes d'icelles et iceux baylez en sa presence divisoient taillez checun baille de sa taille sur sez hommes et amprès icelle division iceux bailles disoyent à checun d'iceulx combien ilz navoient aucunes fois la payoent sans s'en rencurer aucunes fois aucuns se plaignoyent et lors selon qu'il sembloit ausdis bailles aucunes foys les diminyoyent et quant n'en estoient contens de ladictte diminution s'en plaignoyent audit seigneur et selon que audit seigneur bon sembloit les reparoit et l'autre somme payoent et d'autres fois ne lez reparoit point et failloit que le payassent sans nulle grace et ainsi checun an payoent et ne estoient excecutéz quant ne la payoent et d'aucunes foys respondoient d'icelles aux merchans pour icelluy seigneur et ainsi l'a veu et a tousjours ouy dire aux anciens et autres de ladictte terre qui disoient que ainsi avoit acoustumé estre fait par sa memoire et san nul debat ne contrediction excepté que deppuys ledit appellation.

Sur le dixhuytiesme article dit et deppouse que au tamps dudit feu Messire Jehan de Mont Ault quarente ans sunt passés et oultre et deppuis continuellement jusques ou present debat il qui parle a veu que toutes quantesfois l'en a mandé les hommes de ladictte terre de Mont Ault pour foucher ou fener et pourter le foin dez prés dudit seigneur là où bon sembloit à ses officiers et deppuis aussi là où bon sembloit aux officiers de cesdis successeurs ilz le fouchoyent fenoyent et pourtoient comme mandé leur estoit sans nulle contrediction jusques au tamps du present debat encoumamcé et pour ce la scet quar ainsi l'a veu fere et observer par tout le tamps de sa memoire et sans nulle contrediction et aussi pareillement il a ouy dire aux autres hommes anciens et autres desdictes terres sans ce que onques il ne ouyt dire le contraire jusques au tamps du present debat.

Page 57 = folio 29 r

Sur lez trentiesme trente ungeisme et trente deuxiesme articles dit et deppouse qu'il scet que lez hommes nompmés en iceulx articles sunt hommes de ladictte terre de Mont Ault, autre chouse n'en scet.

Ledit cinquiesme jour dudit moys de martz l'an que dessus **Jehan de Selve** de la parroisse de Saint Santin de Cantales ou diocese de Saint Flour agé de cinquante ans ou environ et memoire de quarente ans ou environ, tesmoig par la partie que dessus prouduyt examiné et interrogé par vertu de son serement dit et deppouse comme s'ensuyt :

Et Premièrement sur lez premier second troysiesme quactriesme sinquiesme sixiesme septiesme et huytiesme articles dit et deppouse qu'il a veu par le tamps de feu Messire Jehan de Mont Ault chivalier que lez terres et seigneuries de Mont Ault appartenoient toutes oudit feu Messire Jehan, c'est ascavoir lez baronnies chasteaux et chastellenies de La Roquebraou de Carbonieres qui sont anciennes baronnies et aussi lez chasteaulx et chastellenies de Glenat de Poul Vieux Champs de Velsic et de Saint Victeur et leurs appartenances et en estoit seigneur seul et par le tout, lesquelles seigneuries sont et ont esté toutes de la terre et seigneurie de Mont Ault, à cause desquelles baronies et seigneuries oudit seigneur messire Jehan de Mont Ault et il avoit pluseurs vassaulx hommes et subgiez tenens de luy et de cesdictes baronnies et seigneuries, lesquelles c'est ascavoir lesdis vassaulx sunt et estoient tenuz et luy devoient fere homaiges seremens et autres droys de fiefz à cause dez fieufz nobles et autres qu'ilz tenoient dudit seigneur et de cesdictes baronnies chastellenies et seigneuries et lesdis autres ses hommes et subgietz luy estoient tenus en pluseurs cens rentes de blé d'argent de gelines de moctons et autres drois et devoirs à cause dez vilagez et bourderies qu'ilz tenoient dudit seigneur de cesdictes seigneuries, lequel seigneur par le tamps qu'il vivoit

avoit et luy appartenoit toute justice et juridiction en sesdictes terres. Dit oultre que amprès le trespas dudit feu Messire Jehan luy succederent en cesdictes seigneuries c'est ascavoir Amalry de Mont Ault son filz ez baronnie de La Roquebraou où il a fort et beau chasteau et oussi ez chastellenies et chasteaux de Poul de Glenat et de Saint Victeur et leurs appartences et deppendances lesquelles baronnie et chastellenie ledit Amalry tient et possede comme siennes, et feu noble Jehan de Mont Ault filz dudit

Page 58 = folio 29 v

Messire Jehan succeda à sondit feu pere amprès son trespas ez baronnie de Carbonieres et chastellelies de Vieux Champs et de Velzic et leurs appartences lesquelles par le tamps qu'il visquit amprès le trespas de sondit feu pere avec leurs appartences et deppendances il tint et posside comme siennes, ou quel feu Jehan de Mont Ault a succédé amprès son trespas noble Guillaume de Mont Ault son filz c'est ascavoir esdicte baronie de Carbonieres où il a beau chasteau et fourte place et en la chastellenie de Vieux Champs et leur appartences, et en ladicte chastellenie de Velzic a succédé oudit feu Jehan noble Amalrignon de Mont Ault son filz et frere dudit Guillaume, lesquelx noble Guillaume et Malrygon freres tiennent et possident c'est ascavoir ledit Guillaume lesdictes baronies de Carbonieres et chastellenie de Vieux Champs et icelluy Malrignon ladicte chastellenie de Velzic et par ainsi lesdis Amalry de Mont Ault baylip dez montainhes d'Auvergne et Guillaume et Malrignon de Mont Ault ses nepveux ont succédé oudit feu Messire Jehan de Mont Ault en sesdictes terres et seinheuries de Mont Ault ausquielx sont deus et apertienent et lesquieux oussi tennent et possident toux et checuns lez drois et devoirs desdictes terres qui estoient deus oudit feu Messire Jehan seigneur de Mont Ault c'est ascavoir à checun d'eux pour telle porcion qu'ilz luy succedent et ce a veu par le tamps de sadicte memoire luy qui parle tenir et observer et ainsi l'a dit hom publiquement en toute ladicte terre de Mont Ault.

Sur le dixiesme article dit et deppouse par vertu de son serement qu'il a veu deppuys que la monoye fourte fu changée c'est ascavoir que ung escu d'or du poys de troys deniers avoit cours pour vinpt deux soulx et demy de ladicte fourte monoye lesdis hommes de ladicte terre de Mont Ault ont acoustumé payer lez rentes qu'ilz devoient en argent oudit seigneur à la valeur c'est ascavoir ung escu d'or prins pour ung franc de ladicte monoye desdictes rentes et ce a veu tenir et observer par l'espace de trente ans passés ou environ et par avent ladicte mutation et appetissement de monoye fourte iceulx hommes payoent et ont acoustumé payer à ladicte fourte monoye, de laquielle chouse lesdis hommes se plainhoent et rancuroient et disoyent que c'estoit mal fet et qu'ilz ne le devoient fere mes toutesfoys ilz la poyoent comme dit est. Dit oultre que les hommes de ladicte terre de Mont Ault avoient prins et investuz les vilaiges qu'ilz tiennent de ladicte terre par le tamps que ladicte fourte monoye couroit et quoy qu'il coit pluseurs dez hommes qui sont ou tamps present de ladicte terre ilz ou leurs predecesseurs et croyt aussi que ladicte terre de Mont Ault est assise en pays de droit script.

Sur lez onxiesme et dotxiesme articles se rapporte à ce que dessus a dit.

Page 59 = folio 30 r

Sur le quactorsiesme article dit et deppouse qu'il a veu par le tamps de sa memoire que lez hommes de ladicte terre de Mont Ault ont pourté et acoustumé porter oudit seigneur et à son hostel le bois que luy estoit neccessere pour son chauffaige et pour le service de son houstel sans nul debat ne contrediction jusques au tamps de present debat toutes quantes fois l'en leur commendoit ce fere.

Sur le quinsiesme article dit et deppouse qu'il a veu pluseurs foiset années que lez hommes de ladicte terre de Mont Ault sont alez querir avec leurs beufz et charrois au vinhoble où les officiers dudit seigneur avoient achapté le vin qui estoit neccessere oudit seigneur pour sa deppense de son houstel. Et dit oultre il qui parle que lesdis hommes se plainhoent de aler querir le vin mes toutes fois ilz y aloient le querir sens autre debat ne contrediction excepté que le debat ancoumamcé dont est fecte mention esdictes lectres de commission.

Sur le sexiesme article dit et deppouse qu'il a veu **ou tamps que monsieur le baylif qui est ou jour d'uy seigneur de Mont Ault faïoit ediffier et bastir son chastel de La Roquebraou** lez hommes de ladicte terre de Mont Ault luy faysoient manevres de corps exploix et services et les charrois avec leurs beufs et pluseurs autres hommes aussi qui n'estoient point hommes de ladicte terre et ce a veu il qui parle pluseurs fois.

Sur le dixhuytiesme article dit et deppouse qu'il a veu plusieurs foys par le tamps de sa memoire que lez hommes de ladicte terre quant ilz espoient mandés aloyent foucher et fener le foyn dez prés dudit seigneur. A esté interrogé se il a veu qu'ilz pourtassent le foyn dit qu'il n'en estoit riens.

Sur lez trentiesme trenteungisme et trente deuxiesme articles dit qu'il cognoit Jehan de Bessas Jehan de Robbert Pierre et Jehan de Hutgols Jehan Sourny Pierre Chassanh Pierre de Salvanhac Geraud de Barascon Durand de Palach Olivier du Coderc Beguon du Mespulier Geraud de Mont Agut nompmés esdictes lectres qui sont hommes de ladicte terre de Mont Ault.

Page 60 = folio 30 v

Ledit jour venerable et discrete personne Messire **Gerauld d'Umbert** de la parroisse de Saint Gerons ou dioucese de Saint Flour et agé de septante ans ou environ et de bonne memoire de sixante ans ou environ, reclus en la reclusion nompmée d'Aurengue de la ville d'Orlhac, tesmoig par la partie que dessus prouduyt, examiné et interrogé par vertu de son serement dit et deppouse comme s'ensuyt :

Et Premièrement sur lez premier second troysiesme quactriesme sinquiesme sixiesme septiesme et huytiesme articles dit et deppouse qu'il a veu par le tamps de feu Messire Jehan de Mont Ault chivalier seigneur de Mont Ault que lez terres et seigneuries de Mont Ault appertenoient toutes oudit feu Messire Jehan, c'est ascavoir lez baronies chasteaux et chastellenies de La Roquebraou de Carbonieres qui sont anciennes baronies et aussi lez chasteaux et chastellenies de Glenat, de Poul et Vieux Champs et de Velzic, de Saint Victeur et leurs appertenances et en estoit seigneur seul et par le tout, lesquelles seigneuries sont et ont esté toutes de la terre et seigneurie de Mont Ault, à cause desquelles baronies et seigneuries oudit seigneur messire Jehan de Mont Ault appertenoyent et il avoit plusieurs vassaulx hommes et subgiez tenens de luy et de cesdictes baronies et seigneuries, lesquels c'est ascavoir lesdis vassaulx sont et estoient tenus et luy devoient fere homaiges seremens et autres droys de fieufz à cause dez fieufz nobles et autres qu'ilz tenoient dudit seigneur et de sesdictes baronnies chastellenies et seigneuries et lesdis autres ses hommes subgiez luy estoient tenus en plusieurs cens rentes de blé d'argent de gelines de moctons et autres drois et devoirs à cause dez vilaiges et bourderies qu'ilz tenoient dudit seigneur de sesdictes seigneuries, lequel seigneur par le tamps qu'il vivoit avoit et luy appertenoit toute justice et juridiction en sesdictes terres. Dit oultre que amprès le trespas dudit feu Messire Jehan luy succederent en sesdictes seigneuries c'est ascavoir Amalry de Mont Ault son filz ez baronnie de La Roquebraou où il a fort et beau chateau et oussi ez chastellenies et chasteaux de Poul de Glenat et de Saint Victeur et leurs pertenances et deppendances lesquelles baronnie et chastellenie ledit Amalry tient et possede comme siennes, et feu noble Jehan de Mont Ault filz dudit feu Messire Jehan succeda à sondit feu pere amprès son trespas ez baronnie de Carbonieres et chastellenies de Vieux Champs et de Velzic et leur appertenances lesquelles par le tamps qu'il visquit amprès le trespas de sondit feu pere avec leur appertenances et deppendances il tint et posside comme siennes, au quel feu Jehan de Mont Ault a succédé amprès son trespas noble Guillaume de Mont Ault son filz c'est ascavoir esdictes baronnie de Carbonieres où il a beau chateau et fourte place et en la chastellenie de Vieux Champs et leur appertenances, et en ladicte chastellenie de Velzic a succédé oudit feu Jehan noble Amalrion de Mont Ault son filz et frere dudit Guillaume, lesquels noble Guillaume et Amalrion freres tiennent et possident c'est ascavoir ledit Guillaume lesdictes baronnie de Carbonieres et chastellenie de Vieux Champs et icelluy Amalrion ladicte chastellenie de Velzic et par ainsi lesdis Amalry de Mont Ault baylif dez montainhes d'Auvergne, Guillaume et Malrion de Mont Ault ses nepveus ont succédé oudit feu Messire Jehan de Mont Ault en sesdictes terres et seigneuries de Mont Ault ausquelx sont deus et appertiennent et lesquieux

Page 61 = folio 31 r

oussi tennent et possident toux et checuns lez drois et devoirs desdictes terres qui estoient deus oudit feu Messire Jehan seigneur de Mont Ault c'est ascavoir à checun d'eux par telle portion qu'ilz luy succedent et ce a veu par le tamps de sadicte memoire luy qui parle tenir et observer et oussi l'a dit hom publiquement en toute ladicte terre de Mont Ault. Dit oultre que il qui parle est natif de ladicte terre de Mont Ault où il a demeuré cinquante ans ou environ.

Sur le dixiesme onsiesme et dotziesme articles dit et deppouse que lez hommes de ladicte terre de Mont Ault payoent at ont acoustumé à payer lez rentes qu'ilz devoient aux seigneurs de ladicte terre de Mont Ault par les vilayges en argent et en deniers comtant à fourte monoye de laquelle vint et deux soulx et demy valoient ung ecu d'or du poys de trois deniers et non plus. Dit oultre que aucuns dez hommes habitans de ladicte terre de Mont Ault desdictes baronnies et chastellenies ou leurs predecesseurs par le tamps que ladicte fourte monoye avoit cours et par avant que icelle feust appetissée et diminuée de sa valeur avoyent prins et investuz leurs vilaiges qu'ils tenoyent et tiennent de ladicte terre de Mont Ault et de lesdictes baronnies et chastellenies.

Sur le tretziesme article dit et deppouse le contenu d'icelluy estre vray car ainsi la faysoit il qui parle et veoit oussi que lez autres hommes habitans de ladicte terre la faysoient pareillement ou tamps qu'ilz demeuroient en ladicte terre de Mont Ault.

Sur le quactorsiesme et quinsiesme articles dit et deppouse qu'il a veu deppuys cinquante ans et quarente ans a et oultre tant pour le tamps dudit feu Messire Jehan de Mont Ault que deppuys continuellement jusques au tamps du present debat toutes quantes foyes lez bailles desdictes terres et seigneuries de Mont Ault commendoient aux hommes desdictes terres qu'ilz pourtassent le boys pour le chauffaige et service dez hostelz et seigneurs desdictes terres ilz le pourtoient san contrediction et ce a veu il qui parle par ledit tamps. Dit oultre que par le tamps dudit feu Messire Jehan de Mont Ault et deppuys continuellement jusques ou tamps du present debat encoumamcé que toux lez hommes de ladicte terre de Mont Ault toutes quantes foyes leur estoit commendé aler querir le vin pour la provision desdis houstelz et desdis seigneurs de ladicte terre ilz la aloient querir avec leurs beufs et charrois et venoient querir iceux hommes à l'oustel dudit seigneur les pipes et cueves pour mectre ledit vin à l'oustel dudit seigneur et les officiers dudit seigneur bailloient ausdis hommes du pain et de la cher pour fere leur despense au chemin et d'illec iceulx hommes lesdictes pipes et cueves vuydes pourtoient avec leurdis beufz et charrois où estoit achapté ledit vin et amprès dez en retournoient pleynes de vin ousdit houstels et aucunes foyes ailleurs là out il playsoit aux officiers desdis seigneurs

Sur le sexiesme article dit et deppouse qu'il n'en scet rien.

Page 62 = folio 31 v

Sur le dix et septiesme article dit et deppouse que pour le tamps de sa memoire que feu Messire Jehan de Mont Ault vivoit ledit feu Messire Jehan faysoit venir parler à son juge lez bayles dez baylies de sa terre et ledit juge disoit à iceulx bayles que ledit seigneur avoit mandé mectre tailles sur ses hommesdesdictes baylies et disoit lez sommes d'icelles tailles et iceux bailles en presence dudit juge esgualegoient et deppartoyent et divisoient icelles sommes de taille checun bayle sur lez hommes de sa baillie et le digmanche amprès ladicte division iceux bailles disoyent à checun dez hommes de leurdicte baillies combien de taille ilz avoient et lesdis hommes aucunes fois payoent icelle taille sans eux rancurer ne plaindre, aucunes fois aucuns se plainhoent rancuroient qu'ilz estoient mal taillés et esgalés et lors selon qu'il sembloit ausdis bayles ilz repparoient ou quant lesdis bailles avoient repparé et lesdis hommes ne vouloient tenir ladicte reparation aloient oudit seigneurieux plaindre et lors ledit seigneur selon que bon luy sembloit leur faysoit grace et leur remectoit aucune somme de ladicte taille et l'autre somme ilz payoent et aucunes foyes ne leur faysoit nulle grace mais leur faisoit payer, et quant iceulx hommes de payoent icelles tailles lesdis bayles les faysoient executer par ung sergent dudit seigneur et lez faysoient ainsi payer. Dit oultre que ledit seigneur de Mont Ault pluseurs foyes et années a fait respondre de l'argent desdictes tailles par les recevoir d'icelles aux merchans et autres desquielx il avoit pris marchandises et auxquielx il devoit. A esté interrogé il qui parle comment scet ce qu'il a dessusdit, dit que pour ce qu'il a veu par ledit tamps et a tousjours ouy dire aux hommes anciens et autres de ladicte terre que ainsi avoit acoustumé estre fait checun an ou tamps passé et de ce est et a esté voix et fame publique en toute ladicte terre de Mont Ault et onques il qui parle ne ouy dire le contraire. Dit oultre que par la maniere que dessus a dit il qui parle l'a veu et ouy observer et continuer en ladicte terre de Mont Ault amprès le decces dudit Messire Jehan par le tamps desdis Amalry et Jehan de Mont Ault san nulle contrediction jusques au tamps du present debat.

Sur le dixehuytiesme article dit et deppouse que au tamps dudit feu Messire Jehan de Mont Ault quarente ans sunt passés et oultre et deppuys continuellement jusques ou present debat il qui parle a veu que toutes et quantes foyes l'en a mandé lez hommes de ladicte terre de Mont Ault pour foucher ou fener et pourter le foin dez prés dudit

seigneur là où bon sembloit à ses officiers et de puis aussi là où bon sembloit aux officiers de cesdis successeurs ilz le fouchoyent fenoyent et pourtoient comme mandé leur estoit sans nulle contrediction jusques au tamps du present debat encoumamsé et pour ce la scet quar ainsi l'a veu fere et observer par tout le tamps de sa memoire et san nulle contrediction et ainsi pareillement il a ouy dire aux autres hommes anciens et autres de cesdictes

Page 63 = folio 32 r

terres sans ce que onques il ne ouyt dire le contraire jusques au tamps du present debat. Dit oultre que toutes les chouses dessusdictes estoient notoires et publiques en ladicte terre de Mont Ault par le tamps qu'il y demouroit et a ouy dire luy qui parle à pluseurs hommes de ladicte terre les chouses dessusdictes et onques d'ouy dire le contraire jusques le plet dont est fecte mention sedictes lectres.

Sur le vingtequatriesme article dit et deppouse le contenu d'icelluy estre vray pour se qu'il a veu souvent.

Sur le trentiesme trenteungisme et trente deuxiesme articles dit et deppouse qu'il cognoit Gerould du Mas, Jehan de Besses, Thomas de Claumagiran, Pierre Chassanh, Jehannot du Mas dez Bordes, Pierre Salvanhac, Pierre et Jehan de Lachenx, Micheau d'Escoubeyrou, Jehan de Moncanin, Pierre de Reygadas, Pierre du Mas et les autre nompmés en iceulx articles sunt de la terre de Mont Ault.

Ledit jour mesmes Pierre du Puy du lieu de Montvert ou diocese de Saint Flour et eagé de septante ans et memoire de sixante ans ou environ, tesmoig par la partie que dessus prouduyt, examiné et interrogé par vertu de sondit serement, dit et deppouse si comme s'ensuyt :

Et Premièrement sur lez premier second troysiesme quactriesme sinquiesme sixiesme septiesme huytiesme neufviesme dixiesme unxiesme dotziesme tretzieme quatorsiesme quinsiesme sexiesme et dixeseptiesme articles dit et deppouse qu'il a veu et cogneu en son tamps feu Messire Jehan de Mont Ault chivalier seigneur de Mont Ault lequiel tenoit et possidoit toutes les seigneuries de Mont Ault, c'est ascavoir lez terres chasteaux et chastellenies et seigneuries de La Roquebraou, de Carbonieres out il a beaux chasteaux et places fourtes et aussi de Glenat, de Poul, de Velsic et Saint Victeur, Vieux Champs et leurs appertenances. Ne scet pas se La Roquebraou et Carbonieres sunt baronies, toutes foyz l'en appelloit leudit Messire Jehan baron de Mont Ault ; ne scet pas oussi se lesdictes terres et seigneuries ont prehemence et parrougatives de baronnies et de chastellenies, ne oussi ne scet pas si ledit seigneur de Mont Ault avoit aucuns vassaulx à cause de sesdictes terres, bien scet que aucuns hommes tenoyent pluseurs vilaiges de luy à cause desquelz ilz devoient oudit seigneur pluseurs cens rentes de blé d'argent de poulaillies moctons et autres drois et devoirs. Dit oultre que ausdictes seigneuries et terres de Carbonieres, de Velzic et de Vieux Champs succeda audit feu Messire Jehan et amprès son trespas feu noble Jehan de Mont Ault son filz, ouquiel feu Jehan de Mont Ault amprès son trespas oussi a succédé ez terres de Carbonieres et de

Page 64 = folio 32 v

Vieux Champs noble Guillaume de Mont Ault son filz. A ouy dire que en ladicte terre de Velzic luy a succédé noble Amalry de Mont Ault son filz. Et oultre oudit feu Messire Jehan de Mont Ault seigneur de Mont Ault a succédé Amalry de Mont Ault son filz ou present baylif des montaignes d'Auvergne esdictes terres et seigneuries de La Roquebraou, de Poul, de Glenat, de Saint Victeur et leur appertenances, desquelz successeurs dudit feu Messire Jehan tiennent pour leurs c'est ascavoir checun pour sa part ce que appartenoit oudit feu Messire Jehan seigneur de Mont Ault . Dit oussi que ledit feu Messire Jehan de Mont Ault avoit justice et juridiction en ses terres et seigneuries. Dit oultre qu'il a esté pluseurs foyz oudit chastel de Carbonieres où il a veu que lez hommes de ladicte terre de Carbonieres faysoient le guayt de nuyt sens nul debat, lequiel oussi encores funt. Dit oultre oussi qu'il a ouy dire à pluseurs dez hommes habitans de la seigneurie dudit de Mont Ault baylif qu'ilz funt le guait ou chastel de La Roquebraou, et ceux qui ne le font ne qui ne le faysoient il leur faysoient paier au oucuns ung moton, aux autres plus. Dit oultre qu'il a ouy pluseurs foyz lez hommes dudit seigneur de Carbonieres qui se plainhoent de ce que ledit seigneur leur faysoit porter les rentes qu'ilz devoient oudit seigneur. Dit oultre qu'il a veu pluseurs foyz que les hommes de ladicte terre de Mont Ault sunt alés querir au vinhoble avecques leur beufz et charrois le vin qui estoit neccessere pour la despence de leur seigneur, c'est ascavoir les hommes dudit seigneur de Carbonieres le vin à leurdit seigneur, et les hommes dudit Amalry de Mont Ault le vin que luy estoit neccessere ; ou si ne le faysoient il

leur envoyoyt lez sergens et officiers pour lez excecuter jusques à tant qu'ilz y feussent alez ; et ce a ouy dire souvent luy qui parle à plusieurs desdis hommes. Neantmongs dit et deppouse qu'il a veu plusieurs foys et souvent que toutes quantes foys ledit feu Messire Jehan de Mont Ault seigneur de Mont Ault indisoit et impousoit tailles à ses hommes de sa terre ilz la plainhoent, ou se non lez faysoit excecuter jusques à tant qu'ilz eussent payé, et comment qu'il feust lesdis homme payoent ladicte taille combien que *doc* ilz se plaingyssent et rencurassent. Dit oussi qu'il a ouy dire à aucuns desdis homme qu'ilz payoent ladicte taille oudit seigneur ou à ses successeurs jusques l'an darnier passé que aucuns se sont appellez. Dit oussi qu'il ne scet que lesdis hommes meissent autre debat ne contrediction à payer lesdictes tailles que a dessus dit. Dit oultre qu'il a ouy dire à plusieurs desdis hommes de ladicte terre qu'il leur failloit porter le foin dudit seigneur et icelluy aler fener et foucher. Dit oussi qu'il ne scet ne n'a jamais ouy dire que les hommes de ladicte terre de Mont Ault se soyent deffendus contre lez chouses qu'il a dessus deppousées excepté que du playt et proucès dont est fecte mention esdictes lectres combien que par avant ilz s'en rencurassent comme dessus a dit.

Page 65 = folio 33 r

Le sixiesme jour dudit mois de mars **Martin de l'Algueyres** de la parroisse de Nioudon ou dioucese de Saint Flour eagé de sixante ans et de bonne memoire de cinquante et oultre, tesmoig par la partie que dessus prouduyt examiné et interrogé par vertu de son serement dit et deppouse comme s'ensuyt :

Et Premièrement sur lez premier second troysiesme quactriesme sinquiesme sixiesme septiesme et huytiesme articles dit et deppouse qu'il a veu par le tamps de feu Messire Jehan de Mont Ault chivalier seigneur de Mont Ault que lez terres et seigneuries de Mont Ault appertenoient toutes oudit feu Messire Jehan, c'est ascavoir lez baronnies chasteaux et chastellenies de La Roquebraou de Carbonieres qui sont anciennes baronnies et aussi dez chasteaux et chastellenies de Glenat, de Poul et Vieux Champs et de Velsic et de Saint Victeur et leurs appertenances et en estoit seigneur seul et par le tout, lesquelles seigneuries sont et ont esté de la terre et seigneurie de Mont Ault, à cause desquelles baronies et seigneuries, laquelle c'est ascavoit lesdis vassaulx sont et estoient tenus et luy devoient fere homaiges serevices et autres drois de fieufz à cause desdis fieufz nobles et autres qu'ilz tenoient dudit seigneur et de cesdictes baronnies chastellenies et seigneuries et lesdis autres ses hommes subgietyz luy estoient tenus en plusieurs cens rentes de blé d'argent de gallines de moctons et autres drois et devoirs à cause desdis vilaiges et bourderies qu'il tenoient dudit seigneur de cesdictes seigneuries, le quel seigneur par le tamps qu'il vivoit avoit et luy appertenoit toute justice et juridiction en cesdictes terres. Dit oultre que amprès le trespas dudit feu Messire Jehan luy succederent en cesdictes seigneuries c'est ascavoir Amalry de Mont Ault son filz ez baronnies de La Roquebraou où il a fort et beau chasteau et oussi ez chastellenies et chasteaux de Poul, de Glenat et de Saint Victeur et leurs appertenances et deppendances lesquelles baronnie et chastellenie ledit Amalry tient et possede comme siennes, et feu noble Jehan de Mont Ault filz dudit Messire Jehan succeda à sondit feu pere amprès son trespas ez baronie de Carbonieres et chastellelie de Vieux Champs et de Velzic et leurs appertenances lesquelles par le tamps qu'il visquit amprès le trespas de sondit feu pere avec leurs appertenances et deppendances il tint et posside comme siennes, au quel feu Jehan de Mont Ault a succédé amprès son trespas noble Guillaume de Mont Ault son filz c'est ascavoir esdictes baronnie de Carbonieres où il a beau chasteau et fourte place et en la chastellenie de Vieux Champs, et icelluy Malrignon en ladicte chastellenie de Velzic, et par ainsi lesdis Amalry de Mont Ault baylif dez montainhes d'Auvergne, et Guillaume et Malrignon de Mont Ault ses nepveus ont succédé oudit feu Messire Jehan de Mont Ault en sesdictes terres et seigneuries de Mont Ault ausquelx sont deus et appertiennent et lesquieux oussi tennent et possident toux et checuns lez drois et devoirs desdictes terres qui estoient deus oudit feu Messire Jehan seigneur de Mont Ault c'est ascavoir checun d'eux par telle pourtion qu'il luy succedent, et ce a veu par le tamps de sadicte memoire luy qui parle tenir et observer et ainsi la dit hom publiquement en toute ladicte terre de Mont Ault.

Sur le quactorsiesme article dit et deppouse qu'il a veu par le tamps de

Page 66 = folio 33 v

sa memoire que les hommes de ladicte terre de Mont Ault toutes quantes foys on leur commendoit porter le boys pour le chaufage de leur seigneur et service de son hostel ilz le pourtoient sans nul debat ne contrediction et onques

il qui parle n'a veu que iceulx hommes y ayent mis debat ne contrediction excepté que du debat dont est fectement esdictes lectres, ne oussi n'a ouy dire aux anciens trespas qu'il y ait eu plus autre debat que le dessusdit. Dit oultre que au tamps passé lesdis hommes prenoient le boys lez ungs et la pluspart d'iceulx de la fourest du seigneur de Mont Ault et jusques à tant qu'il y eust à prendre boys, et deppuys iceulx hommes l'ont pris checun de leur boys et fourest.

Sur le quinsiesme article dit et deppouse que par le tamps dudit feu Messire Jehan de Mont Ault et deppuys continuellement jusques ou tamps du present debat encoumamcé que toux lez hommes de ladicte terre de Mont Ault toutes quantes foys leur estoit commendé aler querir le vin pour la provision dez houstelz et dez seigneurs de ladicte terre ilz le aloient querir avec leurs beufz et charrois et venoyent querir iceulx hommes à l'oustel dudit seigneur les pipes et cueves pour mectre ledit vin à l'oustel dudit seigneur et les officiers dudit seigneur bailloient ousdis hommes du pain et de la cher pour fere leur despense ou chemin et d'illec iceulx hommes lesdictes pipes et cueves vuydes pourtoient avecques leurdis beufz et charrois au vinhoble où estoit acchapté ledit vin et amprès lez en retournoyent playnes de vin ousdit chastelz et aucunes foys ailleurs là out il playsoit aux officiers desdis seigneurs. Dit oultre qu'il a ouy parler de ladicte servitut aux anciens trespasés de ladicte terre qui disoyent que anciennement avoit esté acoustumé que lesdis hommes aloient querir ledit vin mais qu'ilz n'estoient pas grevés de ce fere par la maniere que du tamps de luy qui parle : anciennement checuns hommes desdis vilaiges de ladicte terre savoyent de combien ilz aydient ou d'ung beuf ou d'ung pareilh ou de tant qu'il estoit *entrepris* entre eulx, et au jour d'uy lez officiers dudit seigneur en ont d'aucuns deux peretz et des autres troys peres et lez greuvent plus que ne souloyent.

Sur le sexiesme article dit et deppouse que il qui parle a fet pluseurs foys lesdictes manevres toutes quantes foys luy estoit commendé.

Sur le dixeseptiesme article dit que pour le tamps de sa memoire que ledit feu Messire Jehan de Mont Ault vivoit ledit feu Messire Jehan faysoit venir parler à son jutge lez baylez dez bailies de sa terre et ledit jutge disoit à iceulx bayles que ledit seigneur avoit mandé mectre tailles sur ses hommes desdis bailliages et disoit lez sommes d'icelles tailles et iceux bailles en presence

Page 67 = folio 34 r

udit juge esgualoient deppartoyent et divisoient icellez sommes de taille checun bayle sur lez hommes de sa baylie et le dismenche amprès ladicte division iceux bailles disoyent à checun dez hommes de leurdictes baylies combien de taille ilz avoient et lesdis hommes aucunes foys payoient icelle taille sans eux rencurer ne plaindre. aucunes foys aucuns se playnhoent rancuroient qu'ilz estoient mal tailléz et esgalés et lors selon qu'il sembloit auxdis bailles les repparoient ou quant lesdis bailles avoient repparé et lesdis hommes ne vouloyent tenir ladicte reparation aloient oudit seigneur eux plaindre et lors ledit seigneur selon que bon luy sembloit leur faysoit grace et leur remectoit aucune somme de ladicte taille et l'autre somme ilz payoient et aucunes foys ne leur faisoit nulle grace mais leur faisoit tout payer, et ainsi checun an lesdictes tailles l'en faysoit et faysoit payer, et quant iceulx hommes de payoient icelles tailles lesdis bayles les faysoient executer par ung sergent dudit seigneur et lez faisoient ainsi payer. A esté interrogé il qui parle comment scet ce qu'il a dessusdit, dit que pour ce qu'il a veu par ledit tamps et a tousjours ouy dire aux hommes anciens et autres de ladicte terre que ainsi avoit acoustumé estre fait checun an ou tamps passé et de ce est et a esté voix et fame publique en toute ladicte terre de Montault et onques il qui parle ne ouy dire le contraire. Dit oultre que par la maniere que dessus a dit il qui parle l'a veu et ouy observer et continuer en ladicte terre de Montault amprès le decces dudit Messire Jehan per le tamps desdis Amalry et Jehan de Montault san nulle contrediction jusques au tamps du present debat.

Sur le dixhuytiesme article dit et deppouse que il qui parle a veu par l'espace de quarente ans continuelx et jusques ou present debat que lesdis hommes ont fouché fené et pouté le foin comme en l'article est contenu.

Sur le vinptetdeuxiesme article dit et deppouse qu'il a ouy dire le contenu en icelluy article estre vray.

Sur lez trentiesme trentehungisme et trentedeuxiesme articles dit et deppouse qu'il scet que Pierre et Jehan de Hucgols, Jehan Teroy, Pierre Chassanh, Pierre de Salvanhac, Pierre et Jehan de Lachenx, Micheau d'Escoubeyrou, Jehan de Moncany, Pierre Rodier, Pierre La Broe, Hugon dez Casalz, Bernard de l'Eybreydie, Geraud de Barascon,

Durand et Jehan de Palach, Géraud, Durand et Pierre d'Espinet, Pierre de Monmiola, Olivon de Codertz, Beguon du Mespolier et Geraud d'Espinadelh tiennent leurs vilaiges de ladicte terre de Montault.

Page 68 = folio 34 v

Ledit jour mesmes **Geraud de Rieuf** de la parroisse de Nioudon ou dioucese de Saint Flour eagé de quactre vincts ans ou environ et de bonne memoire de septante et oultre, tesmoig par la partie que dessus prouduyt, examiné et interrogé par vertu de son serement dit et deppouse comme s'ensuyt :

Et Premièrement sur lez premier second troysiesme quactriesme sinquiesme sixiesme septiesme et huytiesme articles dit et deppouse qu'il a demeuré au lieu de Huquafon de ladicte parroisse de Nyoudon l'espace de cinquante ans et oultre et a veu par le tamps de feu Messire Jehan de Mont Ault chivalier seigneur de Montault que lez terres et seigneuries de Montault appertenoient toutes oudit feu Messire Jehan, c'est ascavoir lez baronnies chasteaux et chastellenies de La Roquebraou de Carbonieres qui sont anciennes baronies et oussi lez chasteaux et chastellenies de Glenat, de Poul et Vieux Champs et de Velsic et de Saint Victeur et leurs appertenances et en estoit seigneur seul et par le tout, lesquelles seigneuries sont et ont esté toutes de la terre et seigneurie de Montault, à cause desquelles baronies et seigneuries oudit seigneur messire Jehan de Montault appertenoient et il avoit pluseurs vassaulx hommes et subgiez tenens de luy et de cesdictes baronies et seigneuries, lesquelles c'est ascavoir lesdis vassaulx sont et estoient tenus et luy devoient fere homaigez services et autres drois de fiefz à cause dez fieufz nobles et autres qu'ilz tenoient dudit seigneur et de cesdictes baronnies chastellenies et seigneuries et lesdis autres sez hommes subgietz luy estoient tenez en pluseurs cens rentes de blé d'argent de gelines de moctons et autres drois et devoirs à cause dez vilaiges et bourderies qu'ilz tenoient dudit seigneur de cesdictes seigneuries, lequel seigneur par le tamps qu'il vivoit avoit et luy appertenoit toute justice et juridiction en cesdictes terres. Dit oultre que amprès le trespas dudit feu Messire Jehan luy succederent en sesdictes seigneuries c'est ascavoir Amalry de Montault son filz ez baronnie de La Roquebraou où il a fort et beau chateau et oussi ez chastellenies et chasteaux de Poul, de Glenat et de Saint Victeur et leurs appertenances et deppendances, lesquelles baronnie et chastellenie ledit Amalry tient et possede comme siennes, et feu noble Jehan de Montault filz dudit feu Messire Jehan succeda à son dit feu pere amprès son trespas ez baonnie de Carbonieres et chastellenies de Vieux Champs et de Velsic et leurs appertenances lesquelles par le tamps qu'il visquit amprès le trespas de son dit feu pere avec leur appertenances et deppendances il tint et posside comme siennes, ou quel feu Jehan de Montault a succédé amprès son trespas noble Guillaume de Montault son filz c'est ascavoir esdictes baronnie de Carbonieres où il a beau chateau et fourte place et en la chastellenie de Vieux Champs et en leur appertenances. Et en ladicte chastellenie de Velsic a succédé oudit feu Jehan noble Malrignon de Montault son filz et frere dudit Guillaume, lesquieux nobles Guillaume et Malrignon freres tiennent et possident c'est ascavoir ledit Guillaume lesdictes baronnie de Carbonieres et chastellenie de Vieux Champs, et icelluy Malrignon ladicte chastellenie de Velzic, et par ainsi ledit Amalry baylif dez montaignes d'Auvergne et Guillaume et Amalrignon

Page 69 = folio 35 r

de Montault ses nepveux ont succédé oudit feu Messire Jehan de Mont Ault en sesdictes terres et seigneuries de Mont Ault, ausquelx sont deus et appertiennent et lesquieux oussi tennent et possident toux et checuns lez drois et devoirs desdictes terres qui estoient deus oudit feu Messire Jehan seigneur de Montault, c'est ascavoir à checun d'eux pour telle pourtion qu'ilz luy succederent et ce a veu par le tamps de sadicte memoire luy qui parle tenir et observer et ainsi l'a dit hom publiquement en toute ladicte terre de Montault.

Sur le noviesme article dit et deppouse qu'il a veu que lez hommes dez terres et seigneuries de Montault faysoient et aloyent fere le guet checun en la chastellenie dont il estoit, et ce il qui parle a veu pluseurs foys par le tamps a demeuré oudit lieu et oussi l'a ouy dire à pluseurs dez hommes de ladicte terre. Ou quant ilz ne faysoient ledit guet ilz donnoyent aucun prouffit et esmolument oudit seigneur ou à son cappitayne, et se ilz y deffailloient ledit cappitayne le loyent pour et lez excecutoit selon qu'il a ouy dire ainsi que dessus.

Sur lez dixiesme onsiesme et dotxiesme articles dit et deppouse qu'il est recorps du tamps que courroit bonne et fourte monoye de laquelle vinpt deux soulx et demy valioient ung escu d'or du poys de troys deniers. Dit oultre qu'il a ouy dire à pluseurs dez hommez de ladicte terre de Montault que iceux hommes de toute ladicte terre payoient et ont payé deppuys icelle monoye lez rentes qu'ilz devoient en argent oudit seigneur à la valeur de ladicte monoye, et disoient que ce estoit mal fet et s'en plainhoent. Dit oussi que par icelluy tamps de ladicte monoye la pluspart de ladicte terre et dez villaiges d'icelle estoient vestuz.

Sur le quinxiesme article dit et deppouse que deppuys ledit tamps de cinquante ans en sa et par icelluy continuellement il qui parle a veu que les bayles de ladicte terre de Montault ont commendé checun an aux hommez d'icelle terre qu'ilz alassent avecques leurs beufz et charroys querir le vin au vinhoble pour icelluy seigneur et pour la despance de son houstel et amprès ledit commendement iceux hommes y aloient quant commendé leur estoit et appoutoient ledit vin de la despance dudit seigneur et de son houstel là où commendé leur estoit ; et ce que dit est il qui parle l'a ouy dire à pluseurs desdis hommes de ladicte terre que ainsi l'ont ilz fet comme il qui parle a dit continuellement par ledit tamps san nul debat ne contrediction excepté que du debat dont fecte est mention esdictes lectres. Toutesfoys il ne scet pas se lesdis hommes s'en sont plains et rencurés de ce que dit est ; mais jamays n'ouyt dire le contraire autrement que dessus.

Sur le dixeseptiesme article dit et deppouse qu'il a pluseurs foys

Page 70 = folio 35 v

et souvent ouy dire à pluseurs hommes de ladicte terre de Montault qu'il leur failloit payer lez taillez que le seigneurs leur avoit fectes et par le tamps que ledit feu Messire Jehan de Montault vivoit deppuys lesdis cinquante ans en sa il qui parle veoyt checun an et oyoit dire aux hommes de ladicte terre que ledit seigneur leur faysoit et indisoit lez tailles et qu'ilz lez payoient checun et en estoient mal contens ; et de ce estoit lors publique voix et fame en toute ladicte terre ; et amprès le trespas dudit feu Messire Jehan, Amalry de Montault a impoué et indit semblablement semblables tailles checun an ez terres et seigneuries auxquelles il succeda oudit feu Messire Jehan et de ses hommes habitans d'icelles, san nul debat ne contrediction jusques au tamps du debat dont est fecte mention esdictes lectres, excepté que par avant icelluy debat lesdis hommes se plainoient et rancuroient desdictes tailles et disoient que mieux leur seroit de laisser lez vilaiges qu'ilz tenoient dudit seigneur. Dit oultre qu'il ne feust taillable ne exploictable à son seigneur ne oussi n'a ouy dire que il la feust ne oussi ne scet si la doit estre ou non.

Sur le dixhuytiesme article dit et deppouse qu'il a veu pluseurs fois et checun an deppuys lesdis cinquante ans et neantmois a ouy dire aux hommes de ladicte terre de Montault que iceux hommes de ladicte terre aloient foucher et fener le foin et icelluy porter et le fenoyent et fouchoient comme est contenu en l'article san nul debat ne contrediction excepté que deppuys ledit apel.

Sur le vinpt et noviesme article dit et deppouse qu'il se reppourte à ce qu'il a dit dessus.

Sur lez trentiesme trenteungiesme et trente deuxiesme articles dit et deppouse que Jehan et Pierre de Hutgols, Jehannot du Mas de Bourdes, Pierre et Jehan de Lachenx, Jehan de Moncanin, Pierre Rodier, Pierre La Broe, Durand et Jehan de Palach, , Géraud, Durand et Pierre d'Espinet, Pierre de Monmyale, Jehan de Braconat, Jehan de Choudes Maysons, Jehan de Mourel, Olivon de Codertz et Beguon du Mespouler, Geraut de Mont Agut sont hommes de ladicte terre de Montault tenens lez possessions et villaiges de ladicte terre.

Icelluy jour mesmes Jehan de Ventach de la parroisse d'Arnac

Page 71 = folio 36 r

ou dioucese de Saint Flour, eagé de sixante ans et de memoire de cinquante ou environ, tesmoig par la partie que dessus prouduyt, examiné et interrogé par vertu de sondit serement, dit et deppouse comme s'ensuyt :

Et Premièrement sur lez premier second troysiesme quactriesme sinquiesme sixiesme septiesme et huytiesme articles dit et deppouse qu'il cognot feu Messire Jehan de Montault chivalier qui estoit seigneur tout seul dez terres de Montault qui tenoit et possedoit lez terres et chastellenies de La Roquebraou, de Carbonieres, de Saint Victeur, de Poul, de Vieux Champs, de Velzic et de Glenat, ne scet si Carbonieres et La Roquebraou sont baronnies lesquelles terres et seigneuries sont lez terres de Montault. A cause desquelles baronnies et seigneuries oudit seigneur messire

Jehan de Montault appartenent et il avoit plusieurs vassaulx hommes et subgietz tenens de luy et de cesdictes baronies et seigneuries, lesquellz c'est ascavoir lesdis vassaulx sunt et estoient tenuz et luy devoient fere hommaigez servitus et autres drois de fieufz à cause dez fieufz nobles et autres qu'ilz tenoient dudit seigneur et de cesdictes baronnies chastellenies et seigneuries, et lesdis autres sez hommes subgietz luy estoient tenuz en plusieurs cens rentes de blé d'argent de gelines de moctons et autres drois et devoirs à cause dez vilaiges et bourderies qu'ilz tenoient dudit seigneur de cesdictes seigneuries, lequel seigneur par le tamps qu'il vivoit avoit et luy appartenoit toute justice et juridiction en sesdictes terres. Dit oultre que amprès le trespas d'icelluy Messire Jehan luy succederent en cesdictes seigneuries c'est ascavoir Amalry de Montault son filz ez baronnie de La Roquebraou où il a fort et beau chasteau et oussi ez chastellenies et chasteaux de Poul, de Glenat et de Saint Victeur et leurs appartenences et deppendences, lesquelles baronnie et chastellenies ledit Amalry tient et possede comme siennes, et feu noble Jehan de Montault filz dudit Messire Jehan succeda à sondit feu pere amprès son trespas ez baronnie de Carbonieres et chastellenies de Vieux Champs et de Velzic et leurs appartenences, lesquelles par le tamps qu'il visquit amprès le trespas de sondit feu pere avec leur appartenences et deppendences il tint et possida comme siennes, ou quel feu Jehan a succédé amprès son trespas noble Guillaume de Montault son filz c'est ascavoir esdictes baronnie de Carbonieres où il a beau chasteau et fourte place et en ladicte chastellenie de Vieux Champs et leur appartenences. Et en ladicte chastellenie de Velzic a succédé oudit feu Jehan noble Amalrignon de Montault son filz et frere dudit Guillaume, lesquelx nobles Guillaume et Malrignon freres tiennent et possèdent c'est ascavoir ledit Guillaume lesdictes baronnie de Carbonieres et chastellenie de Vieux Champs, et icelluy Malrignon ladicte chastellenie de Velzic, et par ainsi ledit Amalry de Montault baylif dez montaignes d'Auvergne et Guillaume et Amalrignon

Page 72 = folio 36 v

de Montault ses nepveux ont succédé oudit feu Messire Jehan de Montault en sesdictes terres et seigneuries de Montault, ausquelx sont deus et appartiennent et lesquelx oussi tennent et possident toux et checuns lez drois et devoirs desdictes terres qui estoient deus oudit feu Messire Jehan seigneur de Montault, c'est ascavoir à checun d'eux pour telle portion qu'ilz luy succedent et ce a veu par le tamps de sadicte memoire luy qui parle tenir et observer en toute ladicte terre de Montault.

Sur le noviesme article dit et deppouse que il qui parle a veu que quant il estoit tamps de guerre lez hommes de ladicte terre de Montault faysoient le guet de nuyt checun au chastel dont il ressourtiisoit, mais en tamps de pays ¹⁵⁴, n'a veu qu'ils sen feissent oucun guet ; a esté interrogé se par le tamps de pays et aultre qu'ilz ne faysoient nul guet ils donnoient aucun prouffit ou esmolument pour icelluy, dit que non, qu'il le sapche. Et dit oultre que il qui parle n'est gueytable ou seigneur de Montault et pour ce n'en scet guere.

Sur le quinsiesme article dit et deppouse que deppuys quarente ans et trente ans sont passés et deppuys oussi lesdis trente ans il qui parle a ouy plusieurs fois et bien souvent dire que l'en disoit publiquement que les officiers du seigneur de Montault faysoient aler querir le vin du seigneur de ladicte terre au vinhoble où il estoit achapté. Dit oultre que onques il qui parle ne veist iceulx hommes de ladicte terre de Montault aler querir ledit vin. Et oultre dit et deppouse que lez hommes du vilayge de Vabre de la parroisse de Saint Santin ne oussi les hommes du vilaige de Pomeyrols de la parroisse d'Arnac onques ne aloient querir ledit vin ; il eust bien sceu il qui parle s'ilz y feussent alez pour ce qu'ilz estoient le plus prouchains voysins dudit tesmoig, et oussi a ouy dire à iceulx hommes que onques n'y allerent.

Sur le dixeseptiesme article dit et deppouse qu'il a ouy dire plusieurs foys que lez hommes de ladicte terre de Montault aucuns d'eux se rancuroyent plainhoent desdis feu Messire Jehan de Montault et aussi de Amalry son filz pour ce qu'ilz disoyent que iceulx seigneurs destruoient lesdis hommes en lez faysant payer lez tailles que iceulx seigneurs leur impousoyent et leur avoyent impouées. A esté interrogé si a ouy dire onques que lez hommes de ladicte terre de Montault ayent esté taillables ne exploitables à volenté dudit seigneur, dit que non.

¹⁵⁴ Paix !

Sur le dixhuytiesme article dit et deppouse qu'il a ouy dire, ne scet se unne fois ou pluseurs, que aucuns dez hommes de ladicte terre de Montault aloient foucher, lez autres fener le foin dudit seigneur, mais il qui parle ne l'a onques veu selon qu'il dit, ne sceu.

(retour sur le 17^{ème} article :) Dit oultre que il a ouy dire que au tamps passé que aucuns des hommes de ladicte

Page 73 = folio 37 r

terre de Montault se sunt deffandus de payer lesdictes tailles contre Ma Dame Jehanne de Malemort Dame de Montault mere dudit Amalry seigneur de La Roquebraou, mais toutesfoys il qui parle ne scet que de ce fut fait ne la fin que eut ledit prouces. A esté interrogé devent quel jutge fut fecte ladicte deffence ou prouces, dit qu'il n'en scet rien. Dit oussi que il qui parle avec aucuns autres ont vestu deppuys trois ans passés unne bourderie de ladicte terre et du seigneur de Montault, c'est ascavoir dudit Amalry. A esté interrogé quel estoit plus de son playsir que ganiast le playt dont est fecte mention esdictes lectres, dit que se lesdis seigneurs ont bon droit qu'il ne voudroit mye qu'ilz le perdissent pour luy ne dez hommes appelans oussi. Et dit que s'il disoit autre chouse il lez jutgeroit. Autre chouse n'en scet.

Ledit jour que dessus **Hugonnot du Brueil** de la parroisse de Nioudon ou dioucese de Saint Flour, agé de sixante ans et de bonne memoire de sinquante ans ou plus, tesmoig par la partie que dessus prouduyt, examiné et interrogé par vertu de sondit serement dit et deppouse comme s'ensuyt :

Et Premièrement sur lez premier second troysiesme quactriesme sinquiesme sixiesme septiesme et huytiesme articles dit et deppouse qu'il a veu par le tamps dudit feu Messire Jehan de Mont Ault que lez terres et seigneuries de Montault appartenoient toutes oudit Messire Jehan, comme lez baronnies de La Roquebraou de Carbonieres et chastellenies d'icelles qui suont anciennes baronnies, et oussi et aussi lez chasteaux de Glenat et chastellenies de Poul, de Velzic, de Vieux Champs, de Saint Victeur et leurs appartences et en estoit seul seigneur, lequel lez ont esté toutes de ladicte terre de Montault, à cause desquelles oudit Messire Jehan appartenoient et avoit pluseurs vassaulx hommes et subgiez tenens de luy et de cesdictes seigneuries, lesquelx vassaulx estoient tenus et luy devoient fere hommaigez et autres drois de fieufz à cause dez fieufz nobles et autres qu'ilz tiennent de luy et de cesdictes seigneuries et lesdis autres subgiez et hommes luy estoient tenez en pluseurs cens rentes de blé d'argent de gelines de moctons et autres drois et devoirs à cause dez vilaiges qu'ilz tenoient dudit seigneur, lequel par le tamps qu'il vivoit avoit toute juridiction en sesdictes terres. Et amprès le decces dudit Messire Jehan luy succederent en cesdictes seigneuries c'est ascavoir Amalry de Montault son filz ez baronnie de La Roquebraou où il a fort chasteau et oussi en lez

Page 74 = folio 37 v

chastellenies de Poul, de Glenat de Saint Victeur et leurs appartences et dependences, lesquelles ledit Amalry tient et possede comme siennes, et feu noble Jehan de Montault filz dudit feu Messire Jehan succede à sondit feu pere amprès son trespas ez baronnie de Carbonieres et chastellenies de Vieux Champs et de Velzic et leurs appartences, lesquelles par le tamps qu'il vivoit amprès le decces de sondit pere avec leur appartences tenoit comme siennes, ouquiel feu Jehan a succédé amprès son trespas noble Guillaume son filz c'est ascavoir esdictes baronnies de Carbonieres où il a fourte place et en la chastellenie de Vieux Champs. Et en ladicte chastellenie de Velsic a succédé oudit feu Jehan noble Amalrignon de Montault son filz et frere dudit Guillaume, lesquelx nobles Guillaume et Amalrignon freres tiennent et possèdent c'est ascavoir ledit Guillaume lesdictes baronnie de Carbonieres et chastellenie de Vieux Champs, et icelluy Malrignon ladicte chastellenie de Velzic, et par ainsi ledit Amalry baylif et Guillaume et Amalrignon de Montault ses nepveux ont succédé oudit feu Messire Jehan en sesdictes seigneuries de Mont Ault, ausquelx sont deus et appartiennent et lesquelx tennent et possèdent touz lez drois et devoirs desdictes terres qui estoient deus oudit feu Messire Jehan seigneur de Montault, c'est ascavoir à checun d'eux pour la portion qu'ilz luy succedent, et ce a veu par ledit tamps de sa memoire tenir et observer et ainsi se dit publiquement en toute ladicte terre de Montault.

Sur le noviesme article dit et deppouse qu'il a veu par l'espace de sinquante ans que lez hommes habitans de ladicte terre de Montault faycoient et checun a fait le guet checun ez chasteaulx de ladicte terre checun en sa chastellenie

selon que le chastellaing ou cappitayne d'icelle le ordenoit ou luy donnoyent aucune chouse selon qu'ilz estoient d'acord entre iceulx chastellaing et hommes.

Sur le dixiesme onsiesme et douxiesme articles dit et deppouse que oucuns dez villaiges de ladicte terre de Montault estoient vestus par le tamps que la fourte monoyer avoit cours, c'est ascavoir vint deux soulx six deniers pour escu d'or du poys de troys deniers de ladicte monoye, et ez autres n'avoit nulz tenenciers.

Sur le quactorxiesme article dit et deppouse qu'il a veu par l'espace de cinquante ans passés ou environ que lez hommes de ladicte terre de Montault toutes quantes foys l'on leur commendoit qu'ilz pourtassent le boys necessaire pour le chauffaige et service de leur seigneur et de son hostel ilz le pourtoient et l'ont pourté sans ce qu'ilz y meissent ne n'y aient mis debat ne contrediction, excepté que d'aucunes foys quant lez bayles ou sergens de ladicte terre

Page 75 = folio 38 r

de Montault leur commendoient pourter ledit boys à ung jour certain iceulx hommes disoyent et reffussoient que icelluy jour ne le povoient pas pourter, et pour ce entreprenoyent autre jour pour le pourter, ou quel jour entreprins ilz le pourtoient, ou autrement extoyent excecutez et gaigés de leurs biens.

Sur le quinsiesme article dit et deppouse que par le tamps dudit feu Messire Jehan de Montault et deppuys continuellement jusques ou tamps du present debat encoumamcé toux lez hommes de ladicte terre de Montault toutes quantes foys leur estoit commendé aler querir le vin pour la provision dez hostels dez seigneurs de ladicte terre ilz le aloient querir avec leurs beufz et charrois et venoyent querir iceulx hommes à l'oustel dudit seigneur lez pipes et cueves pour mectre ledit vin à l'oustel dudit seigneur et lez officiers dudit seigneur bailloyent ausdis hommes du pain et de la cher pour faire leurs despens ou chemin, et d'illec iceulx hommes lesdictes pipes et cueves vuydes pourtoient avecques leursdis beufz et charrois ou vinhoble où estoit achapté ledit vin, et amprès lez en retournoyent pleynes de vin ausdis hostelx, et aucunes foix ailleurs là out il playsoit aux officiers desdis seigneurs.

Sur le dixseptiesme article dit et deppouse qu'il a veu par l'espace de cinquante ans que toutes quantes foys lez seigneurs de Montault indisoyent et impousoyent tailles aux hommes de sa terre ilz la payoent Et dit oultre qu'il a ouy dire oudit feu Jehan de Montault qu'il s'enmervelloit comment lez hommes dudit Amalry pouvoient vivre que il leur feist payer lez tailles si souvent qu'il faysoit. Et dit oultre que il qui parle n'a sceu ne ouy dire que ou payement et indiction desdictes tailles y ait eu autre debat ne contrediction hors seulement le debat esdictes lectres.

Sur le dixhuytiesme article dit et deppouse qu'il a veu par ledit tamps que lez hommes de ladicte terre aloient foucher, fener et porter le foin dez prés de l'oustel dudit seigneur sans autre debat senon selluy que dessus selon que l'en leur commendoit ou selon qu'ilz acourdoient avec lez officiers d'icelluy seigneur.

Sur lez trentiesme trenteungiesme et trente deuxiesme articles dit et deppouse que Pierre de Salvanihac, Pierre et Jehan de Lachenx, Micheau d'Escoubeyron, Jehan de Moncanin, Pierre de Reyguades, Jehan de La Lemtzenie, Pierre Rodier, Pierre La Broe, Huguez dez Chazals, Geraud de Barascon, Bernard de L'Eybreydie, Durand et Jehan de Palach, Jehan de Braconat, Géraud, Durand,

Page 76 = folio 38 v

Pierre et Jehan d'Espinet, Olivon de Codertz, Beguon de Mespplier, Geraut de Mont Agut, Geraud d'Espinadelh et Jehan de Palach sont hommes de ladicte terre de Montault tenens checun aucunes de leurs chouses de ladicte terre de Montault.

Le jour dessusdit Raymond Bourzes de la parroisse de Roffiac ou dioucese de Saint Flour eagé de cinquante cinq ans et de bonne memoire de quarente ans ou environ, tesmoig par la partie que dessus prouduyt, examiné et interrogé par vertu de son serement dit et deppouse comme s'ensuyt :

Et Premièrement sur lez premier second troysiesme quactriesme sinquiesme sixiesme septiesme et huytiesme articles dit et deppouse qu'il a quarente ans ou environ que yl qui parle se maria en ung vilaige nompmé de Bonal de la parroisse de Roffiac en la terre de Montault et a veu par ledit tamps que feu Messire Jehan de Mont Ault chivalier seigneur de Montault et luy appartenoient toutes lez terres et seigneuries de Montault c'est ascavoir lez baronnies chasteaux et chastellenies de La Roquebraou de Carbonnieres qui sunt anciennes baronnies et oussi lez chasteaulx et

chastellenies de Glenat, de Poul et Vieux Champs et de Velzic et de Saint Victeur et leurs appartenances et en estoit seigneur seul et par le tout, lesquelles sont et ont esté de la terre et seigneurie de Montault, à cause desquelles baronnies et seigneuries oudit seigneur messire Jehan de Montault appartenoient et il avoit pluseurs vassaulx hommes et subgiez tenens de luy et de cesdictes baronnies et seigneuries, lesquelles c'est ascavoir lesdis vassaulx sont et estoient tenuz et luy devoient fere hommaiges servitus et autres drois de fieufz à cause dez fieufz nobles et autres autres ses hommes et subgietz luy estoient tenuz en pluseurs rentes de blé, d'argent, de gelines, de moctons, et autres drois et devoirs à cause dez vilaiges qu'ilz tenoient dudit seigneur de sesdictes seigneuries, le quel seigneur par le tamps qu'il vivoit avoit et luy appartenoit toute justice juridiction en sesdictes terres. Dit oultre que amprès le trespas dudit feu Messire Jehan luy succederent en cesdictes seigneuries Amalry de Montault son filz ez baronnie de La Roquebraou où il a fort et beau chasteau et oussi ez chastellenies et chasteaulx de Poul, de Glenat et de Saint Victeur et leurs appartenances et deppendances, lesquelles baronnie et chastellenies ledit Amalry tient et possede

Page 77 = folio 39 r

comme siennes, et feu noble Jehan de Montault filz dudit Messire Jehan succeda à sondit feu pere amprès son trespas ez baronnie de Carbonnieres et chastellenies de Vieux Champs et de Velzic et leurs appartenances, lesquelles par le tamps qu'il visquit amprès le trespas de sondit feu pere avec leur appartenances il tint et posside comme siennes, ouquel feu Jehan de Montault a succédé amprès son trespas noble Guillaume de Montault son filz c'est ascavoir esdicte baronnie de Carbonnieres où il a beau chasteau chasteau et forte place et en la chastellenie de Vieux Champs et leurs appartenances. Et en ladicte chastellenie de Velsic a succédé oudit feu Jehan noble Amalrion de Montault son filz et frere dudit Guillaume, lesquielx noble Guillaume et Malrion freres tiennent et possident c'est ascavoir ledit Guillaume lesdictes baronnie de Carbonnieres et chastellenie de Vieux Champs, et icelluy Malrion ladicte chastellenie de Velzic, et par ainsi ledit Amalry baylif dez montaignes d'Auvergne et Guillaume et Amalrion de Montault ses nepveux ont succédé oudit feu Messire Jehan de Montault en cesdictes terres et seigneuries de Motault, aulxquels sunt deus et appartienent, lesquieux oussi tennent et possident toux et checuns lez drois et devoirs desdictes terres qui estoyent deus oudit feu Messire Jehan seigneur de Montault, c'est ascavoir à checun d'eux pour telle portion qu'ilz luy succedent, et ce a veu par le tamps de sadicte memoire luy qui parle tenir et observer et oussi l'a dit hom publiquement en toute ladicte terre de Montault.

Sur le noviesme article dit et deppouse qu'il a veu que lez hommes de ladicte terre de Montault faysoient souvent le guet ez chasteaulx de ladicte terre, c'est ascavoir checun au chastel dont il ressortysoit. Dit oultre que oucunes foyz lez seigneurs de ladicte terre de Montault prenoyent certain prouffit et esmolument d'aucuns dez hommes de ladicte terre afin qu'ilz ne feissent ledit guayt, et pour ce estoit fourcé que ceux de qui lesdis seigneurs ne pregnoyent aucun prouffit ne esmolument feussent le guet plus souvent qu'ilz n'eussent fait se ne eust prins oucun prouffit dez autres, et de ce lesdis hommes se rancuroyent et se plainhoent, mais autrement d'y contredisoient mye ne n'y ont aucunement contredit ou tamps passé que il qui parle la saiche excepté de la contrediction et proucs dont est fecte mention esdictes lectres.

Sur le tretziesme article dit et deppouse qu'il a veu deppuys le tamps qu'il se maria c'est ascavoir de quarente ans que lez hommes de ladicte terre de Montault pourtoyent à l'oustel et houstelz desdis seigneurs lez cens et rentes qu'ilz devoient à icelluy seigneur, et de ce oussi lesdis hommes se plainhoent et rencuroyent. Dit oultre que quant lesdis hommes n'appourtoyent lesdictes rentes et cens oudis houstelx les officiers desdis seigneurs les excecutoyent et à ce lez contraignoient et foursoyent par prinse et excecution de leurs biens, et à ce fere lesdis hommes ne y meictoent oucun debat ne contrediction que il qui parle le sayche excepté que de la contrediction dont est fecte mention esdictes lectres.

Page 78 = folio 39 v

Sur le quactorxiesme article dit et deppouse qu'il a veu par l'espace desdis quarente ans que lez hommes de ladicte terre de Montault ont pourté avecques leurs beufz et charrois tout le boys qui estoit neccessere pour le chauffage desdis seigneurs et de service de leursdis houstelx et ce faysoient iceulx hommes toutes quantes foyz leur a esté commendé, et bien souvent tellement que lesdis hommes s'en rencuroient et s'en plainhoent, mais autrement ne y faisoyent, ne ne scet oussi il qui parle qu'ilz y aient fait nul autre debat ne contrediction de ce fere ou tamps passé,

excepté du debat qui est de present. Et oultre dit que quant iceulx hommes ne venoient pourter ledit boys comme dessus est dit lez officiers les excecutoyent et lez ont excecutes, et par ainsi contraingoyent iceulx homme audit boys pourter comme dit est.

Sur le quinsiesme article dit et deppouse il qui parle qu'il a veu par le tamps que lesdis hommes de ladicte terre de Montault par lesdis quarente ans passés c'est ascavoir checun an aloient et sunt aléz querir ou vinhoble le vin pour la despence neccessere ausdis seigneurs et à leurs houstelz avecques leurs beufz et charrois, et lesdis seigneurs faysoient bailler ousdis hommes du pain et de la cher pour faire la despence, et de ce mout se rencuroyent et plainhoent et mesmement quar l'en ne leur bailloyt du foin pour fere la despence de leurs beufz pour le chemin. Mais toutes fois ilz ne y mettoyent nul autre debat ne contrediction excepté que de present comme est fecte mention esdictes lectres. Dt oultre il qui parle a ouy dire à feu Geraud de Bonnal que anciennement oussi lesdis hommes de ladicte terre pourtoient comme dit est checun an ledit vin mais disoit que pour fource le pourtoient. A esté interrogé quel fource faysoit ledit seigneur ausdis hommes se ilz n'appourtoient ledit vin, dit que lez faysoient excecuter et prendre leurs biens par ses serviteurs et puy iceulx hommes s'acourdoient avec ledit seigneur pour aler querir et aloient querir ledit vin comme dessus a dit et depposé.

Sur le setziesme article dit et deppouse qu'il a veu par ledit tamps passés ou lieu de Carbonieres que amprès que lez hommes avoient fet le guet de nuyt oudit lieu lendemain amprès le seigneur dudit lieu leur faysoit pourter le boys ou chastel dudit lieu ou d'autres foyz leur faysoit pourter le blé et alé querir la farine ou molin, et oussi a veu aucunes foyz quant il qui parle estoit au lieu de La Roquebraou oussi leur faysoit le seigneur dudit lieu pourter ledit boys, et tellement que lesdis hommes ne l'ont plus peu seuffrir, et pour ce ont appellé. Mais aucunement ne scet il qui parle que lesdis homes y aent mis autre debat ne empechement excepté que dessus a dit et depposé.

Sur le dixeseptiesme article dit et deppouse que il qui parle a veu par l'espace de quarente ans passés que par le tamps que ledit feu Messire Jehan de Montault vivoyt et amprès son decces lesdis Amalry son filz

Page 79 = folio 40 r

ou sez autres officiers checun an impousoyent et indisoient et ont impoussé et indit, ledit feu Messire Jehan en toute la terre de Montault et ledit Amalry ou ses officiers ez terres esquielles il a succédé à sondit feu pere et aux hommes d'icelle une taille de telle somme que bon sembloit ausdis seigneurs, laquelle ilz faysoient et ont fait esgualer et devire¹⁵⁵ sur leursdis hommes, et ce sans les à ce appeller, et puy lez contes¹⁵⁶ et portions d'icelles ilz faysoient exiger et lever par leurs officiers et l'ont exigée et levée. Et quant iceulx hommes ne payoient leursdictes tailles les leur faysoit payer pour excecutions et prinses de leur vye, et de ce lesdis hommes se rancuroyent et plainhoent, mais toutes foyz iceulx hommes payoient lesdictes tailles sans ce que que ledit qui parle ne scet que lesdis hommes à ce aient mis nul autre debat ne contrediction, excepté que de present dont est fecte mention esdictes lectres.

Sur le dixhuytiesme article dit et deppouse que il qui parle a veu le contenu en icelluy article oudit lieu de Carbonieres par l'espace de trente ans et oultre, et en la terre de Carbonieres que est de Montault et deppuyz que ledit qui parle se maria comme dessus a dit checun an dudit tamps, et pareillement l'a veu ainsi fere ou lieu de La Roquebraou pour l'espace de troys qu'il y feust demourant oudit lieu que ainsi la faysoient lez hommes de ladicte terre de La Roquebraou et dez chastellenies que sont sunt devenues comme a dit audit Amalry.

Le septiesme jour dudit moys de martz **Durand dit Danton de Vabre** de la parroisse d'Arnac oudit dioucese de Saint Flour, eagé de cinquante six ans et de memoire de quarente, tesmoig par la partie que dessus prouduyt, examiné et interrogé par vertu de son serement, dit et deppouse comme s'ensuyt :

Et premierement sur le quatorziesme article dit et deppouse qu'il a ouy dire aux hommes de noble Amalry de Montault baylif dez montaignes d'Auvergne, tant par le tamps que feu Messire Jehan de Montault vivoit que oussi par le tamps dudit Amalry, que iceux seigneurs et ce souvent et pluseurs foyz ousdis hommes, et non plus aux ungs

¹⁵⁵ « devire »= sans doute « diviser »

¹⁵⁶ comptes

que aux autres d'iceulx, que lesdis seigneurs faysoient et ont fet pourter à iceux leurs hommes le boys pour le chauffaige et service d'iceulx seigneurs et de leurs ostelz, et disoient que ce estoit pour fource plus que agreablement¹⁵⁷. A esté interrogé quelle fource leur faysoient lesdis seigneurs, dit qu'il ne scet autre fource, mais tant seulement que iceulx hommes pour ce faire laysoient leurs negoces et besoignes

Page 80 = folio 40 v

pour ce fere, et oussi que quant iceulx n'aloient pourter ledit boys quant mandé leur estoit iceulx seigneurs lez faysoient et ont fet excecuter et gatger par leurs sergens et offeciers de leur houstel et autres ; et par ainsi lesdis hommes pourtoient ledit boys comme dessus est dit avecques leurs beufz et charroys.

Sur le quinsiesme article dit et deppouse qu'il a ouy dire pareillement pluseurs foys ausdis hommes que iceulx hommes par le tamps desdis feu Messire Jehan et son filz aloient et ont alé querir ou vinhoble et d'ylllec le pourter là où mandé leur estoit le vin neccessere pour la despence desdis seigneurs de leur houstel, autrement estoient excecutes et gaigez comme dessus et leur estoit fourcé comme dessus. A esté interrogé combien a du trespas de feu Messire Jehan de Montault en sa, dit que trente ans ou environ.

Le septiesme jour du moys de martz **Guillaume de Longuevernhe** de la parroisse de Saint Santin de Cantalès oudit dioucese de Saint Flour eagé de cinquante ans et de bonne mémoire de quarente, testmoig par la partie dessus prouduyt, examiné et interrogé par vertu de sondit serement, dit et deppouse comme sensuyt :

Et premièrement sur le quatorziesme article dit et deppouse qu'il a veu et ouy par l'espace de vint ans continuellement ou quoy quil soyt durans iceulx vint ans et bien souvent que lez hommes de Amalry de Montault, de ses terres et seigneuries et de Saint Santin et de sa terre, ont pourté le boys ou chasteau de La Roquebraou pour le service dudit chasteau aucunes foys quant simplement les offeciers dudit seigneur le leur disoient et aucunes foys actendoyent qu'il leur feust commendé, et le leur commendoient les offeciers dudit seigneur, et lors quant commendé leur estoit , iceulx hommes le pourtoient quar commendé leur estoit. A esté interrogé quelle fource leur faysoient lesdis offeciers dudit seigneur se ilz ne pourtoient ledit boys par lesdis commendemens, dit qu'ilz le leur commendoient à grandes poynes que ilz le feissent dedans ung certain jour que lesdis offeciers donnoient à iceulx hommes de ce fere, et se lesdis hommes n'avoient pourté ledit boys oudit terme, iceulx offeciers lez gatgoient¹⁵⁸ et excecutoient¹⁵⁹, et lors estoit fourcé ausdis hommes de la pourter, et la pourtoient, mais il qui parle ne scet se la devoient fere quar comme dit n'est point d'icelle terre.

Sur le quif[n]ziesme article dit et deppouse qu'il a veu, par le tamps que dessus a dit, que lez hommes habitans desdictes terres et seigneuries sunt alez querir

Page 81 = folio 41 r

chacun an unne foys le vin ou vinhoble pour la despence dudit seigneur et de son houstel et le pourtoient et ont pourté oudit houstel avecques leurs beufz et charroys, ne scet se le devoient fere.

Sur le dixetseptiesme article dit et deppouse qu'il a veu durant le tamps de vint ans que lesdis hommes dudit seigneur et desdictes terres et seigneuries ont estez excecutez bien souvent par lez offeciers dudit seigneur pource qu'ilz n'avoient payé lez tailles que leur avoient fectes, tellement que pour fource desdictes excecutions et gatgieres ilz payoient et ont payé icelles tailles et bien souvent plus que ilz ne voulsissent.

Sur le dixhuytiesme article dit et deppouse qu'il a veu que lesdis hommes desdictes terres et seigneuries desquieulx il a dessus depposé sont alez foucher et fener le foin dez prés dudit seigneur bien souvent, et croyt que chacun an durant ledit tamps de vint ans. A esté interrogé se lesdis hommes onques¹⁶⁰ ont mis débat oudit seigneur et contrediction fere lez chouses dont il a depposé, dit qu'il n'en scet rien et qu'il n'en a point ouy parler excepté que du débat dont est fecte mention esdictes lectres.

¹⁵⁷ Agréablement : comprendre « de leur bon gré »

¹⁵⁸ De l'occitan « gatjar » = saisir, frapper d'une amende, payer une amende

¹⁵⁹ Du verbe déponent latin « exsequor, exsecutus sum », dont un des sens est « poursuivre en justice »

¹⁶⁰ « onques » ou « oncques » = jamais ; du latin « unquam », en occitan « oncas »

Icelluy jour mesmes Noble homme **Pierre de La Pachevie** escuyer de la parroisse de Roffiac oudit dioucese de Saint Flour eagé de cinquente ans et de memoire de trente cinq ou plus, testmoig par la partie que dessus prouduyt, examiné et interrogé par vertu de sondit serement dit et deppouse comme s'ensuyt :

Et premièrement sur lez premier second troysiesme quactriesme cinquiesme sixiesme septiesme et huytiesme articles dit et deppouse que il a veu par le tamps de feu messire Jehan de Montault chivalier seigneur de Montault que les terres et seigneuries de Montault appertenoient toutes oudit feu Messire Jehan c'est ascavoir lez baronnies chasteaux et chastellenies de La Roquebraou, de Carbonnieres, qui sont anciennes baronnies, et aussi les chasteaux et chastellenies de Glénat, de Poul, de Vieux Champs¹⁶¹, de Velzic et de Saint Victeur, et leurs appartenances, et en estoit seigneur seul et par le tout. Lesquelles seigneuries sunt et ont esté toutes de la terre et seigneurie de Montault à cause desquelles baronnies et seigneuries oudit seigneur Messire Jehan de Montault appertenoient et il avoit pluseurs vassaulx hommes et subgietz tenens de luy et de cesdictes baronnies et seigneuries lesquels c'est ascavoir lesdis vassaulx sunt et estoient tenuz et luy devoient fere hommaiges servitus et autres droys de fieufz¹⁶² à cause

Page 82 = folio 41 v

dez fieufz nobles et autres qu'ilz tenoyent dudit seigneur et de sesdictes baronnies chastellenies et seigneuries, et lesdis autres ses hommes et subgietz luy estoient tenuz en pluseurs cens, rentes de blé, d'argent, de gelinez¹⁶³, de moctons¹⁶⁴ et autres droys et devoirs à cause dez villaiges et bourderies¹⁶⁵ qu'ilz tenoient dudit seigneur de sesdictes seigneuries, lequel seigneur par le tamps qu'il vivoit avoit et luy appertenoit toutes justice et juridiction en cesdictes terres. Dit oultre que amprès le trespas dudit feu Messire Jehan luy succedèrent en cesdictes seigneuries c'est ascavoir : Amalry de Montault son filz ez baronnie de La Roquebraou out¹⁶⁶ il a beu chasteau et oussi ez chastellenies de Poul, de Glénat et de Saint Victeur, et leurs appertenances et deppendences, lesquelles baronnie et chastellenies ledit Amalry tient et possède comme siennes ; et feu noble Jehan filz dudit Messire Jehan succéda à sondit feu pere amprès son trespas ez baronnie de Carbonnieres et chastellenies de Vieux-Champs et de Velzic et leurs appartenances, lesquelles par le tamps qu'il visquist¹⁶⁷ amprès le trespas de sondit feu père avec leurs appertenances et deppendences il tint et posside comme siennes ; ouquiel feu Jehan de Montault a succédé amprès son trespas noble Guillaume de Montault son filz, c'est ascavoir esdictes baronnie de Carbonnières out il a beau chasteau et fourte place, et en la chastellenie de Vieuxchamps, et leurs appartenances, et en ladicte chastellenie de Velzic a succédé oudit feu Jehan noble Malrignon de Montault son fils et frère dudit Guillaume. Lesquielx nobles Guillaume et Malrignon frères tiennent et possident c'est ascavoir ledit Guillaume ladicte baronnie de Carbonnières et chastellenie de Vieuxchamps et icelluy Malrignon ladicte chastellenie de Velzic. Et par ainsi lesdis Amalry de Montault baylif¹⁶⁸, Guillaume et Amalrignon de Mont Ault sez nepveux, ont succédé oudit feu Messire Jehan de Montault en cesdictes terres et seigneuries de Montault ausquelx sont deus et appertiennent et lesquieux oussi tennent et possident toux et checuns lez droys et devoirs desdictes terres qui estoient deus oudit feu Messire Jehan seigneur de Mont Ault c'est ascavoir à checun d'eux pour telle part et portion qu'ilz luy succedent. Et ce a veu par le tamps de sadicte mémoire, luy qui parle, tenir et observer, et ainsi le dit-hom¹⁶⁹ publiquement en toute icelle terre de Montault.

Sur le noviesme article dit et deppouse qu'il a veu par l'espace de trente ans continuellement, et oultre que par ledit tamps, lez hommes dez terres et seigneuries de Montault comme de La Roquebraou et de Carbonnières ont fet le guet de nuyt esdictes places selon que lez seigneurs de Montault et leurs cappitaynes l'ordenoient, et ceulx qui ne

¹⁶¹ Vieux Champs, traduction littérale de « Veteribus Campis », ancien nom latin de Viescamp

¹⁶² Fieufz = fiefs, donc droits féodaux

¹⁶³ Gélines = poules

¹⁶⁴ Moctons ou mottions = moutons

¹⁶⁵ Borderies = métayeries, fermes

¹⁶⁶ « out » = « où »

¹⁶⁷ Francisation de « vixit » = « il a vécu »

¹⁶⁸ Bailli des montagnes d'Auvergne

¹⁶⁹ Hom = on

faysoient ou faysoient fere ledit guet devoient oucun prouffit et esmolument ausdis seigneurs ou à leurs cappitaynes.

Sur lez dixiesme et onziesme articles dit et deppouse que deppuys vint ans il a veu pluseurs foys et oussi ouy dire pluseurs foys ez

Page 83 = folio 42 r

dez terres de Carbonnieres c'est ascavoir desdis noble Guillaume et aussi a ouy dire aux hommes pluseurs desdictes terres et seigneuries devenues de ladicte succession oudit noble et puyssent seigneur Amalry de Montault c'est ascavoir que lez bayles desdictes terres et desdictes seigneuries levoient exigoient et ont levé et exigé desdis hommes dez rentes que iceulx hommes leur devoient à cause desdictes seigneuries ou prys de vint deux solx six deniers pour escu d'or du poys de troys deniers que est le pris de fourte monoye que la monoye feut appetissée de sa valeur, et a ouy que pluseurs foys lesdis hommes se rancuroyent. Dit oultre que pluseurs dez hommes de ladicte terre de Montault tenoyent lez villaiges qu'ilz tiennent desdis seigneurs de Montault, ilz ou leurs predecesseurs ou tamps que ladicte fourte monoye courroit.

Sur le tretziesme article dit et deppouse qu'il a veu par l'espace de trente ans passés ou environ que lez hommes de ladicte seigneurie de Carbonnieres pourtoient et ont pourté le blé et autres rentes qu'ilz devoient oudit lieu de Carbonnieres et aucunes foys amprès qu'ilz avoient pourté ledit blé oussi le pourtoient ou grenier dudit seigneur et autres foys a veu que amprès oussi iceulx hommes pourtoient et ont pourté ledit blé au molin. Dit oultre que oussi a ouy dire que par le tamps que ledit feu Messire Jehan de Montault vivoit et demouroit à La Roquebraou et lez bayles de la seigneurie et terre de Carbonnieres ont fait porter ausdis hommes de ladicte terre et seigneurie de Carbonnieres ledit blé qu'ilz devoient de rente à cause de ladicte seigneurie de Carbonnieres oudit lieu de La Roquebraou, et oussi dit qu'il a ouy dire que pareillement l'ont fait et acoustumé à fere lez hommes dudit Amalry et de cesdictes seigneuries. Dit oultre qu'il a ouy dire ce que a depposé pluseurs foys ausdis hommes de Carbonnieres dont oussi lesdis hommes souvent s'en rancuroyent.

Sur le quactorsiesme article dit et deppouse qu'il a veu par l'espace desdis trente ans et de ca que lez hommes de ladicte terre de Carbonnieres pourtoient et ont pourté le boys oudit lieu et oudit seigneur et à ses officiers par le chauffaige dudit seigneur et service de sondit hostel. Dit oultre que aussi a veu pareillement que lez hommes dez terres dudit Amalry l'ont fayt pareillement, et oultre dit qu'il a ouy dire à aucuns desdis hommes de ladicte seigneurie de Carbonnieres qu'ilz ont pourté ledit boys quactorse foys en unne année, et de ce se plainoient et disoyent qu'ilz y avoyent rompus deux ou troys charrois ou aucunes fois foulés lez beufz.

Sur le quinsiesme article dit et deppouse qu'il a veu deppuys

Page 86 = folio 42 v (les photos 84 et 85 doublent 82 et 83)

quinse ans contynuellement que lez hommez desdictes seigneuries de Carbonnieres et de Vieuxchamps ont pourté tout le vin que a esté deppuys neccessere checun an pour la despance dudit seigneur oudit lieu de Carbonnieres et icelluy vin sont alez querir ou vinhoble out il croyst et out estoit achapté avec leurs beufz et charrois, et ce checun an deppuys lesdis vint et cinq ans ; et pareillement oussi a ouy dire que lez hommez dudit Amalry l'ont fet pareillement comme a dit desdis hommez de la seigneurie de Carbonnieres. Dit oultre qu'il a ouy dire à pluseurs hommes anciens c'est ascavoir à Meistre Bec Brige de La Roquebraou et à autres, et ainsi le disoyt hom publiquement, que lesdis hommez de ladicte terre de Montault avoyent acoustumé anciennement porter et aler querir avec leurs beufz et charrois ledit vin checun an oudit seigneur comme dessus a dit et depposé.

Sur le setziesme article dit et deppouse que il qui parle a veu pluseurs foys que lez hommes de ladicte terre et seigneurie de Carbonnieres aloient querir ledit boys et ledit vin comme dessus est dit et pareillement oussi aloient fener lez prés et foyner les ortz et vergiers dudit seigneur quant hom le leur commendoit, et porter avecques leurs charrois lez pierres et fustage pour la reparation et ediffication de l'oustel dudit seigneur et aussi faysoient lez autres affaires dudit seigneur que commendé leur estoit ; et ce a veu il qui parle pour l'espace de trente ans passés et deppuys continuellement quant ausdis hommes commendé a esté et a ouy dire que pareillement et encoures plus l'ont fait lez hommes desdictes terres dudit Amalry.

Sur le dixeseptiesme article dit et deppouse qu'il a ouy dire à pluseurs et publiquement que au tamps que ledit feu Messire Jehan de Mont Ault vivoyt il indisoit et impousoit checun an à son playsir et à sa volenté taillez à ses

hommes de cesdictes seigneuries de La Roquebraou, de Carbonieres, et toux autres de cesdictes terres et seigneuries, lesquelles taillez iceulx hommes aussi payoyent checun an, et a veu aussi il qui parle et de son tamps que ledit feu Messire Jehan vivoit que icelluy feu Messire Jehan a fait payer lesdictes tailles checun an à cesdis hommes, et amprès le decces dudit feu Messire Jehan de Montault ledit Jehan de Montault son filz faysoit et a fait payer lesdictes tailles qu'il faysoit à sesdis hommes de ses seigneuries non pas checun an mais oucunnes foix de deux en deux ans, les autres foys de troys en troys, lez aultres plus et les aultres moyns. Dit oultre que oussi il qui parle a ouy dire que ledit Amalry a fectes checun an lez taillez c'est ascavoir indictes et impouées à sa volenté

Page 87 = folio 43 r

à ses hommes de ses terres que luy ont appertenu de la succession de sondit feu pere, et les a fectez payer à sesdis hommes.

Sur le dixhuytiesme article dit et deppouse qu'il a veu par l'espace de vinpt cinq ou trente ans que les hommes de ladicte seigneurie de Carbonieres ont fouché fené et pourté le foin checun an comme contenu est oudit article. A esté interrogé se il scet que lez hommes de lesdictes terres anciennement ayent mis nul débat et contrediction de fere lesdis seviles et servitus dont dessus a depposé par justice, dit que non excepté que du débat et de la contrediction dont est fecte mention esdictes lectres.

Le jour que dessus **Pierre La Chalm** du lieu de Cros oudit dioucese de Saint Flour, eagé de quactre vinptz ans ou environ, et memoire de septante ou environ, tesmoig par la partie que dessus prouduyt, examiné et interrogé par vertu de sondit serement, dit et deppouse comme s'ensuyt :

Et premièrement sur lez premier second troysiesme quactriesme cinquiesme sixiesme septiesme et huytiesme articles dit et deppouse que il a veu par le tamps de feu messire Jehan de Montault chivalier seigneur de Montault que les terres et seigneuries de Montault appertenoient toutes oudit feu Messire Jehan c'est ascavoir lez baronnies chasteaux et chestellenies de La Roquebraou, de Carbonieres, qui sont anciennes baronnies, et aussi lez chastellenies de Glénat, de Poul, de Vieux Champs, de Velzic et de Saint Victeur, et leurs appertenances, et en estoit seigneur seul et par le tout. Lesquelles seigneuries sont et ont esté toutes de la terre et seigneurie de Montault, à cause desquelles luy appertenoient et il avoit pluseurs vassaulx hommes et subgietz tenens de luy et de cesdictes baronnies et seigneuries lesquelx vassaulx sont et estoient tenuz et luy devoient fere hommatges servitus et autres drois de fieufz à cause dez nobles fieufz et autres qu'ilx tenoyent dudit seigneur et de cesdictes baronnies chastellenies et seigneuries, et lesdis autres hommes siens et subgietz luy estoient tenuz en pluseurs cens, rentes de blé, d'argent, de gelines, de moctons et autres drois et devoirs à cause dez villaiges et bourderies qu'ilz tenoient dudit seigneur de cesdictes seigneuries, lequel seigneur par le tamps qu'il vivoyt avoit et luy appertenoit toute justice et juridiction en cesdictes terres. Dit oussi que amprès le trespas dudit feu Messire Jehan luy succedèrent en cesdictes seigneuries c'est ascavoir : Amalry de Montault son filz ez baronnie de La Roquebraou out il a fort et beau chasteau et aussi ez chastellenies et chasteaux de Poul, de Glénat, de Saint Victeur, et leurs appertenances et dependences, lesquelles baronnie et chastellenies ledit Amalry tient

Page 88 = folio 43 v

et possède comme siennes ; et feu noble Jehan de Montault filz dudit Messire Jehan succéda à sondit feu pere amprès son trespas ez baronnie de Carbonieres et chastellenies de Vieuxchamps et de Velzic et leurs appartenances, lesquelles durant le tamps de sa vie amprès le trespas de sondit feu père avec leurs appertenances il tint et posside comme siennes ; ou quel feu Jehan de Montault a succédé amprès son trespas noble Guillaume de Montault son filz, c'est ascavoir esdicte baronnie de Carbonieres out il a beau chasteau et fourte place, et en la chastellenie de Vieuxchamps, et leurs appartenances, et en ladicte chastellenie de Velzic a succédé oudit feu Jehan noble Amalryc de Montault son fils et frère dudit Guillaume. Lesquieux nobles Guillaume et Amalrion frères tiennent et possèdent c'est ascavoir ledit Guillaume lesdictes baronnie de Carbonieres et chastellenie de Vieuxchamps, et icelluy Malrion ladicte chastellenie de Velzic. Et par ainsi lesdis Amalry baylif, Guillaume et Amalrion de Montault sez neveux, ont succédé oudit feu Messire Jehan de Montault en cesdictes terres et seigneuries de Montault, ausquielx sont deus et appertienent et lesquieulx oussi tiennent et possident toux et checuns lez drois et devoirs desdictes terres qui

estoyent deues oudit feu Messire Jehan seigneur de Montault c'est ascavoir à checun d'eux pour telle portion qu'ilz luy succedent. Et ce a veu par le tamps de sadicte memoire, luy qui parle, tenir et observer, et aussi le dit-hom publiquement en toute ladicte terre de Montault, quar ainsi l'a veu comme dessus.

Sur le noviesme article dit et deppouse qu'il a veu par le tamps de sa memoire que lez hommes dez terres et seigneuries dudit feu Messire Jehan de Montault ont fet le guet de nuyt aux chasteaux dudit seigneur selon que lez cappitaynes desdis chasteaux l'ent ordonné et aucunes foys ont fet icelluy guet de quinze en quinze jours et lez autres foys de huyt en huyt selon que lez hommes habundoyent esdictes terres.

Sur lez dixiesme et onziesme articles dit et deppouse qu'il a veu par le tamps de sadicte memoire que lez baylez et officiers dudit feu Messire Jehan et de ses successeurs ont fet payer aux hommes de sesdictes terres et iceulx hommes leur ont payé lez rentes que devoient en argent oudit seigneur en monoye courant à extimation de fourte monoye de laquelle de vinpt deux soulx et demy valoyent ung escu d'or du poys de troys deniers. Dit oultre que par celluy tamps que ladicte fourte monoye avoit cours aucuns dez villaiges de ladicte terre de Montault estoient vestus.

Page 89 = folio 44 r

Sur le tretziesme article dit et deppouse qu'il a veu par ledit tamps que lez hommes de ladicte terre pourtoient et ont pourté lez rentes de blé et autres rentes oudit seigneur en ses places et là out il demouroit, et lez sergens dudit seigneur leur commendoient ce fere, et aulcunes foys lez excecutoient, et pour ce ne scet se ilz le fayçoient pour fource ou non. Et dit oultre que aucuns dez hommes d'icelle terre s'en sont allez hors d'icelle pour fource desdictes excecutions.

Sur le quactorsiesme article dit et deppouse qu'il a veu par le commencement du tamps de sa memoire que lez hommes de ladicte terre ne pourtoient pas le boys si souvent audit seigneur comme font au jour d'uy, et ont fet et commencé fere souvent quarente ans a et deppuys. Et dit que anciennement iceulx hommez ne pourtoient pas la moytié souvent ledit boys qu'ilz ont fet deppuys lesdis quarente ans. Et dit que deppuys lesdis quarente ans lesdis hommes de ladicte terre de Montault ont pourté bien souvent avec leurs beufz et charroys oux houstelz où le seigneur de Montault demouroit le boys qui à icelluy seigneur estoit neccessere pour son chauffaige et service de son houstel ; et à ce fere lez sergens et autres officiers dudit seigneur fourçoient et contraignoient lesdis hommes par excecution et gatgieres, et tellement que oucuns hommez de ladicte terre s'en alarent hors d'icelle. A esté interrogé se aucuns d'iceulx hommes estoient à ce plus suppourtez que lez aultres, dit qu'il veoyt et a veu que autant estoient de ce fere contraings lez ungs que lez autres esgualmente.

Sur le quinziesme article dit et deppouse qu'il a veu par le tamps de sadicte memoire que lez hommez de ladicte terre de Montault avec leurs beufz et charroys sont alez querir au vinhoble le vin neccessere pour ledit seigneur et pour la despance de son houstel, et icelluy pourtoient à La Roquebraou et à Carbonnieres et là out ledit seigneur demouroit checun an unne foys checun desdis hommes ; ne scet se la faysoient par fource ou non ; toutes fois lez seigneurs leur commendoient que la feissent, et lors oucuns desdis hommes donnoient aucun argent ou autre chouse ausdis sergens affin qu'ilz n'y alessent, et ce moyennent iceulx hommes qui ainsi donnoient de icelle foys ne y aloient point mais lez autres qui rien ne donnoyen y aloient quar fourcé leur estoit. A esté interrogé pour quoy leur estoit fourcé, dit que pour ce que lesdis sergens le leur commendoient et aucunes foys lez gaigoyent et lez excecutoient.

Sur le setziesme article dit et deppouse qu'il a veu deppuys lesdis quarente ans et oultre que lez hommez dudit feu Messire Jehan et de ses successeurs ont fait lez manevres et avec leurs beufz et charroys et autres services et exploix à volenté d'icelluy seigneur, et quant ne le faysoient ilz estoient excecutéz.

Sur le dixeseptiesme article dit et deppouse qu'il a veu par le tamps de sadicte

Page 90 = folio 44 v

memoire et ou tamps que ledit feu Messire Jehan de Montault vivoyt que icelluy feu Messire Jehan par ses officiers faysoient indire et impouser sur toux ses hommes de ses terres checun an unne taille de telle somme que bon luy sembloit, laquelle taille il faïçoit devire et esgualer sur iceulx hommes selon que bon luy sembloit sens lez appeller à ce et puy les a faittes lever par cesdis officiers, c'est ascavoir de checun desdis hommes la somme que indicte et impousée leur estoit et iceulx hommes lez payoient et lez ont payées, et ceulx qui ne lez pouvoient payer estoient excecutez tellement que amprès par lez excecutions estoient contraings de lez payer ; et Amalry de Montault filz

du dit Messire Jehan pareillement l'a contenué comme avoit acoustumé son pere, mais ledit feu Jehan de Montault filz dudit feu Messire Jehan par le tamps qu'il visquit ne impousoit ne levoit lesdictes tailles si souvent comme lesdis son feu pere et Amalry son frere. A esté interrogé combien souvent levoit et faysoit lesdictes taillez ledit feu Jehan, dit que quant il mariet sez filhes.

Sur le dixhuytiesme article dit et deppouse qu'il a veu checun an que lez hommez de ladicte terre de Montault checun an ont fouché et fené lez prés dudit seigneur et ledit foin ont pourté en son houstel avec leurs beufz et charrois, mais ne scet si estoyent fourcés ou non, ne oussi se la devoient fere.

Sur lez vinptnoviesme, trentiesme et trenteungiesme articles dit et deppouse qu'il scet que Jehan La Brousse, Jehan d'Artiguas, Vidaul de Cavanet, Bernard de Cavanet, Stienne de Maulezmaysons, Geraud Del Vuygue, Geraud et Pierre de Bonnal, Micheau d'Algueyres, Thomas de Cuercuyt, Geraud et Jehan de Masergues, Jehan de Vidal, Pierre du Cassaing, Pierre et ung nompmé Combes de Dilhac, Geraud de Doude de Leyritz, Jehan de Doude, Jehan de Calvet et Jehan de Ventach, Pierre dit Pierronet de Crebetergues qui sunt hommes de ladicte seigneurie de Carbonnieres.

Icelluy jour mesmes venerable et discrete parsonne Messire **Jehan de Estienne dit Guoldon**, recteur de l'esglise de Cros oudit dioucese de Saint Flour, agé de cinquante ans ou environ et memoire de quarente ans et oultre, testmoig par la partie que dessus prouduyt, examiné et interrogé par vertu de sondit serement, dit et deppouse comme s'ensuyt :

La suite manque puisqu'il manque les feuillets 45-46-47-48-49-50, donc ce qui suit est d'un autre témoin dont nous n'avons pas le nom, mais qui d'après son témoignage est de la famille Sabatier de Montvert.

Page 91 = folio 51 recto

..... foys et souvent à aucuns desdis hommes qu'ilz treuvoient de pourter le foin à icelluy seigneur et de ses prés, et le luy avoient pourté en son fenier et ce deppuys lesdis quinze ans et jusques audit appel sans ce que il qui parle ait sceu ne ouy dire que par avant iceulx hommes en ce ayent mis nul debat ne contrediction à leur seigneur ; toutes foys il qui parle ne scet se est rayson ou non.

Sur le dixeseptiesme article dit et deppouse qu'il a veu deppuys quarente cinq ans et trente cinq a et oultre par le tamps que Messire Jehan de Montault chivalier seigneur de Montault pere de Jehan et Amalry freres vivoit, que unne foys se assembloient par ledit tamps à l'ostel du pere dudit testmoig ou lieu de *Montvert ... (illisible)* nompmé Guillaume de Teulet et unautre nompmé Pierre dit Per.... de Ventach et pluseurs autres hommes dudit seigneur, et illec *deviserent* et esgualerent unne taille, laquelle ledit feu Messire Jehan de Montault avoit indicte et impousee sur sez hommes habitans de cesdictes seigneuries de Carbonnieres, et feu Guillaume Sabatier frere dudit tesmoig *... (illisible)* icelle taille et la division et distribution d'icelle. A esté interrogé de combien de somme estoit icelle taille, dit qu'il n'en scet rien. A esté interrogé se la somme d'icelle taille avoit esté taxée par ordrenance desdis hommes, dit que croit que non, la somme universale d'icelle combien que la distribution et division fectes comme dessus est dit, par la quelle checun sceut combien il en *devoit*, fut fecte de consentement et volenté d'iceux hommes et quoy qu'il soit de ceulx qui lors estoient presens. Dit oultre que il qui parle a ouy dire et disoit hom publiquement et disoient lez hommes oussi comunément qui estoient hommes dudit feu Messire Jehan de Montault seigneur de Montault et autres oussi circumvoysins à cesdis hommes que icelluy feu Messire Jehan par le tamps qu'il vivoit impouset et indisoit comunement checun an unne foys unne taille sur ses hommes de ses terres quant bon luy sembloit. Neantmoys dit qu'il a veu et ouy dire aux hommes dudit Amalry et de ses seigneuries que ly sont avenues de la succession dudit son feu pere que icelluy Amalry amprès le trespas de sondit feu pere en cesdictes terres et sur cesdis hommez a indit et impousee pluseurs taillez, lesquelles a exigées et levées. Dit oultre que onques il n'oyt dire que lesdis hommez ayent contredit ne mis debat oudit feu Messire Jehan de Montault de luy payer lesdictes taillez comme dessus a dit et deppousee ; bien est vray que amprès le trespas dudit feu Messire Jehan Ma Dame Jehanne de Mallemort mere dudit Amalry unne foys indeist et impoussa unne taille sur lez hommes de sondit filz qui estoit trop excessive celon qu'il a ouy dire, et pour ce lesdis homme lors contredirent. A esté interrogé

Page 92 = folio 51 v

se par ledit contrediction lez hommes cesserent de payer ladicte taille, dit que il ouyt dire que lors pour ce que ladicte taille estoit trop excessive elle feust reduyte à somme raysonnable, la quelle selon qu'il a ouy dire aux hommes ilz payeont, mais autrement ne a ouy dire que iceulx hommes ayent contredit aucunement à payer lesdictes tailles pour lez foys que impousées ne ont esté tant ceulx de Guillaume de Carbonieres que ceulx dudit Amalry excepté que dudit appel et deppuys dont est fecte mention esdictes lectres. Ne scet se lesdis hommez devoient estre taillables de rayson.

Sur le dixhuytiesme article dit qu'il se reppourte à ce que dessus a dit et deppousé.

Le huytiesme dudit moys de mars **Durand La Brousse** de la ville d'Orlliac oudit dioucese de Saint Flour, eagé de sixante ans ou environ, et memoire sinquante, tesmoig par la partie que dessus prouduyt, examiné et interrogé par vertu de sondit serement, dit et deppouse comme s'ensuyt :

Et premierement sur le noviesme article dit et deppouse que deppuys cinquante ans et quarente quactre ans a et oultre il qui parle qui est natif de la terre et baronnie de Carbonieres de Montault feist deux ou troys foys le guet ou chasteau de Carbonieres de Montault, par lequel tamps lez autres hommes de ladicte terre faysoient oussi ledit guet oudit chastel. Et a veu il qui parle que lez autres hommes de ladicte terre oussi ont fet ledit guet deppuys ledit tamps san nulle contrediction excepté que pour ce que le seigneur dudit lieu et chasteau preignoit aucuns prouffiz et esmolumens de aucuns hommes de ladicte terre à cause dudit guet moiennens lesquelx prouffitz ilz ne fayçoient mye ledit guet, et par ainsi lez autres qui ne donnoient iceulx prouffitz leur estoit fourcé que feissent plus souvent ledit guet qu'ilz n'eussent se ledit seigneur n'eust prins ledit prouffit dez autres, dont s'en sont rancurés.

Sur le dixiesme, onziesme et dotziesme articles dit et deppouse qu'il a ouy dire aux hommes habitans de ladicte terre de Montault et de Carbonieres pluseurs fois deppuys trente ans que le seigneur dudit lieu leur faysoit payer lez rentez qu'ilz devoient en argent au pris et valeur de fourte monoye, de laquelle monoye vinpt deux soulx et demy valloient ung escu d'or du poys de troys deniers.

Page 93 = folio 52 r

Sur le tretziesme article dit et deppouse qu'il a veu par le tamps que feu Messire Jehan de Montault chivalier seigneur de Montault pere de feu Jehan de Montault qui tenoit toutes lez terres et seigneuries de Montault vivoit lez hommez habitans de ladicte chastellenie et seigneurie de Carbonieres pourtoient le blé que devoient oudit seigneur aucunes foys oudit chastel de Carbonieres et aucunes foys ou chastel de La Roquebraou, et deppuys iceulx hommes desdictes terres de Carbonieres de Montault par le tamps que ledit feu Jehan de Carbonieres demouroit oudit chastel de Carbonieres pourterent et ont pourté ledit blé et autres rentes qu'ilz devoient oudit seigneur Jehan et à son chastel de Carbonieres excepté ung nompmé Tremoillez qui est homme de ladicte terre franc.

Sur le quatorziesme article dit et deppouse qu'il a veu pluseurs foys et souvent que lez hommez de la seigneurie de Carbonieres de Montault pourtoient et ont pourté le boys pour chouffer oudit chastel de Carbonieres, et a ouy dire aux hommes habitans de ladicte seigneurie pluseurs foys que iceulx hommez le pourtoient et ont pourté et tieulx hommes il n'y avoit que checunne septmayne l'avoient pourté unne fois dont iceulx hommes s'en rencuroient. A esté interrogé il qui parle combien de tamps a veu ce que deppouse, dit que par l'espace de quarente ans, ou veu ou ouy dire que ainsi l'ont fet par ledit space, ne scet pas s'il est rayson, mais onques n'a ouy dire ne sceu que lez hommes aient à ce mis debat ou contrediction jusques au tamps de l'apel dont est fecte mention esdictes lectres.

Sur le quinziesme article dit et deppouse qu'il a veu pluseurs fois et souvent que lesdis hommes de ladicte seigneurie de Carbonieres de Montault sunt alez querir avecques leurs beufz et charroys le vin au vinhoble pour la despance de l'oustel dudit seigneur checun an et l'ont pourté oudit chastel de Carbonieres, et aulcuns desdis hommez y aloient deux foys pour année, er de ce se rencuroient. Dit oultre que comté ledit tamps qu'il a veu ce que maytenent a dit, il a veu et ouy dire à iceulx hommes et autres publiquement par l'espace desdis quarente ans que lesdis hommes desdictes seigneuries de Carbonieres de Montault sont alez querir et ont pourté ledit vin comme dit est checun an san ce que il qui parle ait deppuys ouy dire le contraire ne sceu que iceulx hommes ayent à ce mys debat ne

contradiction, excepté que deppuys le tamps dudit appel interjecté. Dit oussi qu'il ne scet se lez hommes estoient tenuz ce fere pour raison ou non, mais bien scet qu'ilz se rencuroyent.

Sur le setziesme article dit et deppouse qu'il a veu pluseurs foys et souvent deppuys quarente ans et a ouy dire pareillement

Page 94 = folio 52 v

aux hommes habitans de ladicte chastellenie de Carbonnieres qu'ilz ont fait et faysoient par icelluy tamps lez manevres, exploix et services dont est fecte mention oudit article ; ne scet pas se ilz y sont tenuz ou non, mais toutes foys lesdis hommes s'en rencuroyent fourt, mais autrement ne contredisoient jusques ou tamps dudit appell. Dit oultre qu'il a veu et ouy que ledit feu Jehan de Montault seigneur de Carbonnieres deist unne foys à aulcuns de sesdis hommes qu'ilz faysoient lesdictes manevres, exploix et services, veulsissent ilz ou non.

Sur le dixeseptiesme article dit et deppouse que par le tamps que ledit feu Messire Jehan de Montault chivalier vivoit il fayçoit payer checun an pour certain tamps de années, mais n'est recours de certain nombre, lez tailles qu'il indisoit et impousoit sur ses hommes dez terres qu'il tenoit lors, et le pere de luy qui parle lez payoit, et aucunes et pluseurs fois payoit par unne taille cinq franz checun an selon qu'il qui parle a ouy dire à son dit pere.

Sur le dixhuytiesme article dit et deppouse qu'il a veu que lesdis hommes fayçoient et ont fet pluseurs foys et souvent le contenu oudit article, et l'a ouy dire qu'ilz l'ont fait pour l'espace de quarente ans, dont iceulx hommes s'en rencuroyent, et disoyent qu'ilz ne le devoient pas fere, mais autrement ne scet se ilz y ont mys autre debat excepté que dudit appel.

Ledit jour, Jehan La Borie du lieu de Saint Santin de Cantalès oudit dioucese de Saint Flour, eagé de sixante ans ou environ, et de bonne memoire quarente et oultre, testmoig par la partie que dessus prouduyt, examiné et interrogé par vertu de son dit serement, dit et deppouse comme s'ensuyt :

Et premièrement sur le noviesme article dit et deppouse que lesdis hommes de la terre et seigneurie de Montault doyvent et sont tenuz et ont acoustumé fere le guet selon l'ordenance desdis seigneurs desdictes terres ou de leurs cappitaynes ez lieux et chasteaulx dont ilz ressortissent, et lesdis hommez ne y meistrent oucun debat ne contradiction que il qui parle le sayche, ainsi qu'il est acoustumé fere dans tout le royaume de France. Bien est vray que lesdis hommez dient que ilz ne sont mye tenuz le louer selon que dit il qui parle.

Sur le contenu ez dixiesme, onziesme et douziesme articles dit que lez

Page 95 = folio 53 r

hommes de ladicte terre et seigneurie de Montault doyvent bailler lez rentes qu'ilz devoient ausdis seigneurs en argent ou pris de monoye courant et non à aultre plus fourte valeur. Dit qu'il est recors du tamps que courroit bonne et fourte monoye, de laquelle ung escu d'or du pys de trois deniers valloit vint deux soulx six deniers, par le quel tamps aucuns dez hommes de la terre et seigneurie de Montault avoient vestus lez villaiges, ilz ou leurs predecesseurs.

Sur le tretziesme article dit et deppouse qu'il a veu que les baillez du seigneur de Montault meysuroient lez rentes du blé ez villaiges dez hommez qui lez devoient, et dit oultre que lesdis hommes aucunes foys ont pourté lesdictes rentes oudit seigneur ou à son grenier à requeste desdis baylles et pour fere pleyisir ausdis baillez quar iceulx baillez lez devoient pourter oudit seigneur.

Sur le quatorziesme article dit et deppouse que il qui parle a veu que lez hommez dudit seigneur de Montault et dez seigneurs de ladicte seigneurie et terre de Montault pourtoyent et ont pourté à l'oustel dudit seigneur le boys que oudit seigneur estoit neccessere pour son chauffaige et pour le service de son hostel toutes quantes foiz lesdis seigneurs ou ses officiers le requeroient ausdis hommez, et ce a veu il qui parle par le tamps que feu Messire Jehan de Montault seigneur de Montault et pere de noble et puysent homme Amalry de Montault baylif dez montaignez d'Auvergne vivoit, et oussi amprès le trespas dudit feu Messire Jehan, que lez hommez pourtoient ledit boys avec leurs beufz et charroys ou lieu de La Roquebraou en tamps d'ivert, et de ce aucunes foys aulcuns d'iceulx hommez, c'est ascavoir dez terres et seigneuries de La Roquebraou, de Poul, de Glenat et de Saint Victeur oussi lesdis hommez

ne pourtoient ledit boys ledit seigneur lez fayçoit excecuter et gaiger, et ce il qui parle a veu par le tamps de sa memoire.

Sur le quinziesme article dit et deppouse que il qui parle a veu par l'espace de quarente ans passés que les hommes dudit feu Messire Jehan de Montault et de ses terres luy pourtoient et ont pourté par ledit tamps le vin qui estoit neccessere audit seigneur et pour sa despance, et icelluy vin aloient et sunt alez querir checun an au vinhoble où il estoit achapté avec leursdis beufz et charrois, et amprès par le tamps dudit Amalry l'ont fait pareillement chacun an unne foyz quant iceulx hommez ont esté de ce requis.

Sur le setziesme article dit et deppouse que il qui parle a veu que quant lez seigneurs de ladicte seigneurie de Montault requeroit sesdis hommes

Page 96 = folio 53 v

qu'ilz luy fouchessent son foin, et lez autres qu'ilz le feissent et fenassent, et les autres que le pourtassent, iceulx hommes l'ont fet et le faysoient par ledit tamps de quarente ans passés, avec leurs beufz et charrois dez prés dudit seigneur, et de ce lesdis hommez ne s'en rencuroyent mye affin de s'en plaindre.

Sur le dixeseptiesme article dit et deppouse que il qui parle a veu par l'espace desdis trente ans, tant par le tamps que ledit Messire Jehan de Montault vivoit que aussi amprès son trespas, que ledit seigneur, et amprès sondit trespas ledit Amalry ou ses offeciers fayçoient et ont fait payer environ de checun an ou de deux en deux ou de troys en troys ans aux hommes de leur terre de Montault, c'est ascavoir dez terres et seigneuries de La Roquebraou, de Poul, de Glenat et de Saint Victeur unne taille de tel somme que oudit seigneur sembloit bon, et se lesdis hommes ne la payoent ou ne le pouvoient paier, iceulx hommes estoient excecutes, et lesdis seigneurs ou leurs offeciers les faysoient et ont fait excecuter pour payer lesdictes taillez, ausquellez payer aussi lesdis hommes ne ousoient contredire. Ne scet oussi il qui parle que iceulx hommez à paier lesdictes taillez onques y aient contredit sinon que deppuys le appel dont est fecte mention esdictes lectres, et oussi excepté que unne fois noble et puysent Dame ma Dame Jehanne de Mallemort mere dudit Amalry pour *ou a fon* desdictes taillez et debat avec lez hommez des terres et seigneuries de Montault qui estoient hommez dudit Amalry son filz, dont furent esluz arbitres c'est ascavoir Maistrez Arnaud La Chiese et Jehan du Moulin clerchez, et amprès ledit compromis lesdis hommez payerent unne taille dont avoit esté meu ledit debat pour le mariage de Jehanne et Aleyne de Montault et pour fere nonnen Eliz de Montault, fillez dudit feu Messire Jehan de Montault. A esté interrogé se peyerent unne taille seullement pour toutes lesdictes troys fillez, et pour checune la sienne, dit que pour checun unne taille. A esté interrogé comment lesdis arbitres le ordonnerent, dit que checune desdictes fillez eust sa taille. A esté interrogé se pour autres affayres lesdis hommes paierent taillez, dit que lesdis seigneurs de Montault impousoient et indisoient lesdictes taillez à leur plaisir sur leurs hommez et de leurs terres, lesquielles iceulx hommes paioent et ont payées et se ne lez payoent ilz estoient excecutez par lez offeciers desdis seigneurs, et par ainsi ilz payoent moyennant lesdictes excecutions icellez taillez ; toutes foyz dit qu'il ne scet se ilz lez devoient ou non. Et dit oultre qu'il a ouy dire unne foyz à feu Maistre Bec Brege jutge dudit lieu de La Roquebraou que lesdis seigneurs avoient fait aucunes taillez fourtez, et pour ce n'en vouloit avoir rien amprès que ledit feu Messire Jehan de Montault fut trespasé et en presence de ladicte Dame Jehanne de Mallemort Dame de Montault, laquelle Dame lors dit audit feu Maistre Bec que bien foudroit qu'il y eust desdictes taillez aucunes que feussent justes, et lors ledit Maistre Bec deist que

Page 97 = folio 54 r

ce seroit raison, lequiel Maistre Bec estoit jutge de ladicte terre de Montault.

Sur le dixhuytiesme article dit que se reppourte à ce que a dit dessus.

Ledit jour, Guillaume Pradal mareschal du lieu de Saint Santin de Cantalès oudit dioucese de Saint Flour, eagé de quarente huyt ans, et de bonne memoire trente huyt, testmoig par la partie que dessus prouduyt, examiné et interrogé par vertu de sondit serement, dit et deppouse comme s'ensuyt :

Et premièrement sur le quactorziesme et dixeseptiesme articles dit et deppouse que deppuys vinpt et quactre ans darniers passés et par ledit tamps qu'il a demouré à Saint Santin il a ouy dire à pluseurs des hommez de ladicte seigneurie de La Roquebraou du lieu et parroisse de Saint Santin qu'il leur convenoit apourter le boys oudit baylif dez

montaignes d'Auvergne seigneur de La Roquebraou, et que lez sergens d'icelluy seigneur leur avoient commendé, et se n'y aloient doubtoient iceulx hommes d'estre excecutes, toutes foys il ne lez veyoit point aler querir ledit boys. Dit oultre que il qui parle deppuys vint ans darniers passés a veu lever et exiger et percevoir en ladicte parroisse de Saint Santin aux officiers dudit Amalry de Montault et, par avant que iceluy Amalry, à sa mere Dame de Malemort, la taille sur checun desdis hommes de ladicte terre de Montault communement checun an, et quant iceulx hommes ne vouloient paier icelle taille lez faysoient excecuter et contraindre à icelle payer A esté interrogé si lesdis de Montault indisoient et faysoient tailler lesdictes taillez à leur volenté, dit qu'il n'en scet rien, toutes foys il cuyde que ilz lez esgualoient et indisoient sur checun desdis hommes ou sez officiers et aucuns d'iceulx hommes selon que checun d'iceulx pouvoit bonnement pourter et payer d'icelles taillez. Dit oussi que lesdis hommes ou aucuns d'eux de ce que estoient trop chargés de ladicte taille s'en rencuroient. A esté interrogé se il a veu onques debat esdictes taillez, dit qu'il a ouy dire publiquement aux hommez de la parroisse de Saint Santin, lesquelx ladicte Dame de Mallemort tailloit par icelluy tamps, que iceulx hommez avoient appellé de la taille que ladicte Dame faysoit. A esté interrogé se ilz poursuyvoient leur appellation, dit qu'il n'en scet rien, toutes foys il dit que Maistre Arnaud La Chiese et Jehan du Moulin ordenerent que ladicte Dame levast sur lesdis hommez aucune chouse, la quielle il qui parle ne scet.

Page 98 = folio 54 v

Sur le quatorziesme (18^{ème}) article dit et deppouse que deppuys vint et quatre ans il qui parle a veu que ladicte Dame Jehanne touteresse dudit Amalry son filz a fet venir tant qu'elle a gouverné la terre de sondit filz lez hommez d'icelle terre une foys checun an, c'est ascavoir lez ungs lesquelx elle mandoit pour foucher le foin ez prés dudit seigneur, lez aultres pour le fener, et fere, lez autres pour le pourter avec leurs beufz et charroys selon qu'elle lez mandoit. Dit que à ce nul de contredissoit combien que n'estoyent pas bien contens de perdre lors leur tamps pour fere ce que dit est. Dit oussi qu'il a veu que deppuys ledit tamps que lesdis hommes de ladicte terre ont fouché et fené pourté ledit foin comme dit est sans nul autre contredit excepté que deppuys le appel dont est fet mention esdictes lectres.

Le onziesme jour dudit moys de mars et l'an que dessus **Durand Fabre** de la parroisse de Sait Pol dez Landes oudit dioucese de Saint Flour, eagé de sinquante huyt ans, et de bonne memoire de quarente huyt ans ou environ, tesmoig par la partie que dessus prouduyt, examiné et interrogé par vertu de sondit serement, dit et deppouse comme s'ensuyt

Et premièrement sur lez premier second troysiesme quactriesme cinquiesme sixiesme septiesme et huytiesme articles dit et deppouse que il a veu par le tamps de feu messire Jehan de Montault chivalier seigneur de Montault que lez terrez et seigneuries de Montault appertenoient toutes oudit feu Messire Jehan c'est ascavoir lez baronnies chasteaux et chastellenies de La Roquebraou, de Carbonnieres, qui sunt anciennes baronnies, et aussi lez chasteaux et chastellenies de Glénat, de Poul, de Vieux Champs, de Velzic et de Saint Victeur, et leurs appertenances, et en estoit seigneur seul et par le tout. Lesquelles seigneuries sont et ont esté toutes de la terre et seigneurie de Montault, à cause desquelles seigneuries oudit seigneur messire Jehan de Montault appertenoyent et il avoit plusieurs vassaulx hommes et subgietz tenens de luy et de cesdictes baronnies et seigneuries, lesquelx c'est ascavoir lesdis vassaulx sunt et estoyent tenuz et luy devoient fere hommaiges seremens et autres droys de fieufz à cause dez fieufz nobles et autres qu'ilx tenoyent dudit seigneur et de sesdictes baronnies chastellenies et seigneuries, et lesdis autres ses hommes et subgietz luy estoient tenuz en plusieurs cens, rentes

Page 99 = folio 55 r

de blé, de gelines, de moctons et autres drois et devoirs à cause dez villaiges et bourderies qu'ilz tenoient dudit seigneur de sesdictes seigneuries, le quel seigneur par le tamps qu'il vivoit avoit et luy appertenoit toute justice et juridiction en sesdictes terres. Dit oultre que amprès le trespas dudit feu Messire Jehan luy succedèrent en cesdictes seigneuries c'est ascavoir : Amalry de Montault son filz ez baronnie de La Roquebraou où il a fourt et beau chasteau et aussi ez chastellenies et chasteaux de Poul, de Glénat, de Saint Victeur, et leurs appertenances et deppendances, lesquellez baronnie et chastellenies ledit Amalry tient et posside comme siennes ; et feu noble Jehan de Montault filz

oudit Messire Jehan succede à sondit feu pere amprès son trespas ez baronnie de Carbonnieres et chastelleniez de Vieulxchamps et de Velzic et leurs appartenences, lesquelles par le tamps qu'il visquit amprès le trespas de sondit feu père avec leurs appartenences et dependences il tint et posside comme siennes ; ou quel feu Jehan de Montault a succédé amprès son trespas noble Guillaume de Montault son filz, c'est ascavoir esdicte baronnie de Carbonnières où il a beau chasteau et fourte place, et en la chastellenie de Vieulxchamps, et leurs appartenences ; et en ladicte chastellenie de Velzic a succédé oudit feu Jehan noble Amalrion de Montault son fils et frère dudit Guillaume. Lesquielx nobles Guillaume et Amalrion frères tiennent et possident c'est ascavoir ledit Guillaume lesdictes baronnie de Carbonnières et chastellenie de Vieulxchamps, et icelluy Amalrion ladicte chastellenie de Velzic. Et par ainsi lesdis Amalry de Montault baylif dez montaignes d'Auvergne, Guillaume et Amalrion de Montault sez neveux, ont succédé oudit feu Messire Jehan de Montault en sesdictes terres et seigneuries de Montault, ausquelx sont deus et appertienent et lesquieulx oussi tiennent et possident toux et checuns lez droys et devoirs desdictes terres qui estoient deues oudit feu Messire Jehan seigneur de Montault c'est ascavoir à checun d'eux par telle pourtion qu'ilz luy succedent. Et ce a veu par le tamps de sadicte memoire, luy qui parle, tenir et observer, et oussi le dit-hom publiquement en toute ladicte terre de Montault.

Sur le noviesme article dit et deppouse qu'il a veu par le tamps de sa memoire que les hommes de ladicte terre de Montault checun a acoustumé à fere le guayt et l'ont fet ez chasteaulx dez chastellenies dont ilz ressourtissent excepté que d'aucunes foys aucuns desdis hommes donnoient quelque prouffit au seigneur en lieu de fere ledit guet et d'aucunes foys le faysoient fere par quelcun autre.

Page 100 = folio 55 v

Sur lez dixiesme, onziesme et dotziesme articles dit et deppouse que il qui parle a veu que par le tamps que ledit feu Messire Jehan seigneur de Montault chivalier vivoit et deppuys son trespas par le tamps que lesdis nobles Amalry et feu Jehan de Montault ont succédé oudit feu Messire Jehan , par lequel tamps la monoye fut appetissée de sa valeur, lesdis filz dudit feu Messire Jehan de Montault ont fait payer à leurs hommes de leurs terre et dudit feu leur pere lez rentes que iceulx hommes leur devoient en argent à valeur et ex...tion de fourte monoye, de laquelle ung escu d'or du poys de troys deniers valloit vinpt deux soulx six deniers avaluent la monoye courrent à ladite fourte monoye. Et icelluy qui devoit ung franc bailloit ung escu d'or. Et ce a veu et ouy dire publiquement ausdis hommez que aussi le payoent, et ainsi il qui parle l'a levé par ledit Amalry desdis hommes pluseurs foys et pluseurs années sans ce que il ait veu ne ouy que onques lesdis hommez y aient mis debat nul ne contrediction jusques au tamps de l'appel dont est fecte mention esdis articles. Dit oultre que il qui parle n'est recors dudit tamps que ladicte fourte monoye courroit, et par ledit tamps lez vilaiges et terre dudit seigneur de Montault estoient investus et appertenoient à la plus part dez hommes qui sont au jour d'uy demeurans en icelle terre et seigneurie ou à leurs predecesseurs. Et oultre aussi dit que le present pays du bayliage pour le Roy dez Montaignes d'Auvergne est pais de droit script, et le pays de Lymosin avec, selon que il qui parle l'a ouy dire publiquement.

Sur le tretziesme article dit et deppouse que il a veu que par l'espace du tamps de sa memoire que lez hommez de ladicte terre ont pourté lez rentes de blé qu'ilz devoient oudit seigneur à l'oustel d'icelluy seigneur, et a veu pluseurs foys que lez baillez dudit seigneur venoient et sunt venuz aux villaiges et lieux d'iceux hommez, et illec iceulx baillez meysuroient lez rentes que lesdis homme devoient oudit seigneur, de illec lesdis hommes icelles rentes pourtoient ou lieu et chastel dudit seigneur sans ce que il qui parle y ait veu ne sceu que lesdis hommez y aient mis nul debat ne contrediction en ce jusques ou tamps dudit appel. A esté interrogé se il a veu lesdis hommez pourter lesdictes rentes de blé oudit lieu de Carbonnieres, dit que non, mais tant seulement ou lieu de La Roquebraou. Dit oultre que il a ouy dire aux hommes de ladicte seigneurie de Vieulxchamps que pour ce que ilz ne vouloient pourtez lesdictes rentes qu'ilz devoient oudit seigneur de Carbonnieres oudit lieu et chastel de Carbonnieres, pour ce aussi qu'ilz disoient que ilz ne le avoient acoustumé pourté hors tent seulement oudit lieu de La Roquebraou où estoient contemps de lez pourter, amprès fu fet acourd entre ledit seigneur de Carbonnieres de Montault et lesdis ses hommez de Vieulxchamps que lesdis hommes pourtassent leursdictes rentes ou lieu de Montvert.

Sur le quatorziesme¹⁷⁰ article dit qu'il a veu par le tamps de sa memoire pluseurs et souventes foys pourter aucunes foys deux

Page 101 = folio 56 r

fois la semmayne aux hommez d'icelle seigneurie de La Roquebraou avec leurs beufz et charroys le boys neccessere pour le service de l'oustel de La Roquebraou ou tamps desdis feu Messire Jehan et deppuys, excepté deppuys ledit appel, et ce ont acoustumé de fere et ont fet iceulx hommez à la volenté et mandement dudit seigneur.

Sur lez quinziesme et setziesme articles dit et deppouse qu'il a veu pourter le vin comme est contenu oudit quinziesme article sen nul debat et par le tamps dont il a deppousé de sadicte memoire ; toutes foys dit qu'il ne scet point se lesdis hommez de rayson devoient fere, et oussi ne scet ne ouyt dire que ilz y meissent aucun debat excepté ledit appel comme dessus.

Sur le dixeseptiesme article dit et deppouse que il a veu pluseurs foys que les baillez ledit feu Messire Jehan de Montault pere de noble Amalry qui est en vie, et aussi ledit Amalry, impousoient et indisoient, esgualoient ausdis hommez de ladicte seigneurie de La Roquebraou, de Glenat, de Saint Santin, de Cirang, de Saint Victeur et de Poul, quant bon leur sembloit unne taille tielle que lesdis seigneurs vouloient, et quant lesdis hommes ne le vouloient payer lez faysoient excecuter par leurs officiers. Et dit oultre que ledit Amalry deppuys dix ans darnier passés devoit à luy qui parle certayne somme d'argent à cause de chautz qu'il luy avoit fecte pour ediffier ledit chastel de La Roquebraou et luy feist delivrer sur ses hommez de Saint Santin et sur ceux de la Val de Braou et de Saint Victeur ladicte somme, et iceulx hommes ont payé ledit testmoing laquelle oudit seigneur devoient iceulx hommes à cause dez taillesque icelluy seigneur leur avoit fait selon que lesdis hommez disoient oudit testmoing, et laquelle lesdis hommes luy ont payée.

Sur le dixhuytiesme article dit et deppouse qu'il a veu par le tamps de sa memoire fere aux hommes desdictes seigneuries le contenu en icelluy article checun an sen nul autre debat excepté que dudit appel.

Ledit Jour Micheau de La Vergne de la parroisse de Cirang oudit dioucese de Saint Flour, eagé de cinquante huyt ans et de memoire de cinquante ou environ, testmoig par la partie que dessus examiné et interrogé et prouduyt par vertu de sondit serement, dit et deppouse comme s'ensuyt :

Et premièrement sur lez premier second troysiesme quactriesme cinquiesme sixiesme septiesme et huytiesme articles dit et deppouse que il a veu par le tamps de feu messire Jehan

Page 102 = folio 56 v

de Montault chivalier seigneur de Montault que lez terres et seigneuries de Montault appertenoient toutes oudit feu Messire Jehan, c'est ascavoir lez baronies chasteaulx et chastellenies de La Roquebraou, de Carbonieres, qui sont anciennes baronnies, et aussi lez chasteaulx et chastellenies de Glénat, de Poul, de Vieux Champs, de Velzic, de Saint Victeur, et leurs appertenances, et en estoit seigneur seul et par le tout. Lesquelles seigneuries sont et ont esté toutes de la terre et seigneurie de Montault . A cause desquelles baronnies et seigneuries oudit seigneur Messire Jehan de Montault appertenoient et il avoit pluseurs vassaulx hommez et subgietz tenens de luy et de cesdictes baronnies et seigneuries, lesquelles, c'est ascavoir lesdis vassaulx sunt et estoient tenuz et luy doyvent fere homatgez ,seremens et autres drois de fieufz à cause dez fieufz nobles que ilz tiennent de luy et de sesdictes baronnies chastellenies et seigneuries, et lesdis ses autres hommes subgietz luy estoient tenuz en pluseurs cens, rentes de blé, d'argent, de gelines, de moctons et autres drois et devoirs à cause dez villaiges et bourderies qu'ilz tenoient dudit seigneur et de sesdictes seigneuries, le quel seigneur par le tamps qu'il vivoit avoit et luy appertenoit toute justice et juridiction en cesdictes terres. Dit oultre que amprès le trespas dudit feu Messire Jehan luy succedèrent en cesdictes seigneuries c'est ascavoir : Amalry de Montault son filz ez baronnie de La Roquebraou où il a fort et beau chasteau et ez chastellenies et chasteaux de Poul, de Glénat, de Saint Victeur, et leur appertenance et deppendance, lesquelles baronnie et chastellenies ledit Amalry tient et possede comme siennes ; et feu noble Jehan de Montault filz dudit Messire Jehan succede à sondit feu pere amprès son trespas ez baronnie de Carbonieres et

¹⁷⁰ Erreur du notaire, il s'agit du 18^{ème} article

chastelleniez de Vieuxchamps et de Velzic et leurs appartenences, lesquelles par le tamps qu'il visquit amprès le trespas de sondit feu père avec leur appartenences et dependences il tint et posside comme siennes ; ou quel feu Jehan de Montault a succédé amprès son trespas noble Guillaume de Montault son filz, c'est ascavoir esdicte baronnie de Carbonnières où il a beau chasteau et fourte place, et en la chastellenie de Vieuxchamps, et leurs appartenences ; et en la chastellenie de Velzic a succédé oudit feu Jehan noble Malrignon de Montault son filz et frère dudit Guillaume. Lesquielx nobles Guillaume et Malrignon frères tiennent et possèdent c'est ascavoir ledit Guillaume lesdictes baronnie de Carbonnières et chastellenie de Vieuxchamps, et icelluy Malrignon ladicte chastellenie de Velzic. Et par ainsi lesdis Amalry de Montault baylif dez montaignes d'Auvergne et Guillaume et Amalrignon de Montault sez nepveux ont succédé oudit feu Messire Jehan de Montault en sesdictes terres et seigneuries de Montault, ausquelx sont deus et appertienent et lesquielx oussi tiennent et possident toux et checuns lez drois et devoirs desdictes terres qui estoient deus oudit feu Messire

Page 103 = folio 57 r

Jehan seigneur de Montault c'est ascavoir à checun d'eux pour telle portion qu'ilz luy succedent. Et ce a veu par le tamps de sadicte memoire, luy qui parle, tenir et observer, et oussi la dit-hom publiquement en toute ladicte terre de Montault.

Sur le noviesme article dit et deppouse que il qui parle a fet le guet ou chastel de La Roquebraou par le tamps que la guerre a eu cours par pluseurs foys, et oussi les autres hommez de ladicte terre dudit Amalry le faysoient et ont fet pareillement. A esté interrogé combien souvent faysoient ledit guet, dit que quinze en quinze jours et aucunes foys plus souvent, selon que guerre couroit. A esté interrogé se il cuyde avoir nul prouffit se lez hommez dudit seigneur obtenoient et gaignoyent leur cause en ceste matiere contre ledit seigneur, et dit que oil mais dez autres terrez et seigneuries de Montault ne scet se lez hommes y faisoient ledit guet. (*dans la marge*) A esté interrogé se par le tamps dez guerrez darnieres passées il qui parle a fet le guet, et lez autres aussi, et dit que ouy comme dit est. Dit qu'il a veu que paravent que la guerre commensase dez angloys nul ne faisoit ledit guet. A esté interrogé combien a que ladicte guerre commensa, dit qu'il n'en scet rien, toutes foys luy semble qu'il a trente ans passés. A esté interrogé se il a fait sens cesser continuellement ledit guet, dit que aucunes foys a donné au cappitayne dudit lieu aucune somme c'est ascavoir ung mocton pour checun de deux ans darnies passés. Dit oultre que par avant lesdis deux ans quant ilz deffailloient de fere ledit guet ilz donnoyent ou se acourdoient avec ledit cappitayne de certayne somme d'argent pour ledit deffault.

Sur lez dixiesme, onziesme et dotziesme articles dit et deppouse qu'il a ouy dire et se disoyt communement par toute la terre dudit seigneur que par l'espace de quactre ou cinq ans passés que iceulx hommes ont payé et payerent par icelluy tamps oudit seigneur lez rentez qu'ilz luy devoient en argent au prins et valeur de fourte monoye, c'est ascavoir pour ung franc de rente ung escu d'or. Dit oultre que par le tamps que la fourte monoye couroit, c'est ascavoir que ung escu d'or du poys de troys deniers valloit vinpt deux soulx et six deniers, et ung franc d'or pour vinpt soulx de monoye, lez villaiges moyvens¹⁷¹ de ladicte terre et seigneurie de Montault estoient vestus et lez hommez tenenciers d'iceulx villaiges avoient, ilz ou leurs predecresseurs vestuz lesdis villaigez.

Sur le tretziesme article dit et deppouse qu'il a veu deppuys trente ans et par le tamps que vivoit ledit Messire Jehan de Montault pluseurs foys et pluseurs années que les hommes de ladicte terre de Montault pourtoient à l'oustel de leur seigneur à La Roquebraou lez rentez qu'ilz devoient à icelluy seigneur, dont iceulx hommes se plainoyent fourt, mais ne scet que onques iceulx hommes à ce fere feissent nul debat ne contrediction, et ce a ouy dire il qui parle à pluseurs desdis hommes jusques au tamps de la

Page 104 = folio 57 v

appellation dont est fecte mention esdictes lectres.

Sur le quactorziesme article dit et deppouse qu'il a veu par l'espace de trente ans passés que les hommes de ladicte seigneurie dudit Amalry luy ont pourté pluseurs foys à son houstel à La Roquebraou le boys pour son chauffaige et service de son houstel. Et dit toutes foys que au commencement de porter ledit boys iceulx hommes ne le pourtoient guyre souvent, mais n'a guyre que ledit Amalry a fet porter icelluy boys ausdis ses hommes bien

¹⁷¹ « mouvants »

souvent c'est ascavoir aucunes foys unne foys checune sepmmayne dont iceulx hommez se sont fort rencurés et playntz, et pour ce croit que ont appellé quar autrement ne l'eussent selon que luy semble.

Sur le quinxiesme article dit et deppouse qu'il a veu que au tamps passé iceulx hommes ont pourté et pourtoient et sont alez querir le vin pour ledit seigneur avec leurs beufz et charroys de deux en deux ans unne foys, et aucunes foys plus tard, jusques deppuys naguyre que y sont alez checun unne foys l'an, dont aussi lesdis hommes se plaingnoyent, mais autrement n'a veu que y aient mis debat jusques oudit appel par eulx interjecté.

Sur le setxiesme article dit et deppouse qu'il a veu deppuys trente ans que lez hommez dudit Amalry luy faïçoient et ont fet lez manevres et services dont est fecte mention en l'article, aucunes foys, c'est ascavoir quant ledit seigneur le leur mandoit. S'il estoit raysonnablement ou non, dit qu'il n'en scet rien. Toutes foys ilz s'en plaingnoyent mais ne scet qu'ilz y aient mis nul autre debat ne contrediction jusques ou tamps dudit appel.

Sur le dixeseptiesme article dit et deppouse qu'il a veu deppuys trente ans par le tamps que ledit feu Messire Jehan de Montault vivoit et deppuys plusieurs foys et plusieurs années que lesdis feu Messire Jehan et ledit Monsieur le Baylif son filz ont indit et impoué aucunes taillez, c'est ascavoir de tielle somme qu'ilz se vouloient, ledit feu Messire Jehan sur toux ses hommes de sa terre, et ledit Amalry sur ses hommes des seigneuries esquellez yl a succédé à sondit feu pere. Et icelles taillez ont fectes payer ausdis hommes plusieurs foys et en plusieurs années souvent, dont lesdis hommes s'en rencuroient fort. A esté interrogé se il scet que lesdis hommes onques aient contredit à payer lesdictes taillez, dit qu'il est recours que amprès le decces dudit feu Messire Jehan ma Dame de Montault sa femme et mere dudit Monsieur le baylif impoua unne année unne taille sur lez terres et hommes dudit son filz dont lesdis hommes appellarent,

Page 105 = folio 58 r

et est recours que ladicte taille feust *mectuynée* jusques au double de la rente que lesdis hommes devoient. A esté interrogé comment le scet, dit quar ainsi l'a ouy dire publiquement ausdis hommes.

Sur le dixhuytiesme article dit et deppouse qu'il a veu aucunes foys et non guyre souvent que lesdis hommes dudit baylif aloient et sunt alez aux prés de leur seigneur deppuys dix ans foucher et fener et luy pourter le foin comme est contenu en l'article.

Ledit jour mesmes Begonon de La Balbarie dit Moussac, de la parroisse de Cirang oudit dioucese de Saint Flour, agé de sixante ans et oultre et de memoire de sinquante ou environ, tesmoing par la partie que dessus prouduyt, examiné et interrogé par vertu de sondit serement, dit et deppouse comme s'ensuyt :

Et premierement sur le noviesme article dit et deppouse qu'il a veu que lez hommez de ladicte terre et seigneurie de Montault, c'est ascavoir dez terres et chastellenies de La Roquebraou, de Saint Victeur et de Glenat deppuys trente ans passés ont fet le guet ez chasteaulx desdis lieux selon qu'ilz ressortissent d'iceulx, c'est ascavoir checun ou chastel dont il ressortisset sens y mettre nul debat ne contrediction.

Sur lez dixiesme, onziesme et dotziesme articles dit et deppouse que deppuys que la fourte monoye eut cours lez hommes desdictes terres et seigneuries de noble et puysent homme Amalry de Montault ont payé, et ledit seigneur les a fait payer les rentes qu'ilz luy devoient c'est ascavoir pour vinct soulx de rente ung franc d'or ou ung escu, et ce ont fait continuer ledit seigneurs et ses officiers ausdis hommes jusques ou temps dudit appel. Dit oultre que par le tamps que la fourte monoye couroit les terres de Montault estoient la pluspart vestues de plusieurs hommes qui y sont au jour d'uy, ou leurs predecesseurs.

Sur le tretxiesme article dit et deppouse qu'il a veu que aucuns et la pluspart dez hommez de ladicte terre ont pourté oudit seigneur et à son chastel de La Roquebraou plusieurs foys et plusieurs années lez rentes qu'ilz devoient à icelluy seigneur, tant de blé que d'autres, du tamps que Gaspar de Montagut estoit baille dudit seigneur, et ce oussi ouyt et a ouyt dire plusieurs foys il qui parle ausdis hommez desquielx n'oit il qui parle qu'ilz y aient mis à ce nul autre debat ne contrediction jusques au tamps dudit appel. Toutesfoys il qui parle ne scet pas se lesdis hommez devoient pourter icelle rente ou non.

Page 106 = folio 58 v

Sur le quatorziesme article dit et deppouse qu'il a veu par l'espace de trente ans passé que lesdis hommes pourtoient et ont pourté oudit leur seigneur aucunes foys de deux en deux semmaynes, autres foys de trois semmaynes et autres de huyt en huyt jours, et lez autres deux foys la semmayne du boys avec leurs beufz et charroys oudit chastel de La Roquebraou pour le chauffaige de leur seigneur et pour le service de son houstel, dont lesdis hommez s'en playnhoent et rencuroient bien souvent. Mais toutesfoys ne il meistrent nul autre debat ne contrediction jusques au tamps dudit appel excepté que aucunes foys quant lesdis hommez n'avoient pourté ledit boys quant commendé leur estoit ce fere par ledit seigneur ou ses officiers lesdis officiers excecutoient lesdis hommez et lez gaigoyent de leurs biens, et par ainsi iceulx hommez alerent et sont alez pourter ledit boys comme dessus est dit.

Sur le quinxiesme article dit et deppouse qu'il a veu par l'espace desdis trente ans et oultre que lesdis hommes sont alez querir avec leurs beufz et charroys au vinhoble le vin qui a esté neccessere oudit seigneur et à son chastel et oustel pour sa despance et de sondit chastel sans ce qu'ilz ne y meissent ne y aient mys nul autre debat ne contrediction que il qui parle le saiche jusques ou tamps dudit appel. Dit oultre qu'il a ouy dire ausdis hommes et à plusieurs autres que anciennement et ou tamps passé ilz avoient esté querir et pourter ledit vin comme dessus a dit.

Sur le setxiesme article dit et deppouse que il qui parle a veu que lesdis hommez avent que ledit seigneur feist le ediffice de son chastel de La Roquebraou aloient aux prés dudit seigneur aucunes foys et checun an foucher le foin, et lez autres foys le fener. Et par le tamps dudit ediffice iceulx hommes pourtoient lez pierres, le fustaigne, la chautz et les autres chouses neccesseres pour ledit ediffice. Dit oussi qu'il a veu par ledit tamps dudit ediffice lez autres qui n'estoient mye hommes dudit Amalry oussi aydoient et faysoient lez manevres pour fere ledit ediffice.

Sur le dixeseptiesme article dit et deppouse qu'il a veu que par le tamps que feu Messire Jehan de Montault seigneur de Montault et pere dudit Amalry vivoit, ledit feu Messire Jehan quasi checun an faysoit paier ausdis hommez unne taille et communement fayçoit ledit feu Messire Jehan ladicte taille à ses hommes

Témoignage incomplet, il manque les feuillets 59 à 73

Page 107 = folio 74 r

Le début du témoignage manque

Sur le quinxiesme article dit et deppouse qu'il a veu par tout le tamps de sa memoire que lesdis hommes dudit feu Messire Jehan de Montault sont alez querir avec leurs beufz et charroys ou autre bestail à leurs despens loué ou emprunpté venoyent et sont venuz au lieu où leurdit seigneur demouroit querir les pipes et cueves et d'illec lez pourter au vignoble, et lez en retourner pleynes de vin. Et ce ont fait lesdis hommes unne foys checun an ou plus selon que ledit seigneur avoit achapté de vin. Dit oultre que aucunes foys et années quant ledit seigneur ne faysoit grand vinée ne n'avoit achapté tant de vin que toux sesdis hommes feussent neccesseres à pourter ledit vin comme dessus, à aucuns desdis hommes unne année et esparignoient icelle année lez autres, et amprès l'autre année en suyvent il faysoit aler querir ledit vin aux autres que n'y avoient esté l'an par avent passé, et spargnoit lez autres que l'an de devant y avoient esté. Dit oultre qu'il a ouy plusieurs foys dire publiquement à plusieurs hommes anciens desdictes terres que les hommes desdictes terres de Montault anciennement avoient acoustumé aler querir et pourter ledit vin avec leurs beufz et charroys et autrement comme a dessus a dit et deppousé. Et onques il qui parle n'a sceu ne ouy dire que lesdis hommes ou tamps passé aient mis nul debat ne contrediction excepté que dudit appel.

Sur le setxiesme article dit et deppouse qu'il a veu que lesdis [hommes] desdictes terres et seigneuries ont fait les manevres et exploix et services dont est fecte mention oudit article à volenté de leur seigneur par l'espace du tamps de sadicte memoire, et a ouy dire aussi publiquement à gens et hommes anciens desdictes terres que ainsi l'avoient acoustumé fere leurs predecresseurs hommes d'icelles terres au tamps passé et de ancienneté. A ce onques il qui parle ne sceut ne ouyt dire le contraire excepté que dudit appel.

Sur le dixeseptiesme article dit et deppouse qu'il a veu par ledit tamps de sadicte memoire que toutes quantes foys bon sembloit oudit feu Messire Jehan de Montault et à ses successeurs ilz ont fait, indit et impousé taillez, de telles sommes que bon leur a semblé, sur leursdis hommes de leursdictes terres et seigneuries, excepté ceux qui de ce fere estoient affranchiz. Lesquellez taillez iceulx hommez ont payées toutes quantes foys lesdis seigneurs lez faysoient et

ont fectes par ledit tamps. Et a tousjours ouy dire à pluseurs gens anciennes et hommes de ladicte terre que la terre de Montault estoit et a esté taillable à volenté dez seigneurs, et aussi l'a ouy dire il qui parle publiquement aux hommes anciens dudit seigneur et de cesdictes terres. A esté interrogé s'il scet et a ouy dire que à payer lesdictes tailles lesdis hommes aient mys à leur seigneur nul debat ne

Page 108= folio 74 v

contradiction ou tamps passé, dit que non excepté ledit appel et une foys que Ma Dame Jehanne de Malemort Dame de Montault mere dudit Amalry, deppuys le trespas dudit feu Messire Jehan, avoit indit et impoué aux hommes de son dit filz et dez terres esquelz il a succédé à son dit feu pere une taille que lesdis hommes disoyent que estoit trop excessive, et a ouy dire que lesdis Ma Dame Jehanne et hommez se accourdarent de ladicte taille tellement que par ledit acord icelle taille fut payée par lesdis hommes. Et dit oussi qu'il ouyt dire par ledit tamps que ladicte taille fut modérée, et ce que fut modéré lesdis hommez payarent comme dessus a dit.

Sur le dixhuytiesme article dit et deppouse qu'il a veu par tout ledit tamps de sadicte memoire que lez hommes ont fouché fené et pouté le foin de leur dit seigneur comme contenu est ou dit article toutes quantes foys ledit seigneur le leur a mandé, il ou ses officiers. Dit oultre que à ce fere il qui parle onques ne veist ne ouyt que debat y ait esté mis ne contradiction par lesdis hommes excepté que dudit appel. Mais dit qu'il a ouy dire à pluseurs gens et hommes anciens de ladicte terre dudit feu Messire Jehan que ainsi avoient acoustumé fere lesdis hommez anciennement et ou tamps passé.

Sur le vinpteungesme article dit et deppouse que il qui parle a ung villaige sien nompmé de Brousses¹⁷², lequel il tient en fieuf et hommaige dudit seigneur de Montault, lez tenenciers duquel sont tenuz et doyvent à il qui parle en taillez et exploix à sa volenté. Dit oultre qu'il a aucuns dez villaiges siens ung nommé de Folhet¹⁷³ et l'autre de Masieres, les tenenciers desquelz souloient estre taillables et exploictables à volenté, mais il qui parle lez a affranchis en certaynes taillez et exploix. Dit oultre que lez heretiers de feu seigneur **de Nousieres** et noble **Anthoyne de Veyrac** sont vassaulx dudit Amalry, qui ont pluseurs hommes qui leur sont tenuz en pareilx et semblables droys de taillez et exploix et services à volenté comme lez hommes dudit seigneur de Montault.

Sur le vinptedeuxiesme article dit et deppouse qu'il a ouy dire aux hommes anciens du lieu de La Roquebraou nompmés ou dit article le contenu en icelluy pour vray. Et dit oultre que toux lez habitans dudit lieu de La Roquebraou qui tiennent chevaux ou victurez¹⁷⁴ à bast sont tenuz avec iceulx chevaux et victurez aler une foix checun an au vinhoble pour querir et d'illec pourter le vin pour ledit seigneur dudit lieu. Pamy ce que ledit seigneur doit donner ung fer de chaval ou de beste chevalline pour checun cheval ou beste chevalline qui pourtera ledit vin, et aussi les despens sur le chemin d'icelles bestes et dez gens qui lez gouvernent.

Sur le vinpt et quactriesme article dit et deppouse qu'il a veu le contenu en icelluy article et dez lectres passées sur le louvement et consentemens

Page 109 = folio 75 r

d'aucuns achaptez dont est fecte mention ou dit article.

Ledit jour Bernard La Faurge merchant dudit lieu de La Roquebraou, eagé de sixante ans et oultre, et memoire sinquante et oultre, testmoig par la partie que dessus prouduyt, examiné et interrogé par vertu de son serement, dit et deppouse comme s'ensuyt :

Et premièrement sur lez premier second troysiesme quactriesme cinquiesme sixiesme septiesme et huytiesme articles dit et deppouse que il a veu par le tamps de feu Messire Jehan de Montault chivalier seigneur de Montault que lez terres et seigneuries de Montault appertenoient toutes ou dit feu Messire Jehan, c'est ascavoir lez baroniez chasteaulx et chastellenies de La Roquebraou, de Carbonieres, qui sont anciennes baronnies, et aussi lez chasteaulx et chastellenies de Glénat, de Poul, de Vieux Champs, de Saint Victeur, et leurs appertenances, et en estoit seigneur seul et par le tout. Lesquelles seigneuries sont et ont esté toutes de la terre et seigneurie de Montault. A cause

¹⁷² Brousse, commune d'Arnac ? ou Labrousse, commune de Rouffiac ?

¹⁷³ Le Fouliet, village disparu de Siran (Dictionnaire topographique Emile Amé)

¹⁷⁴ Sans doute « bêtes de somme », du latin « veterina »

desquelles baronnies et seigneuries oudit seigneur Messire Jehan de Montault appartenoient et il avoit plusieurs vassaulx hommez et subgiez tenens de luy et de cesdictes baronnies et seigneuries, lesquelx, c'est ascavoir lesdis vassaulx sont et estoient tenuz et luy doyvent fere homaigez, seremens et autres drois de fieufz à cause dez fieufz nobles qu'ilz tenoient de luy et de sesdictes baronnies chastellenies et seigneuries, et lesdis autres ses hommes subgietz luy estoient tenuz en plusieurs cens, rentes de blé, d'argent, de gelines, de moctons et autres drois et devoirs à cause dez villaiges et bourderies qu'ilz tenoient dudit seigneur de cesdictes seigneuries, le quel seigneur par le tamps qu'il vivoit avoit et luy appartenoyt toute justice et juridiction en sesdictes terres. Dit oultre que amprès le trespas dudit feu Messire Jehan luy succedèrent en cesdictes seigneuries c'est ascavoir : Amalry de Montault son filz ez baronnie de La Roquebraou out il a fourt et beau chasteau et aussi ez chastellenies et chasteaux de Poul, de Glénat, de Saint Victeur, et leurs appartenences et deppendences, lesquelles baronnie et chastellenies ledit Amalry tient et possede comme siennes ; et feu noble Jehan de Montault filz dudit Messire Jehan succede à sondit feu pere amprès son trespas ez baronnie de Carbonnieres et chastelleniez de Vieuxchamps et leurs appartenences, lesquelles par le tamps qu'il visquit amprès le trespas de sondit feu pere avec leur appartenences et deppendences il tint et posside comme siennes ; au quel feu Jehan de Montault a succédé amprès son trespas noble Guillaume de Montault son filz, esdicte baronnie de Carbonnières où il a beau chasteau et fourte place, et en la chastellenie de Vieuxchamps, et leurs appartenences. Et par ainsi lesdis Amalry de Montault baylif dez montaignes d'Auvergne et Guillaume de Montault son

Page 110 = folio 75 v

nepveu ont succédé oudit feu Messire Jehan de Montault en cesdictes terres et seigneuries de Montault, ausquelx sont deus et appartiennent et lesquelx aussi tennent et possident toux et checuns lez droys et devoirs desdictes terres qui estoient deus oudit feu Messire Jehan seigneur de Montault, c'est ascavoir à checun d'eux par telle portion qu'ilz luy succedent. Et ce a veu par le tamps de sadicte memoire, luy qui parle, tenir et observer, et oussi se dit publiquement en toute ladicte terre de Montault.

Sur le noviesme article dit et deppouse qu'il a veu par l'espace de trente ans et oultre que lez habitans de la seigneurie de La Roquebraou et ceulx qui ressourtissent de la chastellenie de Glenat l'ont fait [le guet] à Glenat, et ceux de la chastellenie de Saint Victeur et baillie du Quier l'ont fait à Saint Victeur par ledit tamps selon l'ordonance du seigneur ou de ses capitaynes desdictes places, ou se ilz ne le faysoient ceulx qui ne le faysoient donnoient aucun prouffit oudit seigneur, dont ilz estoient d'accord avec luy. Et ceulx de la seigneurie de Carbonnieres, c'est ascavoir dez parroisses de Aguelez¹⁷⁵, de Camps, de Rouffiac¹⁷⁶ et de Cros¹⁷⁷ l'ont fet et acoustumé à fere oudit chastel de Carbonnieres. Dit oultre qu'il a ouy dire à plusieurs gens anciennes que lesdis hommes et habitans desdictes seigneuries ont fait ledit guayt anciennement et de ancienneté comme dessus est dit sans ce que il qui parle y ait veu ne ouy dire que à ce fere lesdis hommes y aientmis nul debat ne contrediction excepté deppuys n'a guieres que lesdis hommes ont appellé.

Sur lez dixiesme, onxiesme et douxiesme articles dit et deppouse que par le tamps que ledit feu Messire Jehan de Montault vivoit couroit bonne et fourte monnoye, et ses hommez de ses terres et seigneuries luy paioent lez rentes et cens qu'ilz luy doyvent en argent à ladicte monnoye, de laquelle vinpt deux soulx et demy valloient ung escu d'or du poys de trois deniers et trois grains, et deppuys ledit trespas la valeur de ladicte monnoye a esté appetissée souventes foys et changée, et pour ledit appetissement et diminution deppuys icelluy trespas lesdis successeurs dudit feu seigneur de Montault ont levé de leurs hommez de ladicte terre et seigneurie de Montault lesdictes rentes d'argent à la valeur et prins¹⁷⁸ d'icelle fourte monnoye jusques au tamps de ladicte appellation continuellement. Excepté qu'il n'a poyt veu que amprès le trespas dudit feu Messire Jehan de Montault ledit Jehan de Montault et ses successeurs¹⁷⁹ aient levé de leurs hommez à la fourte, mays que bien l'a ouy dire. Dit oultre que par le tamps que

¹⁷⁵ Goules

¹⁷⁶ Rouffiac

¹⁷⁷ Cros de Montvert

¹⁷⁸ prix

¹⁷⁹ Il dit « ses successeurs » alors qu'il n'a nommé que Guillaume, et pas Amalrignon.

icelle fourte monoye courroit lez villaiges desdictes terres et seigneuries de Montault et quoy qu'il soit la pluspart d'eux estoient vestuz, et lez tenoyent lez tenenciers qui lez tennent au jour d'uy, ou leurs predecesseurs.

Sur le tretxiesme article dit et deppouse qu'il a veu par l'espace de trente ans, tant par le tamps que ledit feu Messire Jehan de Montault vivoit que deppuys, que lez hommez desdictes terres et seigneuries dudit feu Messire Jehan de Montault ont pourté le blé qu'ilz devoient de rente et lez autres rentes deues oudit seigneur, c'est ascavoir là où lesdis seigneurs demouroient et ont demouré

Page 111 = folio 76 r

par ledit tamps. Dit oultre qu'il a ouy dire à pluseurs hommez anciens desdictes terres et seigneuries que anciennement lesdis hommes et leurs predecesseurs de ancienneté avoient et ont acoustumé pourter lesdictes rentes comme dessus a dit sans ce que il qui parle y ait sceu ne veu ne ouy dire que à ce ait esté mis ou tamps passé nul debat ne contrediction excepté que dudit appel dont est fecte mention esdictes lectres. Mais dit oultre que lez baylez des seigneurs meysuroient lez rentes de blé aux houstels dez hommez, et d'illec lez pourtoient là où bon leur sembloit. Toutes foyz ne scet point se ce estoit de leur volenté ou non.

Sur le quactorziesme article dit et deppouse qu'il a veu par le tamps de sa memoire que lez hommez dez seigneuries de ladicte seigneurie de Montault ont acoustumé pourter avec leurs beufz et charroys le boys qui a esté neccessere pour le chauffaige dudit seigneur et de ses successeurs et pour tout le service de son houstel, toutes quantes foyz leur a esté commendé. Et se lesdis hommes ne venoyent pourter ledit boys oudit commendement, lez officiers dudit seigneur et de ses successeurs lez excecutoient et gatgoyent, excepté que au tamps que l'ayeul dudit Amalry demouroit au lieu de Moncanin¹⁸⁰, lez hommes de troys ou quactre villaiges de Moncanin quant ne avoient de boys aloient querir icelluy aux frautz ou à la fourest de Belle Calm, selon que il qui parle l'a veu testmoigner à iceulx hommez. Dit oultre qu'il a ouy pluseurs hommes anciens de ladicte terre et seigneurie de feu Messire Jehan de Montault qui disoyent que ainsi avoient acoustumé fere lesdis hommes anciens et anciennement lez hommes desdictes terres et seigneuries, sans ce que jamays n'a ouy ne sceu que lesdis hommes aient ou tamps passé mis à ce aucun debat ne contrediction excepté dudit appel. A esté interrogé d'out lesdis hommes prenoient ledit boys, dit que de leurs possessions, ou s'ilz n'en avoyent le accheptoient de ceux que n'avoient, et ledit seigneur ne le leur bailloit nulle forest dont ilz en pussent prendre. Et autrement se reppourte à ce que dessus a dit et depposé.

Sur le quinxiesme article dit et deppouse qu'il a veu par tout le tamps de sa memoire que lesdis hommes de feu Messire Jehan de Montault sunt alez avec leurs beufz et charroys ou autre bestail à leur despens loué ou emprunpté venoyent et sunt venuz au lieu où leurdit seigneur demouroit querir les pipes et cueves et d'illec lez pourtoient au vinhoble, et lez en retournoient pleynes de vin. Et ce ont fait lesdis hommes unne foyz checun an ou plus selon que ledit seigneur avoit achapté de vin. Dit oultre que aucunes foyz et années quant ledit seigneur ne faysoit grand vinée et n'avoit achapté tant de vin que toux sesdis hommes feussent neccesseres à pourter ledit vin il faysoit pourter ledit vin comme dessus à aucuns desdis hommes unne année et spargnoit icelle année lez autres, et amprès l'autre année en suyvent il faysoit aler querir ledit vin aux autres que n'y avoient esté l'an par avent passé, et spargnoit lez autres que l'an de devant y avoient esté. Dit oultre qu'il a ouy pluseurs foyz pluseurs dire à pluseurs hommes anciens desdictes terres

Page 112 = folio 76 v

que lez hommez desdictes terres de Montault anciennement avoient acoustumé aler querir et pourter ledit vin avec leurs beufz et charroys et autrement comme a dessus a dit et depposé. Et onques il qui parle n'a sceu ne ouy dire que lesdis hommes au tamps passé aient mis nul debat ne contrediction excepté que dudit appel.

Sur le setxiesme article dit et deppouse qu'il a veu que les hommes desdictes terres et seigneuries ont fait lez manevres exploix et services dont est fecte mention oudit article à volenté de leur seigneur par l'espace du tamps de sadicte memoire, et a ouy dire aussi publiquement à gens et hommes anciens desdictes terres que aussi le avoient acoustumé fere leurs predecesseurs hommes d'icelles terres au tamps passé et d'ancienneté. Ne oncques il qui parle n'a sceut ne ouyt dire le contrayre excepté que dudit appel.

¹⁸⁰ Moncany dans la paroisse de Siran, voir aussi sur le folio 19 recto un première mention du « repaire de Moncanin »

Sur le dixeseptiesme article dit et deppouse qu'il a veu par le tamps de sadicte memoire que toutes quantes foys bon sembloit oudit feu Messire Jehan de Montault et à sesdis successeurs ilz ont indit et impousé tailles, de telles sommes que bon leur a semblé, sur leursdis hommes de leursdictes terres et seigneuries, excepté ceulx qui de ce fere estoient affranchiz. Lesquellez taillez icellex hommez ont payées toutes quantes foys lesdis seigneurs lez faysoient et ont fectes par ledit tamps. A esté interrogé s'il scet ne a ouy dire que à payer lesdictes tailles lesdis hommes aient mis à leurdit seigneur nul debat ne contrediction ou tamps passé, dit que non excepté ledit appel et unne autre foys que Ma Dame Jehanne de Montault Dame de Montault mere dudit Amalry, deppuys le decces dudit feu Messire Jehan, avoit indit et impousé aux hommes de sondit filz et dez terres esquellez il a succédé à sondit feu pere unne taille que lesdis hommes disoyent que estoit trop excessive, et a ouy dire que lesdis Ma Dame Jehanne et hommez se accordarent de ladicte taille tellement que par ledit acord icelle taille fut payée par lesdis hommes. Et dit aussi qu'il ouyt dire par ledit tamps que ladicte taille fut modérée, et ce que fut moderé lesdis hommez payarent comme dessus a dit.

Sur le dixhuytiesme article dit et deppouse qu'il a veu par tout ledit tamps de sadicte memoire que lez hommes ont fouché fené et poutté le foin de leurdit seigneur comme contenu est oudit article toutes quantes foys ledit seigneur le leur a mandé, il ou ses officiers. Et à ce fere il qui parle onques ne vyt ne ouyt que debat y ait esté mis ne contrediction par lesdis hommes excepté que dudit appel. Mais dit qu'il a ouy dire à plusieurs gens et hommes anciens de ladicte terre dudit feu Messire Jehan que ainsi avoyent acoustumé fere lesdis hommez anciennement et ou tamps passé.

Ledit jour Pierre Maran de la parroisse de Saint Paul dez

Page 113 = folio 77 r

Landez oudit dioucese de Saint Flour, eagé de sixante ans et oultre et de memoire de cinquante cinq ou environ, tesmoig par la partie que dessus prouduyt, examiné et interrogé par son serement, dit et deppouse comme s'ensuyt :

Et premièrement sur lez premier second troysiesme quactriesme cinquiesme sixiesme septiesme et huytiesme articles dit et deppouse que il a veu par le tamps de feu Messire Jehan de Montault chivalier seigneur de Montault que lez terres et seigneuries de Montault appertenoient toutes oudit feu Messire Jehan, c'est ascavoir lez baroniez casteaulx et chastellenies de La Roquebraou, de Carbonieres, qui sont anciennes baronnies, et aussi lez chasteaulx et chastellenies de Glénat, de Poul, de Vieux Champs, de Saint Victeur, et leurs appertenances, et en estoit seigneur seul et par le tout. Lesquelles seigneuries sunt et ont esté toutes de la terre et seigneurie de Montault. A cause desquelles baronnies et seigneuries oudit seigneur Messire Jehan de Montault appertenoient et il avoit plusieurs vassaulx hommes et subgiez tenens de luy et de cesdictes baronnies et seigneuries, lesquelx, c'est ascavoir lesdis vassaulx sont et estoient tenez et luy doyvent fere hommaigez, seremens et autres drois de fieufz à cause dez fieufz nobles et autres qu'ilz tenoyent de luy et de cesdictes baronnies, chastellenies et seigneuries, et lesdis autres ses hommes et subgietz luy estoient tenez en pluseurs cens, rentes de blé, d'argent, de gelines, de moctons et autres drois et devoirs à cause dez villaiges et bourderies qu'ilz tenoient dudit seigneur de cesdictes seigneuries, lequiel seigneur par le tamps qu'il vivoit avoit et luy appartenoyt toute justice et juridiction en cesdictes terres. Dit oultre que amprès le trespas dudit feu Messire Jehan luy succedèrent en cesdictes seigneuries c'est ascavoir : Amalry de Montault son filz ez baronnie de La Roquebraou où il a fort et beau chasteau et aussi ez chastellenies et chasteaux de Poul, de Glénat, de Saint Victeur, et leurs appertenances et deppendances, lesquellez baronnie et chastellenies ledit Amalry tient et possede comme siennes ; et feu noble Jehan de Montault filz dudit Messire Jehan succede à sondit feu pere amprès son trespas ez baronnie de Carbonnières et chastellenies de Vieuxchamps et leurs appartenances, lesquellez par le tamps qu'il visquit amprès le trespas de sondit feu père avec leur appartenances et deppendances il tint et posside comme siennes ; auquiel Jehan de Montault a succédé amprès son trespas noble Guillaume de Montault son filz ez baronnie de Carbonnières où il a beau chasteau et fourte place, et en la chastellenie de Vieuxchamps, et leurs appartenances. Et par ainsi lesdis Amalry de Montault baylif dez montaignes d'Auvergne et Guillaume de Montault son neveu ont succédé oudit feu Messire Jehan de Montault en cesdictes

terres et seigneuries de Montault, ausquelx sont deus et appartiennent et lesquelx aussi tennent et possident toux et checuns lez drois et devoirs desdictes terres qui estoient deus ou dit feu Messire Jehan seigneur de Montault, c'est ascavoir à checun d'eux par telle

Page 114 = folio 77 v

portion qu'ilz luy succedent. Et ce a veu par le tamps de sadicte memoire, luy qui parle, tenir et observer, et oussi se dit publiquement en toute ladicte terre de Montault.

Sur le noviesme article dit et deppouse qu'il a veu par l'espace de cinquante ans dernièrement passés que lez habitans de la seigneurie de La Roquebraou de parroisse de Cirang, de Saint Gerons, de Saint Santin ont fait le guait ou dit lieu de La Roquebraou, et ceulx qui ressourtissent de la chastellenie de Glenat l'ont fait à Glenat, et ceux de la chastellenie de Saint Victeur et baillie du Quier l'ont fait à Saint Victeur par ledit tamps selon l'ordenance du seigneur ou de ses capitaynes desdictes places, ou se ilz ne le faysoient ceulx qui ne le faysoient donnoient aucun prouffit ou dit seigneur, dont ilz estoient d'accord avec luy. Et iceulx de la seigneurie de Carbonnieres, c'est ascavoir dez parroisses de Aguolez¹⁸¹, de Camps, de Roffiac et de Cros l'ont fait et acoustumé à fere ou dit chastel de Carbonnieres. Dit oultre qu'il a ouy dire à pluseurs gens anciennes que lesdis hommes et habitans desdictes seigneuries ont fait ledit guait anciennement et de ancienneté comme dessus est dit, sans ce que il qui parle y ait veu ne sceu ne ouy dire que à ce fere lesdis hommes aient mis nul debat ne contrediction excepté deppuys n'a guieres que lesdis hommes ont appellé.

Sur le dixiesme article dit et deppouse que au tamps que ledit feu Messire Jehan de Montault vivoit courroit bonne et fourte monnoye, c'est ascavoir que vint et sept doubles d'icelle monnoye valloient ung escu d'or du poys de trois deniers selon que il qui parle a veu, et ledit Messire Jehan faysoit payer aux hommez de cesdictes terres et seigneuries lez rentes que iceulx hommes luy devoient en argent à ladicte valeur, et ampres ensuyvent ceulx qui ont à luy succédé comme dessus a depposé ont fait paier à leursdis hommes, et iceulx hommes ont payé lesdictes rentes d'argent à la valeur de ladicte fourte monnoye sans nulle contrediction jusques au debat dudit appel combien que lesdis hommes s'en rencuroissent et s'en plaignissent.

Sur le tretziesme article dit et deppouse que il a veu par ledit tamps de sadicte memoire comme est contenu en icelluy article, et n'a ouy dire ne n'a sceu que onques *mais* y eust debat ne contrediction excepté que deppuys ledit appel.

Sur le quatorziesme article dit et deppouse qu'il a veu par le tamps de sa memoire que lez hommez de la terre et seigneurie de Montault, tant dudit Amalry que dudit noble Guillaume,

Page 115 = folio 78 r

c'est ascavoir de Carbonnieres de Montault, ont fait le contenu ou dit article sens nul debat ne contrediction, que il qui parle n'a onques veu ne sceu ne ouy dire que à ce aient esté fays excepté que dudit appel. Dit oultre que quant lesdis hommes ne pourtoient ledit boys lez officiers dudit seigneur lez excecutoyent. Dit oultre que il n'a onques oy dire le contraire.

Sur le quinziesme article dit et deppouse qu'il a ouy dire à feu Michel de Codercz de la parroisse de La Roquebraou, homme dudit Amalry, que icelluy Michel souventes foyz avoit pourté pour ledit seigneur pluseurs pipes et cueves de vin que ledit seigneur eimoit vendre en la ville d'Orlhac quant il avoit dudit vin oultre le neccessere de sa despense et de son houstel.

Sur le setxiesme article dit et deppouse qu'il a veu par l'espace du tamps de sa memoire que lesdis hommes ont acoustumé fere lez manevres, services et exploix contenus et dont est fecte mention ou dit article par lesdis hommes de la terre dudit seigneur à volenté dudit seigneur excepté que d'iceulx qui ont esté de ce affranchiz et aussi exceptéz lez hommes dez chastellenies de Vieulxchamps et de Velzic desquelx a ouy dire que sunt franx, et pour ce le scet se que dessus a dit et aussi dit dit (sic) oultre qu'il a ouy dire auxdis hommes desdictes chastellenies de Vieulxchamps et de Velzic qu'ilz devoient fere lesdictes manevres exploix et autres services que dessus, de porter ledit boys et foucher et fener lez prés pour le foin dudit seigneur et porter icelluy foin, mais que ce feust dedens leursdictes chastellenies de Vieulxchamps et de Velzic mais non ailleurs hors icelles, et ausquelx hommes de

¹⁸¹ Gouilles

Vieulxchamps et de Velzic ne veyst onques il qui parle pourter lesdis vin [et] boys et fere lesdictes manevres et exploix hors desdictes chastellenies. Bien est vray que aussi auxdis de Velzic et de Vieulxchamps a veu par ledit tamps qu'ilz pourtoient et ont pourté lez rentes oudit leur seigneur. Mais autrement aux autres hommez desdictes terres et seigneuries de Montault n'a sceu ne ouy dire qu'ilz aient mis debat ne contrediction à fere lesdictes manevres exploix et services que a dit se ilz n'estoyent de ce expressement affranchiz, jusques au tamps dudit appel.

Sur le dixeseptiesme article dit et deppouse que il a veu par ledit tamps de sa memoire que toutes quantes foys lesdis feu Messire Jehan de Montault et sesdis successeurs ont fait, indit et impousé dudit tamps tailles de telles sommes qu'ils lez faysoient et indisoyent et ont fectes et indites sur leursdis hommes excepté

Page 116 = folio 78 v

lez expressement affranchiz, et autres desdictes chastellenies de Vieulxchamps et de Velzic, toux lez autres hommes desdictes terres lez ont payées. Dit oultre qu'il a veu et ouy dire que ledit Messire Jehan de Montault chivalier seigneur de Montault a impousé et indit lez taillez dessus dictes à sa volenté sur toux cesdis hommes checun an unne foys ou environ, et iceulx hommes lez ont payées excepté les dessusdis frans expressement et dez hommes desdictes chastellenies de Vieulxchamps et de Velzic. Et amprès le decces dudit feu Messire Jehan de Montault aussi ledit Amalry son filz et sa mere semblablement ont fait, indit et impousé semblables taillez sur touz lez dessusdis hommes dez terres esquellez ledit Amalry a succédé à sondit feu pere, excepté lesdis hommes de ce expressement affranchiz, checun an unne taille à sa volenté, ou environ de checun an unne. Dit oultre qu'il a ouy dire publiquement aux hommes desdictes terres et seigneuries de Montault et aultres que lez hommez d'icelle terre estoient et avoient d'ancienneté esté taillables à volenté de leur seigneur. Dit oultre que il que il (*sic*) qui parle onques n'a sceu ne ouy le contraire de ce que dessus a depposé, excepté que dudit appel, et aussi que amprès le decces dudit feu Messire Jehan Ma Dame Jehanne de Malemort sa fame, Dame de Montault et mere dudit Amalry, impousit et indit à toux lez hommez dez terres de sondit filz unne année unne taille, laquelle selon que lesdis hommez disoyent estoit trop excessive, et pour ce lesdis hommes ne la vouloient payer, mais y contredire à la payer, et amprès ladicte Dame diminua icelle taille de quelle somme, et fut icelle taille diminuée, et amprès lesdis hommes furent contans de la payer et la payarent. Mais autrement il qui parle n'a sceu ne ouy dire selon qu'il dit que lesdis hommes aient ou tamps passé contredit à payer lesdictes taillez jusques ou tamps dudit present appel. Dit oultre que il a ouy dire que lez hommes de la dicte terre de Montault estoient taillables à volenté, et ce a ouy dire il qui parle publiquement tant à pluseurs hommes de ladicte terre que à autres.

Sur le dixhuytiesme article dit et deppouse qu'il se reppourte à ce que dessus a dit. Et dit oultre que il qui parle a veu que quant aucun villaige appertenant oudit feu Messire Jehan de Montault ou à sesdis successeurs estoit abs¹⁸² et n'avoit nul tenencier ledit seigneur faysoit foucher et fener lez prés dudit villaige à ses hommes de ladicte terre, et lez aucuns le fouchoient et ont fouché, lez autres fenoient ledit foin, et les autres icelluy foin pourtoient et ont pourté avec leurs beufz et charroyx

Page 117 = folio 79 r

là où ledit seigneur leur a commendé. Et ce a veu il qui parle dez prés du villaige dez Ortz qui par le tamps de sadicte memoire a esté abs et de ung autre pré que ledit seigneur faysoit foucher par luy, nommé icelluy pré « le pré Fillol de Nioudon », et aussi les a fais foucher et fener au pré dudit seigneur de La Roquebraou, et aussi dudit seigneur de Carbonieres, et amprès pourter icelluy foin desdis prés comme dessus a dit et depposé.

Le jour que dessus **Guillaume de Albourieuf**¹⁸³ de la parroisse de Saint Girons oudit diocese de Saint Flour, eagé de quarente cinq ans ou environ, et de memoire de trente ou environ, testmoig pa la partie que dessus prouduyt, examiné et interrogé par vertu de sondit serement, dit et deppouse comme s'ensuyt :

¹⁸² Abs est un adjectif occitan qui signifie « non cultivé » (Dictionnaire Provençal-Français d'Emil Levy)

¹⁸³ Bourrieu

Et premièrement sur le quatorziesme article dit et deppouse que il a veu aucunes foys que lez hommes des seigneuries et chastellenies de La Roquebraou, de Poul, de Glenat, de Saint Victeur ont pourté avec leurs beufz et charroys deppuys vint ans ou environ ou chastel de La Roquebraou du boys pour le chauffaige et service du seigneur dudit lieu et de son houstel et autre chouse n'en scet dire.

Sur le quinziesme article dit et deppouse qu'il a veu pareillement lesdis hommes que aucunes années passées deppuys lesdis vint ans avec leurs beufz et charroys sont alez querir pour ledit seigneur ou vinhouble, et d'illec ont pourté oudit lieu de La Roquebraou, du vin pour la despence et provision de son chastel et dudit seigneur. A esté interrogé se toux lesdis hommes dudit seigneur faysoient et ont fet ce que dit est checun an ou plus ou moigs ou aucun d'eux, dit qu'il n'en seroit autre chouse dire mais ce qu'il a dit.

Sur le dixeseptiesme article dit et deppouse que il a ouy dire que ledit seigneur plusieurs foys et aussi feu Messire Jehan de Montault seigneur de Montault au tamps qu'il vivoit indisoient et impousoient plusieurs taillez sur ses hommes.

Le dixenoviesme jour dudit moys de mars **Messire Geraud de Salvagnac** p[r]estre du lieu de La Roquebraou oudit dioucese

Page 118 = folio 79 v

de Saint Flour, eagé de sixante sept ans ou environ et memoire de cinquante et oultre, tesmoig par la partie que dessus prouduyt examiné et interrogé dit et deppouse par son serement si comme s'ensuyt :

Et premièrement sur lez premier second troysiesme quactriesme cinquiesme sixiesme septiesme et huytiesme articles dit et deppouse que il a veu par le tamps de feu Messire Jehan de Montault chivalier seigneur de Montault que lez terres et seigneuries de Montault appertenoient toutes oudit feu Messire Jehan, c'est ascavoir lez baroniez chasteaulx et chastellenies de La Roquebraou, de Carbonieres, qui sont anciennes baronnies, et aussi lez chasteaulx et chastellenies de Glénat, de Poul, de Vieux Champs, de Saint Victeur, et leurs appertenances, et en estoit seigneur seul et par le tout. Lesquelles seigneuries sont et ont esté toutes de la terre et seigneurie de Montault. A cause des quelles baronnies et seigneuries oudit seigneur Messire Jehan de Montault appertenoyent et il avoit plusieurs vassaulx hommes et subgiez tenens de luy et de cesdictes baronnies et seigneuries, lesquelx, vassaulx sunt et estoient tenuz et luy doyyent fere hommaigez, seremens et autres drois de fiefz à cause dez fieufz nobles et autres qu'ilz tenoyent de luy et de cesdictes baronnies, chastellenies et seigneuries, et lesdis autres hommes et subgietz luy estoient tenuz en plusieurs cens, rentes de blé, d'argent, de gelines, de moctons et autres drois et devoirs à cause dez villaiges et bourderies qu'ilz tenoient dudit seigneur de cesdictes seigneuries, lequiel seigneur par le tamps qu'il vivoit avoit et luy appertenoyt toute justice et juridiction en cesdictes terres. Dit oultre que amprès le trespas dudit feu Messire Jehan luy succederent en sesdictes terres c'est ascavoir : Amalry de Montault son filz ez baronnie de La Roquebraou où il a fourt et beau chasteau et aussi ez chasteaux et chastellenies de Poul, de Glénat, de Saint Victeur, et leurs appertenances et deppendences, lesquelles baronnie et chastellenies ledit Amalry tient et possede comme siennes ; et feu noble Jehan de Montault filz dudit Messire Jehan succede à sondit feu pere amprès son trespas ez baronnie de Carbonnières et chastellenie de Vieuxchamps et leurs appartenances, lesquelles par le tamps qu'il visquit amprès le trespas de sondit feu pere avec leur appertenances et deppendences il tint et possede comme siennes ; auquel Jehan de Montault [a succédé] amprès son trespas noble Guillaume de Montault son filz ez baronnie de Carbonnières où il a beau chasteau et fourte place, et en la chastellenie de Vieulxchamps, et leurs appartenances. Et par ainsi lesdis Amalry baylif dez montaignes et Guillaume de Montault son nepveu ont succédé oudit feu Messire Jehan de Montault en sesdictes terres et seigneuries de Montault, ausquelx sont deus et appertiennent et lesquelx aussi tennent et possident toux et checuns lez drois et devoirs desdictes terres qui estoient deus oudit feu Messire Jehan seigneur de Montault, c'est ascavoir à checun d'eux par telle portion qu'ilz luy succedent.

Page 119 = folio 80 r

Et ce a veu luy qui parle par le tamps de sadicte memoire, luy qui parle, tenir et observer, et aussi se dit publiquement en toute ladicte terre de Montault.

Sur le noviesme article dit et deppouse qu'il a veu par le tamps de sa memoire que lez hommes de la terre dudit feu Messire Jehan de Montault ont fait le guait ausdix lieux de La Roquebraou et de Carbonnieres et autrement comme contenu en l'article san nulle contrediction ne debat et onques il qui parle n'a sceu ne ouy dire le contraire jusques audit appel dont est fecte mention esdictes lectres.

Sur le onziesme article dit et deppouse qu'il est recors du tamps que courroit la bonne et fourte monoye, c'est ascavoir de vinct deux soulx et demy ung escu d'or du poys de troys deniers par lequiel tamps la plus part dez villaigez dez terres et seigneuries dudit feu Massire Jehan de Montault estoient vestuz et lez tenoient lez tenenciers qui lez tennent au jour d'uy, ilz ou leurs predecesseurs.

Sur le quactorxiesme article dit et deppouse qu'il a veu par le tamps de sa memoire jusques au tamps dudit debat et appel que lez hommez dudit feu Messire Jehan de Montault de ses terres et seigneuries ont fet le contenu oudit article san nulle contrediction, et onques il qui parle n'a sceu ne n'a ouy dire le contraire jusques au tamps dudit debat.

Sur le quinxiesme article dit et deppouse qu'il a veu par le tamps de sa memoire jusques au tamps dudit appel et sans nulle contrediction que lez hommes dez terres et seigneuries dudit feu Messire Jehan de Montault, excepté ceux ...ceux que ne estoyent expressement affranchiz ont fet le contenu oudit article. Dit outre que quant ledit feu Messire Jehan ou ses successeurs ..avoient achapté de vin au vinhoble par lequiel porter toux ses hommes luy eussent esté besoig toux le pourtoient, et quant toux ne luy estoient besoing les aucuns le pourtoient unne année, lez autres l'autre, et par ainsi autmoings toux le pourtoient de deux en deux années ... quoy qu'il soit selon que ledit seigneur ne avoit besoing et selon la quantité qu'il avoit achaptée de vin.

Sur le setxiesme article dit et deppouse que par le tamps de sa memoire il a veu observer et fere le contenu oudit article san nulle contrediction jusques oudit tamps dudit appel, et lez hommes desdictes terres ont acostumé fere lez manevres exploix et services comme contenu est oudit article toutes quantes foys commendé leur estoit et quoy qu'il soyt à la voulenté et ordonance desdis seigneurs ou de leurs officiers.

Sur le dixeseptiesme article dit et deppouse que il a veu au tamps que Messire Jehan de Montault vivoit au tamps de sa memoire que icelluy Messire Jehan a taillé et indit taillez à sa voulenté sur toux ses

Page 120 = folio 80 v

hommes taillables et exploictables, lesquelles il a levé et exigé d'iceulx communement checun an, et amprès ledit Amalry son filz pareillement et semblablement a impoué et indit à sa voulenté et a fet payer lez tailles à ses hommez dez terres et seigneuries ausquelles il a succédé à sondit feu pere sans nulle contrediction jusques au tamps dudit appel. Dit outre que amprès le decces dudit feu Messire Jehan ledit feu Jehan son filz a impoué et indit tailles toutes quantes foys et ainsi qu'il vouloit sur ses hommes taillables et exploictables de sesdictes terres et seigneuries esquelles il a succédé à sondit feu pere, mais non mye si souvent que sondit feu pere.

Sur le dixhuytiesme article dit et deppouse qu'il a veu par le tamps de sadicte memoire que les hommes ont fouché fené appourté le foin de leurdit seigneur comme contenu audit article toutes quantes foys ledit seigneur le leur a mandé, il ou ses officiers. Dit outre que à ce fere il qui parle onques ne veyst ne ouyt que debat y aist esté mis ne contrediction par lesdis hommes excepté que dudit appel. Mais dit qu'il a ouy dire à pluseurs gens et hommes anciens de ladicte terre dudit feu Messire Jehan que ainsi avoent acostumé fere lesdis hommes anciennement et ou tamps passé.

Le vinptequactriesme jours dudit moys de mars au lieu de La Roquebraou l'an que dessus mil quactre cens quarente neuf **Pierre de Las Hutquas** de la parroisse de Saint Girons oudit diocese de Saint Flour, eagé de cinquante ans et de bonne memoire de quarente et outre, testmoig par la partie que dessus prouduyt, examiné et interrogé, dit et deppouse par vertu de son serement comme s'ensuyt :

Et premièrement sur le noviesme article dit et deppouse qu'il a veu par le tamps de sa memoire que lez hommes habitans dez parroisses de Braou, de Nioudon, de Saint Girons, de Saint Santin, de Cirang ont fet le guet continuellement de nuyt au chastel de La Roquebraou et selon l'ordonance du seigneur dudit lieu ou de son

cappitaine, ou ceulx qui ne le faysoient donnoient aucun prouffit et esmolument oudit seigneur ou à son cappitaine. Et onques il qui parle n'a sceu le contraire excepté que deppuys l'appel dont est fecte mention esdictes lectres.

Page 121 = folio 81 r

Sur le tretziesme (14^{ème}) article dit et deppouse qu'il a veu par le tamps de sadicte memoire que lez hommez dudit Amalry ont pourté le boys tant à feu Messire Jehan de Montault son pere que à icelluy Amalry amprès le trespas d'icelluy son pere, avec leurs beufz et charroys en la place du lieu de La Roquebraou, et d'illec ledit seigneur le faysoit pourter au chastel dudit lieu à ses autres serviteurs au tamps dudit feu Messire Jehan, et deppuys jusques au tamps que ledit Amalry a ediffié icelluy chastel de La Roquebraou, et a ouy dire que deppuys que icelluy chastel a esté ediffié iceulx hommes l'ont pourté à icelluy chastel avec leurs beufz et charroyx. A esté interrogé combien souvent checun d'iceulx hommes pourtoient ledit boys, dit que aucunes foys de troys en troys sepmaines, et autres foys de quinze en quinze jours selon que ledit seigneur le leur faysoit commender par ses serviteurs.

Sur le quinxiesme article dit et deppouse que par le tamps que il qui parle demouroit en ung villaige d'Espinet où estoient huyt fasons¹⁸⁴ dudit villaige, iceulx hommes qui tenoyent lesdictes mansons checun an envoyoient ung pere de beufz querir et pourter le vin comme est en ledit article contenu.

Sur le dixeseptiesme article dit et deppouse que par le tamps que il qui parle demouroit oudit villaige d'Espinet lez hommez de ladicte terre payoent et ont payé checun an unne taille oudit seigneur, puy a dit que ledit seigneur faysoit les taillez pour marier ses fillez ou pour lez fere nonenes, dont l'unne fut nonneni et lez autres deux mariées. Luy a esté remonstré l'espace dudit tamps de sa memoire, pour ce qu'il a dit qu'il a demeuré hors du villaige d'Espinet deppuys qu'il le leyssa vint et cinq ans, puy amprès a dit qu'il a ouy dire à son pere et à pluseurs autres par le tamps qu'il demouroit loyé¹⁸⁵ hors l'ostel de sondit pere que ledit seigneur faysoit checun an payer unne taille à sesdis homme. Dit oultre que par le tamps que Ma Dame de Montault mere dudit Amalry gouvernoit la terre de sondit filz, unne année elle impoussa et indest unne taille sur lez hommez de ladicte terre dont lesdis hommes appellarent, et puy amprès lesdis hommes s'accourdarent avec ladicte Dame et donnarent pour ladicte taille celle foys cent cinquante francz selon que luy semble, et estoit icelle taille pour marier unne dez fillez dudit feu Messire Jehan de Montault.

Sur le dixhuytiesme article dit et deppouse qu'il a veu par l'espace de cinq ou six ans ou tamps qu'il demouroit oudit villaige d'Espinet que lez hommes de ladicte terre ont aucuns fouché, lez autres fené et lez autres pourter le foin comme est contenu en l'article. Dit oultre qu'il a ouy dire à sondit feu pere que ainsi le avoit il fait au tamps passé.

Page 122 = folio 81 v

Ledit jour de mars Anthoyne de Cels dudit lieu de La Roquebraou, cordonnier, eagé de quarente cinq ans et de memoire trente cinq ans et oultre, testmoig par la partie que dessus prouduyt, examiné et interrogé dit et deppouse par vertu de sondit serement comme s'ensuyt :

Et premièrement sur le tretziesme article dit et deppouse qu'il a veu par l'espace de trente ans que lez hommes de la terre de noble et puysent Amalry de Montault seigneur de La Roquebraou ont pourté lez rentes qu'ilz devoient oudit seigneur audit lieu de La Roquebraou avec leurs beufz et charroys, et ce a il qui parle veu checun an excepté que deppuys le tamps dudit appel dont est fecte mention esdictes lectres.

Sur le quinxiesme article dit et deppouse qu'il a veu par l'espace desdis trente ans que lesdis hommes avec leurs beufz et charroys venoient et sont venus checun an audit lieu de La Roquebraou querir lez pipes vuydes, lesquelles pourtoient au vinhoble, et d'illec lez retornoyent et pourtoient pleynes de vin pour la provision et despense dudit seigneur, et onques il qui parle n'a sceu ne ouy dire le contraire jusques au tamps dudit appel.

Sur le setxiesme article dit et deppouse qu'il a veu par l'espace desdis trente ans que lesdis hommes de ladicte terre aucuns d'eux ont fouché, lez autres fené, et lez autres pourté le foin comme est contenu en l'article.

¹⁸⁴ Fasion ou fach, correspondant au mot latin médiéval « factum » = petite exploitation agricole

¹⁸⁵ Loyé = loué = employé comme ouvrier (agricole généralement)

Sur le dixeseptiesme article dit et deppouse qu'il a veu par l'espace desdis trente ans que lez hommes de ladicte terre ont payé audit seigneur aucunes foys checun an, lez autres foys de deux en deux ans, et lez autres foys de troys en troys, toutes quantes foys ledit seigneur indisoit et impousoit lesdictes taillez sur lesdis hommes, sans ce qu'il ait ouy dire le contraire excepté que deppuys ledit appel.

Sur le dixhuytiesme article se reppourte à ce que dessus a dit.

Ledit jour discrete parsonne **Maistre Bernard du Mas** notayre dudit lieu de La Roquebraou, eagé de septante cinq ans et de memoire de sixante cinq et oultre, testmoig par la partie que dessus prouduyt, examiné et interrogé par vertu

Page 123 = folio 82 r

de sondit serement, dit et deppouse si comme s'ensuyt :

Et premièrement sur le noviesme article dit et deppouse qu'il est recours du tamps dudit feu Messire Jehan de Montault, par le quel tamps, et dudit Amalry son filz, du quel tamps et par sa memoy[r]e il qui parle a veu que lez hommes de la chastellenie de Saint Victeur, appertenens oudit Amalry, qui est ung des membres de ladicte terre de Montault, on fet le guait audit chastel de Saint Victeur toutes quantes foys le cappitaine dudit chastel leur ou commendoit, ou quant ilz ne faysoient ledit guet donnoient aucun prouffit audit cappitaine pour ledit guet.

Sur le quactorxiesme article dit et deppouse qu'il a veu deppuys cinquante ans et quarente ans a et oultre, tant pour le tamps dudit feu Messire Jehan de Montault que deppuys, continuellement jusques au tamps du present debat, toutes quantes foys lez baylez desdictes terres et seigneuries de Montault commendoient aux hommez desdictes terres qu'ilz pourtassent le boys pour le chauffaige et service dez houstelz et seigneurs desdictes terres, ilz le pourtoient sen contrediction, et ce a veu il qui parle par ledit tamps.

Sur le quinxiesme article dit et deppouse que par le tamps dudit feu Messire Jehan de Montault et deppuys continuellement jusques au tamps du present debat encoumamcé que toux lez hommes de ladicte terre de Montault, toutes quantes foys leur estoit commendé aler querir le vin pour la provision des houstelx dez seigneurs de ladicte terre, ilz le aloient querir avec leurs beufz et charroix et venoient querir iceulx hommez à l'oustel dudit seigneur les pipes et cueves pour mectre ledit vin à l'oustel dudit seigneur, et lez officiers dudit seigneur bailloient ausdis hommes du pain et de la cher pour fere leurs deppens an chemin et d'illec iceulx hommes lesdictes pipes et cuyves veudez pourtoient avecques leursdis beufz et charroys au vinhoble où estoit achapté ledit vin, et amprès lez en retournoient pleynes de vin ausdis houstelx et aucunes foys ailleurs, là out il playsoit aux officiers desdis seigneurs, et ce a il veu par le tamps de sa memoire.

Sur le setxiesme article dit et deppouse qu'il a veu par sondit tamps de sa memoire jusques au tamps dudit debat encoumamcé que quant en l'houstel dudit seigneur estoit quelque chouse affere où avoient bessoing de charroys et bessoing d'autres services lez officiers dudit seigneur aloient querir lez hommes de ladicte terre pour fere lez manevres ausquelles fere estoient mandés, et quant estoit besoing à icellez manevres et negocez dudit hostel y avoir charroyx aussi iceulx hommez lez amenoient et venoyent oudit

Page 124 = folio 82 v

houstel pour fere lez manevrez et autres servicez par lesquels fere estoient mandéz, et aucunes foys quant iceulx hommes ne venoyent fere lesdis manevrez et exploix avec leursdis charroyx ou sens eulx, lez officiers dudit seigneur leur faysoit fere commendement par les sergens d'icelluy seigneur qu'ilz veinssent fere lesdis manevres et exploix de charroix, et par ainsi amprès lesdis commendemens lesdis hommes venoient comme commendé leur estoit sans nulle contrediction, et onques ledit testmoig n'oyt dire le contraire hors tant seulement au tamps du present debat en coumamcé.

Sur le dixeseptiesme article dit et deppouse que il a veu par le tamps de sa memoire que par le tamps que ledit feu Messire Jehan de Montault vivoit et amprès son decces ledit Amalry son filz ou ses autres officiers checun an impousoient et indisoient et ont impouyé et indit, ledit feu Messire Jehan en toute la terre de Montault et ledit Amalry ou ses officiers ez terres esquellez il a succedé à sondit feu pere, et aux hommes d'icelle, unne taille de telle

somme que bon sembloit ausdis seigneurs, laquelle ilz faysoient et ont fait esgualer et devire sur leursdis hommez, et sans les à ce appeller, et puyz lez comtez et pourtions d'icelles ilz faysoient exiger et lever par leurs officiers, et l'ont exigé et levé ; et quant iceulx hommes ne payoent lesdictes taillez le leur faysoit par execution et prinses de leurs biens, et de ce lesdis hommez s'en rencuroient et plaignoyent, mais toutes foys iceulx hommes payoent lesdictes taillez sans ce que il qui parle nescet que lesdis hommes à ce aient mis nul autre debat ne contrediction excepté que de present et dont est fecte mention esdictes lectres.

Sur le dixhuytiesme article dit et deppouse que il qui parle a veu par l'espace de quarente ans continuelx et jusques au present debat que lesdis hommes ont fouché et fené et pourté le foin comme en l'article est contenu.

Ledit jour dudit mars **Pierre de La Balbie**¹⁸⁶ de la parroisse d'Aguoles¹⁸⁷ ou dioucese de Tuelle¹⁸⁸ eagé de septante ans et de bonne memoire de sixante, testmoig par la partie que dessus prouduyt, examiné et interrogé par vertu de son serement, dit et deppouse comme s'ensuyt :

Et premièrement sur lez premier second troysiesme quactriesme cinquiesme sixiesme septiesme et huytiesme articles dit et deppouse que il a veu par le tamps de feu Messire Jehan de Montault chivalier seigneur de Montault que lez terres et seigneuries de Montault appertenoient toutes oudit feu Messire Jehan, c'est ascavoir lez baronies chasteaux et chastellenies de La Roquebraou, de Carbonieres, qui sont anciennes baronnies, et aussi lez chasteaux et chastellenies de

Page 125 = folio 83 r

Glénat, de Poul, de Vieulx Champs, de Saint Victeur, et leurs appartenances, et en estoit seigneur seul et par le tout. Lesquelz seigneuries sunt et ont esté toutes de la terre et seigneurie de Montault. A cause des quelles baronnies et seigneuries oudit seigneur Messire Jehan de Montault appertenoyent et il avoit pluseurs vassaulx hommez et subgietz tenens de luy et de cesdictes baronnies et seigneuries, lequelx vassaulx sunt et estoient tenuz et luy doyvent fere hommaigez, seremens et autres drois de fiefz à cause dez fieufz nobles et autres qu'ilz tenoyent de luy et de sesdictes baronnies, chastellenies et seigneuries, et lesdis autres hommes et subgietz luy estoient tenuz en pluseurs cens, rentes de blé, d'argent, de gelines, de moctons et autres drois et devoirs à cause dez villaigez et bourderies qu'ilz tenoyent dudit seigneur de sesdictes seigneuries, lequiel seigneur par le tamps qu'il vivoit avoit et luy appertenoyt toute justice et juridiction en sesdictes terres. Dit oultre que amprès le trespas dudit feu Messire Jehan luy succederent en sesdictes terres c'est ascavoir : Amalry de Montault son filz ez baronnie de La Roquebraou où il a fourt et beau chateau et aussi ez chasteaux et chastellenies de Poul, de Glénat, de Saint Victeur, et leurs appartenances et deppendances, lesquelles baronnie et chastellenies ledit Amalry tient et possede comme siennes ; et feu noble Jehan de Montault filz dudit Messire Jehan succeda à sondit feu pere amprès son trespas ez baronnie de Carbonieres et chastellenie de Vieulxchamps et leurs appartenances, lesquelles par le tamps qu'il visquit amprès le trespas de sondit feu pere avec leur appartenances et deppendances il tint et posside comme siennes ; auquel feu Jehan de Montault [a succédé] amprès son trespas noble Guillaume de Montault son filz ez baronnie de Carbonières où il a beau chateau et fourte place, et en la chastellenie de Vieulxchamps, et leurs appartenances. Et par ainsi lesdis Amalry baylif dez montaignes et Guillaume de Montault son neveu ont succédé oudit feu Messire Jehan de Montault en cesdictes terres et seigneuries de Montault, ausquelx sunt deus et appartiennent et lequelx aussi tennent et possident toux et checuns lez drois et devoirs desdictes terres qui estoient deus oudit feu Messire Jehan seigneur de Montault, c'est ascavoir à checun d'eux par telle pourtion qu'ilz luy succedent. Et ce a veu luy qui parle par le tamps de sadicte memoire, tenir et observer, et aussi se dit publiquement en toute ladicte terre de Montault.

Sur le onziesme article dit et deppouse que par le tamps que ladicte fourte monnoye couroit ez villaiges et affasions dez seigneuries dudit feu Messire Jehan de Montault estoient vestus la plus part, et en toux communement y avoit

¹⁸⁶ La Balvie

¹⁸⁷ Gouilles

¹⁸⁸ Tulle

tenenciers, et quoy qu'il soyt la cinquiesme partie desdis villaigez n'estoit point abse¹⁸⁹, mais y avoit tenenciers en la plus part desdis villaiges, c'est ascavoir ceulx qui lez tennent au jour d'uy ou leurs predecesseurs.

Sur le trexiesme article dit et deppouse que il a veu par

Page 126 = folio 83 v

le tamps de sa memoire, c'est ascavoir par le tamps que ledit Messire Jehan de Montault vivoit et demeuroit en son chastel de La Roquebraou ses hommes de sadicte seigneurie de Carbonieres de Montault luy ont pourté checun an audit lieu de La Roquebraou avec leurs beufz et charroyx et autre bestail lez rentes et autres qu'ilz devoient oudit seigneur, et se ilz ne le luy pourtoient lez faysoit excecuter et gaiger par ses sergens sans ce qu'il ne scet ne a ouy dire que onques lesdis hommez à ce aient contredit excepté que de l'appel dont est fecte mention esdictes lectres.

Sur le quatorxiesme article dit et deppouse que il a veu par l'espace de sa memoire que lez hommes dez seigneuries dudit feu Messire Jehan de Montault ont pourté avec leurs beufz et charroys tout le boys qui estoit oudit seigneur neccessere à son houstel pour son chauffaige et le service de sondit houstel où il demeuroit toutes quantes foys le leur faysoit commender par ses serviteurs. Dit oultre qu'il n'a sceu onques ne ouy dire le contraire de ce que a dit jusque au debat dont est fecte mention esdictes lectres. Dit aussi qu'il a ouy dire à Bernard d'Artigues de la parroisse de Sescles¹⁹⁰ que au tamps que ledit Messire Jehan de Montault vivoit il pourtoit ledit boys dudit lieu d'Artigues de ladicte parroisse que est distant par une lieue et demye dudit lieu de La Roquebraou¹⁹¹.

Sur le quixiesme article dit et deppouse qu'il a veu par l'espace du tamps de sa memoire que lesdis hommes dudit feu Messire Jehan de Montault sont alez avec leurs beufz et charroys ou autre bestail à leurs despens loué ou emprunpté venoyent et sunt venuz ou lieu où ledit seigneur demeuroit querir lez pipes et cueves et d'illec lez pourtoient au vinhoble et lez en retournoient pleynes de vin, et ce ont fait lesdis hommes unne foys checun an ou plus selon que ledit seigneur avoit achapté de vin. Dit oultre que aucunes foys et années quant ledit seigneur ne faysoit grant vinée et ne avoit achapté tant de vin que toux sesdis hommez feussent neccesseres à porter ledit vin il faysoit porter ledit vin comme dessus à aulcuns desdis hommes unne année et spargnoit icelle année lez autres, et amprès l'autre année en suyvent il faysoit alé querir ledit vin aux autres que n'y avoient esté l'ant par avant passé, et spargnoit lez autres que l'an devant y avoient esté. Dit oultre qu'il a ouy pluseurs foys dire publiquement à pluseurs anciens desdictes terres que lez hommez desdictes terres de Montault anciennement avoient acoustumé aler querir porter ledit

vin avec leurs beufz et charroys et autrement comme a dessus a dit et depposé. Et onques il qui parle n'a sceu ne ouy dire que lesdis hommes au tamps passé aient mis nul debat ne contrediction excepté que dudit appel.

Sur le dixeseptiesme article dit et deppouse que il a ouy dire par l'espace du tamps de sa memoire par tant que audit tamps visquit ledit feu Messire Jehan de Montault chivalier que icelluy feu Messire Jehan de Montault indisoit et impousoit checun an unne taille

Page 127 = folio 84 r

de tiel somme que bon luy sembloit sur toux ses hommes de ses seigneuries lesquelles lesdis hommez qui n'estoient à ce affranchiz payoent et ont payée ainsi que ledit seigneur lez leur indisoit. A esté interrogé à qui l'a ouy dire, dit que à ung nompmé feu Jehan de Pers de la parroisse d'Aguolez qui levoit et exigoit lesdictes taillez dez hommez dudit seigneur taillendiers de ladicte parroisse de Aguolez, et il qui parle lez luy a veues lever et exiger. Et quant lesdis hommes ne lez payoent, icelluy Jehan de Pers lez fayçoit excecuter. Et aussi plus a ouy dire à ung autre nompmé Jehan Calvet de ladicte parroisse d'Agulez au quel Calvet amprès le decez dudit Pers il qui parle lez a veues pluseurs années lever et exiger desdis hommes de ladicte parroisse comme avoit fait ledit Jehan de Pers, et lequiel Calvet aussi faysoit excecuter lesdis hommes quant ne lez payoent. Dit oultre que aussi le oyoit dire par ledit tamps publiquement à toux lez hommes dudit feu Messire Jehan de Montault taillandiers. Dit oultre que il luy souvient du commencement du tamps de sa memoire que lesdis hommes payoent et ont payées checun an lesdictes taillez ainsi que a dit oudit feu seigneur de Montault et non tant seulement lesdis hommez de ladicte seigneurie de

¹⁸⁹ Voir plus haut « abs », non cultivé

¹⁹⁰ Sexcles en Corrèze

¹⁹¹ Faux ! même à vol d'oiseau, il y a déjà 14 km ! Il devait donc y en avoit au moins 20 par les chemins. Ou alors, la lieue valait alors 13 km ?

Carbonieres mais aussi touz lez autres hommes taillandiers dudit feu Messire Jehan de Montault comme ceulx de La Val de Braou, dez chastelleniez de Poul, de Glenat, de La Roquebraou et de Saint Victeur, de Cirang et de Saint Girons. A esté interrogé quelx hommes dit et nompme il taillandiers comme dessus a dit, respond que iceulx qui expressement de ce ne sunt affranchiz. Dit oultre que ledit feu Messire Jehan de Montault avoit pluseurs hommes en sesdictes terres et seigneuries que ne luy estoient taillandiers hors tant seulement en quactre cas, mais lesdis hommes taillandiers desdis quactre cas ne payoent mye lesdictes taillez checun an se ellez ne estoient indites et impouées pour aucun desdis quactre cas. Dit oultre qu'il a ouy dire publiquement que de ancienneté la terre dudit seigneur de Montault estoit taillable et exploictable à volenté dudit seigneur. Dit oultre qu'il a veu que amprès le trespas dudit feu Messire Jehan de Montault ledit Amalry son filz, il ou sez officiers et gouverneurs ont pareillement impoué et indit checun an, ou quoy qu'il soit bien souvent taillez à leur volenté sur lez hommes taillandiers des terres et seigneuries esquellez ledit Amalry a succédé à sondit feu pere, et est recors que par le tamps que Ma Dame Jehanne de Mallemort Dame de Montault mere dudit Amalry gouvernoit la terre et seigneurie de sondit filz, elle impoua et indit une année sur lez hommes de sondit filz [unne taille]

Page 128 = folio 84 v

à laquelle payer iceulx hommes contredeiscent (*sic*) pour ce que ilz disoyent que ladicte taille que ladicte Dame avoit impouée estoit trop excessive, et amprès icelle Dame diminue de ladicte taille et lesdis hommes amprès que ladicte taille fut diminuée furent contens de la payer et la payarent. Dit oultre que onques il qui parle n'a ouy dire le contrayre excepté ce que a dit de ladicte Dame Jehanne de Mallemort et aussi excepté ledit debat du appel dont est fecte mention esdictes lectres.

Le jour que dessus **Geraud de Tueyres** merchant dudit lieu de La Roquebraou, eagé de cinquante ans et oultre, et memoire de trente et plus, testmoig par la partie que dessus prouduyt, examiné et interrogé par vertu de sondit serement, dit et deppouse comme s'ensuyt :

Et premièrement sur le tretxiesme article dit et deppouse que il a veu que au tamps que ung nompmé Guaspar de Montagut estoit baylle de Cirang par noble et puysent seigneur Amalry de Montault ou pour sa mere il meysuroit aux villaiges dez hommes de ladicte terre dudit seigneur le blé de la rente que lesdis hommez devoient audit seigneur, et amprès lesdis hommez le pourtoient et ont pourté ledit blé au chastel de La Roquebraou. Amprès aussi il a veu il qui parle que amprès le tamps dudit Guaspar lesdis hommez ont pourté ledit blé au chastel de La Roquebraou par l'espace de vinct et cinq ans san nulle contrediction excepté que deppuys le tamps de l'appel dont est fecte mention esdictes lectres.

Sur le quactorxiesme article dit et deppouse que il a veu deppuys vinct et cinq ans passés et oultre que lez hommes de ladicte terre dudit Amalry, ceux qui sont de oultre la reviere de Cère devers le pays de Quercin ont pourté le boys pour le chauffaige et service dudit seigneur et de son houstel en ung ouvreur¹⁹² près de la place dudit lieu de La Roquebraou, et d'illec ledit Amalry le faysoit pourter par hommez qu'il tenoit à ce fere à sondit chastel, et lez autres hommez qui estoient part decca ladicte reviere devers le pays d'Auvergne le pourtoient et ont pourté oudit chastel. Et dit oultre que trente ans a ou environ que aucunes foyz ung nompmé Manserguez qui demouroit oudit chastel alloit tailler du boys à la fourest

Page 129 = folio 85 r

dudit seigneur pour le service dudit sergneur, et puyz faysoit icelluy Manserguez pourter ledit boys qu'il avoit taillé oudit chastel à iceulx hommez.

Sur le quinxiesme article dit et deppouse que il a veu par l'espace de vinct et cinq ans que lesdis hommes dudit Amalry sunt alez querir checun une foyz au vigneuble avec leurs beufz et charroyx le vin pour la despance et provision de l'oustel dudit seigneur. Bien est verir que aucunes foyz iceulx hommez avoyent debat entre eulx de bailler aucunes foyz lez beufz, aucunes foyz lez charroyx, mais quoy qu'il soit ilz y aloient comme dessus a dit.

¹⁹² Traduction littérale du mot latin médiéval « operatorium » = atelier, bureau (et parfois boutique)

Sur le dixeseptiesme article dit et deppouse qu'il a ouy dire à pluseurs hommes de ladicte terre que le seigneur dudit lieu ou tamps passé quant il impousoit taillez ausdis hommes il leur bailloit

la grosse¹⁹³ d'icelle taille pour checune bayllie de sadicte terre pour la devire et distribuer entre eulx, laquelle taille iceulx hommes divisoyent et distribuoyent à leur playsir, mais deppuys que ledit Amalry a esté leur seigneur icelluy Amalry la leur a divisé et distribuée selon que bon luy a semblé sans apeller lesdis hommez. Et par ainsi dit il qui parle qu'il a veu par l'espace desdis vint et cinq ans que lesdis hommes ont payées lesdictes tailles oudit seigneur checun an unne foys, ou aucunes foys de deux en deux ans selon que bon sembloit audit seigneur, et de tielles sommees qu'il luy playsoit. Dit oultre que aucunes foys lesdis hommes se rancuroient de ladicte taille et division que ledit seigneur leur avoit fecte, et pour ce aucunes foys icelluy seigneur selon que bon luy sembloit leur en diminuoyt d'icelle taille, et à aucuns desdis hommes et aux autres non, selon que son playsir estoit.

Ledit jour Durand de Pompignac du lieu de La Roquebraou, boucher, eagé de quactre vintz ans, et de bonne memoire de sixante ans ou environ, testmoig par la partie que dessus prouduyt, examiné et interrogé dit et deppouse par vertu de sondit serement si comme s'ensuyt :

Et premièrement sur lez premier second troysiesme quactriesme cinquiesme sixiesme septiesme et huytiesme articles dit et deppouse que il a veu

Page 130 = folio 85 v

par le tamps de feu Messire Jehan de Montault chivalier seigneur de Montault que lez terres et seigneuries de Montault appertenoyent toutes oudit feu Messire Jehan, c'est ascavoir lez baronnies chasteaulx et chastellenies de La Roquebraou, de Carbonieres, qui sunt anciennes baronnies, et aussi lez chasteaulx et chastellenies de Poul, de Glénat, de Vieux Champs, de Saint Victeur, et leurs appertenances, et en estoit seigneur seul et par le tout. Lesquelles seigneuries sunt et ont esté toutes de la terre et seigneurie de Montault. A cause des quelles baronnies et seigneuries oudit seigneur Messire Jehan de Montault appertenoyent et il avoit pluseurs vassaulx hommez et subgiez tenens de luy et de sesdictes baronnies et seigneuries, lesquels c'est ascavoir lesdis vassaulx sont et estoient tenuz et luy doyvent fere hommaigez, seremens et autres droys de fiefz à cause dez fieufz nobles et autres qu'ilz tenoyent de luy et de sesdictes baronnies, chastellenies et seigneuries, et lesdis autres ses hommez et subgietz luy estoient tenuz en pluseurs cens, rentes de blé, d'argent, de gelines, de moctons et autres droys et devoirs à cause dez villaigez et bourderies qu'ilz tenoyent dudit seigneur de cesdictes seigneuries, lequel seigneur par le tamps qu'il vivoit avoit et luy appertenoyt toute justice et juridiction en sesdictes terres. Dit oultre que amprès le trespas dudit feu Messire Jehan luy succederent en sesdictes seigneuries c'est ascavoir : Amalry de Montault son filz ez baronnie de La Roquebraou où il a fourt et beau chasteau et aussi ez chastellenies et chasteaulx de Poul, de Glénat, de Saint Victeur, et leurs appertenances et deppendances, lesquelles baronnie et chastellenies ledit Amalry tient et possede comme siennes ; et feu noble Jehan de Montault filz dudit Messire Jehan succede à sondit feu pere amprès son trespas ez baronnie de Carbonieres et chastellenie de Vieulxchamps et leurs appartenances, lesquelles par le tamps qu'il visquit amprès le trespas de sondit feu pere, avec leur appertenances et deppendances, il tint et possida comme siennes ; auquel feu Jehan de Montault a succédé amprès son trespas noble Guillaume de Montault son filz esdicte baronnie de Carbonières où il a beau chasteau et fourte place, et la chastellenie de Vieuxchamps, et leurs appartenances. Et par ainsi lesdis Amalry de Montault baylif dez montaignes d'Auvergne et Guillaume de Montault son nepveu ont succédé oudit feu Messire Jehan de Montault en cesdictes terres et seigneuries de Montault, ausquelx sunt deus et appertiennent et lesquelx aussi tennent et possident toux et checuns lez drois et devoirs desdictes terres qui estoient deus oudit feu Messire Jehan seigneur de Montault, c'est ascavoir à checun d'eux pour telle pourtion qu'ilz luy succedent. Et ce a veu luy qui parle par le tamps de sadicte memoire, luy qui parle, tenir et observer, et aussi se dit publiquement en toute ladicte terre de Montault.

Page 131 = folio 86 r

¹⁹³ Copie notariée d'un acte

Sur le noviesme article dit et deppouse qu'il a veu par l'espace de trente ans et oultre que lez habitans de la seigneurie de La Roquebraou, dez parroiszez de Ciran, de Saint Girons, de Saint Santin, ont fait le guait audit lieu de La Roquebraou, et ceulx qui ressourtissent de la chastellenie de Glenat l'ont fait à Glenat, et ceulx dela chastellenie de Saint Victeur et baylie du Quier l'ont fait à Saint Victeur par ledit tamps selon l'ordenance du seigneur ou de ses cappitaynes desdictes places, ou s'ilz ne le faysoient, ceulx qui ne le faysoient donnoient aucun prouffit audit seigneur, dont ilz estoient d'accord avec luy. Et ceulx de la seigneurie de Carbonieres, c'est ascavoir dez parroiszez de Agueles, de Camps, de Roffiac, de Cros, l'ont fait et acoustumé à fere oudit chastel de Carbonieres. Dit oultre qu'il a ouy dire à pluseurs gens anciens que lesdis hommes et habitans desdictes seigneuries ont fait le guait anciennement et d'ancienneté comme dessus est dit sans ce quel qui parle y ait veu ne sceu ne ouy dire que à ce fere lesdis hommez aient mis nul debat ne contrediction excepté deppuys n'a guierez que lesdis hommez ont appellé.

Sur le tretxiesme article dit et deppouse qu'il a veu que lez homez ont pourté lez rentes qu'ilz devoient oudit seigneur avecques leurs beufz et charroys ou autre bestail en la place dudit lieu de La Roquebraou, et d'illec la eudoyent à porter au chastel dudit lieu, et ce a veu par l'espace de quarente ans et oultre sen nulle contrediction jusques au tamps dudit appel.

Sur le quactorxiesme article dit et deppouse qu'il a veu par le tamps de sa memoire que lez hommez dez seigneurs de ladicte seigneurie de Montault ont acoustumé à porter avec leurs beufz et charroys le boys qui a esté neccessere pour le chauffaige dudit seigneur et de ses successeurs et pour tout le service de son houstel toutes quantes foyz leur a esté mandé, et se lesdis hommez ne venoient porter ledit boys audit commendement lez officiers dudit seigneur et de ses successeurs lez excecutoyent et gaigoyent. Excepté que au tamps que l'ayeul dudit Amalry demuroit au lieu de Moncanin lez hommez de troys ou quactre villaigez de Moncanin quant n'avoient de boys aloyent querir icelluy aux fraux ou sur la fourest de Belcarm selon qu'il a ouy pluseurs hommes anciens de ladicte terre et seigneurie de feu Messire Jehan de Montault, qui disoient que aussi avoient acoustumé fere lesdis hommes anciens, et autrement lez hommes desdictes terres et seigneuries sans ce que jamays n'a ouy ne sceu que lesdis homme aient au tamps passé mis à ce aucun debat ne contrediction, excepté dudit appel. A esté interrogé d'out lesdis hommes prenoient ledit boys, dit que de leurs possessions, ou s'ils n'en avoyent le achaptoient de ceulx qu'en avoient, et ledit seigneur ne le leur

Page 132 = folio 86 v

bailloit nulle fourest dont ilz en puissent prendre ; et autrement se reppourte à ce que dessus a dit et deppoué.

Sur le quixiesme article dit et deppouse que il a veu par l'espace de trente cinq ans que lez hommes des seigneuries dudit Amalry ont pourté checun an avec leurs beufz et charroys et sunt alez querir le vin ainsi qu'est contenu en l'article. Bien est vray que toux lesdis hommes n'en aloyent pas checun an, mais seulx qui estoient seullement neccesseres pour porter le vin de la despance dudit seigneur. Et si toux y eussent estez neccesseres, toux y feussent alez, selon que luy semble. Et pour ce luy semble quar aucuns ans y ailloient lez ungs desdis hommes, et autres ans lez autres qui n'y avoient esté lez années par avant.

Sur le setxiesme article dit et deppouse que il a veu par le tamps que dessus desdis trente cinq ans que quant lesdis seigneurs mandoyent leursdis hommes à la sayson pour retourner *l'ave (ene ?)* aux prés lez hommes y sunt venus checun an unne foyz checun an. Dit oultre qu'il a veu que lesdis hommes checun an sunt venuz aucuns d'eulx foucher, lez autres fener, et lez autres porter le foin dez prés d'icelluy seigneur avec leurs beufz et charroys.

Sur le dixeseptiesme article dit et deppouse que il est recours qu'il a eu bonne cognoissance dudit feu Messire Jehan de Montault au tamps qu'il vivoit l'espace de quinze ans et oultre, et est recours qu'il a veu, et aussi disoit hom publiquement que ledit feu Messire Jehan par ledit tamps de quinze ans, aucunes foyz de an en an, et autres foyz de deux en deux ou plus, a indit et impoué sur toux ses hommes de ses terres, excepté ceulx qui estoient expressement affranchiz, et pluseurs foyz taillez, lesquelles il faysoit payer à sesdis hommes, et icellez taillez faysoit lever par ses baillez de sez baillies, et checun d'iceulx bailles respondoient d'icellez taillez oudit seigneur. Et de ce selon qu'il dit estoit voix et fame publique esdictes terres. Mais ne scet se amprès le trespas dudit feu Messire Jehan ledit Amalry son filz a impoué ne indit aucunes taillez sur ses hommes.

Sur le dixhuytiesme article dit qu'il se reppourte à ce que a dit dessus.

Ledit jour Pierre de Gracteparlle¹⁹⁴ de la paroisse de

Page 133 = folio 87 r

Saint Girons oudit dioucese de Saint Flour, eagé de sixante ans, et de memoire de cinquante, testmoig par la partie que dessus prouduyt et examiné, dit et deppouse par vertu de sondit serement si comme s'ensuyt :

Et premièrement sur le quatorxiesme article dit et deppouse qu'il a veu par le tamps de sa memoire que lez hommez de ladicte terre de Montault ont pourté et acoustumé à pourter oudit seigneur et à son chastel le boys qui luy estoit neccessere pour son chauffaige et pour tout le service de son houstel san nul debat ne contrediction jusques au tamps du present debat, toutes quantes foyz l'en leur commendoit ce fere. Toutesfoys ne scet se lez hommez le devoient fere ou non. Bien est vray qu'ilz s'en rancuroyent, mais ne y ont mis autre debat que dudit appel.

Sur le quixiesme article dit et deppouse que par le tamps dudit feu Messire Jehan de Montault et deppuys continuellement et jusques au tamps du present debat encoumamcé, que toux lez hommez de ladicte terre de Montault, toutes quantes foyz leur estoit commendé aler querir le vin pour provision des houstelx et dez seigneurs de ladicte terre, ilz le aloient querir avec leurs beufz et charroyz, et venoyent querir iceulx hommez à l'oustel dudit seigneur lez pipes et cueves pour mectre le vin à l'oustel dudit seigneur, et lez offeciers dudit seigneur bailloient ausdis hommes du pain et de la cher pour fere lez despens au chemin, et d'illec iceulx hommes lesdictes pipes et cueves vuydes pourtoyent avecques leursdis beufz et charroyx au vinhoble où estoit achapté ledit vin, et amprès lez en retournoyent pleynes de vin auxdis houstelz, et aucunes foyz ailleurs là où il playssoit aux offeciers desdis seigneurs.

Sur le setxiesme article dit et deppouse que il a veu par sondit tamps de sa memoire jusques au tamps dudit debat encoumamncé que quant en l'oustel dudit seigneur estoit quelque chouse affere où avoient besoing de charroix ou beufz, ou d'autres services, les offeciers dudit seigneur aloient querir lez hommez de ladicte eterre pour fere lez manevrez ausquellex fere estoient mandéz, et quant estoit besoig à icellez manevres et negocez dudit houstel y avoir charroies aussi iceulx hommez lez amenoient et venoient oudit houstel pour fere lez manevres et autres services par lesquelx fere estoient mandéz. Et aucunes foyz quant iceulx hommez ne venoyent fere lesdictes manevres et exploix avec leursdis charroix ou sens eulx, lez offeciers dudit seigneur leur faysoient fere commendement par lez sergens d'icelluy seigneur qu'ilz veneissent fere lesdictes manevres et exploix de charroix. Et par ainsi amprès lesdis commendement lesdis hommez venoyent comme commendé leur estoit san nulle contradiction, et onques ledit testmoig n'ouyt dire le contraire, hors tant seulement au tamps du present debat encoumamcé.

Sur le dixeseptiesme article dit et deppouse que il a veu par le tamps

Page 134 = folio 87 v

de sa memoire que lez hommez dez terrez dudit Amalry ont payé à feu Messire Jehan de Montault son pere par le tamps qu'il vivoit et amprès son trespas audit Amalry son filz environ checun an unne foyz unne taille de tiel somme que leur a pleu. Dit oultre que aussi a ouy dire et disoit hom publiquement que semblablement ledit feu Messire Jehan aussi checun an ou environ impousoit et indisoit et faysoit payer semblables tailles aux hommez dez terres dudit noble Guillaume de Carbonnieres qui n'estoient de ce affranchiz, autrement ne le scet. Dit oultre qu'il n'a sceu ne ouy dire que lesdis hommez y aient à ce mis aucun debat ne contrediction jusques au tamps dudit appel, excepté aussi que amprès le trespas dudit feu Messire Jehan de Montault lez hommez dudit Amalry appellarent d'ugne taille trop excessive que Ma Dame Jehanne de Montault mere dudit Amalry leur avoit indicte, mais toutesfoys amprès ledit appel ladicte taille fut diminuée et retournée à somme raysonnable, laquelle taille ainsi diminuée lesdis hommez de leur consentement et par leur accord furent contans de la payer, et la poyerent.

Sur le dixhuytiesme article dit et deppouse que au tamps dudit feu Messire Jehan de Montault quarente ans sunt passés et oultre, et deppuys continuellement jusques au present debat il qui parle a veu que toutes quantes foyz l'en

¹⁹⁴ Grattepaille, commune de Saint Gérons

a mandé lez hommes de ladicte terre de Montault pour foucher ou fener et pourter le foin ez prés dudit seigneur là où bon sembloit à ses officiers et deppuys aussi là où bon sembloit aux officiers de sesdis successeurs ilz le fouchoient fenoient et pourtoient comme mandé leur estoit sans nulle contradiction jusques au tamps du present debat encouramcé, et par ce le scet quar ainsi l'a veu fere et observer par tout le tamps de sa memoire et sans nulle contrediction. Et aussi pareillement il a ouy dire aux autres hommes anciens et autres desdictes terres sans ce que onques il ne ouyt dire le contraire jusques au tamps du present debat.

Le jour dessusdit **Jehan de Pompignac dit d'Espinet** dudit lieu de La Roquebraou, eagé de cinquante ans et de memoire de quarente deux, testmoig par la partie que dessus prouduyt, examiné et interrogé par vertu de sondit serement,

Page 135 = folio 88 r

dit et deppouse comme s'ensuyt :

Et premièrement sur lez premier second troysiesme quactriesme cinquiesme sixiesme septiesme et huytiesme articles dit et deppouse que il a veu par le tamps de feu Messire Jehan de Montault chivalier seigneur de Montault que lez terres et seigneuries de Montault appertenoyent toutes oudit feu Messire Jehan, c'est ascavoir lez baronnies chasteaux et chastellenies de La Roquebraou, de Carbonieres, qui sont anciennes baronnies, et aussi lez chasteaux et chastellenies de Glénat, de Poul, de Vieux Champs, de Velzic et de Saint Victeur, et leurs appertenances, et en estoit seigneur seul et par le tout. Lequellex seigneuries sont et ont esté toutes de la terre et seigneurie de Montault. A cause desquelles baronnies et seigneuries audit seigneur Messire Jehan de Montault appertenoient et il avoit plusieurs vassaulx hommez et subgietz tenens de luy et de cesdictes baronnies et seigneuries, lequelx c'est ascavoir lesdis vassaulx sont et estoient tenuz et luy doyvent fere hommaigez, seremens et aultres droys de fiefz à cause dez fieufz nobles et aultres qu'ilz tenoyent dudit seigneur et de sesdictes chastellenies et seigneuries, et lesdis aultres sez hommes et subgietz luy estoient tenuz en plusieurs cens, rentes de blé, d'argent, de gelines, de moctons et aultres droys et devoirs à cause dez villaiges et bourderies qu'ilz tenoient dudit seigneur de sesdictes seigneuries, le quel seigneur par le tamps qu'il vivoit avoit et luy appertenoit toute justice et juridiction en sesdictes terres. Dit oultre que amprès le trespas dudit feu Messire Jehan luy succederent en sesdictes seigneuries c'est ascavoir : Amalry de Montault son filz ez baronnie de La Roquebraou où il a fourt et beau chateau et aussi ez chastellenies et chasteaux de Poul, de Glénat, de Saint Victeur, et leurs appertenances et deppendances, lesquelles baronnie et chastellenies ledit Amalry tient et possede comme siennes ; et feu noble Jehan de Montault filz dudit Messire Jehan succede à sondit feu pere amprès son trespas ez baronnie de Carbonieres et chastellenie de Vieulxchamps et de Velzic et leurs appartenances, lesquelles par le tamps qu'il visquit amprès le trespas de sondit feu pere, avec leurs appertenances et deppendances, il tint et posside comme siennes ; auquel feu Jehan de Montault a succédé amprès son trespas noble Guillaume de Montault son filz esdicte baronnie de Carbonieres où il a beau chateau et fourte place, et la chastellenie de Vieulxchamps noble Amalrignon de Montault son filz frere dudit Guillaume. Lesquieulx nobles Guillaume et Amalrignon freres tennent et possident c'est ascavoir ledit Guillaume lesdictes baronnie de Carbonieres et chastellenie de Vieulxchamps, et icelluy Amalrignon ladicte chastellenie de Velzic. Et par ainsi lesdis Amalry de Montault baylif dez montaignes d'Auvergne, Guillaume et Amalrignon de Montault sez neveux ont succédé oudit feu Messire Jehan de Montault en sesdictes terres et seigneuries de Montault, ausquelz sont deus et appartiennent et lesquieulx aussi tennent et possident toux et checuns lez droys et devoirs desdictes terres qui estoient deus oudit feu Messire Jehan seigneur de Montault, c'est ascavoir à checun d'eux pour telle pourtion qu'ilz luy succedent. Et ce a veu par le tamps de sadicte memoire, luy qui parle, tenir et

Page 136 = folio 88 v

et aussi le dit hom publiquement en toute ladicte terre de Montault.

Sur le noviesme article dit qu'il n'en scet rien senon comme dessus a dit et deppousé.

Sur le quactorxiesme article dit et deppouse qu'il a veu par le tamps de sa memoire que lez hommes de ladicte terre de Montault ont pourté et acoustumé apourter audit seigneur et à son chastel le boys que luy estoit necessere pour son chauffaige et pour le service de son houstel sans nul debat ne contrediction jusques au tamps du present debat

toutes quantes foyz l'en leur commendoit ce fere. Toutesfoys ne scet se lez hommes le devoient fere ou non. Bien est vray qu'ilz s'en rancuroient, mais n'y ont mis nul autre debat que dudit appel.

Sur le quixiesme article dit et deppouse que par le tamps dudit feu Messire Jehan de Montault et deppuys continuellement et jusques au tamps du present debat encoumamcé que touz lez hommes de ladicte terre de Montault toutes quantes foyz leur estoit commendé alé querir le vin pour la provision dez houstelz et dez seigneurs de ladicte terre ilz le aloient querir avec leurs bufz et charroys, et venoient querir iceulx hommes à l'oustel dudit seigneur lez pipes et cueves pour mectre le vin, et lez officiers dudit seigneur bailloient ausdis hommes du pain et de la cher pour fere la despance au chemin, et d'illec iceulx hommes lesdictes pipes et cueves vuydes pourtoient avecquez leursdis beufz et charroys au vinhoble où estoit achapté ledit vin, et amprès lez en retournoient playnes de vin ausdis houstelz, et aucunes foyz ailleurs là où il plaisoit aux officiers desdis seigneurs.

Sur le setxiesme article dit et deppouse qu'il a veu par sondit tamps de sadicte memoire lusques au tamps dudit debat encoumamcé que quant en l'oustel dudit seigneur estoit quelque chouse affere où avoient besoing de charroies ou beufz ou d'autres services lez officiers dudit seigneur aloient querir lez hommes de ladicte terre pour fere lez manevrez ausquelz fere estoient mandés, et quant estoit besoing à icelles manevrez et negoces dudit houstel y avoir charroyes aussi, iceulx hommes lez amennoient et venoient audit houstel pour fere lez manevres et autres services par lesquelz fere estoient mandés, et aucunes foyz, quant iceulx hommez ne venoient fere lesdictes manevres et exploix avec leursdis charroys ou sens eulx, les officiers dudit seigneur leur faysoient fere

Page 137 = folio 89 r

commendement par lez sergens d'icelluy seigneur qu'ilz veinssent fere lesdictes manevres et exploix de charroys ; et par ainsi amprès lesdis commendemens lesdis hommes venoyent comme commendé leur estoit san nulle contrediction. Et onques ledit tesmoig n'oyt dire le contraire hors tent seulement au tamps du present debat encoumamcé.

Sur le dixeseptiesme article dit et deppouse qu'il a veu par le tamps de sa memoire que lez hommez dez terres dudit Amalry ont payé à feu Messire Jehan de Montault son pere, par le tamps qu'il vivoit, et amprès son trespas audit Amalry son filz, environ checun an unne foyz unne taille de tieulx sommes que luy a pleu. Dit oultre que aussi a ouy dire et disoit hom publiquement que semblablement ledit feu Messire Jehan aussi checun an ou environ impousoit et indisoit et faysoit payer semblables taillez aux hommes dez terres dudit noble Guillaume de Carbonieres qui n'estoient de ce affranchiz, mais autrement ne le scet. Dit oultre qu'il n'a sceu ne n'a ouy dire que lesdis hommes aient à ce mis aucun debat ne contrediction jusques au tamps dudit appel, excepté aussi que amprès le trespas dudit feu Messire Jehan de Montault lez hommes dudit Amalry apellarent de unne taille troupe excessive que Ma Dame Jehanne de Montault mere dudit Amalry leur avoit indite ; mais toutesfoys ne scet pas par quel fin heut le plet coumamcé contre icelle Dame, ne se lez hommes payarent ladicte taille ou non, mais deppuys l'ont payée jusques audit debat.

Sur le dixhuytiesme article dit et deppouse que au tamps dudit feu Messire Jehan de Montault, quarente ans sunt passés et oultre, et deppuys continuellement jusques au present debat, il qui parle a veu que toutes quantes foyz l'en a mandé lez hommez de ladicte terre de Montault pour foucher ou fener et pourter le foin dez prés dudit seigneur là où bon sembloit à ses officiers, et deppuys aussi là où bon sembloit aux officiers de sesdis successeurs, ilz le fouchoient fenoient et pourtoient comme mandé leur estoit san nulle contrediction jusques au tamps du present debat encoumamcé, et par ce la scet quar ainsi l'a veu fere et observer par tout le tamps de sa memoire et sans nulle contrediction. Et aussi pareillement il l'a ouy dire aux autres hommes anciens et autres desdictes terres sens ce que onques il ne ouyt dire le contraire jusques au tamps du present debat. Et dit oultre que aucunes années lesdis hommes ne fouchoient ne fenoient ne pourtoient le foin, mais lors iceulx hommez paioient ceulx qui ainsi le fouchoyent, fenoient et pourtoient.

Ledit Jour Jehan de Rousso, de la parroisse de Cirang oudit dioucese de Saint Flour, eagé de cinquante huyt ans, et de memoire de quarente ou environ, testmoig par la partie que dessus prouduyt, examiné et interrogé, dit et deppause par vertu de son serement comme s'ensuyt :

Page 138 = folio 89 v

Et premierement sur le tretxiesme article dit et deppouse qu'il a ouy dire plusieurs foys aux hommez dez terres de feu Messire Jehan de Montault que ledit seigneur et ses officiers faysoient porter ausdis hommes au grenier dudit seigneur lez rentes qu'ilz luy devoient, et de ce souvent lesdis hommes se rancuroient, mais toutesfoys ne y contredisoient ny on contredit que il qui parle l'ait sceu ne ouy dire, excepté que du tamps du debat dont est fecte mention esdictes lectres.

Sur le quatorxiesme article dit et deppouse que il qui parle a veu et ouy dire aux hommez desdictes terres qu'ilz ont pourté oudit feu seigneur et à ses successeurs le boys qui audit seigneur estoit neccessere pour son chauffage et service de son hostel, toutes quantes foys oudit hostel dudit seigneur estoit besoig, et aucuns le pourtoient de quinze en quinze et lez autres de sept en sept jours. Et quant ilz ne pourtoient ledit boys quant leur estoit commendé, ledit seigneur lez faysoit excecuter par ses sergens et officiers, dont iceulx hommes estoient mal contens. Toutes foys ilz ne y contredisoient autrement jusques oudit debat.

Sur le quinxiesme article dit qu'il qui parle a veu par le tamps de sa memoire que aucunes foys lesdis hommes aloient et sunt aléz checun an querir au vinhoble et d'illec pourtoient et ont pourté oudit seigneur le vin neccessere pour la despance et provision de l'oustel dudit seigneur, mais aucun tamps lesdis hommes n'y aloient ne y sont aléz que avecques ung beuf tout seul, et d'autres foys avec ung pere¹⁹⁵.

Sur le setxiesme article dit qu'il a veu par le tamps de sadicte memoire que lesdis hommes aloient et sunt alez toute quantes foys ledit seigneur ou ses officiers le leur commendoient fere lez manevres de coups¹⁹⁶ avec leurs beufz et charroys pour lez affayrez et negoucez dudit seigneur et de ses successeurs, et quant ilz ne y alloient lesdis officiers lez excecutoient et ont excecuté, dont iceulx hommes se plaignoient et rencuroient aucunes foys. Toutes foys ilz n'y contredisoient autrement ne n'y ont contredit que il qui parle l'ait sceu ne ouy dire, hors tant seulement deppuys le tamps dudit debat dont est fecte mention esdictes lectres.

Sur le dixeseptiesme article dit et deppouse qu'il a veu que ledit seigneur Messire Jehan de Montault vivoit il endisoit communement checun an, et aulcunes foys de deux en deux ans, sur ses hommes de ses terres qui n'estoient de ce francz, et leur faysoit payer unne taille de tel somme que bon luy sembloit, et aussi amprès le trespas dudit feu Messire Jehan noble et puyssent seigneur Amalry de Montault son filz a indit et fet payer semblablement tailles à ses hommez de ses terres esquelles il a succédé à sondit feu pere, sans ce que il qui parle ait sceu ne ouy dire que lesdis hommes aient à ce contredit aucunement, excepté que du tamps dudit debat, combien que par avant iceulx hommez aussi estoient mal contens payer

Page 139 = folio 90 r

tant de taillez et si souvent, et aussi unne autre foys par le tamps que Ma Dame de Montault gouvernoit lez hommes de sondit filz, par le quel tamps ladicte Dame indit et impouza unne taille à iceulx hommes de sondit filz, et iceulx hommez contradirent à la payer, et puy fut fet acord entre ladicte Dame et hommez, tellement que par ledit accord ladicte Dame diminua ausdis hommez aucune partie de ladicte taille, et iceulx hommes furent contens payer, et de fait payerent l'autre partie, pour ce que icelle taille estoit trop excessivement desraysonnable. Dit oultre que aussi deppuys ladicte taille de ladicte Dame de Montault lesdis hommes ont payé audit Amalry leur seigneur plusieurs foys taillez, lesquelles il leur a impouées et indites.

Sur le dixhuytiesme article dit et deppouse que au tamps dudit feu Messire Jehan de Montault, quarente ans sunt passés et oultre, et deppuys continuellement jusques au present debat, il qui parle a veu que toutes quantes foys l'en a mandé lez hommez de ladicte terre de Montault pour foucher ou fener et porter le foin dez prés dudit seigneur là où bon sembloit à ses officiers, et deppuys aussi là où bon sembloit aux officiers de sesdis successeurs, ilz le fouchoient fenoient et pourtoient comme mandé leur estoit san nulle contrediction jusques au tamps du present debat encoumamcé, et pour ce le scet quar l'a veu fere et observer par tout le tamps de sa memoire e san nulle contrediction, et ainsi pareillement il a ouy dire aux autres hommes anciens et à aultres desdictes terres, sans ce que onques il n'a ouy dire le contraire jusques au tamps du present debat.

¹⁹⁵ Une paire de boeufs

¹⁹⁶ Corps ? mais c'est bien écrit « coups »

Ledit jour Jehan de Maignac de la paroisse de Braou, eagé de sixante ans et de memoire de cinquante ou environ, testmoig par la partie que dessus prouduyt, examiné et interrogé par vertu de sondit serement, dit et deppouse comme s'ensuyt :

Et premierement sur le tretxiesme article dit et deppouse qu'il a veu par l'espace dudit tamps de sa memoire que lez hommez dez terrez et seigneuries de feu Messire Jehan de Montault, et tant seulx dez terrez et seigneuries de La Roquebraou, de Poul, de Glenat, de Saint Victeur et aussi de Carbonieres ont pourté au grenier et houstel dudit seigneur et de ses predecesseurs lez rentes de blé et autres qu'ilz devoient audit seigneur et à sesdis successeurs avec leurs beufz et charroix et autres bestes, sans ce que il qui parle ait onques veu ne sceu que à ce fere lesdis hommes

Page 140 = folio 90 v

aient contredit aucunement ne mis aucun debat, excepté que du debat dont est fecte mention esdictes lectres de commission

Sur le quatorxiesme article dit et deppouse qu'il a veu par le tamps de sa memoire que lez hommez de ladicte terre de Montault ont pourté et acoustumé à porter oudit seigneur et à son chastel le boys qui luy estoit necessere pour son chauffaige et pour le service de son houstel san nul debat ne contrediction jusques au tamps du present debat toutes quantes foys l'en leur commendoit ce fere, toutes foys ne scet se lez hommes le devoient fere ou non. Bien est vray qu'ilz s'en rencuroyent mais n'y ont mys autre debat que dudit appel.

Sur le quixiesme article dit et deppouse que il qui parle a veu par l'espace de quarente ans passés que les hommes dudit feu Messire Jehan de Montault seigneur de Montault et de ses terres luy pourtoient et ont pourté par ledit tamps le vin qui estoit necessere audit seigneur et pour sa despense, et icelluy vin aloient et sunt aléz querir checun an au vinhoble où il estoit achapté avec leursdis beufz et charrois, et amprès par le tamps dudit Amalry l'ont fait pareillement checun an une foys quant iceulx hommes ont esté de ce requis.

Sur le setxiesme article dit et deppouse qu'il a veu par ledit tamps de sa memoire que lesdis hommez aloient et sunt aléz toutes quantes foys ledit seigneur ou ses officiers le leur commendoient fere lez manevres de courps et avec leurs beufz et charroix pour lez affaires et negocez dudit seigneur et de ses successeurs. Et quant ilz n'y aloient lesdis officiers les excecutoyent et ont excecutes, dont iceulx hommes se plaignoyent et rancuroyent aucunes foys. Totes foys ilz n'y contredisoient autrement ne n'y ont contredit qu'il qui parle l'ait sceu ne ouy dire, hors tant seulement deppuys le tamps dudit debat dont est fecte mention esdictes lectres.

Sur le dixeseptiesme article dit et deppouse qu'il a veu par le tamps de sa memoire que lez hommez dez terrez dudit Amalry ont payé à feu Messire Jehan de Montault son pere par le tamps qu'il vivoit, et amprès son trespas audit Amalry son filz, environ checun an une foys une taille de tieulx sommez que leur a pleu. Dit oultre que aussi a ouy dire et disoyt hom publiquement que semblablement ledit feu Messire Jehan aussi semblablement checun an ou environ impousoit et indisoyt et faysoit payer semblablez taillez aux hommez dez terrez dudit noble Guillaume de Carbonieres qui n'estoyent de ce affranchiz, mais autrement ne le scet. Dit oultre qu'il n'a sceu de n'a ouy dire que lesdis hommes aient à ce mis aucun debat ne contrediction jusques au tamps dudit appel, excepté aussi que amprès le trespas dudit feu Messire Jehan de Montault lez hommes dudit Amalry appellarent d'ugne taille trop excessive que Ma Dame Jehanne de Montault mere dudit Amalry leur avoit indite, mais toutes foys amprès ledit appel ladicte taille fut diminuée et retournée à somme

Page 141 = folio 91 r

raysonnable, laquelle taille ainsi diminuée lesdis hommez, de leur consentement et par leur accord furent contens de la payer et la poyerent.

Sur le dixhuytiesme article dit et deppouse que au tamps dudit feu Messire Jehan de Montault, quarente ans sunt passés et oultre, et deppuys continuellement et deppuys jusques au present debat, il qui parle a veu que toutes quantes foys l'en a mandé lez hommez de ladicte terre de Montault pour foucher ou fener et porter le foin dez prés dudit seigneur là où bon sembloit à ses officiers, et deppuys aussi là où bon sembloit aux officiers de sesdis successeurs, ilz le fouchoient, fenoient et pourtoient comme mandé leur estoit sans nulle contrediction jusques au tamps du present debat encoumancé, et par ce la scet quar l'a veu fere et observer par tout le tamps de sa memoire

et san nulle contrediction, et aussi pareillement il a ouy dire aux autres hommez anciens et autres desdictes terres, sans ce que onques il n'oyt dire le contraire jusques au tamps du present debat.

Ledit jour noble homme Pierre de Negremont, dudit lieu de La Roquebraou, eagé de cinquante ans et de memoire de sinquante et oultre¹⁹⁷, testmoig par la partie que dessus prouduyt, examiné et interrogé par vertu de son serement, dit et deppouse comme s'ensuyt :

Et premierement sur le quatorxiesme article dit et deppouse qu'il a veu par le tamps de sa memoire que lez hommes de ladicte terre de Montault ont pourté et acoustumé à porter oudit seigneur et à son hostel le boys que luy estoit neccessere pour son chauffage et pour le service de son hostel san nul debat ne contrediction jusques au tamps du present debat toutes quantes foyz l'en le leur commendoit ce fere. Toutes foyz ne scet se lez hommez le devoient fere ou non. Bien est vray qu'ilz s'en rencuroient, mais ne y ont mis autre cebat que dudit appel.

Sur le quisesme article dit et deppouse qu'il qui parle a veu par l'espace de quarente ans passés que lez hommes dudit feu Messire Jehan seigneur de Montault et de ses terres luy pourtoient et ont pourté par ledit tamps le vin qui estoit neccessere oudit seigneur et pour sa despance, et icelluy vin aloient et sunt alés querir checun an au vignoble où il estoit achapté, avec leursdis beufz et charroix, et amprès par le tamps dudit Amalry l'ont fait pareillement checun an une foyz, quant iceulx hommez ont esté de ce requis.

Sur le setxiesme article dit et deppouse qu'il a veu par ledit tamps de sa memoire que lesdis hommes aloient et sunt alés, toutes quantes foyz ledit seigneur ou ses officiers le leur commendoient, fere lez manevres de corps avec leurs beufz et charroix pour lez affaires et negocez

Page 142 = folio 91 v

dudit seigneur et de ses successeurs. Et quant ilz n'y aloient, lesdis officiers lez excecutoient et ont excecuté, dont iceulx hommes se plaignoyent et rencuroient aucunes foyz. Toutes foyz ilz ne y contredisoient autrement ne y ont contredit, que il qui parle l'ait sceu ne ouy dire, hors tant seulement deppuys le tamps dudit appel dont est fecte mention esdictes lectres.

Sur le dixeseptiesme article dit et deppouse qu'il a veu que ledit Messire Jehan de Montault vivoit il indisoit communement checun an, et aucunes foyz de deux en deux ans, sur ses hommes de sez terres qui n'estoient de ce francz, et leur faysoit payer une taille de tel somme que bon luy sembloit, et aussi amprès le trespas dudit feu Messire Jehan noble et puysent seigneur Amalry de Montault son filz a indit et fet payer semblablement taillez à ses hommez de ses terres esquellez il a succédé à sondit feu pere, sans ce que il qui parle ait sceu ne ouy dire que lesdis hommes aient à ce contredit aucunement, excepté que du tamps dudit debat, combien que par avant iceulx hommez aussi estoient mal contens payer tant de taillez et si souvent, et aussi une autre foyz par le tamps que Ma Dame de Montault gouvernoit lez hommez de sondit filz, par le quel tamps ladicte Dame indit et impouza une taille à iceulx hommes de sondit filz, et iceulx hommez contredirent à la payer, et puys fut fet acord entre ladicte Dame et hommes, tellement que par ledit accord ladicte Dame diminua ausdis hommez aucune partie de ladicte taille, et iceulx hommes furent contens paier, et de fait la poyerent l'autre partie, pour ce que icelle taille estoit trop excessivement desraysonnable. Dit oultre que aussi deppuys ladicte taille de ladicte Dame de Montault lesdis hommes ont payé audit Amalry leur seigneur pluseurs foyz taillez, lesquelles il leur seigneur a impouées et indites.

Sur le dixhuytiesme article dit et deppouse que au tamps dudit feu Messire Jehan de Montault, quarente ans sunt passés et oultre, et deppuys continuellement jusques au present debat il qui parle a veu que toutes quantes foyz l'en a mandé lez hommez de ladicte terre de Montault pour foucher ou fener et porter le foin dez prés dudit seigneur là où bon sembloit à ses officiers, et deppuys aussi là où bon sembloit aux officiers de sesdis successeurs, ilz le fouchoient, fenoient et pourtoient comme mandé leur estoit san nulle contrediction jusques au tamps du present debat encoumamcé, et par ce la scet car l'a veu fere et observer par tout le tamps de sa memoire, et sans nulle contrediction, et aussi pareillement il a ouy dire aux autres hommez anciens et autres desdictes terres, sans ce que onques il ne ouyt dire le contraire jusques au tamps du present debat.

¹⁹⁷ Oups, il y a une erreur soit dans l'âge soit dans la mémoire....

Le jour que dessus **Hug La Brossete**, du lieu de La Roquebraou, eagé de cinquante six ans et memoire de cinquante ans ou environ, testmoig par la partie que dessus prouduyt, examiné et interrogé par vertu de son serement, dit et deppouse si comme s'ensuyt :

Page 143 = folio 92 r

Et premierement sur le tretxiesme article dit et deppouse qu'il a veu par le tamps que ung nompmé Guaspar estoit baille dez bayliez de Cirang et de Glenat par icelluy seigneur, Jacques de Corbieres estoit baille de la baylie de Saint Santin, et Jehan La Borie estoit baylle de Saint Victeur et de Vieulxchamps, et ung nompmé Messire Martin estoit baille dez terrez de Carbonieres par le tamps que feu Messire Jehan de Montault chivalier seigneur de Montault vivoit, que iceulx baillez faysoient pourter lez rentes que lez hommes dudit seigneur luy devoient à l'oustel et granier d'icelluy seigneur. Mais ne scet à quieulx deppens, mais toutes foys lezdis hommes lez pourtoient, et deppuys le trespas dudit feu Messire Jehan lez hommes de noble Amalry son filz lez y ont pourtées à son grenier et à son houstel avec leurs beufz et charroix et autre bestail, jusques au tamps dudit debat dont est fecte mention esdictes lectres.

Sur le quactorxiesme article dit et deppouse qu'il a veu tant par le tamps dudit feu Messire Jehan de Montault que aussi deppuys par le tamps dudit Amalry son filz que lezdis hommes de la terre dudit Amalry ont pourté pluseurs foys et souvent ou lieu et chastel de La Roquebraou du boys pour le chauffaige desdis seigneurs et service de lezdis houstelz. Autre chouse n'en scet.

Sur le quixiesme article dit et deppouse qu'il a veu par le tamps desdis feu Messire Jehan et Amalry son filz lezdis hommes des terres qui sunt aujourduy dudit Amalry sunt alés querir au vinhoble avec leurs beufz et charroix, et d'illec ont pourté à l'oustel desdis seigneurs le vin de la provision et despance d'iceulx seigneurs et de leurdit houstel une foys checun an sans nul debat ne contrediction, excepté que deppuys ledit appel.

Sur le dixeseptiesme article dit et deppouse qu'il a veu par l'espace de cinquante ans passés que ledit seigneur Messire Jehan de Montault vivoit il indisoit communement checun an, et aucunes foys de deux en deux ans, sur ses hommes de sez terres qui n'estoient de ce francz, et leur faysoit payer une taille de tiel somme que bon luy sembloit, et aussi amprès le trespas dudit feu Messire Jehan, noble et puysent seigneur Amalry de Montault son filz a indit et fet payer semblablement taillez à ses hommez de ses terres esquellez il a succédé à sondit feu pere, sans ce que il qui parle ait sceu ne ouy dire que lezdis hommes aient à ce contredit aucunement, excepté que du tamps dudit debat, combien que par avant iceulx hommez aussi estoient mal contens payer tant de taillez et si souvent, et aussi une autre foys par le tamps que Ma Dame de Montault gouvernoit lez hommez de sondit filz, par le quel tamps ladicte Dame indist et impouza une taille à iceulx hommes de sondit filz, et iceulx hommez contredirent à la payer, et puys fu fet accord entre ladicte Dame et hommes, tellement que par ledit accord ladicte Dame diminua ausdis hommez aucune partie de ladicte taille, et iceulx hommes furent contens payer, et de fayt poyerent l'autre partie, pour ce que icelle taille estoit trop excessivement

Page 144 = folio 92 v

desraysonnable. Dit oultre que aussi deppuys ladicte taille de ladicte Dame de Montault lezdis hommes ont payé oudit Amalry leur seigneur pluseurs foys taillez, lesquelles il leur a impousées et indites.

Sur le dixhuytiesme article dit et deppouse que au tamps dudit feu Messire Jehan de Montault, quarente ans sunt passés et oultre, et deppuys continuellement jusques au present debat il qui parle a veu que toutes quantes foys l'en a mandé lez hommez de ladicte terre et seigneurie de La Roquebraou pour foucher et fener et pourter le foin dez prés dudit seigneur là où bon sembloit à ses offeciers, et deppuys aussi là où bon sembloit aux offeciers de sesdis successeurs, ilz lez fouchoient, fenoient et pourtoient comme mandé leur estoit san nulle contrediction jusques au tamps du present debat encoumamcé, et par ce la scet car ainsi l'a veu fere et observer par tout le tamps de sa memoire, et sen nulle contrediction, et aussi pareillement il a ouy dire aux autres hommes anciens et aultres desdictes terres, sans ce que onques il ne ouyt dire le contraire jusques au tamps du present debat.

Le jour que dessus, **discrete parsonne Messire Guillaume du Brueil** prestre habitant du lieu de La Roquebraou, agé de sixante ans ou environ, et de bonne memoire de sinquante, testmoig par la partie que dessus prouduyt, examiné et interrogé par vertu de son serement, dit et deppouse comme s'ensuyt.

Et premierement sur le tretxiesme article dit et deppouse qu'il a veu par l'espace du tamps de sa memoire que lez hommez dez terres et seigneuries de noble et puyssent seigneur Amalry de Montault esquellez il a succedé à feu Messire Jehan de Montault son pere, par le tamps qu'il est recors de la vie dudit feu Messire Jehan de Montault, ont pourté pluseurs foys et pluseurs années, dont il qui parle ne scet le nombre, à l'oustel et chastel dudit feu Messire Jehan de son lieu de La Roquebraou, avec lesdis beufz et charroix, lez rentez qu'ilz devoient oudit seigneur, et amprès le trespas dudit feu Messire Jehan aussi pareillement l'ont pourté comme dit est, du tamps dudit Messire Jehan de Montault san nul debat ne contrediction que il qui parle ait sceu ne ouy dire que lesdis hommes aient fait au pourter lesdictes rentes, excepté que du present debat dont est fecte mention esdictes lectres.

Sur le quatorxiesme article dit et deppouse qu'il a veu par l'espace de trente ans passés et oultre, et aussi par le tamps dont il est recors que ledit feu Messire Jehan vivoit, que lez hommez desdictes terres dudit Amalry ont pourté avec leurs beufz et charroix en la place de La Roquebraou par aucun tamps dudit tamps le boys pour le chauffage dudit seigneur et service de sondit houstel, et amprès par l'autre tamps desdis trente ans ont pourté ledit boys avecques iceulx leurs beux et

Page 145 = folio 93 r

et charroix au chastel dudit lieu sen nul debat ne contrediction excepté dudit debat.

Sur le quixiesme article dit et deppouse qu'il a veu par le tamps de la vie dudit feu Messire Jehan, et par aucuns ans du nombre desquielx il n'est recours, que lez hommes de ladicte terre dudit feu Messire Jehan de Montault, lez aucuns unne année, lez autres que à la année par avant passée n'y avoient esté, et par ainsi de deux en deux ans, pour ce que la terre dudit feu messire Jehan de Montault vivoit estoit grande et estoit toute à ung seigneur, et ledit feu seigneur tenoit et possedoit lez terres esquellez ledit Amalry luy a succedé, et aussi la seigneurie et castellenie de Carbonieres, aloient et sunt alez querir avec leurs beufz et charroix au vignoble tout le vin de la provision et despance dudit feu seigneur et de son houstel. Et dit oultre que amprès le trespas dudit feu Messire Jehan, et n'est recours du tamps passez deppuys icelluy trespas, lez hommes dudit Amalry sunt alez querir pareillement au vignoble avec leurs beufz et charroix, et ont pourté tout le vin de la provision et despance de l'oustel dudit seigneur san nul debat ne contredicition, excepté que dudit debat. A esté interougé se par le tamps que lesdis hommes dudit feu Messire Jehan de Montault ne aloient que de deux en deux ans querir ledit vin comme a dit ledit seigneur eust achapté à vignoble si grant quantité et foyson de vin que toux cesdis hommes eussent esté besoing à le pourter, et sur ce esté inquis se lors toux lesdis hommes eussent alé querir et eussent pourté ledit vin comme dessus a dit, respond qu'il luy est advis qu'oyl.¹⁹⁸

Sur le setxiesme article dit et deppouse qu'il a veu par le tamps dudit feu Messire Jehan de Montault que toutes quantes foys ledit seigneur mandoit lesdis hommez fere lez manevrez exploix et services que luy estoient besoin pour ses affaires, de courps ou avec leurs beufz et charroix, que iceulx hommes sunt venuz lez fere, et aussi l'ont fet pareillement deppuys le trespas dudit feu Messire Jehan lez hommes dudit Amalry toutes quantes foys leurdit seigneur lez mandoit à ce fere, et ce a il qui parle veu san nul debat ne contrediction excepté que dudit appel.

Sur le dixeseptiesme article dit et deppouse que par le tamps dudit feu Messire Jehan de Montault il qui parle a veu que ledit feu seigneur impousoit et indisoit et a impousé et indit pluseurs et souventes foys taillez sur toux ses hommes qui n'estoient expressement affanchiz de toutes ses terres et seigneuries, et aussi de ladicte seigneurie de Carbonieres, taillez de tiel somme que audit seigneur bon sembloit *et asterble*, lesquelles taillez lesdis hommez payoient et ont payées. Dit oultre que amprès le trespas dudit feu Messire Jehan de Montault, par le tamps que ma Dame de Montault mere dudit Amalry a rigé et gouverné lez terrez et seigneuries de sondit filz, et aussi ledit Amalry

¹⁹⁸ « qu'oyl » = « que oui » ; on peut supposer qu'il a plutôt répondu « oc », mais le notaire a traduit en langue d'oïl, celle du parlement de Paris !

amprès le gouvernement de ladicte sa Dame mere ont fet payer ausdis hommes de ladicte terre dudit Amalry et ont exigé d'iceulx homes souventes et pluseurs foys et pluseurs années pluseurs

Page 146 = folio 93 verso

taillezqu'ilz indisoyent et ont indit et impousé, ont indit sur liceulx hommes de tielz sommes que bon leur sembloit, ausdis Amalry et à ma Dame sa mere san nulle contrediction ne sens nul debat excepté que dudit debat, et aussi excepté que unne foys ladicte Dame , et unne année, impousa et indist unne taille sur lesdis hommez d'icelluy son filz dont lesdis hommes pour ce playdiarent avec ladicte Dame, mais ne scet que fut fet amprès dudit plait, toutes foys non obstant ledit plait lesdis hommes ont payé pluseurs foys et souventes lesdictes taillez audit Amalry.

Sur le dixhuytiesme article dit et deppouse qu'il a veu pluseursfoys et pluseurs années que au tamps de fere lez foyns lez officiers dudit seigneur aloient par lez terres d'icelluy seigneur et commendoient à aulcuns desdis hommes qu'ils veinssent foucher le foin dez prés d'icelluy seigneur, et lesdis hommez venoient , aux aultres hommes mender qu'ilz veinssent pour fener icelluy foin, ce que faysoient, et aux autres commendoit qu'ilz le pourtassent, ce que aussi iceulx hommes faysoient et le pourtoient ez lieux où ledit seigneur ou sesdis officiers leur commendoient, avec leurs beufz et charroix, san nul debat ne contrediction, excepté que du debat que dessus.

Le 25^{ème} jour du mois de mars l'an mil quactre cens et cinquante¹⁹⁹ **Hug de Miechcaze** de ladicte parroisse de Cirang oudit dioucese de Saint Flour, eagé de quactre vintz ans, et de bonne memoire de sixante cinq et oultre, testmoign par la partie que dessus prouduyt, examiné et interrogé par vertu de son serement dit et deppouse comme s'ensuyt :

Et premierement sur le **tretxiesme article** dit et deppouse qu'il a veu pluseurs foys deppuys cinquante cinq ans et au tamps que vivoit noble et puysent seigneur Messire Jehan de Montault chivalier seigneur de Montault, et aussi deppuys le trespas d'icelluy feu Messire Jehan, et amprès le trespas d'icelluy feu Messire Jehan de Montault par le tamps de noble Amalry de Montault son filz, que lez hommez dez terres et seigneuries dudit feu Messire Jehan, c'est ascavoir dez chastelleniez de La Roquebraou, de Glenat ont pourté au lieu de La Roquebraou avec leurs beufz et charroix et autre bestail, à l'oustel d'icelluy seigneur, lez rentez qu'ilz luy devoient de blé, et illec lez mesuroyent san nul debat ne contrediction que onques il qui parle n'a sceu ne ouy dire que iceulx hommes y aient mis jus[ques] au tamps du debat dont est fecte mention esdictes lectres. Dit oultre qu'il a ouy dire que anciennement iceulx hommes l'avoient ainsi acoustumé affere. Dit oultre qu'il

Page 147 = folio 94 recto

a ouy dire que anciennement iceulx hommez l'avoient ainsi acoustumé à fere. Dit oultre qu'il ne scet se iceulx hommez le faysoient agreablement ou fourcéz, toutes foys il ne scet ne a onques ouy dire que lesdis seigneurs aient pour ce au commencement fourcé lesdis hommez.

Sur le quatorziesme article dit et deppouse qu'il a veu par l'espace de cinquante ans ou environ que lesdis hommes dudit feu Messire Jehan de Montault pourtoient et ont pourté avec leurs beufz et charroys en la ville dudit lieu de La Roquebraou, aucunes foys de quinze en quinze jours et autres foys de trois en troys semmaynez le boys pour le chauffaige d'iceulx seigneurs et service de leur houstel, et de ladicte ville lesdis seigneurs faysoient icelluy boys pourter au chastel audit lieu par aucuns autres leurs serviteurs, et ce a veu il qui parle par pluseurs foys et années dudit tamps sen nul debat ne contredicton comme dessus a dit.

Sur le quixiesme article dit et deppouse qu'il a veu par pluseurs années desdis cinquante ans, unne foys checun an, que lesdis hommes avec leurs beufz et charroys sunt alez querir aux vignoubles, et d'illec ont pourté en ladicte ville de La Roquebraou, et d'illec ledit seigneur par ses autres serviteurs faysoit pourter audit chastel tout le vin qui estoit besoig pour la provision dez seigneurs dudit lieu san nul debat ne contrediction excepté comme dessus, c'est ascavoir unne foys checun an, mais ne scet se ilz le faysoient fourcéz ou non.

¹⁹⁹ Le 25 mars, jour de l'Annonciation aussi appelée « incarnation du Seigneur » (il s'est fait chair dans le ventre de Marie), était le début de l'année, nous passons donc de 1449 à 1450 à cette époque, mais pour nous c'est l'année 1450 qui continue.

Sur le setxiesme article dit et deppouse qu'il a veu plusieurs et souventes foys que toutes et quantes foys ledit feu Messire Jehan de Montault envoioit querir ceulx que luy sembloit de ses hommes pour fere lez manevrez de courps et avec leurs beufz et charroix, ilz venoyent, mais ne scet se fourcéz ou de bon gré, pour lez negocez et affairez dudit seigneur, san nul debat ne contrediction excepté comme dessus.

Sur le dixeseptiesme article dit et deppouse qu'il a veu par l'espace de quarente ans que lez hommes dudit feu Messire Jehan de Montault ont payé communement checun an unne taille de tiel somme que bon a plu ausdis feu Messire Jehan et Amalry son filz, lesquelles taillez iceulx seigneurs leur ont indites, san nul debat ne contrediction excepté le debat que dessus, et aussi excepté que unne foys ma Dame de Montault impouza unne taille aux hommez dudit Amalry son filz, à laquelle payer iceulx hommez contredristrent, et ne scet que amprès fu fet de ladicte taille.

Bien est vray que amprès ladicte contrediction faicte à ladicte Dame Jehanne iceulx hommes ont payé plusieurs années et souvent taillez qui leur ont esté indites tant par ladicte Dame Jehanne que aussi par ledit Amalry san nul debat ne contrediction excepté que le debat dont dessus a dit.

Sur le dixhuytiesme article dit et deppouse qu'il a veu plusieurs foys et plusieurs années que lez hommes de ladicte terre dudit feu Messire Jehan et de son filz ont aulcuns fouché, lez autres fené, et lez autres pourté le foin avec leurs beufz et charroix san nulle contrediction excepté comme dessus.

Page 148 = folio 94 v

Le vinptesixiesme jour dudit moys de mars l'an que dessus de l'incarnation Notre Seigneur mil quactre cens et cinquante, **Beg d'Escures** dudit lieu de La Roquebraou, eagé de cinquante six ans, et de bonne memoire de quarente ans et oultre, testmoign par la partie que dessus prouduyt, examiné et interrogé, dit et deppouse par vertu de sondit serement comme s'ensuyt :

Et premierement sur le tretxiesme article dit et deppouse que par le tamps de la vie de feu Messire Jehan de Montault, ouquel tamps icelluy Messire Jehan demeuroit au chastel dudit lieu de La Roquebraou, il qui parle veist que Pierre de Calvaignac, de la parroisse de La Chapelle de Vieuxchamps, pourta unne année vint et quactre ans a passez et oultre, oudit lieu du blé de la rente qu'il devoit en ung charroy et avec ses beufz. Dit oultre qu'il a veu par l'espace de dix ou dotze ans passés, que lez hommes de la terre de noble et puysent Amalry de Montault seigneur de La Roquebraou ont pourté le blé de la rente qu'ilz devoient oudit seigneur avecques leurs beufz et charroix au chastel dudit lieu et en la place d'icelluy lieu jusques au tamps du debat dont est fecte mention esdictes lectres.

Sur le quactorxiesme article dit et deppouse qu'il a veu par l'espace de quinze ans ou environ que lez hommes de la terre dudit Amalry ont pourté le boys pour le chauffaige et service dudit seigneur et de son houstel avecques leurs beufz et charroix en la ville dudit lieu, et d'illec ledit seigneur à ses aultres serviteurs ledit boys a sondit chastel faysoit porter.

Sur le quixiesme article dit et deppouse qu'il a veu par l'espace desdis quinze ans passés au tamps de sa memoire que lesdis hommes sunt alez querir le vin au vignoble, et d'illec l'ont pourté en la place dudit lieu, d'out ledit seigneur le faysoit porter à ses autres serviteurs à sondit chastel, et dit que checun desdis hommes ne y aloient pas checun an unne foys, mais y aloient aucuns à unne année et lez autres que n'y avoient esté l'an par avant y aloient l'an en suyvant, et par ainsi checun an.

Sur le setxiesme article dit et deppouse qu'il a veu par lesdictes quinze ans que ledit Amalry a fait fere à ses hommes dedictes terres les manevres de cours avec leurs beufz et charroix ainsi que est contenu en l'article.

Sur le dixeseptiesme article dit et deppouse qu'il a ouy dire plusieurs foys trente et quactre ans a et oultre par le tamps que il qui parle demeuroit loué avec lez hommes de la terre dudit feu

Page 149 = folio 95 r

Messire Jehan de Montault, et ausdis hommes, que icelluy feu Messire Jehan de Montault avoit indit et impouyé taille à sez hommes de ses terres tant de Carbonieres que d'ailleurs, et ce a ouy dire il qui parle par troys années du tamps dudit feu Messire Jehan de Montault. Dit oultre qu'il a ouy dire publiquement que ledit Amalry deppuys qu'il a esté seigneur de sesdictes terrez il a impouyé et indit souventes foys et communement checun an unne taille à sesdis hommes, et ce a il qui parle veu par le tamps dudit Amalry et deppuys le trespas dudit feu Messire Jehan. A

esté interrogé par combien de tamps ledit Amalry a esté seigneur dez terrez esuelles il a succédé à sondit feu pere, dit que trente quactre ans ou environ. A esté interrogé se lesdis hommes à payer lesdictes taillez ont mis nul debat ne contrediction, dit qu'oyl, unne année que ma Dame de Montault mere dudit Amalry amprès le trespas dudit feu Messire Jehan indist unne taille aux hommes de sondit filz, et amprès lesdictes parties se acourdoient, mais ne scet autrement que fut fet. Dit oultre que deppuys ledit debat il qui parle a plusieurs et souventes foys et années ouy dire publiquement oudit lieu, et à pluseurs hommes de ladicte terre, que iceulx hommes ont payé oudit seigneur pluseurs taillez que leur ont esté indites deppuys ledit debat san nul autre debat ne contrediction excepté que dudit debat dont est fecte mention esdictes lectres.

Sur le dixhuytiesme article dit et deppouse qu'il a veu par toute sa vie que lez hommes dudit Amalry ont lez ungs fouché, lez autres fené le foin dez prés dudit seigneur, et lez autres pourté le foin avec leurs beufz et charroix comme est contenu en l'article.

Ledit jour audit lieu **Pierre du Brueil** dudit lieu, eagé de sixante deux ans, et de bonne memoire de cinquante ans ou environ, testmoign par la partie que dessus prouduyt, examiné et interrogé dit et deppouse par vertu de sondit serement comme s'ensuyt :

Et premierement sur le trexiesme article dit et deppouse qu'il a veu deppuys cinquante ans et au tamps que ung nompmé Guaspar de Montagut estoit baille de la baille de oultre la reviere de Cère pour feu Messire Jehan de Montault icelluy Guaspar aloit par lez villaiges de ladicte baillie et meysuroit lez rentes du blé que lez hommes devoient oudit feu seigneur, et amprès iceulx hommes lez pourtoient et ont pourtés lesdictes rentes de blé et autres en la place dudit lieu, et d'illec iceulx hommes pourtoient ledit blé au grenier d'icelluy seigneur, et dit oultre que aussi les autres hommes dudit Amalry qui lors estoient hommes dudit feu Messire Jehan de Montault pourtoient lesdictes rentes de blé audit grenier avec leurs beufz et charroix et autre bestail et dedens leurs sacs. Et dit oultre que aussi

Page 150 = folio 95 v

amprès ledit Guaspar semblablement lesdis hommes de ladicte terre dudit Amalry ont pourté le blé de ladicte rente oudit grenier comme dessus, et aussi audit lieu lez autres rentez qu'ilz devoient oudit seigneur. Bien est vray que lesdis hommes de oultre ladicte reviere deppuys le tamps dudit Guaspar ont maysuré lesdictes rentes de blé audit grenier, mais ne scet où lesdis autres hommes de par deça la reviere meysuroient ledit blé, se en leurs houstels ou audit grenier. Et en ce que a dit et depposé il qui parle n'a sceu ne ouy dire que au tamps passé ait esté mis nul debat ne contrediction excepté que du debat dont est fecte mantion esdictes lectres.

Sur le quactorxiesme article dit et deppouse qu'il a veu par l'espace de sa memoire que lez hommes dudit Amalry ont pourté avec leurs beufz et charroix tout le boys qui a esté besoign audit seigneur pour son chauffaige et service de son houstel c'est ascavoir ceulx qui sunt de part dessa ladicte reviere de Cère oudit chastel, et ceulx qui sunt de part delà icelle reviere en la place dudit lieu, et d'illec ceulx desdis hommes qui avoient pourté ledit boys prenoient checun son fart d'icelluy boys et le pourtoient à leurs epaules audit chastel où lez serviteurs dudit seigneur donnoient à iceulx hommes du pain pour manger, et puy iceulx hommes s'en retournoient, et ledit seigneur faysoit porter ledit boys à sondit chastel par ses autres serviteurs. Et est recours que ung desdis hommez nompmé Mourelh donna aucun prouffit à aucuns dez serviteurs dudit seigneur ; et par ainsi, ce moyennent, ledit Mourelh ne pourta ledit boys hors quactre foys checun an, mais dit que ledit seigneur ne scavet rien dudit prouffit. Sans ce que aucunement il qui parle ait sceu ne ouy dire que à ce fere lesdis homms aient mis nul debat ne contrediction excepté que dudit debat, combien que aucuns d'iceulx hommes se rancuroient entre eulx, disans qu'ilz pourtoient trop souvent ledit boys. A esté interrogé combien souvent iceulx hommes pourtoient ledit boys, dit que ledit seigneur par aucun de ses serviteurs faysoit commender ausdis hommes qu'ilz pourtassent ledit boys, et par ainsi toutes quantes foys à iceulx hommes estoit commendé de porter ledit boys ilz le pourtoient comme dessus a dit. Et s'ilz ne le pourtoient au terme que ledit serviteur leur commendoit, le pourtoient à ung autre terme.

Sur le quixiesme article dit et deppouse que par le tamps dudit feu Messire Jehan de Montault, et deppuys continuellement jusques au tamps du present debat encoumamcé, que toux lez hommez desdictes terres de

Montault , toutes quantes foys leur estoit commendé aler querir le vin pour la provision dez houstelx et dez seigneurs de ladicté

Page 151 = folio 96 r

terre ilz le aloient querir avec leurs beufz et charroix, et vennoient querir iceulx hommes à l'oustel dudit seigneur lez pipes et cueves pour mectre ledit vin à l'oustel dudit seigneur, et lez officiers dudit seigneur bailloyent ausdis hommes du pain et de la cher pour fere leurs despens au chemin, et d'illec iceulx hommes lesdictes pipes et cueves vuydes pouroient avec leursdis beufz et charoix au vignoble où estoit achapté ledit vin , et amprès lez en retournoient pleynes de vin ausdis houstelx, et aucunes foys ailleurs là où il playsoit aux officiers desdis seigneurs.

Sur le setxiesme article dit et deppouse qu'il a veu par le tamps de sa memoire sans nul debat ne contrediction jusques au tamps dudit debat que lesdis hommes, c'est ascavoir aucuns d'eux ont fouché, lez autres fené le foin dez prés où ledit seigneur faysoit ses foyns, et les autres le pourtoient et ont pourté chacun an avec leurs beufz et charroix là où commendé leur estoit par aucuns dez officiers dudit seigneur.

Sur le dixesepiesme article dit et deppouse qu'il a veu deppuys quarente ans et ou tamps dudit feu Messire Jehan de Montault que icelluy feu Messire Jehan indisoit impousoit et a indit et impoué communement checun an une taille sur ses hommes qui n'estoient expressement affranchiz, la quelle leur a fecte payer , et iceulx hommes la payoent et ont payée par ledit tamps, tant ceulx de Cabonieres que lez aultres san nul debat ne contrediction, et deppuys le trespas dudit feu Messire Jehan, ma Dame Jehanne de Montault, mere de noble et puysse seigneur Amalry de Montault son filz et dudit feu Messire Jehan indist et impoua pluseurs foys et toutes quantes foys bon leur sembloit pluseurs tailles sur lez hommes dudit Amalry, lesquelles tailles iceulx hommez ont payées et payoent san nul debat ne contrediction jusques oudit debat, excepté icelluy debat, et aussi excepté que une foys ladicté Dame impoua et indist une taille sur lez homme de sondit filz, laquelle estoit de trop grande somme, et pour ce lesdis hommes contredirstrent de la payer, et amprès ledit debat fut accordé que icelle taille fut diminuée et appetissée, et moyennent la dicte diminution et appetissement iceulx hommes par ledit accord furent contens de payer ladicté taille ainsi diminuée et la payerent . Dit oultre qu'il a ouy dire à pluseurs hommes anciens dudit feu Messire Jehan de Montault que lez hommes dudit feu Messire Jehan de Montault estoient taillables à leurdit seigneur. Dit oultre qu'il a ouy dire aussi pluseurs foys que lesdis hommes estoient taillables comme a dit à pluseurs hommes, et le disoit hom publiquement. Neantmoyns aussi dit et deppouse qu'il a ouy dire pluseurs foys quant aucuns hommes dudit feu Messire Jehan de Montault avoient pris et investues aucunes bories ou villaigez dudit seigneur iceulx hommes et lez autres disoyent que lesdis villaiges estoient taillables.

Sur le dixhuytiesme article se reppourte à ce que dessus a dit et deppoué

Page 152 = folio 96 v

Ledit jour Messire Martin Girbert prestre de la parroisse de Camps ou diocese de Tuelle, eagé de septante troys ans et oultre et de memoire bonne de sixante ans ou environ, testmoign par la partie que dessus prouduyt, examiné et interrogé par vertu de sondit serement, dit et deppouse comme s'ensuyt :

Et premièrement sur lez premier second troysiesme quactriesme cinquiesme sixiesme septiesme et huytiesme articles dit et deppouse qu'il a veu par le tamps de feu Messire Jehan de Montault chivalier seigneur de Montault que lez terres et seigneuries de Montault appertenoient toutes oudit feu Messire Jehan, c'est ascavoir lez baronnies chasteaulx et chastellenies de La Roquebraou, de Carbonieres, qui sont anciennes baronnies, et aussi lez chasteaulx et chastellenies de Glénat, de Poul, de Vieulx Champs, de Saint Victeur, et leurs appertenances et deppendences, et en estoit seigneur seul et par le tout. Lesquelles seigneuries sont et ont esté toutes de la terre et seigneurie de Montault. A cause desquelles baronnies et seigneuries oudit seigneur Messire Jehan de Montault appertenoient et il avoit pluseurs vassaulx hommez et subgietz tenens de luy et de cesdictes baronnies et seigneuries, lesquels vassaulx sunt et estoient tenuz et luy doyvent fere hommaigez, seremens et autres drois de fiefz à cause dez fieufz nobles et aultres qu'ilz tenoyent de luy et de sesdictes baronnies chastellenies et seigneuries, et lesdis hommes aultres et subgietz luy estoient tenus en pluseurs cens, rentes de blé, d'argent, de gelines, de moctons et autres drois et devoirs à cause dez villaiges et bourderies qu'ilz tenoient de luy et de sesdictes seigneuries, lequel seigneur par le

tamps qu'il vivoit avoit et luy appartenoit toute justice et juridiction en sesdictes terres. Dit oultre que amprès le trespas dudit feu Messire Jehan luy succedèrent en sesdictes terres c'est ascavoir : Amalry de Montault son filz ez baronnie de La Roquebraou où il a fourt et beau chasteau et aussi ez chasteaux et chastellenies de Poul, de Glénat, de Saint Victeur, et leur appartences et deppendences, lesquelles baronnie et chastellenies ledit Amalry tient et posse[de] comme siennes ; et feu noble Jehan de Montault filz dudit Messire Jehan succede à sondit feu pere amprès son trespas ez baronnie de Carbonnieres et chastellenie de Vieulxchamps et leurs appartences, lesquelles par le tamps qu'il visquit amprès le trespas de sondit feu père avec leur appartences et deppendences il tint et possede comme siennes ; au quel feu Jehan de Montault amprès son trespas [a succédé] noble Guillaume de Montault son filz ez baronnie de Carbonnières où il a beau chasteau et fourte place, et en la chastellenie de Vieulxchamps, et leurs appartences. Et par ainsi ledit Amalry baylif dez montaignes et Guillaume de Montault son nepveu ont succédé oudit feu Messire Jehan de Montault en sesdictes terres et seigneuries de Montault, ausquelx sont deus et appertienent et lesquieulx aussi tennent et possident toux et checuns lez droys et devoirs desdictes terres qui estoient deus oudit feu Messire Jehan de Montault, c'est ascavoir à checun d'eux pour telle portion qu'ilz luy succedent. Et ce a veu luy qui parle par le tamps de sadicte memoire tenir et observer, et aussi se dit publiquement en toute ladicte terre de Montault.

Sur le noviesme article dit et deppouse qu'il a demeuré audit lieu

Page 153 = folio 97 r

de La Roquebraou avec ledit feu Messire Jehan par l'espace de dotze ans ou environ continuellement, et veoyt et a veu il qui parle par ledit tamps que lesdis hommes habitans de la chastellenie et baronnie de La Roquebraou faysoient le guet audit lieu de La Roquebraou, et ceux qui ressourtissent dela chastellenie de Glenat l'ont fait à Glenat, et ceulx de la chastellenie de Saint Victeur et baillie du Quier l'ont fait à Saint Victeur par ledit tamps, selon l'ordenance du seigneur ou de ses cappitaines desdictes places, ou s'ilz ne le faysoient ceulx qui ne le faysoient donnoient aucun prouffit audit seigneur dont ils estoient d'accord avec luy. Dit oultre qu'il a ouy dire à plusieurs gens anciennes que lesdis hommez et habitans de ladicte seigneurie ont fet ledit guet anciennement et d'ancienneté comme dessusdit est dit, san ce que il qui parle y ait veu ne sceu ne ouy dire que à ce fere lesdis hommes aient mis nul debat ne contrediction, excepté que deppuys n'a guieres que lesdis homme ont appellé.

Sur lez dixiesme, onziesme et doutziesme articles dit et deppouse qu'il a veu par ledit tamps qu'il a demeuré avec ledit feu Messire Jehan de Montault lesdis hommez des terres et seigneuries d'icelluy feu Messire Jehan payoent lez rentes qu'ilz doyvent oudit seigneur en argent c'est ascavoir à fourte monoye, de vinpt deux soulx six deniers pour ung escu d'or du pois de trois deniers. Dit oultre qu'il scet que par le tamps de la fourte monoye avoit cours la pluspart dez villaigez de ladicte terre dudit feu Messire Jehan de Montault et de ses seigneuries estoient vestuz, et lez tenoient leurs tenenciers qui lez tennent au jour d'uy, ilz ou leurs predecesseurs.

Sur le quatorziesme article dit et deppouse qu'il a veu par le tamps dessusdit qu'il demuroit ou lieu de La Roquebraou par le tamps dudit feu Messire Jehan de Montault que lez hommez dez terrez dudit feu seigneur luy pourtoient toutes quantes foys ledit seigneur le leur faysoit commender par ung sien sergen en la place dudit lieu de La Roquebraou, et d'illec lez autres serviteurs dudit seigneur le pourtoient oudit chastel, le boys que ledit seigneur despendoit pour son chauffaige et service de son houstel. Dit oultre que quant ledit feu Messire Jehan vivoit et demuroit audit lieu de La Roquebraou le cappitaine dudit seigneur qui demuroit oudit chastel de Carbonnieres aussi faysoit pourter aux hommes de ladicte seigneurie de Carbonnieres le boys audit chastel pour le chauffaige et service dudit cappitaine de Carbonnieres. Et pour ce le scet qar il l'a veu plusieurs foys par ledit tamps et a ouy dire publiquement ausdis hommes et autres que amprès le trespas dudit feu Messire Jehan de Montault et aussi par l'autre tamps d'icelluy feu Messire Jehan qu'il qui parle le²⁰⁰ demuroit avec luy lesdis hommes ont pourté et pourtoient pareillement ledit boys oudit seigneur et à ses successeurs comme dessus a dit qu'il l'avoit veu. Dit oultre qu'il a ouy dire à plusieurs hommes anciens desdictes terres et seigneuries dudit feu Messire Jehan de Montault que ainsi l'avoient anciennement acoustumé

Page 154 = folio 97 v

²⁰⁰ Le notaire a mal entendu ? on verrait plutôt ici « ne » que « le »

fere lesdis hommes, c'est ascavoir pourter ledit boys comme dessus a dit et deppousé, et onques il qui parle n'a sceu ne ouy dire le contraire excepté que dudit debat.

Sur le quinziesme article dit et deppouse qu'il a veu, par ledit tamps qu'il a demeuré avec ledit feu Messire Jehan, lesdis hommes de la chastellenie de La Roquebraou et autres dudit seigneur et de ses seigneuries de Carbonieres et autres sunt alés toutes quantes fois ledit Messire Jehan de Montault vouloit, avecques leurs beufz et charroix, au vignoble pour querir et pourter, et ont pourté le vin que audit seigneur estoit neccessere pour la provision et despance de son houstel de La Roquebraou, et il qui parle a achapté pluseurs années ledit vin pour ledit seigneur. Et dit qu'il a ouy dire publiquement ausdis hommes desdictes terrez que ainsi l'ont fet par le tamps autre amprès ledit feu Messire Jehan que il qui parle ne demouroit avec luy, c'est ascavoir pourter ledit vin, et aussi il qui parle l'a veu pluseurs foys. Dit oultre que pareillement a ouy dire ausdis hommes et autres, et aussi l'a il qui parle veu pluseurs foys, que amprès le trespas dudit feu Messire Jehan l'ont fet et pourté pareillement ledit vin aux successeurs dudit feu Messire Jehan, c'est ascavoir lez hommes dudit Amalry et dez terres et seigneuries esquellez il a succédé à sondit feu pere ont pourté ledit vin audit chastel de La Roquebraou. Et dit oultre qu'il n'a sceu ne ouy dire le contraire de ce que a dessus dit et deppousé, excepté que au tamps dudit debat.

Sur le setxiesme article dit et deppouse qu'il a veu par l'espace dudit tamps qu'il a demeuré avec ledit feu Messire Jehan de Montault que toux ses hommes de sesdictes seigneuries ont fait et faysoient lez manevres services et exploix dont est fecte mention oudit article. Dit oultre que aussi a ouy dire ausdis hommes et à pluseurs autres que iceulx hommes l'avoient fait pareillement avant ledit tamps de sa demeure dudit testmoign oudit feu Messire Jehan et à sesdis successeurs. Dit oultre qu'il n'a sceu ne ouy dire le contraire que ait esté fait autrement au tamps passé jusques au tamps dudit appel.

Sur le setxiesme (erreur : 17^{ème}) article dit et deppouse qu'il a veu par le tamps de la vie dudit feu Messire Jehan de Montault # (*renvoi en bas de page* : et dont il qui parle est recours, d'icelluy feu Messire Jehan de Montault), ledit feu Messire Jehan indisoit et impousoit et a indit et impousé pluseurs et souventez foys taillez de tieulx sommez que bon luy sembloit et luy a semblé sur toux ses hommes de toutes ses terres et seigneuries, tant de La Roquebraou que de Glenat, de Poul et de Saint Victeur, et de leurs appertenances, et aussi de ladicte seigneurie de Carbonières, et il qui parle a levé sept ou huit taillez desdis hommes pour ledit seigneur, que icelluy seigneur avoit fectes à sesdis hommes de sadicte seigneurie de Carbonières, durand le tamps desdis onze ou douze ans qu'il a demeuré avec ledit feu Messire Jehan. Dit oultre que il qui parle n'a sceu ne ouy dire le contraire de ce que a dit et deppousé jusques au tamps dudit appel.

Sur le dixhuytiesme article dit et deppouse qu'il a veu par le tamps

Page 155 = folio 98 r

desdis douze ans ou environ que ledit qui parle a demeuré avec feu Messire Jehan de Montault que toutes quantes foys ledit seigneur mandoit ses hommes qu'ils venissent foucher ou fener ou pourter le foin dont est fecte mention en l'article, au tamps de la sayson de ce fere, ilz l'ont fait et le faysoient. Et a ouy dire ausdis hommes et autres que pareillement l'ont fait iceulx hommes aus successeurs dudit feu Messire Jehan amprès son trespas san nulle contrediction ne debat, excepté que dudit appel, et aussi que iceulx hommes disoyent que lesdis seigneurs lez avoient en ce gieriz. (*retour sur les articles précédents* :) A esté interrogé se toux lez hommes communement dudit feu Messire Jehan ont fet lesdis exploix services et manevres que dessus et se ont payé lez taillez ainsi que dessus a dit sans excepter nulluy desdis hommes, dit que toux lesdis hommes sans excepter nulz ont fet de guet ez chasteaux dudit seigneur et autres lieux où lez avoient et ont acoustumé fere, excepté lesdis hommes de Camps que le faysoient en ladicte esglise de Camps, et aussi ne scet que lez hommez de la chastellenie de Vieulx Champs aient fet ledit guait oudit lieu de Carbonières, ne aussi n'a veu que iceulx hommes de Vieulxchamps aient fet aucunement lesdis services et exploix et payées lesdictes taillez, combien qu'il panse et croit que iceulx hommes de Vieulxchamps soient aussi taillables et exploictables à leur seigneur comme lez autres, mais toux lez autres hommez desdictes terres qui n'estoient expressement affranchiz faysoient et ont fait comme a dit et deppousé lesdis exploix, services et manevres, et payé lesdictes taillez à volenté, et aussi lez autres hommez affranchiz en certains cas de payer lesdictes taillez lez ont payées quant elles ont esté fectes et indites, en aucuns des cas qu'ilz demeuoyent taillables, selon lez teneurs de leurs affranchimens. Mais autrement il ne scet que lesdis expressement affranchiz aient fet lez

maneuvez exploix services, hors dudit guait, ne payés lesdictes taillez. Et par ce que a dit maintenant veult estre entendue toute sadicte presente deposition en parlant desdis hommes quar ainsi pareillement l'entent il qui parle selon que a dit et deppousé.

Ledit jour discrepte personne Maistre Jehan de Philippe alis du Blé notayre de La Roquebraou ou dioucese de Saint Flour, eagé de cinquante huyt ans ou enviton, et de memoire de quarente ou environ, testmogne par la partie que dessus prouduyt, examiné et interrogé par vertu de son serement ; dit et deppouse comme s'ensuyt :

Et premierement sur le premier article dit et deppouse que le contenu d'icelluy est vray, et pour ce le dit quar il a veu lez lectres du partiatge d'iceulx seigneurs et autres sez tiltres, et oultre dit que luy appertient la terre de Saint Julien du Boy.

Page 156 = folio 98 v

Sur le second article dit et deppouse que le contenu d'icelluy est vray, et pour ce le dit quar il a veu tousiours que iceulx seigneurs le possedoyent comme leurs, et oultre dit qu'il a veu lez titres, et lez a devers luy, la pluspart tant en grosse²⁰¹ que an minute²⁰², et neantmoins dit qu'il a lez notes²⁰³ de quactre noteres, et pour ce dit qu'il le scet.

Sur le tretziesme (3^{ème}) article, dit qu'il est vray, et pour ce le dit qu'il l'a veu.

Sur le quactriesme article, dit et deppouse que le contenu d'icelluy est vray. A esté interrogé comment le scet, il dit que pour ce qu'il a lez tiltres dez notayres aultres.

Sur le cinquiesme article dit et deppouse estre vray. A esté interrogé pour quoy le scet, il dit que pour ce qu'il a receu lez recognoissances d'iceulx vassauls et lez hommaigez, et oultre dit qu'il a lez notez desdis hommaigez anciens, et oultre dit qu'il y a bien six vinpt hommaigez.

Sur le sixiesme article dit et deppouse qu'il est vray.

Sur le septiesme article dit et deppouse qu'il est vray.

Sur le huytiesme article dit et deppouse qu'il a veu paier beaucoup de servitus, et oultre dit qu'il s'en reppourte à ce qu'il a dit dessus.

Sur le noviesme article dit et deppouse que tout le tamps de sa memoire il a veu fere le guet en lesdictes places, et ou demeurent s'en reppourte à ce que a dit dessus.

Sur le dixiesme article dit qu'il a veu que lesdis seigneurs leur faysoient payer ung escu d'or pour vinpt soulx senon tant seulement deppuys la appellation, et oultre dit qu'il levoit toute sa rente à fourte monoye. Ou demeurent se reppourte à ce qu'il a dit dessus.

Sur le onxiesme article dit qu'il est vray.

Sur le quactorziesme (12^{ème}) article dit et deppouse que tout est en droit script, et du tout en tout s'en gouverne pour droit script. A esté interrogé pour quoy le scet, dit que pour ce qu'il a esté notere ordinaire de la terre des susdis seigneurs de Montault.

Sur le tretziesme article dit et deppouse qu'il est vray. A esté interrogé comment le scet, il dit que pour ce qu'il a esté noury alentour dudit chastel de La Roquebraou.

Sur le quactorxiesme article dit et deppouse qu'il est vray, et pour ce l'a dit que tout le tamps de sa memoire lez hommez pourtoient tout le boys qui estoit necessere audit chastel, mais ne scet se le devoient fere.

Sur le quinxiesme article dit et deppouse que le contenu d'icelluy est vray, et pour ce le scet quar il a veu que payssiblement et quietement il lez a veus toux eux aler querir le vin qui estoit necessere oudit houstel, mais ne scet se la devoient fere ou non.

Sur le seixiesme article dit et deppouse qu'il est vray, et pour ce le dit pour ce que tout le tamps de sa memoire luy faysoient lez manoeuvres. Et oultre dit que quant lez hommez ne venoyent le seigneur lez envoyoit executer.

Page 157 = folio 99 r

²⁰¹ Grosse, copie d'un acte délivrée à une des parties

²⁰² Minute, acte authentique conservé par le notaire

²⁰³ Notes, actes reçus par les notaires (origine du mot notaire).

Sur le dixeseptiesme article dit et deppouse qu'il est vray, et pour ce l'a dit quar au tamps de Messire Jehan de Montault il a veu que il leur impousait excessivement chacun an unne taille, et oultre dit qu'il a veu executer son pere de unne jument pour le fet de la taille. Dit que pour ce luy en souvient quar l'en ne pouvoit à grand payne prendre la jument, icelluy recevoir²⁰⁴ d'icelle taille la print bien, ou ceulx qui estoient avecques luy. Et deppuys aussi leurs predecesseurs²⁰⁵ ont acoustumé aussi pareillement à impouser checun an, ou la pluspart d'eux, et ledit qui parle disoit oudit Mosseigneur qu'il lez tailloyt trop excessivement, et s'en contendoit barbe par barbe.

Sur le dixhuytiesme article dit et deppouse estre vray. A esté interrogé comment le scet, il dit que pour ce que tout le tamps de sa memoire il a veu que quant ledit seigneur lez mandoit ilz venoient incontinent foucher et pourter le foin là où bon sembloit au seigneur.

(renvoi en bas de page :) **Sur le dixenoviesme article** dit qu'il s'en reppourte à ce qu'il a dit dessus.

Sur le vintpiesme article dit et deppouse qu'il a veu que lez hommez de la terre dez vassaulx dudit seigneur sont taillables à volenté, excepté ceux qu'ilz ont affranchi. A esté interrogé comment le scet, dit que pour lez notez antiques qu'il a d'iceulx vassaulx. Et oultre dit il qui parle qu'il a bien cinq pagès ou hommez qui sont taillables et exploictables à volenté, que lez tient dudit hostel de Montault.

Sur le vintedeuxiesme article dit que lez habitans de La Roquebraou furent affranchis bien a huyt vintz ans²⁰⁶. A esté interrogé comment le scet, dit que pour ce qu'il a veu lez franchises, et oultre dit que toux lez habitans s'en aloient qui ne lez eust affranchiz.

Sur le vintetroysiesme article dit et deppouse qu'il s'en reppourte à ce qu'il a dit dessus.

Sur le vintequactriesme article dit qu'il est vray, et oultre dit il qui parle que ainsi le trouve il par lez lectres qu'il a dez vassaulx.

Sur le vintecinquiesme article dit et deppouse qu'il s'en reppourte à ce qu'il a dit dessus.

Sur le vintesi[x]iesme article dit et deppouse qu'il est vray, et pour ce le dist il quar il, ou Maistre Jehan de Brege, ont receu la plus part dez recognoissances de toutes lesdictes terres, et de ce reppourte à lez notez qu'il a.

Sur le vinteseptiesme article dit et deppouse qu'il est vray, et pour ce le dit quar ainsi l'a veu user tout le tamps de sa memoire.

Sur lez vintphuytiesme et vintenoviesme articlez dit et deppouse qu'ilz sont vrayz, et pour ce le dit quar il a veu ainsi user tout le tamps de sa memoire.

Sur lez trente, trenteungiesme, trentedeuxiesme et trente troysiesme articles se reppourte à ce qu'il a dit et deppoué. Et ainsi comme dessus a dit et deppoué ledit testmoing comme estoit contenu en sa deposition par luy bayllée en script et par luy ordonnée.

Page 158 = folio 99 v

Le jour que dessus **Messire Michel Fabre recteur de Bassignac près de Derezac**²⁰⁷ ou dioucese de Tuelle, eagé de cinquante huyt ans ou environ et de bonne memoire de cinquante ou environ, testmoing par la partie que dessus prouduyt, examiné et interrogé, dit et deppouse par vertu de son serment si comme s'ensuyt :

Et premièrement sur lez premier second troysiesme quactriesme cinquiesme sixiesme septiesme et huytiesme articles dit et deppouse qu'il a veu par le tamps de feu Messire Jehan de Montault chivalier seigneur de Montault que lez terres et seigneuries de Montault appertenoient toutes oudit feu Messire Jehan, c'est ascavoir lez baronnies de La Roquebraou, de Carbonieres, qui sont anciennes baronnies, et aussi lez chasteaulx et chastellenies de Glénat, de Poul, de Vieulx Champs, de Saint Victeur, et leurs appertenances, et en estoit seigneur seul et par le tout. Lesquelles seigneuries sont et ont esté toutes de la terre et seigneurie de Montault. A cause desquelles seigneuries et baronnies oudit seigneur Messire Jehan de Montault appertenoient et il avoit pluseurs vassaulx hommez et subgietz tenens de luy et de cesdictes baronnies et seigneuries, lesquelx vassaulx sont et estoient tenuz et luy

²⁰⁴ Rappel : « recevoir » a le sens de « receveur »

²⁰⁵ Erreur sans doute, il s'agit des successeurs

²⁰⁶ $8 \times 20 = 160$ ans ; nous sommes en 1450, cela porte avant 1290, il s'agit donc de la charte de 1282

²⁰⁷ Bassignac-le-Haut, près de Darzac, au Nord de Saint Privat, au bord de la Dordogne, en Xaintrie Corrèzienne

devoient fere hommaigez, seremens et autres drois de fieufz à cause dez fieufz nobles et aultres qu'ilz tenoyent de luy et de cesdictes baronnies chastellenies et seigneuries, et lesdis autres ses hommes et subgietz luy estoient tenus en pluseurs cens, rentes de blé, d'argent, de gelinez, de moctons et autres drois et devoirs à cause dez villaiges et bourderies qu'ilz tenoient dudit seigneur et de cesdictes seigneuries, lequel seigneur par le tamps qu'il vivoit avoit et luy appartenoit toute justice et juridiction en sesdictes terres. Dit oultre que amprès le trespas dudit feu Messire Jehan luy succedèrent en cesdictes terres c'est ascavoir : Amalry de Montault son filz ez baronnie de La Roquebraou où il a fourt et beau chasteau, et aussi ez chas tellenies et chasteaux de Poul, de Glénat, de Saint Victeur, et leurs appartences et deppendences, lesquelles baronnie et chastellenies ledit Amalry tient et posse[de] comme siennes ; et feu noble Jehan de Montault filz dudit Messire Jehan succede à sondit feu pere amprès son trespas ez baronnie de Carbonnieres et chastellenie de Vieux Champs et leurs appartences, lesquelles par le tamps qu'il visquit amprès le trespas de sondit feu père avec leurs appartences et deppendences il tint et possede comme siennes ; au quel feu Jehan de Montault a succédé amprès son trespas noble Guillaume de Montault son filz ez baronnie de Carbonnières où il a beau chasteau et fourte place, et en la chastellenie de Vieulxchamps, et leurs appartences. Et par ainsi lesdis Amalry de Montault baylif dez montaignes et Guillaume de Montault son nepveu ont succédé oudit feu Messire Jehan de Montault en sesdictes terres et seigneuries de Montault, ausquelx sont deus et appartienent et lesquelx aussi tennent et possedent toux et checuns lez drois et devoirs desdictes terres qui estoient deus oudit feu Messire Jehan seigneur de Montault, c'est ascavoir à checun d'eux par telle portion qu'ilz luy succedent. Et ce a veu par le tamps de sadicte memoire, luy qui parle, tenir et observer, et aussi se dit publiquement en toute ladicte terre de Montault.

Page 159 = folio 100 r

Sur le noviesme article dit et deppouse qu'il est recors du tamps dudit feu Messire Jehan de Montault et dudit Amalry son filz, par lequiel tamps et par sa memoire il qui parle a veu que lez hommes de la chastellenie de Saint Victeur, appartenant audit Amalry, qui est un dez membres de ladicte terre de Montault, ont fet le guet oudit chastel de Saint Victeur toutes quantes foyz le cappitayne d'icelluy chastel leur on commendoit ou quant ilz ne faysoient ledit guet donnoient aucun prouffit audit cappitayne pour ledit guet.

Sur le tretxiesme article dit et deppouse qu'il a esté recevoir dez rentez desdictes terres par le tamps que feu Jehan de Montault demuroit au lieu de La Roquebraou par l'espace de quactre ans amprès le deccès de sondit feu pere, par lequiel tamps lez hommes habitans desdictes chastellenies et seigneuries de La Roquebraou, de Carbonnières, de Poul, de Glenat et de Saint Victeur pourtoient oudit lieu de La Roquebraou avec leurs beufz et charroix et leur autre bestail lez rentes de blé et autres qu'ilz devoient checun an san nulle contrediction. Dit oultre que aussi amprès ledit feu Jehan de Montault il qui parle a demeuré recevoir audit hostel de La Roquebraou desdictes rentes par l'espace de dix ans, par lequiel tamps il qui parle a veu que lez hommez desdictes terres dudit Amalry on pourté checun an oudit lieu de La Roquebraou avec leurs bestail comme dessus a dit lez rentez qu'ilz devoient oudit seigneur san nul debat ne contrediction. Dit aussi que par le tamps que ung nompmé Guaspar de Montagut estoit baille de la baillie de Cirang par ledit feu Jehan, luy qui parle estoit recevoir comme dessus a dit, icelluy Guaspar pourta audit grenier comme dessus a dit à ses despens du blé de ladicte rente, et pour ce quar icelluy Guaspar avoit prins dez hommez qui devoient ladicte rente lez droix que lez baillez prenoient sur ses hommes pour fere pourter ledit blé, lesquelx droys quant iceulx baillez lez prenoient faysoient pourter ledit blé à leurs despens. Mais toutes foyz il qui parle a veu par avant qu'il feust recevoir comme dessus, et du tamps dudit feu Messire Jehan de Montault, par l'espace de sept ans, que ledit Guaspar faysoit pourter oudit granier et ausdis hommes lesdictes rentes, mais c'estoyt aux despens desdis hommes ou dudit Guaspar, dit qu'il n'en scet rien. Dit oultre que amprès le deccès dudit Guaspar, et amprès aussi que ledit feu Jehan de Montault s'en ala du lieu de La Roquebraou pour demeurer à son chastel de Carbonnières, il qui parle a veu que lesdis hommes dudit Amalry ont pourté lesdictes rentez comme dessus a dit, et il qui parle le leur a commendé pluseurs foyz sans ce que lesdis hommes aient mis à ce fere nul debat ne contrediction, excepté que du debat dont est fecte mention esdictes lectres. Dit oultre qu'il a ouy dire à feu Pierre de Ventach bayle de Carbonnières, et il qui parle aussi a veu pluseurs foyz que lez hommes de la seigneurie et chastellenie de Carbonnières dudit feu Jehan de Montault ont pourté le blé desdictes rentes comme dessus oudit lieu

de Carbonières avec leurs beufz et charroix et autre bestail sans ce que il qui parle n'ayt sceu que lesdis hommes y aient mis nul debat ne contrediction excepté que dudit appel.

Sur le quatorxiesme article dit et deppouse que il qui parle a veu par l'espace

Page 160 = folio 100 v

de huyt ans continuellement, c'est ascavoir aucunes foys deux foys la semmayne, lez autres foys checune semmayne unne foys, et lez autres foys plus, que lez hommes dudit feu Messire Jehan non expressement affranchiz ont pourté ainsi que dessus a dit en ung houstel de la ville de La Roquebraou le boys neccessere au chauffaige du seigneur dudit lieu et service de son houstel, et d'illec deux hommes qui estoient à ce depputés et qui demeuroient oudit chastel avec ledit seigneur le montoyent en icelluy chastel. Dit oultre que amprès le deccès dudit feu Messire Jehan, par le tamps que ledit feu Jehan son filz demeura oudit lieu de La Roquebraou par l'espace de quactre ans, il qui parle a veu que aussi semblablement lesdis hommes dudit feu Messire Jehan ont pourté avec leurs beufz et charroys ledit boys oudit chastel, et est recours que par icelluy tamps dudit feu Jehan il qui parle a fait pourter pluseurs foys ledit boys pour ledit chauffaige audit lieu de La Roquebraou aux hommez de la chastellenie de Carbonières. Dit oultre que amprès le deppartement dudit feu Jehan que fut depparti du lieu de La Roquebraou pour aler demeurer oudit lieu de Carbonières, il qui parle a veu que lesdis hommes dudit Amalry semblablement ont pourté ledit boys oudit lieu de La Roquebraou, c'est ascavoir ceulx qui n'estoient expressement affranchiz, san nul debat ne contrediction, excepté que deppuys le debat dudit appel.

Sur le quixiesme article dit et deppouse qu'il a veu par l'espace de six ou sept ans, ou tamps que ledit feu Messire Jehan de Montault vivoit, que lez hommez dudit feu Messire Jehan, tant de ses terres et seigneuries de Carbonières et dez parroisses de Saint Santin, de Cirang, de Saint Girons et de Saint Victeur, et autres hommes d'icelluy seigneur qui n'estoient *de ce* expressement affranchiz aloient et sunt aléz checun an avec leurs beufz et charroix pour querir le vin au vignoble qui estoit neccessere pour la despance dudit seigneur, et d'illec le pourtoient et l'ont pourté jusques à la place dudit lieu de La Roquebraou san nul debat ne contrediction jusques audit appel. A esté interrogé se checun desdis hommes pourtoient le vin checun an comme dit est, dit que aucunes foys le seigneur achaptoit du vin habundance, et selon l'abundance dudit vin et qu'il estoit bessoing y avoir beufz et charroix et hommes pour le pourter icelluy seigneur faysoit pourter à ses hommes, que nul n'y contredisoit tant toux lesdis hommes non affranchiz au tamps dudit feu Messire Jehan que amprès et deppuys son deccès à sesdis successeurs, c'est ascavoir lesdis homme dudit Amalry à icelluy Amalry et à son chastel de La Roquebraou, et lesdis hommes dudit Jehan de Montault et de sa seigneurie de Carbonières à icelluy leur seigneur et à sondit chastel de Carbonières.

Sur le setxiesme article dit et deppouse qu'il a veu par l'espace de quarente ans que lez hommes dez terres dudit Amalry ont fet lez manevres, exploix et services de cours, avec leurs beufz et charroix

Page 161 = folio 101 r

pour lez negoces et affaires de leur seigneur toutes quante foys demendé leur a esté faire, ce que il qui parle onques n'a sceu ne ouy dire le contraire jusques oudit debat.

Sur le dixeseptiesme article dit et deppouse qu'il a veu par le tamps de sa memoire du quiel il est recours, du tamps dudit feu Messire Jehan de Montault, que icelluy Messire Jehan impousoit et indisoit checun desdis ans sur sesdis hommes de sesdictes terres non expressement affranchiz taillez de tielx sommez que bon luy sembloit, lesquelles il feis payer à iceulx ses hommes, san nulle contrediction ne debat que il qui parle n'a sceu ne ouy dire que iceulx hommes y aient mis par ledit tamps. Dit oultre que deppuys le deccès dudit feu Messire Jehan de Montault il qui parle a veu continuellement que lez hommes dudit Amalry luy ont payé, ou à ma Dame de Montault sa mere, toutes les tailles que leur ont indites et impouées dez sommez que bon leur a semblé, desquelles il a veu indire et impouser sur iceulx hommez souvent, c'est ascavoir unne foys checun an, et autres foys de deux en deux ans selon que ausdis seigneurs et dame bon a semblé lez indire et impouser san nul debat ne contrediction que iceulx hommez non expressement affranchiz aient à icellez payer mis, qu'il qui parle l'ait onques ouy dire ne sceu jusques au tamps du present debat dont est fecte mention esdictes lectres, excepté toutes foys que amprès le deccès dudit feu Messire Jehan ladicte Dame de Montault unne année impoua et indist unne taille de grand somme sur lez hommes de sondit fils, à laquelle paier iceulx hommes contredirent, mais amprès par feux Messire Jehan du Moulin

d'Orlhac²⁰⁸ docteur en decret et Armand La Chiese de Tuelle licencié en loys fut fet accord entre ladicte Dame et lesdis hommes, tellement que pour ce que iceulx hommes disoyent que ladicte taille estoit trop excessive, et aussi l'estoit elle, icelle fut diminuée d'une partie, et lesdis hommes furent contens de payer amprès ladicte diminution, et payerent ladicte taille, et il qui parle l'a receue de toux lesdis hommes non affranchiz. Dit oultre que aussi deppuys ledit debat iceulx hommez dudit Amalry ont payé pluseurs foys et pluseurs autres années pluseurs et diverses autres tailles, lesquelles ledit Amalry et sa mere ont indites san nulle contrediction ne debat jusques audit darnier appel. Et neantmoigs a dit que par le tamps dudit debat il qui parle a ouy pluseurs foys dire à feu Maistre Beg Brige, jutge de La Roquebraou, et aussi à aultres et pluseurs desdis hommes qu'ilz estoient taillables à volenté dudit seigneur par my ce que ledit seigneur leur feist taille que feust raysonnable et non ny si excessive que avoit lors fait ladicte ladicte Dame.

Sur le dixhuytiesme article dit et deppouse qu'il se reppourte à ce que dessus a dit et deppousé.

Page 162 = folio 101 v

Ledit jour Jehan dez Boygues²⁰⁹ de la parroisse de Glenat oudit dioucese de Saint Flour, eagé de septante ans ou environ, et de memoire de sixante ans, testmoign par la partie que dessus prouduyt examiné et interrogé, dit et deppouse par vertu de sondit serement si comme s'ensuyt :

Et premièrement sur le trexiesme article dit et deppouse qu'il a veu par le tamps de sa memoire que lez hommes dudit Amalry et de ses terres et seigneuries esquellez il a succédé à feu Messire Jehan de Montault son pere ont pourté lez rentez de blé et aultres qu'ilz devoient ausit seigneur au lieu de La Roquebraou avec leurs beufz et charroix, et autre leur bestail, san nul debat ne contrediction jusques au tamps dudit appel.

Sur le quatorziesme article dit et deppouse qu'il a veu par le tamps de sadicte memoire que toutes quantes foys les officiers dudit de Montault commendoyent et ont commendé aux hommes d'icelluy seigneur qu'ilz pourtassent le boys avec leurs beufz et charroix à l'oustel dudit seigneur pour son chauffaige et service de son houstel ilz le pourtoient dedens le terme que à ce leur a esté assigné, et quant ilz ne le faysoient ledit seigneur lez faysoit aucunes foys excecuter jusques à ce qu'ilz l'eussent fet. A esté interrogé d'où iceulx hommes prenoient ledit boys, dit que du leur mesmes. A esté aussi interrogé se iceulx hommes aient à ce mis nul debat ne contrediction, dit que non, excepté que dudit appel.

Sur le quixiesme article dit et deppouse qu'il a ceu par ledit tamps de sa memoire que lesdis hommes et aussi lez hommes de Carbonières sunt unne foys checun an alés querir au vignouble, et d'illec ont pourté avec leurs beufz et charroys le vin neccessere pour la despance de leurs seigneurs et provisions de leurs houstelz san nul debat ne contrediction jusques au tamps dudit appel, que il qui parle l'ait sceu ne ouy dire.

Sur le setxiesme article dit et deppouse qu'il a veu par le tamps de sa memoire que lez hommes dudit Amalry ont fait lez manevres, services et exploix de cours, avec leurs beufz et charroys ainsi que contenu est audit article, toutes quantes foys commendé leur a esté san nul debat ne contrediction jusques au debat dudit appel.

Sur le dixeseptiesme article dit et deppouse qu'il a veu par l'espace et par le tamps de sadicte memoire que ledit feu Messire Jehan de Montault a indit et impousé aux hommes dez terres dudit Amalry son filz esquellez il luy a succédé taillez à volenté dudit seigneur toutes quantes foys et de telz sommez que audit

La suite manque...

²⁰⁸ Aurillac

²⁰⁹ De Lasbouygues, commune de Glénat